


Kitabu ka Kanu



Portions of the Holy Bible in the Baga Sitemu language of
Guinea

Kitabu ka Kanu
Portions of the Holy Bible in the Baga Sitemu language
of Guinea
Des portions de la Sainte Bible dans la langue Baga
Sitemu de Guinée

copyright © 2015 Pioneer Bible Translators

Language: Baga Sitemu

Translation by: Traducteurs Pionniers de la Bible

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-29

PDF generated using Haiola and XeLaTeX on 29 Apr 2025 from source files dated 29 Apr 2025

e5320012-5c6f-534d-9205-97d787f9a95c

Contents

| | |
|-------------------------------------|-----|
| Matiye | 1 |
| Kābaru Kātət ka Mark | 71 |
| Luk | 112 |
| Yēbəc ya Asom a Yesu | 185 |
| Areka nηε Sak ενacicəs mə | 250 |
| 1Isaη | 258 |
| 2 Isaη | 266 |
| 3 Isaη | 268 |

Kibaru Kətət ka Yesu nkε Matiye εnacicəs mɔ Matiye Kəsəkəs ka Kibaru Kətət ka Yesu nkε Matiye encicəs mɔ

Səbuk səcempi maŋkələ səloku moloku mme aŋwe «Kibaru Kətət ka teta Yesu Krist mɔ». Kəmar ka Amera ɲecempi ɲa Kanu, acεpse a Yesu darəŋ maŋkələ ɲacicəs taruku ta Yesu. ɲa ɲayəne: Matiye, Mark, Luk kə Isan. Mba Matiye kə Isan ɲanayi asom a Yesu aŋe wəco kə mεrəŋ dacɔ.

Nte kəpe ka Yesu dəkəm kəncepər mɔ, kə Matiye encicəs buk bambε pəcloku mecepərəne fəp ma Yesu antɔf ɲaŋe kəron, nte təŋsəŋe afum a doru ɲaccəre a Yesu əyənε Krist, wəyek-yek nwe Kanu kənasom kəder teta kəyac afum doru dandε mɔ. CəKərek cɔ Matiye εnacicəs buk bambε, mba səna səŋkafəli bi cəBaka nte təŋsəŋe aBaka sɔ ɲacəre mes maməkɔ mɔ.

Buk bambε boloku mes mεwεy-wεy mɛlarəm mme Yesu εnayɔ doru dandε, nte təŋsəŋe afum ɲacəre fənəntər nfe Kanu kənasəŋ kə mɔ. Yesu εnataməs acuy, pəcbeləs yəŋk yelεc. Matiye εnafəŋ sɔ a afum ɲacəre mεtəkse ma Yesu. Nte Yesu εntəkse afum mɔ, ɲanacəre a moloku ma Kanu m'oncloku, pəcloku kance kəsoku pεs. Telpəs oŋ, defi kə kəfətε ka Yesu afi dacɔ kə kəpe kən kə buk bambε boloku su.

Mamε fəp mεŋmar su kəcəre fum nwe Yesu əyənε mɔ. Kəcəre ka buk bambε kəŋmar su kəcəpərəne doru kəcəre kəkətene mes disre, bεmar su sɔ kəlompəs ka kiya wəyεŋ ka doru o doru, k'afi-ε. Kanu kəsəŋ su kəcəre ka moloku ma buk bambε! Amina!

Tokotərəne ta Taruku ta Kibaru kətət ka Matiye:

1. Sora 1-4: Matiye oncop Kibaru Kətət kən kələm kəkəm ka Yesu Krist kə tocop tən yebəc nyε Kanu kəsom kə mɔ.
2. Sora 5-25: Ta mεrəŋ, Matiye ementər yebəc ya Yesu kə mεtəkse mən mɛlarəm.
3. Sora 26-28: Telpəs, Matiye ələm nte Yesu εmbəcε Kanu defi dən disre kə kəfətε kən afi dacɔ mɔ.

*Atem a Yesu
Luk 3.23-38*

¹ Kəbənda ka dokom da Yesu Krist kə kaŋkε, wansɔ ka Dawuda, wansɔ ka Abraham:

² Abraham εnakom Siyaka, kə Siyaka oŋkom Yakuba, kə Yakuba oŋkom Yuda kə awεnc əŋ,

³ Yuda okom Perεc kɔ Serah. Tamar ɔyɔne ɲa kere. Kɔ Fares ɔɲkom Hecərɔɲ, kɔ Hecərɔɲ ɔɲkom Aram.

⁴ Kɔ Aram ɔɲkom Aminadab, kɔ Aminadab ɔɲkom Nasɔɲ kɔ Nasɔɲ ɔɲkom Salmɔɲ.

⁵ Salmɔɲ kɔ wɛran kɔn Rahab ɲaɲkom Bɔs, Bɔs kɔ wɛran kɔn Rut ɲaɲkom Yobed. Kɔ Yobed ɔɲkom Yisay,

⁶ kɔ Yisay ɔɲkom Dawuda wɛbe wɛka Yisrayel.

Dawuda enanasɛr wɛran ka Uri, kɔ ɲaɲkom Sulemani.

⁷ Kɔ Sulemani ɔɲkom Roboyam, kɔ Roboyam ɔɲkom Abiya, kɔ Abiya ɔɲkom Asaf.

⁸ Kɔ Asaf ɔɲkom Yosafat, kɔ Yosafat ɔɲkom Yoram kɔ Yoram ɔɲkom Osiyas.

⁹ Kɔ Osiyas ɔɲkom Yotam, kɔ Yotam ɔɲkom Akas, kɔ Akas ɔɲkom Esekiyas.

¹⁰ Kɔ Esekiyas ɔɲkom Manase kɔ Manase ɔɲkom Amɔs kɔ Amɔs ɔɲkom Yosiya.

¹¹ Yosiya ɔɲkom Yekoniya kɔ awenc aɲa tem nte anasumpɛr aka Yisrayel pakekɛre ɲa Babilɔɲ mɔ.

¹² Nte tatɔkɔ tencepɛr mɔ, kɔ Yekoniya ɔɲkom Salatiyel kɔ Salatiyel ɔɲkom Sorobabel.

¹³ Kɔ Sorobabel ɔɲkom Abiyud kɔ Abiyud ɔɲkom Eliyakim, kɔ Eliyakim ɔɲkom Asor.

¹⁴ Kɔ Asor ɔɲkom Sadok kɔ Sadok ɔɲkom Akim kɔ Akim ɔɲkom Eliyud.

¹⁵ Kɔ Eliyud ɔɲkom Elasar kɔ Elasar ɔɲkom Matan kɔ Matan ɔɲkom Yakuba.

¹⁶ Kɔ Yakuba ɔɲkom Isifu wos ka Mari wɛkɔ ɔɲkom Yesu nwe aɲwe Krist, wɛbe nwe Kanu kɛyek-yek mɔ.

¹⁷ Awa, detemp wɛco kɔ maɲkɛle denacepɛr kɛyefe Abraham haɲ kɛbɛp Dawuda, detemp wɛco kɔ maɲkɛle kɛyefe Dawuda haɲ kɛbɛp kɛkekɛre ka aYisrayel Babilɔɲ, detemp wɛco kɔ maɲkɛle kɛyefe kɛkekɛre kɔɲan Babilɔɲ haɲ kɛbɛp Krist.

Kɔkom ka Yesu Krist

¹⁸ Tokom nte t'anakom Yesu Krist: Wɛrkun nwe ancwe Isifu mɔ, encfac iya ka Yesu nwe ancwe Mari mɔ. Ta Isifu entagbaɲne Mari-ε, kɔ Mari enaɲkne pɛbɛkse fɛnɔntɛr fa Amera Nεcempi.

¹⁹ Isifu wos ka Mari nwe enalomp, ta efaɲ kɛceɲ kɔ gbasɲa mɔ, encem-cemne kɛlukse Mari nda afum ɔn kɛgbɔpne disre.

²⁰ Isifu eyi ti kɛcem-cemne, gbɛncana babɔkɔ kɔ mɛleke ma Mariki mowurɛr kɔ dɛmere, kɔ moloku kɔ: «Isifu wan ka Dawuda, ta mɛnese kɛlek Mari mɛnence kɔ, bawo wan nwe embekɛs mɔ, bafɔ dɛfum eyefe, mba dɛAmeraNεcempi.

²¹ Wəran kam Mari endekom wan wərkun mände məwe kə Yesu*, bawo nkən endeyac afum ən kiciya kəjan.»

²² Maməkə fəp mənayi nte təḡsəḡe nte Mariki ənalokə kusu ka sayibə mə, meyi:

²³ «Məcəḡkəl, wəyəcərə wətəcərə wərkun endebəkəs.

Pəkom wan wərkun nwe andewe Emaniyel mə.»

Itə tatəkə: «Kanu kəyi kə səna.»

²⁴ Nte Isifu entime mə, k'əyə təkə mələkə ma Mariki mənasom kə mə. K'ələk Mari k'ənence kə.

²⁵ Mba ḡanafəntərə fə kə Mari haḡ nte Mari ənakom wan wərkun, nwe Isifu ənasəḡ tewe ta Yesu mə.

2

Acərə mes ḡander kənəḡk Yesu

¹ K'əḡkom Yesu dare da Betləhem nde atəf ḡa Yude, təm tatəkə tə Herodu ənayəne di wəbə. Kə acərə mes aka ntende kəca nke dec dəmpə mə ḡander Yerusalem,

² kə ḡayif: «Deke kənaka nke kəndeyəne wəbə k'aSuyif nwe antəp kəckom mə, eyi-ε? Bawo sənəḡk kəs kən ntende dec dəmpə mə, sənder kədetontnəne kə fər kirinḡ.»

³ Nte wəbə Herodu ene toloku tatəkə mə, kə pəyi kə ya-mayama, kə aka Yerusalem fəp.

⁴ Kə wəbə Herodu oləḡka aləḡne apəḡ fəp kə atəkse sariye s'aSuyif, k'eyif ḡa kəfo nke andekom Krist, wəyac nwe Kanu kəyək-yək mə.

⁵ Kə akakə ḡaloku kə: «Dare da Betləhem nde atəf ḡa Yude andekom kə, bawo itə sayibə səncicəs:

⁶ Kə mənə Betləhem atəf ḡa Yuda, məyə dəkəcəmə sədare səpəḡ sa Yuda dacə, bawo dare dam də wəkiriḡ endewur

nwe endekəkəs afum em aḡe ḡayəne aka Yisrayel mə.»

⁷ Awa, kə Herodu ewe acərə ən mes, k'eyif ḡa yəkək kəcərə yati təm təkə kəs kaḡkə kənamentərne mə.

⁸ Kə Herodu osom afum Betləhem, pəcloku: «Nəkə nətenəs kəcərə pəsoku teta wan wəkawə. Kə nənəḡk kə-ε, nəder nəsəḡ'em ti kəcərə, nte təḡsəḡe ina sə ikə itontnəne kə fər kirinḡ mə.»

⁹ Nte acərə mes ḡalip kəcəḡkəl wəbə mə, kə ḡaḡkə. Awa, kəs nke ḡananəḡk mə, kəyi ḡa tekiriḡ, nte kəs kaḡkə kəmbəp kəfo nke wan nwe ənayi mə, kə kəncəmə.

¹⁰ Nte ḡananəḡk kəs nke mə, kə pəmbət ḡa pəpəḡ.

¹¹ Kə ḡambərə kələ disre, kə ḡanəḡk wan kə kərə Mari, kə ḡancəpə wan suwu dəntəf kətontnəne kə fər kirinḡ. Kə ḡasikəli

* 1:21 Yesu = cəHebərə «Wəyac» 1:23 Esayi 7.14 2:6 Mika 5.2 2:6 2 Samiyel 5.2

loba ya daka danjan ko ñamroce wan Yesu kema, suray satot sa kɛlɛl ka kɛtɔk ko labunde da mir.

¹² Nte Kanu kɛlok-lokɛr ña dɛmere a ta ñaluksɛrne sɔ nda wɛbe Herodu mɔ, ko ñalek dɔpɔ dɔlɔma kɛko ka ndaranjan.

Kɔyɛkse ka Isifu, Mari ko wan kɛn Yesu ñako Misira

¹³ Nte ñankɔ mɔ, gbɛncana babɔko ko mɛleke ma Mariki mowurɛr Isifu dɛmere ko moloku ko: «Mɔyɛfɛ mɛlek wan ko kɛrɛ, mɔyɛkse mɛko Misira, mɔyi di han tɛm nte indelok'ɛm kɛlukus mɔ, bawo Herodu endetɛn wan pɛmɛlɛk ko.»

¹⁴ Ko Isifu eyɛfɛ pibi disrɛ, k'ɛlek wan ko kɛrɛ k'ɔɱko Misira,

¹⁵ k'eyi di han ko Herodu efi. Mamɔko mɛnayi nte tɔɱsɔɱɛ mɛko Mariki ɛnalokɛ kusu ka sayibe mɔ, mɛlarɛ: «Iwe wan kem pɛwur Misira.»

Kɛdifɛt ka awut

¹⁶ Nte Herodu ɛnɔɱk nte acɛrɛ mes ñantɱkɛr ko mɔ, ko pɛnanjanɛ kɛtɛlɛ ko, k'osom a padifɛt awut fɛp aɱɛ ñanasɔtɔ meren mɛrɔɱ han kɛtor mɔ, aɱɛ ñanayi Betlehɛm ko sɛdare nɛ sɔɱkel di mɔ, ɛnalɛk tɛcɛmɛmɛnɛ tatɔko nte acɛrɛ mes ñanaloku ko tɛm nte kɔs kɛnawur mɔ.

¹⁷ Awa, tɔko Sayibe Jeremy ɛnaloku mɔ, telarɛ:

¹⁸ «Ane kɛbokɛnɛ nde dare da Rama, kɛbok kɛpɔɱ ko kɛkulɛ-kulɛ ka defi. Rasɛl eyi kɛbok awut ɔn.

Ɛfan fɛ a palɛtsɛnɛ patore-tore ko abɛkɛc, bawo awut ɔn ñanɱkɔs-kɔs.»

Kɛlukus kɛɱan Yisrayel

¹⁹ Nte wɛbe Herodu efi mɔ, gbɛncana babɔko ko mɛleke ma Mariki mowurɛr Isifu dɛmere atɔf ña Misira,

²⁰ ko moloku ko: «Mɔyɛfɛ mɛlek wan ko kɛrɛ, mɛlukus atɔf ña Yisrayel, bawo akɔ ñanafan kɛdif ka wan wɛkawɛ mɔ ñafis-fis.»

²¹ Ko Isifu eyɛfɛ, k'ɛlek wan ko kɛrɛ ko ñalukus Yisrayel.

²² Mba nte ɛnane a Arkelayos ɔsɔtɔ kɔyɔnɛ ka wɛbe dɛkɛcɛmɛ da kas Herodu mɔ, ko Isifu ɛnɛsɛ kɛko atɔf ña Yude. Ko mɛleke molok-lokɛr ko dɛmere, ko Isifu ɔɱko atɔf ña Kalile.

²³ K'ɔɱko pɔyi dare da Nasarɛt, ɛnayɔ ti nte tɔɱsɔɱɛ toloku ta Yecicɔs Yosoku nyɛ sayibe ñanacicɔs mɔ telarɛ: «Andewe ko wɛka Nasarɛt.»

3

Kawandi ka Anɱabi Saɱ Batis

Mark 1.1-8; Luk 3.1-6

¹ Mata mamɔko ko Anɱabi Saɱ Batis owur pɛckawandi nde tɛgbɛrɛ ta atɔf ña Yude:

² «Nəsəkpər bəkəc nəlomp, bawo dəbe da dəKəm dələtərne!»

³ Nkən sayibe Esayi ənaloku tetən: «Fum wəkə dim dən dey i kəwur dətegbəre mə ofo:

«Nəlompəs dəpə da Mariki,
Nəlompə səpə sən sa wəcək!»

⁴ Sañ nwe, yamos ya cəfon ca yəkəme y'encberne, pəcgbəncne bələt ba akata defi. Cəlanjma kə məse ma cəme ca dop gbəcərəm yenayəne kə yeri.

⁵ Afum anje nəncyefe Yerusalem, akə nəncyefe atəf ɲa Yude fəp mə, kə akə nəncyefe sədare nse səyi kəngbəkə ka Yurdən kəsək mə fəp ɲanckə nde eyi mə,

⁶ ɲacsətər kə kəgbət dəromun teta Kanu nde kəngbəkə ka Yurdən, ɲaccəɲ kiciya kəɲan afum dacə.

⁷ Nte encnəjk aka dine da aFarisi* kə da aSadisi† ɲacderene kəgbət dəromun teta Kanu mə, k'oloku ɲa: «Nəna anje nəyi pəmə ɲkisin mə! An'əsəɲe nu kəcəre nte anyekəsər kiti ka Kanu nkə kəyi kəder mə-ε?

⁸ Awa, nəde nəcyə məyə mətət mme məɲmentər a nəsəkpər mera kə nəncəme pəlompu darəɲ mə.

⁹ Ta nəcem-cəmnə a Kanu kəndeyac nu bawo nəloku: «Abraham əyənə wətem kosu!» Ey, icloku nu, nənəjk masar mame ba? Kanu kəntam kəkafəli mi məyənə awut a Abraham.

¹⁰ Ndekəl oɲ, tomunt pelip kəcəme kəcəp ka tək haɲ nde ntentəl ya yi: Kətək nkə o nkə kəntəkom yokom yətət mə, ancəp ki, pələm dənənc.

¹¹ Ina, dəromun iɲgbət nu teta kəmentər a nəsəkpər bəkəc, mba nwe eyi kəder im tadarəɲ mə, dəAmerə Nəcempi ɲa Kanu kə nənc ende pəcgbət nu. Wəkəkə əyə fənəntər pətəs im. Isətə fə dofum dowure kə cəfta dəwəcək.

¹² Pəcəme dəkur pətəmpər kərebe dəwaca pəcgbap, pəgbey məɲgben mətət mme endeməɲkərne dəkəle mə, mba pəcəfonta dənənc nde dəntənimə mə.»

Kəgbət ka Yesu dəromun teta Kanu

Mark 1.9-11; Luk 3.21-22; Isaɲ 1.29-34

¹³ Təm tatəkə tə Yesu enayefe atəf ɲa Kalile, k'ender nde kəngbəkə ka Yurdəɲ kəsək nno Sañ eyi mə pədesətər kə kəgbət dəromun teta Kanu.

¹⁴ Mba kə Sañ efan kəyamsər kə ti, k'oloku Yesu: «In'ə pəmar isətər məna kəgbət dəromun teta Kanu, kə məna mənder nno iyi mə!»

3:3 Esayi 40.3 * **3:7** *WəFarisi, aFarisi* = Kəgba k'abeki ka dine d'aSuyif anje ɲasektərəne sariye kə məyə mokur ma aSuyif mə tin tin tin. † **3:7** *WəSadisi, aSadisi* = Kəgba k'abeki ka dine d'aSuyif kələma, anje ɲasektərəne sariye kə məyə mokur ma aSuyif mə. **3:7** Luk 3.7

15 Kɔ Yesu olukse kɔ: «Məwose ti kəəsna. Tatəkɔ tɔ pəmar payɔ mes fəp mmɛ Kanu kəsom su mə.» Awa, kɔ Saŋ owose.

16 Yesu enadelip kəsətɔ kəgbət dəromun teta Kanu, k'empɛ. Gbancana babəkɔ kɔ kəm kəŋgbite tetɔn, k'enəŋk Amera ŋa Kanu ŋɔctorər kɔ pəmɔ antantoriya.

17 Awa kɔ dim dontor kəyefe dəkɔm: «Wəkawɛ wan kem nwe imbətər mə ɔfɔ, nkɔn ɔbət im mes belbel.»

4

Ŋəŋk Ŋɛlɛc ŋɛwakəs kəsəŋɛ Yesu kəciya

Mark 1.13; Luk 4.1-13

1 Ntɛ tencepər mə, kɔ Amera ŋa Kanu ŋɛŋkekərə Yesu nde dətɛgbərə kəkəsak kɔ Ŋəŋk Ŋɛlɛc ŋɛwakəs kəsəŋɛ kɔ kəciya.

2 Ntɛ Yesu elip kəsŋ mata wəco maŋkələ (40) pibi kɔ dan mə, kɔ dor dəyɔ kɔ.

3 Ntɛ Ŋəŋk Ŋɛlɛc ŋɛfaŋ kəsəŋɛ Yesu kəciya mə, kɔ ŋender ŋoloku kɔ: «Kɔ tɔyɔnɛ a Wan ka Kanu məyɔnɛ-ɛ, məloku oŋ masar mame məyɔnɛ cəcom.»

4 Kɔ Yesu oloku: «Yecicəs Yosoku yoloku: «Bafɔ kəcom gbəcərəm kəŋsəŋɛ fum kəyi doru, mba moloku ma Kanu fəp məŋsəŋɛ fum kəyi doru.»»

5 Kɔ Ŋəŋk Ŋɛlɛc ŋɛŋkekərə Yesu nde Yerusalem dare dosoku, kɔ ŋəŋkɔ ŋɛcəmbər kɔ nde dətɛlempən pa kələ kəpəŋ ka Kanu kəroŋ.

6 Kɔ ŋoloku Yesu: «Kɔ tɔyɔnɛ a wan ka Kanu məyɔnɛ-ɛ, məyokɛ ma dantɔf, bawo dəYecicəs Yosoku ancicəs: «Kanu kəndesom məlɛkɛ ɔŋ, ŋandɛtəmpər əm dəwaca nte təŋsəŋɛ ta məmpət tasar mə.»»

7 Kɔ Yesu oloku ŋi: «Mba ancicəs dəYecicəs Yosoku sɔ: «Ta məcəŋəs Mariki Kanu kam kəyɔ ka tes tɛwɛy-wɛy tɔn.»»

8 Kɔ Ŋəŋk Ŋɛlɛc ŋɛŋkekərə Yesu sɔ tərɔ tɛŋɛci kəroŋ, kɔ nɛmentər kɔ dɛbɛ da tɔf ya doru fəp kɔ dətɔt da yi.

9 Kɔ Ŋəŋk Ŋɛlɛc ŋoloku Yesu: «Ŋŋsəŋ əm yayɛ fəp kɔ məwose kətontnɛn'em fər kirin-ɛ.»

10 Kɔ Yesu oloku ŋi: «Məbɔlɛ, mənə Sentani! Bawo ancicəs dəYecicəs Yosoku: «Mariki Kanu kam pəmar məctontnɛnɛ fər kirin, nkɔn gbəcərəm pəmar məcsalɛnɛ.»»

11 Kɔ Ŋəŋk Ŋɛlɛc ŋɛsak Yesu, awa kɔ məlɛkɛ mender məbəcə kɔ.

Yesu oncop yɛbəc yɔn Kalile

Mark 1.14-15; Luk 4.14-15; Isaŋ 4.1-3,43-46

12 Ntɛ Yesu ene a alɛk Saŋ Batis k'ambɛr dəbili mə, k'owur kəkɔ atɔf ŋa Kalile.

13 Yesu enayi dare da Nasaret, k'ende pæcepε dare da Kaparnam ndε deyi kæba ka Kalile kæsæk dændo tɔf ya Sabulon kɔ Naftali,

14 nte tɔŋsɔŋε tɔkɔ Kanu kənalokε kusu ka sayibε Esayi mɔ, tɛlarε:

15 «Atɔf ŋa Sabulon

kɔ ŋa Naftali dɔpɔ ndε dɔŋkɔ nde kæba ka Kalile,

kəŋgbɔkɔ ka Yurdεn kæsæk,

atɔf ŋa Kalile nde atɔyɔnε aSuyif ŋande mɔ,

16 afum a di aŋε ŋanacεm-cεmne a Kanu kəmbεr ŋa kumunt mɔ, ŋanəŋk nte Kanu kəŋkafɔle kɔ kəntɛfərnε ŋa mɔ.

Aŋε ŋanayi kubump ka kətɔgbekər amera mɔ,

kɔ pəwanɔkəra pomot ŋa.»

17 Tεm tatɔkɔ tɔ Yesu enacɔp kəkawandi: «Nəsəkpər bəkək nəlomp, bawo dεbε da dəkɔm dɔlɔtərnε.»

Yesu ewe acεpse ɔn darəŋ acəkɔ-cəkɔ maŋkɔle

Mark 1.16-20; Luk 5.1-11; Isaŋ 1.35-51

18 Nte Yesu ɔnckɔtəs kæba ka Kalile kæsæk mɔ, k'ənəŋk dεwεncə mεrəŋ, Siməŋ nwe ancwe Piyer mɔ, kɔ wεnc Andərə, ŋacɔgbal manta dəkæba, bawo awent ŋɔ ŋanayɔnε.

19 Kɔ Yesu oloku ŋa: «Nəder nəcεps'em darəŋ, indesɔŋε nu kəyɔnε awent a afum.»

20 Gbəncana babɔkɔ kɔ ŋasak manta maŋan kɔ ŋancəme Yesu darəŋ.

21 Nte Yesu ɔŋkɔ pipic mɔ, kɔ εnəŋk sɔ dεwεncə mεrəŋ Sak wan ka Sebede kɔ wεnc Isaŋ, aŋε ŋanayi sɔ abil ŋaŋan disrε kɔ kas kəŋan Sebede, ŋaclompəs-lompəs manta mɔ. Kɔ Yesu ewe ŋa.

22 Gbəncana babɔkɔ kɔ ŋasak abil kɔ kas kəŋan, kɔ ŋancəme Yesu darəŋ.

Yesu εnctəkse pəctaməs sɔ

Mark 1.39; Luk 4.44; Luk 6.17-18

23 Yesu ɔnckɔtəs atɔf ŋa Kalile fəp pəctəkse dəkətola Kanu da aSuyif, pəckawandi Kibaru Kətɔt ka dεbε da dəkɔm, pəctamsεnε sɔ docu kɔ laŋyiru fəp ndε dənayi afum mɔ.

24 Ti tεnasɔŋε tewe tɔn tεsamsər atɔf ŋa Siri fəp disrε. Packεrε kɔ afum fəp akɔ docu yamayama dεnasumpər, pəccu ŋa mɔ: Akɔ yɔŋk yεlεc yɔnctərəs, akɔ docu da kətεmpεnε dənayi, kɔ akɔ ŋanayɔ laŋyiru mɔ, Yesu εnctaməs ŋa fəp.

25 Kənay k'afum alarəm kəncder kəyεfε Kalile, atɔf ŋa Sədare Wəcɔ, dare da Yerusalem, atɔf ŋa Yude, kɔ sədare sa kəca nkε dec dεmpε Yurdεn mɔ.

5

Kawandi ka Yesu nde tɔrɔ kɛron

Mark 3.13; Luk 6.12-13

¹ Nte Yesu enɛɲk kɛnay ka afum mɔ, k'empɛ tɔrɔ kɛron, k'ɔɲkɔ pɛndɛ, kɔ acɛpɛ ɔn darɛɲ ɲander nnɔ eyi mɔ.

² Kɔ Yesu ɛlɛk moloku k'ɛyɛfɛ kɛtɛkɛ ɲa:

Amera ɲɛtɔt ɲɲɛ ɲɔsɔɲ fum pɛbotu nnɔ Kanu kɛyi mɔ

Luk 6.20-26

³ «Pɛbotu peyi aɲɛ Kanu kɛsɔɲ pɛtɔt kɔ ɲancɛɛnɛ a ɲancɛmɛ Kanu fɔr kirin ɲa wɔsɔkɛr mɔ,

bawo dɛbɛ da dɔKɔm, daɲan dɔ!

⁴ Pɛbotu peyi aɲɛ Kanu kɛsɔɲ pɛtɔt kɔ ɲayi kɛbok mɔ,

bawo Kanu kɛndekɔfɛɲɛt ɲa mɛncɛr.

⁵ Pɛbotu peyi aɲɛ Kanu kɛsɔɲ pɛtɔt kɔ ɲandɛncɛ mɔ,

bawo ɲandekɔsɔtɔ doru fɛp, dɔyɔnɛ ɲa kɛ!

⁶ Pɛbotu peyi aɲɛ Kanu kɛsɔɲ pɛtɔt kɔ tɛfan ta Kanu tɛmbas ɲa

kɛɲɲk pɛmɔ nte amera ɲɔɲwos fum dor dɔyɔ kɔ mɔ,

bawo ɲandekɔnɛmbɛrɛ!

⁷ Pɛbotu peyi aɲɛ Kanu kɛsɔɲ pɛtɔt kɔ ɲaɲyɔnɛ awɛnc aɲa nɔnɔfɔr mɔ,

bawo Kanu kɛndekɔyɔnɛ ɲa nɔnɔfɔr!

⁸ Pɛbotu peyi aɲɛ Kanu kɛsɔɲ pɛtɔt kɔ ɲasɔk bɛkɛc mɔ,

bawo ɲandekɔnɛɲk Kanu!

⁹ Pɛbotu peyi aɲɛ Kanu kɛsɔɲ pɛtɔt kɔ ɲayɔnɛ alompɛs a pɛforu awɛnc aɲa dacɔ mɔ,

bawo andekɔwe ɲa awut a Kanu!

¹⁰ Pɛbotu peyi aɲɛ Kanu kɛsɔɲ pɛtɔt kɔ antɔrɛs ɲa tɛta kɛyi

kɛɲan tɛfan ta Kanu mɔ,

ɲa ɲandekɔsɔtɔ dɛbɛ da dɔKɔm!

¹¹ Pɛbotu peyi aɲɛ Kanu kɛsɔɲ pɛtɔt mɔ k'alɔmɛs nu, pactɔrɛs, k'andɛle nu moloku mɛlɛc fɛp ma yem tɛta ina Yesu.

¹² Kɔ tatɔkɔ tɛmbɛp nu-ɛ, nɛwolɛs-wolɛs, nɛyi pɛbotu disrɛ, bawo kɛway konu kɛmbɛk nde dɔKɔm. Tantɛ t'anatɔrɛs sayibɛ aɲɛ ɲananuɲkɛnɛ kɛdɛr a nɛna nɛcɛdɛr mɔ.»

Nɛyi pɛmɔ mɛr kɔ pɛwanɲkɛra

Mark 9.50; Luk 14.34-35

¹³ «Nɛna mɛr ma doru mɔ nɛyɔnɛ. Mba kɔ mɛr mɛndɛncɛ-ɛ, afɔtam kɛdɔktɛsɛ mi paka o paka. Mentɛsɛ fɛ sɔ tɔlɔm o tɔlɔm, mɛnɛ pagbal mi afum ɲanas-nas.

¹⁴ Nɛn'ɔyɔnɛ pɛwanɲkɛra pa doru. Dare ndɛ dɛɲyi tɔrɔ kɛron mɔ, afɔtam kɛmɛɲk di.

¹⁵ Afɔmot lamp pagbɛpɛr di kɛfala, mba andɛt di kɛdɛt dɛm pɛdɛtɛ lamp kɛron, dɔsɔɲ pɛwanɲkɛra akɔ ɲayi kɛlɔ disrɛ mɔ fɛp.

16 Tin tayi tɔ pəmar pomot ponu pəsəŋ pəwan̄kəra tatəkɔ afum fər kirinj, nte təŋsəŋe ŋanəŋk yebəc yonu yətɔt, ŋakor-koru Kanu Papa konu nwe eyi nde dəkəm mɔ.»

Yesu entəksɛ sariye nɛ Musa ɛnasəŋ mɔ

17 «Ta nəcɛm-cɛmnɛ a teta Sariye kɔ pəyɔne fe ti mətəksɛ ma sayibe fəp m'inder kəlinj day. Inder fe kəlinj mi day, mba kəsəkəs ka mi pəs k'inderɛnɛ.

18 Kance, injloku nu ti, kəwon nkɛ o nkɛ ka kəm kɔ antɔf afəlinj nte o nte dəsariye. Afəlinj ali toloku tɛfɛt tin, afəlinj ali tɛgbeyəs-gbeyəs tin, tatəkɔ haŋ doru delip.

19 Məna nwe o nwe mən̄fani tosom tɛfɛt tin mɔ, mətəksɛ sɔ afum kəfani tosom tatəkɔ, fum wəkakɔ endekɔfɛtɛ dəkəcəmə nde dəbɛ da dəkəm. Mba kɔ fum eleləs mosom pətəksɛ sɔ afum kələləs mi-ɛ, fum wəkakɔ endekɔyɔ dəkəcəmə dəpəŋ nde dəbɛ da dəkəm.

20 Icloku nu, pəmar nəcəmə dolompu da Kanu darəŋ nətəs atəksɛ sariye s'aSuyif kɔ aFarisi. Kɔ təntəyi-ɛ, nəfɔbɛrɛ dəbɛ da dəkəm.»

*Kətəksɛ teta mɛtɛlɛ
Mark 11.25; Luk 12.57-59*

21 «Nənanɛ nte analoku atem anu mɔ: «Ta mədif fum.» Məna nwe mən̄dif fum mɔ, aŋkəkər'am dən̄kiti.

22 Mba ina iloku nu: Nwe o nwe pəntɛlɛ nnɔ wənc eyi mɔ, aŋkəkərə kɔ dən̄kiti. Kɔ fum oloku wənc «Daku dɔ məyɔnɛ-ɛ, pəkəkərə kɔ aboc kiti fər kirinj. Kɔ fum oloku wənc: «Məntəŋkələ-ɛ,» palɛk kɔ pakɔ paləm dən̄ɛnc da yahanama.

23 Kɔ mən̄dekɔ kəmentər polon̄nɛ pam nde tetek tolon̄nɛ Kanu kəron̄ a məcɛm-cɛmnɛ dənda, a wənc əm ɛmɛŋk'am tes tɔləm-ɛ,

24 məsak polon̄nɛ pam papəkɔ tetek tolon̄nɛ Kanu kirinj, məkɔ kərəsna məlompəsne dacɔ kɔ wənc əm a məluksərne kədelon̄nɛ.

25 Kɔ nəsol kɔ wəyɛfərənɛ kam kəkɔ dən̄kiti-ɛ, nətɛn kətəŋnɛ dəpɔ, ta wəyɛfərənɛ kam pəkəbər əm wəboc kiti dəwaca, wəkakɔ pəsəŋ əm wəsɔdar nwe əŋkəbər əm dəbili mɔ.

26 Kance, iclok'am, məfɔwur dəndo ta məlip kəlukɛ fərəŋk fəlpəs nfe məntəmpərə kɔ mɔ-ɛ.»

*Kətəksɛ teta kəsumpər dalakɔ
MAT 18.8-9; Mark 9.43,47-48*

27 «Nənanɛ pacloku: «*Ta məsumpər dalakɔ.*»

28 Mba ina iloku nu: Nwe o nwe əməmən wəran haŋ pəfan̄ kəfəntərər kɔ mɔ-ɛ, elip kəsumpər dalakɔ kɔ wəran wəkakɔ dəbəkɛc.

29 Kə təyənə dəfər dam da kəca kətət dendesəŋ'am kəciya-ε, məkakti di mələm di dəbəl'am. Bawo kəliŋ kəfo kələma dis dam kəncepər kəyɔ dis dam məlməl paləm əm yahanama.

30 Kə təyənə kəca kam kətət kəndesəŋ'am kəciya-ε, məgbinti ki mələm ki kəbəl'am. Bawo kəliŋ kəfo kələma dis dam kəncepər kəyɔ dis dam məlməl paləm əm yahanama.»

*Sariye nse səncəme anəncəne mərəŋ aŋe ŋayi kəcənəne mə
Mat 19.7-9; Mark 10.4-5,10-12; Luk 16.18*

31 Kə Yesu oloku sɔ: «Ancicəs dəYecicəs Yosoku nte: «Kə wərkun endece wəran-ε, pəmar pəcicse wəran wəkakə areka ŋecəne kə.»

32 Mba ina icloku nu: Nwe ence wəran kən mə, əŋsəŋe wəran wəkakə kəsumpər dalakə kə wərkun wələma enəncə kə-ε, mənə təyənə a kənəncəne kəŋkə kəyi fe sariye disre. Mba nwe eŋnəncə wəran nwe wərkun wələma ence mə, nkən sɔ dalakə d'əŋsumpər.»

Kətəksə teta kədəerəm

33 «Nəncərə təkə anəcicse atəm anu dəYecicəs Yosoku mə: «Ta məyi ta məyɔ təkə mənədəerəm kəyɔ mə. Mba məyɔ təkə mənədəerəm Mariki fər kirin kəyɔ mə fər.»

34 Mba ina icloku nu, ta nədermə tələm o tələm: Ta nədermə kəm, bawo dəcəm da Wəbe Kanu də.

35 Ta nədermə antəf, bawo antəf ŋəyənə dəkəcəmbər dən wəcək, ta nədermə sɔ ali Yerusalem bawo dare da Kanu Wəbe wəpəŋ də.

36 Ta nəderəm sɔ domp, bawo məfətəm kəsəŋe ali kəfon kam kin kəferə kə pəyənə fe ti kəbiye.

37 Dəməderəm monu pəmar məloku: «Ey,» kə pəyənə kance kə-ε, məloku: «Ala,» kə pəyənə a bafə kance kə-ε. Nte o nte amberəne moloku ma kədəerəm maməkə mə, dəŋəŋk Njələc təyefe.»

Kətəksə teta kəlukse ayek

Luk 6.29-30

38 Kə Yesu oloku sɔ ŋa: «Nəne pa cloku dəYecicəs Yosoku: Dəfər d'əŋsəŋe dəfər kəway, desək d'əŋsəŋe desək kəway.

39 Mba ina iloku nu ta nəlukse ayek nwe əŋyɔ nu pələc mə. Kə fum efer əm kəca dəkanca ŋa kəca kətət-ε, məcəncə kə sɔ ŋa mərəŋ ŋəkə.

40 Kə fum efan əm kəkiti teta kəbaŋər kam duma-ε, məsakərə kə sɔ burumus bam.

41 Kə fum entar'am kəkət kilometr kin-ε, məkət kilometr mərəŋ kə nkən.

42 Məpocə wəkə ontol'am mə, ta məber kəmunt nwe eŋfan kələkər əm debe da paka pələma mə.»

*Nəbətər aterene anu**Luk 6.27-28,32-36*

43 Kə Yesu oloku ɲa sɔ nte: «Nəne a analoku: «Məbətər wenc əm, məter wəterene kam.»

44 Mba ina icloku nu: Nəbətər aterene anu nətola Kanu pətət akə ɲantərəs nu mə.

45 Kə nəyɔ ti-ε, nəntubucene məyɔ mətət ma Kanu Papa konu nwe eyi nde dəkəm mə, bawo enyektər dec dən ayeŋki bəkək kə atət, pətufər wəcafən alompu kə atəlompu.

46 Kə tɔyɔne nəbətər gbəcərəm akə ɲambətər nu mə, kəway kərə kə nəsətɔne ti-ε? Ali abanəs dut tatəkə tɔ ɲanɲɔ pəmɔ nəna.

47 Kə tɔyɔne awenc əm anɲa gbəcərəm ɲə mənɲiyif-ε, pətət pere pɔ məyɔ-ε mpe pencepər pa akə mə? Ali atɔyɔne aSuyif, bafɔ tatəkə tɔ ɲanɲɔ pəmɔ nəna ba?

48 Awa, nəna nəlare dolompu nəcemp pəmɔ nte Papa konu nwe eyi nde dəkəm elare dolompu k'encemp mə.»

6*Kətəkse teta kəpocε atɔyɔ daka*

1 Kə Yesu oloku ɲa sɔ: «Nəkembərne kəcyɔ məyɔ monu ma dɪne afum fər kirin nte tənɔɲe ɲaməmən nu mə. Kə teyi-ε, Papa konu nwe eyi nde dəkəm mə əfɔdesɔɲe nu ti kəway.

2 Nənɔfər disre kə mənɔde kəcmar atɔyɔ daka-ε, ta məcam ti afum ɲacərə. Abanene kəlompu ɲanɲɔ ti, nde wəɔ wa dəkətola Kanu kə dəpɔ dacɔ, ɲacten a afum aləma kəyek-yekəs ɲa. Icloku nu, kance kə: Kəway kəɲan məlməl kə ɲayi kəban.

3 Mba kə mənɔpocε atɔyɔ daka-ε, ta məsɔɲe kəca kəmeriya kəcərə təkə kətət kəyi kəyɔ mə.

4 Nənɔfər disre kə mənɔde məcmar fum-ε, məmar kə kəgbəpne disre ta wələma pəcərə ti. Papa kam nwe eɲnəɲk ali nte tənɲbəpne mə, endesɔɲ əm kəway.»

Mətəkse mme antola Kanu mə

5 «Kə nənɔde kəctola Kanu-ε, ta nəcyɔ pəmɔ abanene kəlompu ane kəcəme dəkətola Kanu kə məgbəkene ma səpɔ səpɔɲ kəmbət, nte tənɔɲe ɲamentərne afum mə. Kance, icloku nu, kəway kəɲan kə ɲayi kəban tatəkə.

6 Mba məna, kə mənɔde kəctola Kanu-ε, məberε dukulɔ, məgbətərne kumba, mətola Papa kəgbəpne disre, Papa kam nwe eɲnəɲk nte tənɲbəpne mə, əɲsɔɲ əm kəway.

7 Kə mənɔdetola Kanu-ε, ta məla moloku pəmɔ atəcərə Kanu, ane ɲancem-cemne a kə ɲalok-loku pələrəm-ε, tənɔɲe Kanu pəcəɲkəl ɲa.

8 Ta nəctubucne akakə, bawo Papa konu encərə mes mme nəfanər kə dəsək o dəsək mə, ta nəntatola kə-ε.

⁹ Mba nāna, nte tō pamar nāctola Kanu:

Kas kosu nwe eyi nde dāKōm mō,
māsōɲe palelās decempi da tewe tam topus!

¹⁰ Māsōɲe a dēbe dam deder.

Māsōɲe afum ɲacāme tefan tam darəɲ dāntōf pāmō dāKōm!

¹¹ Məpocē su kəcom kāmākō.

¹² Məɲaɲnēne su kiciya kosu,

pāmō nte səɲɲaɲnēne akō ɲanciyane su mō.

¹³ Ta māsak su səyō mes mme məɲsōɲe su kəciya mō,

mba məbaɲ su ɲōɲk ɲɛlec dəwaca. [Bawo māna mən'oyō dēbe,
fənāntər kō kəkorkoru teta meren kō meren disrɛ.]*

¹⁴ Awa, kō nəɲaɲnēne afum pələc mpe ɲayō nu mō-ɛ, Kas konu
nkē kəyi nde dāKōm mō kəɲɲaɲnēne nāna sō,

¹⁵ mba kō nāntəɲaɲne afum-ɛ, Kas konu əfəɲaɲnēne nāna sō
pələc ponu.»

Kətəkse teta kəsuy

¹⁶ «Kō māsuy-ɛ, ta məɲey kəro pāmō abāɲene kəlomp, ɲa
ɲandukut kəro kəmentər a ɲasuy. Kance icloku nu: Kəway
kəɲan məlməl kō ɲayi kəbaɲ kaɲkō.

¹⁷ Mba māna, kō māsuy-ɛ, məsopne labunde, məbufərne
kəro,

¹⁸ nte təɲsōɲe ta məmentər afum a kəsuy kō mände mō, mba
məmentər ti Papa kam Kanu nwe əɲgbəpne, pəcnəɲk nte o nte
təɲgbəpne mō. ɔɲsōɲ əm kəway.»

Daka da dəkām detas da doru

Luk 11.33-34

¹⁹ «Ta nāten kəsōtō daka delarəm nnō doru dandɛ, nde ate kō
mārka yɛɲlāsər fəp, nde akiye ɲamberɛ dəwəlō ɲakiye mō.

²⁰ Mba nāten kəyō daka delarəm da dāKōm nde Kanu kəyi
mō. Dəndō, ate kō mārka yōfōlāsər mpe o mpe, akiye ɲafōberɛ,
ɲafōkiye.

²¹ Bawo kəfo nkē daka dam denyi mō, difō abəkək ɲam ɲenyi.»

Pəwan̄kəra pa dis

Luk 11.34-36

²² «Dəfər dəyōne lamp da dis. Kō dəfər dam dentesɛ-ɛ, dis
dam fəp dorɲmot,

²³ mba kō dəfər dam dɛlɛcɛ-ɛ, dis dam fəp, kubump kō
denyi. Kō təyōne pəwan̄kəra mpe peyi dis dam mō kəbump kō-ɛ,
kubump kam kəmbək!»

Kanu kō pəsam: Ake mələk-ɛ?

Luk 16.13

* **6:13** Yecicās yōlōma yōyō fɛ moloku mame.

24 «NWE o nwe ɔfɔtam kəbəcə abe merəŋ. Kə teyi-ε, enter wəkin pəbətər wəkə, kə pəyɔne fe ti-ε, pəsektərne wəkin, pəber wəkə kumunt. Nəfɔtam kəbəcə Kanu kə pəsam tem tin.»

Məgbəkər Kanu kəlan

Luk 12.22-32

25 «It'ɔsəŋe nte iloku nu: Ta nəcem-cemne pəlarəm teta tecepərəne tonu doru, paka mpe nəndedi kə pəkə nəndemun mə. Ta nəcem-cemne sə teta dis donu, pəkə nəndeber di mə, bafə kəyi wəyeŋ kəncepər yeri yedi kə dis dencepər yamos ba?

26 Nəməmən bemp ya darenc: Yəfəgbal defet, yəfətəl, yəfəmənəkərne mənğben dəcele, mba Kas konu nke kəyi dəKəm mə kəŋsəŋ yi yeri. Bafə kəyi wəyeŋ ka nəna kəncepər ka bemp ya darenc yayəkə dəkəcəme ba?

27 Fum wəre eyi nu dacə nwe məcemcemne mən məntam kəbələs kiyi kən doru ali kururu katin gboŋ mə-ε?

28 Ta ake tə nəncem-cemnene teta yamos-ε? Nəməmən nte yeləŋk ya dalə yompoŋ mə: Yəfəbəc, yəfədu yamos.

29 Mba icloku nu, ali wəbe Sulemani yati kə daka da debeki dən fəp enasətə fe yamos nyə yenatese pəmə ya pələŋk papəkə pin mə.

30 Yika yeyi məkə dalə, alna pacləm yi dənenc, mba Kanu kəŋsəŋe pəmar yi. Nəntam kəlan tes tin: Pipice ŋ cəke o cəke, Kanu kəndeber nəna apice kəlan yamos pəcepər tatəkə!

31 Ta nəcem-cemne kəyi konu doru, nəcyifne: Ake səndedi-ε? Ake səndemun-ε? Yamos yere yə səndebərne-ε?

32 Maməkə mə atəcəre Kanu ŋanten tem fəp. Mba Kas konu nke kəyi nde dəKəm mə kəncəre a pəmar nəyə ca yayəkə fəp.

33 Nənuŋkəne kərəsna kəten dəbe da Kanu† kə pəlompu pən. Kə nəyə tatəkə-ε, nkən Kanu endedenəre nu yayəkə fəp.

34 Ta nəcem-cemne pəlarəm teta tecepərəne doru tonu alna, nəce alna ŋecem-cemne teta ŋisərka. Pəcu y pa dəsək o dəsək pentəŋne dəsək da di.»

7

Ta nəlek dəkəcəme da Kanu dəŋkiti fum

1 Yesu oloku ŋa: «Ta nəkiti akə nte təŋsəŋe ta andesəkiti nəna mə.

2 Bawo təkə nəŋkiti akə mə, itə Kanu kəndekəkiti sə nəna! Kə potubce pəkə nəntubce akə mə, ip'andekəsətubce nu.

3 Ake'səŋe nte mənğbətne ayika nŋe ŋeyi wenc əm dərəfər mə, mba ta mənŋəŋk təmbəŋk ta kətək pəkə pey'əm dərəfər mə-ε?

4 Pəlompu pə ba, kəloku wenc əm: «Wenc im, məwose a ilin əm ayika nŋe ŋey'əm dərəfər mə,» mba məna məyə təmbəŋk ta kətək dərəfər ba?

† 6:33 Yəgbəkəre ya Yecicəs Yosoku yokur yələma yəyə fe «da Kanu.»

⁵ Məna wəbanjənə kəlomp, məliŋnə kərəsna təmbonk ta kətək dəfər dam, it'əŋsəŋ'am kənəŋk belbel ayika ŋəkə məfan kəlin wənə əm dəfər mə.

⁶ Ta məsəŋ daka dəkə ampus mə cen, yentam kəluksərne yəŋəŋ əm. Ta nələmə sə mətət monu meyenki kəway səp, ta yedenas-nas mi.»

Kə məntən-ε, məŋsətə

Luk 11.9-13

⁷ «Nətola, nəndəsətə. Nəten, nəndenəŋk. Nəsut-sut kumba, andəgbite nu.

⁸ Bawo nwe o nwe ontola Kanu mə, ompoce kə. Nwe o nwe entən mə, əŋnəŋk. Nwe o nwe oŋsut-sut kumba mə, aŋgbite kə.

⁹ Kas kərə kəyi nu dacə nwe wan kən ontola kə kəcom, nkən pəsəŋ kə tasar mə-ε?

¹⁰ Kə pəyənə fə ti, an'eyi nu dacə nwe wan kən ontola kə alop, nkən pəsəŋ kə abok mə?

¹¹ Kə pəyənə nəna aŋə nələce mə, nəncərə kəsəŋ awut anu ca yətət-ε, Kas konu nke kəyi nde dəKəm kəndenəŋkanə kəsəŋ aŋə ŋantola kə ca yətət yayəkə mə!

¹² Nəyənə afum təkə nəfan a ŋayənə nu mə. Tatəkə tə Sariyə sa Musa kə Yecicəs ya Sayibə yosom.»

Dəkəberε da nde Kanu kəyi mə dəwəkene

Luk 13.23-24

¹³ «Nəberε dəkəberε nde dəwəkene mə! Dəkəberε nde dentefərne kələsər mə dəwəkəl, dəpə dəkə aŋkə di mə doncuca fə kəkət. Afum aŋə ŋəŋkət dəpə dadəkə mə ŋala.

¹⁴ Mba dəkəberε nde dentefərne kiya wəyən mə dəwəkene, dəpə nde aŋkə di mə doncuca kəkət, aŋə ŋəŋkət di mə ŋala fə.»

Sayibε sa yem

Luk 6.43-44

¹⁵ «Nəkəməbərne sayibε sa yem. Ŋa ŋander nu ŋakere nu moloku mobotu, mba alec bəkəc ŋə aŋə ŋawey-wey mə.

¹⁶ Məyə maŋan mələc mə nənde nəcnepələ ŋa. Awa, nəcərə sə a afəpim yokom ya wen kə pəyənə fə ti cəyabə dəberŋk!

¹⁷ Yokom yətət yə tək yətət fəp yonkom, mba kətək nke kəntətəmnə mə, yokom yələc yə kəŋkom.

¹⁸ Kətək kətət kəfəkom yokom yələc, kətək kətətəmnə kəfəkom yokom yətət.

¹⁹ Kətək nke o nke kəntəkom yokom yətət mə, ancəp ki paləm dənənc.

²⁰ Awa məyə ma sayibε sa yem akakə mə nənde nəcnepələ ŋa pəmə nte aŋnepələ kətək kətət kə pəyənə fə ti kətətəmnə yokom ya ki mə.»

Ayemε acəmə Mariki darəŋ

Luk 6.46; 13.25-27

²¹ «Bafɔ nwe o nwe ɔɲlok'im: «Mariki! Mariki!» ɲandekɔberɛ dɛbɛ da kɔm dɛntɔf, mba nwe gbɛcɛrɛm ɔɲyɔ tɛfan ta Papa kem nwe eyi nde dɛkɔm mɔ.

²² Dɔsɔk ndɛ Kanu kɛndeboc kiti afum a doru fɛp dacɔ mɔ alarɛm ɲandeloku: «Mariki, Mariki, bafɔ tewe tam tɔ sɛncbonc nte sɛncloku mosom mam mɔ, bafɔ tewe tam tɔ sɛncbɛlsɛ yɔɲk yɛlɛc, bafɔ tewe tam tɔ sɛncyɔnɛ mes mɛwɛy-wɛy ba?»

²³ Indelukɛ ɲa dɔsɔk dadɔkɔ: «Incɛrɛ fɛ nu ali katin! Nɔbɔl'em day fɛp fonu nɔɲyɔ mes mɛlɛc!»

Wɔlɔ nwe mɛrɔɲ

Luk 6.47-49

²⁴ «Awa nwe o nwe ɛɲnen'em moloku mame pɛkɔt sɔ mi mɔ, endeyi pɛmɔ wɛrkun wɛcɛrɛ kɛkɔtɛnɛ mes, nwe ɛncɛmbɛr kɛlɔ kɔn dɛtasar teyenki mɔ.

²⁵ Wɛcafɛn pɛtuf, mɛncaca mɛyɛkɛsɛ, afɛf ɲowur yɛwɛkɛrɛnɛ kɛlɔ kanjɛ: Kɛfɔwunɛ bawo dɛtasar ɛncɛmbɛr ki gbɲɲ.

²⁶ Nwe o nwe ɛɲnen'em moloku mame ta ɔɲkɔt mi mɔ, endeyi pɛmɔ wɛrkun wɛtɔcɛrɛ kɛkɔtɛnɛ mes, nwe ɛncɛmbɛr kɛlɔ kɔn dɛsɛnc mɔ.

²⁷ Wɛcafɛn pɛtuf, mɛncaca mɛyɛkɛsɛ, afɛf ɲowur yɛwɛkɛrɛnɛ kɛlɔ kanjɛ. Kɛwunɛ, kɛtɛmpɛnɛ ka ki kɛbɛk.»

Yesu kɛtam kɔn mes

Mark 1.22; Luk 4.32

²⁸ Ntɛ Yesu elip kɛlok-loku mɔ, kɔ cusu cɛwos kɛnay tɛta kɛtɛksɛ kɔn,

²⁹ bawo ɛnctɛksɛ ɲa pɛmɔ fum nwe ɔntɔmpɛr kɛtam mɔ, kɛtɛksɛ kɔn kɛnaciyanɛ kɔ ka atɛksɛ sariyɛ s'aSuyif.

8

Yesu ɛntamɔs wɛcunɛ sen

Mark 1.40-44; Luk 5.12-14

¹ Ntɛ Yesu ontɔr kɛyɛfɛ dɛtɔrɔ mɔ, kɔ kɛnay ka afum kɛncɛmɛ kɔ darɔɲ.

² Awa kɔ wɛcunɛ sen ender pɛtontnɛnɛ kɔ fɔr kirɲ pɛcloku: «Mariki, kɔ mɛfan ti-ɛ, mɛntam kɛsɔkɛs im.»

³ Kɔ Yesu ɛntɛnc kɛca, k'ɔɲgbunɛnɛ kɔ, k'oloku: «Ifan ti, mɛsɔk.» Gbɛncana babɔkɔ kɔ sen sɔn sɛntamɛ.

⁴ Kɔ Yesu oloku kɔ: «Mɛkɛmbɛrɛnɛ kɛloku ti fum, mba mɛkɔ mɛmentɔrɛnɛ wɛlɔɲnɛ, pɛmɔmɛn ɛm tɛta kɛsɔkɛsnɛ kam, mɛkɛkɛrɛ polɔɲnɛ pɛmɔ tɔkɔ Musa ɛncic ti mɔ. Tendeyɔnɛ afum fɛp kɛcɛrɛ a mɛntamɛ.»

Yesu ɛntamɔs wɛbɔcɛ ka wɛbɛ wɛka asɔdar a Rom

Luk 7.1-10; Isan 4.46-54

⁵ Ntɛ Yesu ɛmbɛrɛ dare da Kaparnam mɔ, kɔ wɛbɛ k'asɔdar wɛRom ender pɛloku kɔ.

6 Kə wəsədar nwe elətsənə Yesu: «Mariki, wəbəcə kem efəntərə nde kələ kem, əfətəm kəkət, kə pəcu y pəpəy peyi kə.»

7 Kə Yesu oloku kə: «İndekə ndaram kətaməs kə.»

8 Kə wəbə k'asədar oloku Yesu: «Mariki, isətə fə dofum dəfaynən'am nde kələ kem disrə, mba məloku toloku tin gbəcərəm, wəbəcə kem pətamnə.»

9 Bawo ina yati kətam ka abe em k'iyi dəntəf, k'iyə sə asədar anə ηayi kətam ka ina sə dəntəf mə. K'iloku wəkin: «Məkə,» wəkayi əjkə. K'iloku wəkə: «Mədə,» wəkayi ender. K'iloku wəcar kem: «Məyə nte-ə,» əjyə ti.»

10 Nte Yesu encənkəl moloku mən mə, kə teta wəsədar nwe tenciyanə kə, k'oloku akə ηanacəmə kə darəy mə: «İcoku nu kance: İnəjkə fə fum o fum aYisrayel dəcə kəlan pəmə kəjkə!

11 İloku nu: Afum alarəm ηandeder kəyefə kəca nke dec dempe kə nke dənkale mə, ηandə deməsa nde dəbe da dəkəm dəntəf kə Abraham, Siyaka kə Yakuba.

12 Mba afum anə pənamar ηalək kə ka di mə, andeləm ηa dəkubump. Difə kəbok kə kəηanərəne sek kəndəkəyi.»

13 Kə Yesu oloku wəsədar wəkəkə: «Məlucus nde ndaram, təkə məηgbəkər kəlan mə teder əm.» Təm tatəkə yati tə wəbəcə kən enatamnə.

Yesu entaməs acuy alarəm

Mark 1.29-34; Luk 4.38-41

14 Kə Yesu əjkə nda Piye, k'əjkə pənəjk iya ka wəran ka Piye pəfəntərə ta entamnə-ə. Fiba fənayi kə.

15 Kə Yesu oηgbuənə kə kəca, kə fiba fəsək kə, kə wəran nwe eyefə, k'osumpər kəbəcə Yesu.

16 Dəfəy dendəbər, k'anke Yesu afum alarəm anə yəjk yələc yəntərəs mə. Kə Yesu embəlsə moloku mən yəjk yələc, k'entaməs acuy fəp.

17 Tatəkə tə mes mənalarə, mme Sayibə Esayi enaloku mə: «Enalıη təkə tənctərəs su mə, k'esarə docu dosu.»

Anə ηafəy kəcəmə Yesu darəy mə

Luk 9.57-60

18 Nte Yesu enəjk kənay kəkəl kə mə, k'osom acəpsə ən darəy a ηacali kə nkən ntende mokuru ma kəba kəjkə.

19 Kə wətəkse sariyə sa aSuyif ələtərne Yesu, k'oloku kə: «Wətəkse, ifəy kəyəne wəcepse kam, indecəm'am darəy nno o nno məndəkə mə.»

20 Kə Yesu oloku kə: «Məsəjk məyə bi dəkədirə kə bəmp yəyə wələ dəkədirə. Mba ina Wan ka Wərkun, iyə fə kəfo nke intam kəboc domp dem mə.»

21 Kə fum wələma acəpsə ən darəy dəcə oloku kə: «Mariki, məwos'em kərəsna kəkə, ikə iwup papa kem.»

²² Kɔ Yesu oloku kɔ: «Məcəps'em darəŋ, məce afi ŋawup afi aŋan.»

Yesu ontore-tore afef

Mark 4.35-41; Luk 8.23-25

²³ Kɔ Yesu embekε debil kɔ acεpsε ɔn darəŋ.

²⁴ Pəwɔn fε kɔ afef ŋəpəŋ ŋeyefε kəwur dəkəba. Nte yam yeyi kəgbəpərne abil mɔ, Yesu pəcdirε.

²⁵ Kɔ acεpsε ɔn darəŋ ŋalətərne, kɔ ŋantimi kɔ ŋacloku: «Mariki, məyac su! Kəfi kɔ sənder!»

²⁶ Kɔ Yesu eyif ŋa: «Ta ake tɔ nəŋnesenε-ε? Nəyɔ fε kəlan kəpəŋ!» Kɔ Yesu eyefε k'εŋgbəŋ-gbəŋər afef kɔ kəba, kɔ pəyɔ yeŋ.

²⁷ Kɔ cusu cəwɔs acεpsε ɔn darəŋ, kɔ ŋaloku: «Ake wərkun ɔfɔ wəkawε-ε, nte afef kɔ domun yeŋcəme tefan tən darəŋ mɔ?»

Yesu entaməs arkun merəŋ aŋe yəŋk yelec yeŋayi mɔ

Mark 5.1-20; Luk 8.26-39

²⁸ Nte Yesu encali mokuru ntende atɔf ŋa Kadara mɔ, kɔ afum merəŋ ŋawur nde cufu dacɔ, kɔ ŋander ŋacəme kɔ fər kirin. Afum akanε yəŋk yelec yeŋayi ŋa, ŋanayɔ wəywey, ali fum enctam fε kəcəpər dɔpɔ dadəkɔ.

²⁹ Awa kɔ ŋayefε kəkule-kule: «Wan ka Kanu, ake məfanər su-ε? Mənder nnɔ kədetərəs su a tɛm tɛcbəp ba?»

³⁰ Awa, ŋanabələne fε kɔ səp yelərəm nyε yəncsəmət mɔ.

³¹ Kɔ yəŋk yelec yeletsenε Yesu, yocloku: «Kɔ məfan kəbeləs su-ε, məkekəre su dəsəp yelərəm yayε!»

³² Kɔ Yesu oloku: «Nəkɔ dəndɔ!» Kɔ yəŋk yelec yowur afum akanε kɔ yəŋk yebere dəsəp. Gbəncana babəkɔ kɔ səp yayε yeyefε tərɔ kəronj kɔ yontor dəkəba, kɔ yeŋgbətsε, kɔ yefis-fis fəp dərɔmun.

³³ Kɔ akεk a səp yayəkɔ ŋayekse kəkɔ dare. Kɔ ŋaləm təkɔ tənəcəpər mɔ fəp kɔ təkɔ təsɔtɔ afum merəŋ akakɔ yəŋk yelec yeŋayi mɔ.

³⁴ Awa, kɔ aka dare fəp ŋawur kəkənəŋk Yesu. Nte ŋambəp kɔ mɔ, kɔ ŋaletsenε Yesu a pəbələ atɔf ŋaŋan.

9

Yesu entaməs wərkun nwe enafi wεcək mɔ

Mark 2.3-12; Luk 5.18-26

¹ Kɔ Yesu embekε debil, k'encali kəba k'əŋkɔ dare dɔn.

² Gbəncana babəkɔ kɔ afum ŋaŋkεre Yesu wərkun nwe enafi wεcək pəfəntərə dəpoko mɔ. Nte Yesu encərə a kəlan kəŋan kəmbek mɔ, k'oloku wəfi wεcək: «Wenc im, məbəkne! Aŋaŋnən'am kiciya kam.»

³ Awa kɔ atəkse sariye s'aSuyif alɔma ŋayefε kəcem-cemne dεbəkε: «Fum wəkawε, Kanu k'eyi kələməs!»

⁴ Nte Yesu encære mecem-cemne manjan mə, k'eyif ɲa: «T'ake tɔ nancem-cemnene pələc dəbəkəc yonu-ε?»

⁵ Mosom merəɲ mə mame: «Aɲaɲnen'am kiciya,» kɔ «Məyefe, məkət,» tosom tere tətɔcuca kəloku-ε?»

⁶ Awa, indeyɔ nu tantɛ nte tɔɲsɔɲe nəcərə a ina, Wan ka Wərkun, intɔmpər kətam kəɲaɲnene kiciya nnɔ doru dandɛ.» Kɔ Yesu oloku wəfi wɛcək: «Məyefe mələk poko pam məkɔ ndɛ ndaram!»

⁷ Kɔ wərkun nwe eyefe k'ɔɲkɔ ndərɔn.

⁸ Nte kəɲay k'afum kəɲəɲk ti mə, kɔ cusu cəwos ɲa pəpəɲ, kɔ ɲaɲkor-koru Kanu nke kəsəɲ afum kətam kəɲke mə.

Yesu ewe Matiye

Mark 2.13-17; Luk 5.27-32

⁹ Kɔ Yesu osumpur dɔpɔ kəkɔ, k'ɛnəɲk wərkun wələma pacwe kɔ Matiye pənde aɲgbancan ɲa abanəs dut. Kɔ Yesu oloku kɔ: «Məcəps'em darəɲ!» Kɔ Matiye eyefe k'encɛpse Yesu darəɲ.

¹⁰ Dɔsək dələma, Yesu kɔ acɛpse ɔn darəɲ ɲaɲkɔ ɲadi yeri nda Matiye. Awa, k'abanəs dut alarəm kɔ aciya ɲander ɲadi yeri kɔ Yesu.

¹¹ Nte aFarisi ɲanəɲk tatəkɔ mə, kɔ ɲayif acɛpse darəɲ a Yesu: «Ta ake tɔ wətəkse konu eyi kədinɛ yeri kɔ abanəs dut kɔ aciya-ε?»

¹² Kɔ Yesu ene ɲa sim, k'oloku: «Pəmar fe atamne ɲafan wəten cəl, mba acuy ɲɔ pəmar a ɲafan kɔ.

¹³ Nəkɔ nətəkəs təkɔ moloku ma Kanu mme mementər mə: «Nɔnɔfər d'ifan, bafɔ yolonɛ.» Awa, bafɔ alompu ɲ'inder kəwe, mba aciya.»

Yesu kɔ kəsuy

Mark 2.18-22; Luk 5.33-39

¹⁴ Kɔ acɛpse a Saɲ Batis darəɲ ɲalɔtərne Yesu kɔ ɲayif kɔ: «T'ake tɔ acɛpse am darəɲ ɲantɔsunɛ, mba səna kɔ aFarisi səcsuy pəlarəm-ε?»

¹⁵ Kɔ Yesu eyif ɲa: «Pəmar afum aɲɛ awe kəgbanɛ mə, ɲaməncne kɔ ɲasərəyi kɔ wəfura ba? Mba dɔsək dendeɲp nte andeliɲ wəfura mə. Awa, ɲandesuy dɔsək dadəkɔ.

¹⁶ Ali fum ɔfɔfapərə kəloto kəfu yamos yeməcə-məcə. Kɔ teyi-ε, kəloto kəfu kəɲwali yamos yeməcə-məcə, tɔsɔɲe pəwali pa kəloto kəkur pəbək pətəs pəwale pəcək-cəkɔ.

¹⁷ Ali fum ɔfɔbɛr wɛn wofu dətələba pa akata pokur, kɔ teyi-ε, wɛn wɛɲwəsəli tələba, wolonɛ dəntɔf, tələba pələcɛ. Mba wɛn wofu, dətələba tofɔ t'ambɛr wi. Ti disre, wɛn kɔ tələba yɛɲyi belbel.»

Yesu entaməs wəran, k'eyekti wəyecəra wəfi

Mark 5.21-43; Luk 8.40-56

18 Nte Yesu eyi kəloku ɲa moloku mamə mə, kə wəkiriɲ k'aSuyif wəloma ender. K'ontontnɛ Yesu fər kirin, k'oloku kə: «Wan kem wəran entɛp kəcfi. Mba məkə mədenɲər kə waca, endefətɛ.»

19 Kə Yesu eyɛfɛ k'encəmɛ wəkiriɲ nwe darəɲ, kə acɛpsɛ ɔn darəɲ ɲasol kə ɲa.

20 Gbəncana babəkə kə wəran wəloma nwe docu da kəwur mecir dənayi tenasətə meren wəco kə mɛrəɲ mə, ender Yesu tadarəɲ, k'ɔɲgbuɲɛnɛ dobol da yamos yən.

21 Awa kə wəran nwe olokunɛ dɛbəkək: «K'iɲgbuɲɛnɛ gbəcərəm yamos yən-ɛ, intamnɛ!»

22 Kə Yesu ɛɲkafələ, k'ɛnəɲk wəran nwe, k'oloku kə: «Məbəkɛ, wan kem! Kəlan kam kəntaməs əm.» Gbəncana babəkə kə wəran nwe entamnɛ ɔɲ.

23 Nte Yesu ender kələ ka wəkiriɲ nwe mə, k'ɛnəɲk afula luk ya defɪ kə kənay ka afum ɲacbok ɲacɛ ɲactor.

24 Kə Yesu oloku ɲa: «Nəwur nde dabanɲa! Wəyecəra wəkawɛ efi fɛ, kədirɛ k'endɛ.» Kə afum ɲayɛfɛ kəfani Yesu.

25 Nte awurɛnɛ kənay ka afum dabanɲa mə, kə Yesu embɛrɛ dukul k'osumpər wəyecəra kəca, kə wəkakə eyɛfɛ.

26 Kə tes tatəkə tesamsər dətəf fəp.

Yesu entaməs atənəɲk mɛrəɲ

Mat 20.29-34

27 Nte Yesu osumpər dəpə kəkə mə, kə atənəɲk mɛrəɲ ɲancəmɛ kə darəɲ ɲackulɛ-kulɛ: «Wan ka Dawuda, məyənɛ su nənəfər!»

28 Kə Yesu embɛrɛ kələ kanɲə ɛnayi mə disrɛ, k'atənəɲk ɲalətərnɛ kə, kə Yesu eyif ɲa: «Nəncɛm-cɛmnɛ a intam kətaməs fər yonu ba?» Kə atənəɲk ɲalukɛ kə: «Ey, Mariki.»

29 Kə Yesu ɔɲgbuɲɛnɛ fər yanɲan pəcloku: «Mes mecepər nnə nəyi mə, pəmə nte nəlan mə!»

30 Kə fər yanɲan yoluksərnɛ sə kənəɲk. Kə Yesu olok-lokər ɲa pəctiɲ-tiɲ ɲa: «Nəkembərnɛ, ta nwe o nwe pəcərə ti!»

31 Mba nte akakə ɲawur mə, kə ɲaloku teta Yesu dətəf fəp.

Yesu entaməs wərkun wətəlok-loku

Luk 11.14-15

32 Akakə Yesu ɛnatɛp kəctaməs mə ɲandewur, gbəncana babəkə k'əɲkɛrɛ kə wətəlok-loku nwe ɲəɲk ɲɛlɛc ɲəncətərəs mə.

33 Kə Yesu embɛləs ɲəɲk ɲɛlɛc ɲaɲəkə, kə wətəlok-loku eyɛfɛ kəlok-loku. Kə cusu cəwos kənay ka afum pəpəɲ, kə ɲaloku: «Səntanəɲk fɛ tes pəmə tantɛ atəf ɲa Yisrayel!»

³⁴ Mba kɔ aFarisi ŋaloku: «Wəkiriŋ ka yɔŋk yeɛc ɔsɔŋ kɔ fənɔntɔr fəbeləse yɔŋk yeɛc.»

Yesu ɔyɔne kənay k'afum nənɔfɔr

Mark 6.6

³⁵ Kɔ Yesu encepər-cepər sɔdare sɔpɔŋ kɔ sɔfɛt sa dɔtɔf fɔp. Pɛctakse mofɔ maŋan ma dəkətola Kanu d'aSuyif, pɛckawandi Kibaru Kɛtɔt ka dɛbe da Kanu, pɛctamsene sɔ docu kɔ lanjiru fɔp.

³⁶ Nte Yesu enanəŋk kənay ka afum mɔ, k'ɔyɔne ŋa nənɔfɔr. Dis dɔlɔl afum kɔ bəkɛc yeɛce ŋa, ŋanayi dɔpɛcuca pəmɔ ŋkesiya nyɛ yɔntɔyɔ wəkɛk mɔ.

³⁷ Awa kɔ Yesu oloku acɛpse ɔn darəŋ: «Dale detel dembek, mba atel ŋampice.

³⁸ Nələtsene Mariki ma kɛtel pɔberene sɔ atel alɔma aŋɛ ŋandetele kɔ mɔ.»

10

Asom a Yesu aŋɛ wɔco kɔ mɛrəŋ

Mark 3.16-19; Luk 6.14-16

¹ Kɔ Yesu ewe acɛpse ɔn darəŋ aŋɛ wɔco kɔ mɛrəŋ, k'ɔsɔŋ ŋa fənɔntɔr fɔtame kəbeləs yɔŋk yeɛc, kɛtaməs ka docu kɔ lanjiru fɔp.

² Mewe ma Asom ɔn wɔco kɔ mɛrəŋ mɔ mame: wɛcɔkɔ-cɔkɔ Siməŋ nwe aŋwe Piyer mɔ, kɔ wɛnc Andəre, Sak kɔ wɛnc Isan awut a Sebede,

³ Filip, Bartelemy, Tɔma, Matiye wəbaŋəs dut, Sak wan ka Alfe, Tade,

⁴ Siməŋ wəKanan* kɔ Yudas wəka dare da Keriyot nwe enaber Yesu aterene ɔn dəwaca mɔ.

Kɔsom ka acɛpse Yesu aŋɛ wɔco kɔ mɛrəŋ

Mark 6.7-11; Luk 9.2-5; 10.3-12

⁵ Acɛpse darəŋ wɔco kɔ mɛrəŋ aŋɛ ŋɔ Yesu enasom dɔtɔf, k'endenɔr ŋa sɔ mosom mme: «Ta nəkɔ nda atɔyɔne aSuyif, ta nəberɛ dare da aSamarɛ.

⁶ Mba nəkɔ nda aYisrayel aŋɛ ŋayi pəmɔ ŋkesiya yɔsɔle mɔ.

⁷ Kɔ nəyi dɔpɔ-ɛ, nəcdəŋk: «Dɛbe da dəkɔm dɔlɔtərne!»

⁸ Nɛtaməs atɔtamne, nətimi afi, nətaməs acune sen, nəbeləs yɔŋk yeɛc. Ampoce nu kifəli, nəna sɔ nəpocɛ kifəli.

⁹ Ta nədemne kema, kɔ pəyɔne fe ti gbeti, ta nəber pəsam dəyuba.

¹⁰ Ta nətəmpər lɔba kəkɔ marənt. Nəkekəre burumus bin bin gbɔŋ. Ta nətəmpərəne cɔfta, ta nətəmpərəne kəgbo. Ti disre pəmar wəbɛc pəsɔto yeri yɔn.

11 Kəberε nke o nke kə nəmberε dare dəpəŋ kə pəyənε fε ti defεt-ε, nətən fum wəlel nwe ŋwose kəmerŋk nu mə. Nəyi nda fum wəkakə haŋ dəsək ndε nəŋyεfε kəwur dare dadəkə nəsumpər dəpə donu kəkə mə.

12 Kəlō nke nəmberε mə, nəkulε: «Kanu kəsəŋ nu pəforu!»

13 Kə aka kəlō kaŋkə ŋawose kəbaŋ nu belbel-ε, kətolanε konu kəŋsəŋ ŋa pəforu! Mba kə ŋantəwose kəbaŋ nu-ε, kətolanε konu ka pəforu kaŋkə kəŋlüksərne nu!

14 K'afati kəbaŋ nu waca mērəŋ, ta awose kəcəŋkəl moloku monu kəlō kəlōma, kə pəyənε fε ti dare dəlōma-ε, nəyεfε kəfo kaŋkə, nəckəŋ-kəŋ kəfəl nke wεcək wonu wεlek mə, ti tendeyənε aka dare dadəkə sede a ŋanabaŋ fε nu.

15 Iloku nu kance: Dəsək ndε Kanu kəndekiti afum fəp mə, Kanu kənayenŋk fε abəkəc nnə afum alec a təf ya Sodom kə Komora ŋayi mə pəmō ntε kəndeyenŋkər aka dare dadəkə abəkəc mə.»

Mətərəs mmε meyi kəder mə

Mark 13.9-13; Luk 12.11-12; 21.12-19

16 «Nəcəŋkəl! Isom nu, mba nəŋkəyi pəmō ntε ŋkesiya yenŋi calma dacə mə. Awa, nəkəmbərne pəmō bok, nəyənε atələsər mes pəmō ntantoriya.

17 Nəkəmbərne afum ŋandekəkəre nu aboc kiti fər kirin dənkiti. Nəndekəsute nu cəŋgban-gban ndε dəkətola Kanu daŋan.

18 Nəndekəkəre nu nda akirinŋ a sədare səpəŋ kə abε a təf fər kirin teta ina. Nən'endekəyən'em sede fər yaŋan kirin kə ya atəyənε aSuyif.

19 K'andekəkəre nu fər ya aboc kiti kirin-ε, ta nədekə nəccεm-cεmne pələrəm nəcyifne: «Cəke cə səŋkəlok-loku, kə moloku mere mə səŋkəloku-ε?» Ey, tεm tatəkə, Kanu kəndekəsəŋ nu təkə pəmar nəloku mə.

20 Ti disre bafə nən'endekəlok-loku, mba Amera ŋa Papa konu Kanu ŋendekəlok-lokε nu.

21 Wεnc endekəsəŋ wεnc padif. Tatəkə tə kas kəndekəsəyə wan kən. Awut ŋandekəcəme akombəra aŋan dəbəkəc, ŋasəŋ ŋa padif.

22 Fəp fəndeter nu teta tewe tem. Mba nwe endebəkne ti haŋ mes maməkə melip mə, Kanu kəndeyac kə.

23 K'andekə pactərəs nu dare dadəkə-ε, nəcepe nəkə dare dəlōma. Iloku nu kance kə: Kə Wan ka Wərkun endeder-ε, tendetəŋne ta nəntalip kəkət sədare sa Yisrayel fəp-ε.

24 Wəcəpse darəŋ əfəbək dəkəcəme pətəs wətəkse kən. Wəcar əfəyə dəkəcəme dəpəŋ pətəs mariki mən.

25 Ntε tentese mə, pəmar wəcəpse darəŋ pəyi pəmō wətəkse kən, wəcar pəyi pəmō mariki mən. K'aloku wəkirinŋ ka kəlō:

«Sentani Belsebul bə məyənə-ε,» aləmsənə sə aka kələ kən disrə han pacepərər.»

Nwε pəmar panesε mə

26 «Ti disrə ta nənesə afum! Ntε o nte tēmənknε mə andənənk ti, kə nte tənğbərne mə, andecərə ti.

27 Ntε inlokə nu kubump mə, nəğbəkərə ti kələku dan pen. Ntε imənəkəs nu dələnəs mə, nədənk ti pəpən mofə məbəpsənə.

28 Ta nənesə afum anε nandif dis gbəcərəm, ta nıtam kədif kəyi wəyən nke kəyi nu mə. Mba nwε pəmar nənesə mə, nkən əyən Kanu nke kəntam kədif nu kədifənə sə afəkəl nde yahanama mə.

29 Ali pacaməs gbanə mərən fərənk fin, təfəsənε agbanə nənəkə nın nətəmpənə dəntəf ta Papa konu encərə ti-ε.

30 Mba nəna, ali dəlay da cəfon ca domp donu Kanu kəncərə di fəp.

31 Awa, ta nənesə! Nnə Kanu kəyi mə nəyə dəkəcəmε nde dεmbək dεtas da gbanə yayəkə mə!»

Məna nwε məncərə Yesu mə, endəkəcər'am fər ya Kanu kirin

Luk 12.8-9

32 «Kə fum nwε o nwε oloku afum fər kirin: «İncərə Yesu, nkən əy'em)-ε, ina Yesu indekəwosε teta fum wəkəyi ndena Papa kem nwε eyi nde dəkəm mə.

33 Mba kə fum oloku afum fər kirin: «İncərə fε Yesu, bafə nkən əy'em)-ε, ina Yesu sə ifədəkəcərə kə ndena Papa kem nwε eyi nde dəkəm mə.»

Bafə pəforu p'ınkərə nu, mba kəsutənε kə kəğbeyənε

Luk 12.51-53

34 «Ta nəcəm-cəmne a pəforu p'ınkərə kəsən doru, bafə pəforu p'ınkərə mba kəsutənε.

35 Bawo inder kəğbey kas kə wan kən wərkun, wan wəran kə kərə, wansə kə kəncərə kən.

36 Afum a kələ kən disrə yati nandeyənə aterənə ən.

37 Nwε əmbətər kas kə kərə pətəs ina Yesu mə, əyə fε dəkəcəmε kəyənə wəcəpsε kem darən. Nwε əmbətər wan kən wərkun kə pəyənə fε ti wan kən wəran pətəs ina Yesu mə, əyə fε dəkəcəmε kəyənə wəcəpsε kem darən.

38 Kə məna nwε məntəwosε kətərəs kə kəfi teta kəcəpsε kem darən mə, məfəyə dəkəcəmε kəyənə wəcəpsε kem.

39 Məna nwε məndetən kəyac kiyi kam doru mə, kəndesalpər əm. Məna nwε kiyi kam doru kənsalpər əm teta ina Yesu mə, məndesətə ki.»

Yesu emban nwε o nwε emban acəpsε ən darən mə

Mark 9.37,41; Luk 9.48; 10.16; Isay 13.20

40 Nnɔ ɔ nnɔ nɛŋkɔ kɛdɛŋk Kibaru kɛtɔt pabaŋ nu mɔ, ina Yesu ambaŋ. Fum nwɛ embaŋ im mɔ, embaŋ sɔ nwɛ osom im mɔ.

41 Kɔ fum embaŋ sayibɛ bawo sayibɛ sɔ-ɛ, wɛkayi endesɔtɔ kɛway nkɛ aŋsɔŋ sayibɛ mɔ. Kɔ fum embaŋ fum wɛlompu teta dolompu dɔn-ɛ, kɛway ka wɛlompu k'ɔŋkɛsɔtɔ.

42 Icloku nu ti kance kɔ: Kɔ fum ɔsɔŋ nwɛ efɛtɛ dɛkɛcɛmɛ acepse em dacɔ domun dɛcaŋk tɔmbɛl katin teta kɛyɔnɛ kɛŋan acepse em darɛŋ mɔ, ɔfɔdekɔbut kɛsɔtɔ kɛway kɛn kɛtɔt.

11

Asom a Aŋnabi Saŋ Batis

Luk 7.18-35

1 Ntɛ Yesu elip kɛsom tosom tatɔkɔ acepse ɔn darɛŋ wɛcɔ kɔ mɛrɛŋ mɔ, k'ɔŋkɔ pɛctɔkse pɛckawandi sɛdare sɛŋan.

2 Ntɛ Aŋnabi Saŋ Batis ɛnayi dɛbili mɔ, k'ene pacloku teta Krist kɔ yɛbɛc nyɛ ɔncyɔ mɔ. Kɔ Saŋ osom acepse ɔn darɛŋ alɔma nnɔ Krist eyi mɔ,

3 kɛkɔyif Yesu: «Mɛn'ɔyɔnɛ nwɛ eyi kɛder kɛdeyɛc afum a Kanu mɔ, kɔ tɔyɔnɛ fɛ mɛna-ɛ, ka pɛmar sɛkar sɔ wɛlɔma ba?»

4 Kɔ Yesu olukse ŋa: «Nɛkɔ nɛloku Saŋ tɔkɔ nɛnɛ kɔ tɔkɔ nɛnɛŋk mɔ:

5 Atɔnɛŋk ŋanɛŋk, atɔtam kɛkɔt ŋaŋkɔt, k'asɔkɛs acunɛ sen, atɔnɛ ŋane, afi ŋafɔtɛ, aŋkawandi Kibaru Kɛtɔt nnɔ atɔyɔ daka ŋayi mɔ.*

6 Pɛbɔt nwɛ ɔntɔdesak kɛgbɛkɛr im kɛlaŋ kɛn mɔ!»

7 Ntɛ acepse a Saŋ darɛŋ ŋayɛfɛ kɛlukus mɔ, kɔ Yesu ɛyɛfɛ kɛloku kɛnɛy ka afum teta Saŋ pɛcyif: «Ake nɛnakɔ kɛmɔmɛn nde dɛtɛgbɛrɛ-ɛ: Fum nwɛ efane pɛmɔ awo nŋɛ afɛf ŋeyikɛc mɔ ba?

8 Anɔ nɛnakɔ kɛmɔmɛn: Wɛrkun wɛsɛkɛp ba? Mba nɛcɛrɛ a aŋɛ ŋaŋsɛkɛp belbel mɔ, dɛwɔlɔ wa abɛ wɔ ŋayi!

9 Mba anɔ nɛnakɔ ɔŋ kɛmɔmɛn-ɛ: Sayibɛ ba? Ey, icloku nu, Saŋ encepɛr sayibɛ fɛp dɛkɛcɛmɛ.

10 Tetɔn t'ancicɛs nde Yecicɛs Yosoku disrɛ: «Mɛcɛŋkɛl: In-dekɛkɛrɛ wɛsom kem fɔr yam kirin, pɛkɔlomps'am dɔpɔ.»

11 Kance icloku nu: Afum aŋɛ aran ŋaŋkom mɔ dacɔ, ali fum ɔyɔ fɛ dɛkɛcɛmɛ pɛtas Saŋ Batis. Mba wɛkɔ efɛtɛ dɛbɛ da dɛKɔm mɔ, ɔyɔ dɛkɛcɛmɛ pɛtas kɔ.

12 Kɛyɛfɛ dɔsɔk da Saŋ Batis haŋ ndɛkɛl, dɛbɛ da dɛKɔm kɛdɛktɛr disrɛ deyi, adɛktɛr a di ŋayi kɛtɛn kɛbaŋ di.

13 Bawo sariyɛ sa Musa kɔ Sayibɛ fɛp ŋanadɛŋk tɔkɔ tendeder mɔ haŋ tɛm ta Saŋ,

* 11:5 11:10 Malaki 3.1

¹⁴ Kə nəwose kance ka ti-ε, Saŋ ɔyɔne Anŋabi Eli nwe pənamar kəder mə.

¹⁵ Məna nwe məŋyɔ ləŋəs mə, mənə ti!

¹⁶ An'indetubucəne detemp dandε-ε? Awa, nənəŋk aŋe ŋaŋwurene mə: Awut aŋe ŋandε kəfo nke afum ŋambəpsene mə, ŋacwe akə mə.

¹⁷ Ŋacloku: «Səfulane nu luk, kə nəntəpise! Kə səleŋse nu melen ma defi, kə nəntəbok.»

¹⁸ Bawo Saŋ ender: Pəsun, ta oŋmun wən-ε, k'aloku: «ɔyɔ ŋəŋk ŋelεc!»

¹⁹ Kə ina Wan ka Wərkun inder, icdi yeri icmun wən, awa k'aloku: «Wəcelək iyəne, wəcis, wanapa ka abanəs dut k'aciya!» Mba k'anəŋk nte kəcəre kəkətene mes ka Kanu kəŋyɔ mə-ε, ancəre a belbel bə kəyi kəyɔ.»

Sədare nse səfati kəgbekər kəlan kəŋan Yesu mə

Mat 10.15; Luk 10.12-15

²⁰ Kə Yesu eyefe kənal pəpəŋ sədare nse anayɔ mes məwey-wey məlarəm mə, bawo ŋanasəkpər fe bəkəc yeλεc yaŋan:

²¹ Pələc pəpəŋ peyi məna dare da Korasin! Pələc pəpəŋ peyi məna dare da Betsayida! Bawo tɔcyəne a mes məwey-wey mme Kanu kənayɔ nno ndoronu mə, m'anayɔ aka sədare sa Tir kə Sidəŋ-ε, kə ŋanasəkpər bəkəc pəwon, ŋacəme pəlompu darəŋ, ŋaberne yamos ya kəbal, ŋaməncne!

²² It'əsəŋe nte iloku nu, dəsək ndε Kanu kəndekiti afum fəp mə pəndeyəŋkər nu pətəs aka sədare sa Tir kə Sidəŋ.

²³ Kə nəna aka Kaparnam, nəncem-cəmnε a andepene nu haŋ dəkəm ba? Ala! Andetore nu dəntəf haŋ nde afum aŋi ŋayi mə. Bawo mes məwey-wey mme anayɔ ndoronu mə, im'anayɔ dare da afum aλεc aSodom-ε, kə dare dadəkə dəsəryi haŋ məkə!

²⁴ It'əsəŋe, icloku nu: Dəsək ndε Kanu kəndekiti afum fəp mə, pəndeyəŋkər nu pətəs aka dare da Sodom.»

Nəder nno Yesu eyi mə, nəndesətə kəŋesəm

Luk 10.21-22

²⁵ Tem tatəkə tə Yesu enatola Kanu nte: «Inkor-kor'əm Papa, Mariki ma dəkəm kə dəntəf, bawo məməŋkər mes məməkə acəre kəkətene mes kə asoku səbomp, kə məmentər mi afet dəkəcəme.

²⁶ Ey, Papa, bawo tatəkə tə məfaŋ ti.

²⁷ Papa kem əsəŋ im mes fəp, nwe o nwe encəre fe Wan mēne Papa, nwe o nwe encəre fe sə Papa kə pəntəyəne Wan-ε, kə nwe Wan eŋfaŋ kəmentər kə mə.

²⁸ Nəder nno iyi mə, nəna aŋe nəntərpene yesare yonu mə. Inten fe kətəsərne nu, imbət mes. Kəŋesəm k'indesəŋ nu.

²⁹ Nələk oŋ nəna sɔ yɛbəc nyɛ ifaŋ a nəsumpər mə, nəcəŋkəl mətəkse mem, bawo imbət amera, k'indence. Ti disre nəndəsətɔ kəŋesəm nənəsərka.

³⁰ Ey, yɛbəc nyɛ ifaŋ a nəsumpər mə yoncuca fɛ. Pəsare mpe isarsər nu mə pəfəfərəne.

12

Yesu entəkse afum teta dəsək da kəŋesəm nde ampuse Mariki mə

¹ Tɛm tɔləma Yesu pəccali dale, dəsək da kəŋesəm nde ampuse Mariki mə denayi. Dor denayɔ acepse ɔn darəŋ, kɔ ŋayefe kəcŋosuru səbomp sa mɛŋgben ŋacsəm.

² Nte aFarisi ŋanəŋk ti mə, kɔ ŋaloku Yesu: «Mənəŋk! Acepse am darəŋ ŋayi kəyɔ nte Sariye sənətəwose dəsək da kəŋesəm nde ampuse Mariki mə.»

³ Mba kɔ Yesu eyif ŋa: «Nəŋkaraŋ fɛ dəYecicəs Yosoku təkɔ Dawuda kɔ asol ɔn ŋanayɔ nte dor denayɔ ŋa mə ba?

⁴ Nte enabere kəlɔ ka Kanu, kɔ ŋasəm cəcom nce analoŋne Kanu, nce Sariye sənətəwose nkən kɔ asol ɔn kəsəm mɛne aloŋne gbəcərəm mə?

⁵ Kɔ pəyɔne fɛ ti nəŋkaraŋ fɛ sɔ dəsariye sa Musa, a dəsək da kəŋesəm nde ampuse Mariki mə, bafɔ aloŋne ŋafələləs sariye sa kəŋesəm dəkəlɔ kəpəŋ ka Kanu ba? Mba ti disre ŋafəsare kiciya!

⁶ Iclokɔ nu ti, paka pɔləma peyi nnɔ mpe dəkəcəme da pi dembek detas kəlɔ kəpəŋ ka Kanu mə.

⁷ Kanu kənaloku dəYecicəs Yosoku: «Nənəfər d'ifaŋ, bafɔ yoloŋne!» Nəccəre tatəkɔ-ɛ, kɔ nəntərəs fɛ atəciya.

⁸ Bawo Wan ka Wərkun əyɔne mariki ma dəsək da kəŋesəm nde ampuse Mariki mə.

*Yesu entaməs wərkun nwe kəca kən kənadəmtər mə
Mark 3.1-6; Luk 6.6-11*

⁹ Kɔ Yesu əŋkɔ nde dəkətola Kanu danjan dɔləma.

¹⁰ Awa wərkun wəlɔma enayi dəndo pədəmtər kəca. Kɔ aFarisi ŋayif Yesu: «Aŋwose fum kətaməs dəsək da kəŋesəm nde ampuse Mariki mə ba?» Nənanayɔ ti nte təŋsəŋe ŋayemseɛne kɔ mə.

¹¹ Kɔ Yesu eyif ŋa: «An'eyi nu dacɔ nwe əŋyɔ aŋkesiya ŋin gboŋ, ŋetempene debi dəsək da kəŋesəm ta empene ŋi dəsək din dadəkɔ-ɛ?

¹² Dəkəcəme da fum dencepər da aŋkesiya pəbɔlə! Ti disre, Sariye səwose kəyɔ pətət simiti dəsək da kəŋesəm.»

¹³ Kɔ Yesu oloku wərkun nwe: «Mətenci kəca!» Kɔ wərkun nwe entenci kəca kən kɔ kəŋkɔ sɔ kəntamne pəmɔ kəŋkɔ.

¹⁴ Ti tenasəŋe kɔ aFarisi ŋawur dəkətola Kanu danjan kəkənəŋkene nte təŋsəŋe ŋatəŋne tedife ta Yesu mə.

Yesu ɔyɔnɛ wəbəcɛ nwe Kanu kəyɛk-yɛk mɔ

¹⁵ Ntɛ Yesu ɛncərə mɛcɛmɛmɛnɛ mɛlɛc maŋan mɔ, k'ɛyɛfɛ kəfo kaŋkɔ. Kɔ kənaɣ k'afum kəncəmɛ kɔ darəŋ, k'ɛntaməs acuy fəp.

¹⁶ Mba Yesu pəctiŋ-tiŋ ŋa, pəcmɔnɛ ŋa kəloku afum nwe ɔyɔnɛ mɔ.

¹⁷ ɛnaloku ti ntɛ tɔŋsɔŋɛ mes mɛlarɛ, mmɛ sayibɛ Esayi ɛnaloku mɔ:

¹⁸ «Kɔ Kanu kəloku:

«Mənəŋk, wəbəcɛ kem ɔfɔ wəkawɛ: Nkɔn iyɛk-yɛk,

nkɔn imbətər,

nkɔn, ɔŋsɔŋ im pəbotu fəp.

Indeber kɔ Amera ŋem,

pədə pəcdəŋkər afum a tɔf ya doru fəp dolompu dem.

¹⁹ Ŋafɔdecɔp kɔ fum, ɔfɔdekulɛ-kulɛ.

Afɔdecəŋkəl dim dɔn dabanŋka.

²⁰ Ɔfɔdetepi awo ŋonutnɛ,

ɔfɔdenim lamp depicɛ pomot.

Tantɛ tendɛ pəcyɔ sɔ haŋ pəsɔŋɛ pəlompu kətam.

²¹ Afum a tɔf fəp ŋandegbəkər tewɛ tɔn amera.»

Yesu oluksɛ moloku ma yem məkɔ anaboncɛ kɔ mɔ

Mark 3.22-30; Luk 11.14-23

²² K'anjɛrɛ Yesu fum nwe ŋəŋk ŋɛlɛc ŋɔnctərəs ta ɛŋnəŋk, ta ɛntam sɔ kəloku-loku mɔ. Kɔ Yesu ɛntaməs kɔ, k'ɛnəŋk k'oloku-loku sɔ.

²³ Ntɛ pənciyənɛ kənaɣ k'afum fəp mɔ, kɔ ŋaloku: «Bafɔ Wan ka Dawuda ɔfɔ, nwe Kanu kəsom kədəyɛc afum ɔn mɔ ba?»

²⁴ Ntɛ aFarisi ŋanɛ ti mɔ, kɔ ŋaloku: «Wəkiriŋ ka yəŋk yɛlɛc Sentani Bɛlsɛbul, Yesu wəkawɛ embɛlsɛ yəŋk yɛlɛc!»

²⁵ Ntɛ Yesu ɛncərə pɛcɛmɛmɛnɛ paŋan mɔ, k'oloku: «Atɔf o atɔf nŋɛ ŋɛŋyɛrɛnɛ ŋisərka mɔ, dəkələcɛ ŋəŋkɔ, tɔyɔnɛ dare o dare, kəlɔ o kəlɔ disrɛ, ca fəp nyɛ yɛŋyɛrɛnɛ yisərka mɔ, yɔfɔtam kəcəmɛ.

²⁶ Kɔ Sentani səmbɛləs Sentani-ɛ, səyɛrɛnɛ sisərka. Cəkɛ cɔ dəbɛ da si dɛntam kəcəmɛ gbɪŋ-ɛ?

²⁷ Kɔ tɔyɔnɛ ina Yesu, Bɛlsɛbul imbɛlsɛ yəŋk yɛlɛc-ɛ, afum anu ɔŋ, an'ɔ ŋambɛlsɛ yəŋk yɛlɛc-ɛ? Ti tɔsɔŋɛ ntɛ akakɔ yati ŋandeyɔnɛ akiti anu mɔ.

²⁸ Mba kɔ tɔyɔnɛ Amera ŋa Kanu ŋ'ina imbɛlsɛ yəŋk yɛlɛc-ɛ, awa dəbɛ da Kanu dender haŋ nnɔ nəyi mɔ.

²⁹ Cəkɛ cɔ fum ɛntam kəbɛrɛ kəlɔ ka wəkə səkət disrɛ, pəwɛtəs daka dɔn fəp, ta onuŋkɛnɛ pəsekət kərəsna wəkə səkət wəkakɔ-ɛ? K'ɛlip kəsəkət kɔ-ɛ a pədəfɔŋət daka da kəlɔ kɔn.

³⁰ Nwe ɔntɔyi kɔ ina mɔ, ɛntɛr im, mba nwe ɔntɔlɔŋkan'em mɔ, ɛsamsər'em.

³¹ It'əsəηe nte iloku nu, kiciya kə kəlməs fəp andekəηaηnene yi afum, mba afədekəηaηnene kəlməs ka Amera ηa Kanu.

³² Məna nwe o nwe məηloku pələc pa Wan ka Wərkun mə, andekəηaηnen'am ti, mba nwe o nwe oηloku pələc pa Amera Nəcempi mə, afəηaηnene kə ti kəyefe nno doru dandə haη doru nde dendeder mə.»

Kətək kə yokom ya ki

Mat 7.16-20; Luk 6.43-45

³³ Kə Yesu enderə sə moloku mme: «Kə kətək kəntese-ε, yokom ya ki yentesε. Kə kətək kəntətamnε-ε, yokom ya ki yəfətesε. Yokom ya kətək y'aηnepələ ki.

³⁴ Nəna Nkisin! Cəke cə nəntam kəcərə kəloku moloku mətət ta nəna nəntese-ε? Bawo nte teηlas abəkəc mə, tə kusu kəηloku.

³⁵ Fum wətət, dəabəkəc ηən ηətət eηlek mes mətət məkə meyi kə mə. Fum wələc, dəabəkəc ηən ηələc eηlek mes mələc məkə meyi kə mə.

³⁶ Icloku nu ti: Dəsək nde andekiti afum fəp mə, ηandeləmər Kanu moloku maηan mələc fəp mme məntəyə dəkəcəmə mə.

³⁷ Bawo moloku mam mendesəηe Kanu kəlm əm wəlompu, kə pəyənε fε ti-ε, patərəs əm.»

Kəwer ka tεgbəkərə tεwey-wey ta dəKəm

Mark 8.11-12; Luk 11.29-32

³⁸ Atəkse sariye sa aSuyif kə aFarisi ηaloku Yesu: «Wətəkse, səfaη kənəηk tεgbəkərə tεwey-wey tam tin nte tementər a Kanu kəsom əm mə.»

³⁹ Kə Yesu oloku ηa: «Detemp delec dətəcəmə danapa da Kanu darəη ηayi kəten tεgbəkərə tεwey-wey nte tementər a Kanu kəsom im mə. Afəsəmentər ηa tεgbəkərə nte o nte kə pəntəyənε ta sayibε Yunusa-ε.

⁴⁰ Ey, Yunusa enayi mata maas daη kə pibi kor ka alop ηəpəη disrε. Ti tə pəndeyi Wan ka Wərkun sə, endeyi mata maas daη kə pibi antəf disrε.

⁴¹ Aka Niniwe ηandeyefe dəsək nde Kanu kəndeboc kiti ka afum fəp mə, ηaboncε afum a detemp dandε kətəsəkprər bəkəc, bawo kawandi ka Yunusa kənasəηe aka Niniwe kəsəkprər bəkəc yaηan yələc kə ηalomp. Awa fum eyi nu dacə nwe entas Yunusa dəkəcəmə mə.

⁴² Wəbera ka atəf nηe ηeyi Yisrayel kəca kətət mə, endetime dəsək da kiti kə detemp dandε, pəboncε di kətəwosε kəcəηkəl kəcərə kəkətene mes kətət, bawo pəbələ p'ənayefe kədəcəηkəl kəcərə kəkətene mes kətət ka Sulemani*. Awa fum eyi de nwe entas Sulemani dəkəcəmə mə.»

Kəlukus ka ηəηk ηələc

Luk 11.24-26

* 12:42 Məməmən 1 Abε 10.1-10

43 «Nte ɲɔŋk ɲɛlɛc ɲaŋɔkɔ ɲowur fum nwe dɛris mɔ, ɲɛcyara-yara mofɔ mowosu, ɲɛctɛn dɛkɛŋɛsɛm, mba ɲɛnasɔtɔ fɛ.

44 Kɔ ɲolokunɛ: «Iluksɛrne nde kɛlɔ kem, nke inawur disrɛ mɔ.» Nte ɲolokus mɔ, kɔ ɲɛmbɛp kɛlɔ fos, pafɛŋ ki palompɛs ki belbel.

45 Kɔ ɲolokus kɛkɔtɛn yɔŋk yeɛc camɛt-mɛrɛŋ nye yɛnanɲkanɛ kɛlɛcɛ yɛtas ɲi mɔ. Kɔ yɛmbɛrɛ kɛlɔ disrɛ kɔ yɛndɛ. Nte tencepɛr mɔ, kɔ pɛlɛc pɛnanɲkanɛ fum nwe pɛtas tɔkɔ pɛnayi kɔ tɔcɔkɔ-cɔkɔ mɔ! Ti tendesɔtɔ afum a detemp dɛlɛc dɔmɔkɔ dandɛ!»

Iya kɔ awɛnc a Yesu

Mark 3.31-35; Luk 8.19-21

46 Nte Yesu onclɔk-lokɛr afum mɔ, awa kɔ kɛrɛ k'awɛnc aŋa ɲacɛmɛ dabanɲka, ɲacfaŋ kɛlɔk-lokɛr kɔ.

47 Kɔ fum wɛlɔma oloku Yesu: «Mɛcɛŋkɛl, wiri kɔ awɛnc ɛm aŋa ɲancɛmɛ nde dabanɲka, ɲafaŋ kɛlɔk-lokɛr ɛm.»

48 Mba kɔ Yesu oloku fum wɛkakɔ ɛnalɔku kɔ toloku tatɔkɔ mɔ: «An'ɔyɔnɛ iya kem-ɛ? Are ɲayɔnɛ awɛnc im aŋa-ɛ?»

49 Kɔ Yesu entenci kɛca nnɔ acɛpɛ ɔn darɛŋ ɲayi mɔ, k'oloku: «Nɛnanɲk: Iya kem kɔ awɛnc im aŋa ɲɔ akanɲɛ!»

50 Nwe o nwe ɔŋyɔ tɛfaŋ ta Kanu Papa kem nwe eyi nde dɛKɔm mɔ, wɛkakɔ ɔyɔnɛ wɛnc im, wɛkire kɔ iya kem.»

13

Totubcɛnɛ ta wɛgbal defet

Mark 4.1-9; Luk 8.4-8

1 Dɔsɔk dadɔkɔ kɔ Yesu owur dɛkɛlɔ k'ɔŋkɔ pɛndɛ agbɛp ɲa kɛba.

2 Kɔ kɛnay ka afum alarɛm ɲaŋkɔ ɲalɔŋkanɛ kɔ kɛsɛk, kɔ tɔsɔŋɛ kɔ kɛbɛkɛ debil k'ɛndɛ. Kɔ kɛnay ka afum fɛp kɛncɛmɛ agbɛp ɲa kɛba.

3 Kɔ Yesu olɔk-lokɛr ɲa pɛlarɛm dɛmotubcɛnɛ, k'oloku ɲa: «Nɛcɛŋkɛl: Wɛbɔf ɛnawur kɛkɔgbal defet.

4 Nte ɛncɛgbal defet mɔ, kɔ mɛŋgbɛn mɔlɔma mɛntɛmpɛnɛ dɔpɔ. Kɔ bɛmp yɛndɛ yɔsɔm mi.

5 Kɔ mɛŋgbɛn mɔlɔma mɛntɛmpɛnɛ antɔf ɲa masar nde kɛbɔf kɛlarɛm kɛnatɔyi mɔ. Nte antɔf ɲɛnadɛm mɔ, kɔ mɛŋgbɛn momponɲ katɛna.

6 Mba nte nne yɛnadewonɛ mɔ, kɔ yɔncɔf buma yayɔkɔ, kɔ yowosɛrɛnɛ, bawo yɛnayɔ fɛ ncɔnc.

7 Kɔ mɛŋgbɛn mɔlɔma mɛntɛmpɛnɛ dɛbɛŋk, kɔ momponɲ, mba kɔ bɛŋk yɛmpɛ kɔ yɛndi mi.

8 Kɔ mɛŋgbɛn mɔlɔma mɛntɛmpɛnɛ antɔf ɲɔtɔt, kɔ momponɲ kɔ mɛlɛpsɛr kɛkom yokom nye tassar tin (100), yɔkɔ wɛcɔ camɛt-tin (60), kɔ yɔlɔma wɛcɔ maas (30).

9 Mɛna nwe mɛŋyɔ lɛŋɛs mɔ, mɛnɛ ti.»

Ta ake tɔ Yesu ɛnctɔksɛ dɔmotubcɛnɛ-ɛ?

¹⁰ Kɔ acɛpsɛ a Yesu darɛŋ ŋander ŋayif kɔ: «Ta ake tɔ mɛŋlok-
lokɛrɛ ŋa dɔmotubcɛnɛ-ɛ?»

¹¹ Kɔ Yesu olukɛ ŋa nte: «Bawo Kanu kɛsɔŋɛ nɔna kɛcɛrɛ
kance kɛgbɔpɛnɛ ka dɛbɛ da dɔKɔm, mba ŋa, asɔŋ fɛ ŋa ki.

¹² Ti disrɛ, nwe ɔŋyɔ kɛcɛrɛ ka tɔgbɔpɛnɛ ta dɛbɛ da dɔKɔm mɔ
ambɛrɛnɛ kɔ, haŋ pɛlar kɔ, mba nwe ɔntɔyɔ mɔ, andɛbanɔr kɔ
ali pɔkɔ ɔyɔ mɔ.

¹³ Ti tɔsɔŋɛ nte ilok-lokɛrɛ ŋa dɔmotubcɛnɛ mɔ, bawo
ŋaŋgbɔtɛnɛ belbel mba ŋafɔnɔŋk, kɔ ŋancɛŋkɛl belbel mba
ŋafɔnɛ, ŋafɔcɛrɛ sɔ.

¹⁴ Nte Kanu kɛnalokɛ kusu ka sayibɛ Esayi tetanɔn mɔ tɛlarɛ:
«Nɛndewon kɛcɛŋkɛl mba nɛfɔdecɛrɛ few.

Nɛndewon kɛgbɔtɛnɛ mba nɛfɔdenɔŋk few,

¹⁵ bawo sɔbomp sa afum akanɛ sɛfɔtam kɛcɛrɛ.

Ŋasunc lɛŋɔs yaŋan,

kɔ ŋamɛp fɔr

nɛ tɔŋsɔŋɛ ta ŋanɔŋkɛ yi,

ta ŋanɛnɛ lɛŋɔs yaŋan,

ta bɛkɛc yaŋan yɔsɔŋɛ ŋa kɛcɛrɛ,

ŋadɛkafɛlɛ, ŋaluksɛrɛnɛ nnɔ iyi mɔ,

tɔsɔŋɛ itamɔs ŋa!»

¹⁶ Mba pɛmbɔt nu, bawo fɔr yonu yɛŋnɔŋk kɔ lɛŋɔs yonu
yɛŋnɛ!

¹⁷ Kance, icloku nu: Sayibɛ sɛlarɛm kɔ alompɔ alarɛm
ŋanafan kɛnɔŋk mame nɔyi kɛnɔŋk mɔ, mba ŋananɔŋk fɛ mi. Kɔ
ŋanafan kɛnɛ mame nɔyi kɛnɛ mɔ, mba ŋanane fɛ mi.

Kɔtɔksɛ dɔtotubcɛnɛ ta wɔbɔf

Mark 4.13-20; Luk 18.11-15

¹⁸ Awa nɛcɛŋkɛl tɛdisrɛ ta totubcɛnɛ ta wɔgbal defet.

¹⁹ Mɛŋgbɛn mɔkɔ mɛnatɛmpɛnɛ dɔpɔ meyi pɛmɔ fum nwe
ɛŋnɛ toloku ta dɛbɛ da dɔKɔm ta tɔsɔkɛr kɔ mɔ. Wɛlɛc pɛdɛr
pɛlɛk tɔkɔ anabɔf abɛkɛc ŋɔn mɔ. It'ɔyɔnɛ nwe ɛnasɔtɔ mɛŋgbɛn
dɔpɔ dacɔ mɔ.

²⁰ Mɛŋgbɛn mɛmɛ mɛnatɛmpɛnɛ kɛfo ka masar mɔ meyi pɛmɔ
fum nwe ɔnckɔnane Toloku ta Kanu pɛbanɔ ti katɔna pɛbotu
disrɛ mɔ,

²¹ mba wɛkayi eyi pɛmɔ pɛbɔf pɔtɔyɔ nɔncɔ: Kɛcɛmɛ kɛn
kɛfɔwon, pɛcuca kɔ kɛtɔrɛs kɛnckɔnader tɛta Toloku tatɔkɔ,
tɔŋsɔŋɛ kɔ kɛsak ti few.

²² Mɛŋgbɛn mɛmɛ anabɔf dɛbɛŋk mɔ meyi pɛmɔ fum nwe
ɛŋnɛ Toloku ta Kanu, mba mɛcɛm-cɛmɛnɛ mɛlarɛm ma doru kɔ
kɛtɛn daka, mes mamɔkɔ mɛrɛŋ medi Toloku tatɔkɔ, tɔsɔŋɛ ti
kɛtɔkom.

23 Mɛŋgbɛn mɛmɛ mɛnatɛmpɛnɛ antɔf ŋɔtɔt mɔ meyi pɛmɔ fum nwe ɛŋne Toloku pɛcɛɛ ti, tokom ntɛ tasar tin (100), tɔkɔ wɛcɔ camɛt-tin (60), kɔ tɔlɔma wɛcɔ maas (30).»

Totubcɛnɛ ta defet dɔtɔt kɔ yika yɛlɛc

24 Kɔ Yesu oloku ŋa sɔ totubcɛnɛ tɔlɔma: «Dɛbɛ da dɛKɔm dowurɛnɛ kɔ wɛrkun nwe ɔmbɔf defet dɔtɔt dale dɔn mɔ.

25 Pibi pɔlɔma afum ŋacdirɛ, kɔ wɛtɛr kɔn ender pɛbɔf yika yɛlɛc dɛbɔlɛ, k'ɔŋkɔ.

26 Ntɛ yɔbɔf yompon kɔ yokom mɔ, mba yika yɛlɛc yompon sɔ.

27 Kɔ acar a wɛka dale ŋander ŋaloku kɔ: «Mariki, bafɔ mɛŋgbɛn mɔtɔt mɔ mɛnabɔf dale dam ba? Deke yika yɛlɛc yɛyɛfɛ yedepon nnɔ-ɛ?»

28 Kɔ mariki oloku ŋa: «Wɛtɛr kem wɔlɔma ɔyɔ ti.» Kɔ acar ŋayif kɔ: «Mɛfan a sɛkɔ sɛwas yika yɛlɛc yayɔkɔ ba?»

29 Kɔ mariki oloku ŋa: «Ala, iŋnɛsɛ kɔ nɛndewas yika-ɛ, nɛndɛsɔ kɛcgbuktɛnɛ bɔlɛ.

30 Nɛcɛ yika yɛlɛc yɛbɛk kɔ bɔlɛ haŋ patɛl, kɔ tɛm ta kɛtɛl tendɛbɔp-ɛ, indɛloku atɛl: Nɛnɔŋkɛnɛ kɛrɛsna nɛgbuktu yika yɛlɛc nɛsɛk yi pacɔf, kɔ nɛlip-ɛ, nɛbɛr bɔlɛ kɛlɛ kem disrɛ.»

Totubcɛnɛ ta tɛŋgbɛn tɛfɛt pa dɔlakɔ

Mark 4.30-32; Luk 13.18-19

31 Kɔ Yesu oloku ŋa totubcɛnɛ tin: «Dɛbɛ da dɛKɔm dowurɛnɛ tɛŋgbɛn tɛfɛt mpɛ fum ɛlɛk k'ɔmbɔf pi dale dɔn mɔ.

32 Tɛŋgbɛn tatɔkɔ pɛfɛtɛ pɛtas mɛŋgbɛn fɔp, mba ntɛ pompon mɔ, kɔ pɛmbɛk pɛtas yɔbɔf ya dɔlakɔ fɔp, kɔ pɛndɛ pɔyɔnɛ kɛtɔk, kɔ tɔsɔŋɛ bɛmp ya darenɛ kɛdɛr yɔlɔ dɛwara wa ki.

Totubcɛnɛ ta lebin

Luk 13.20-21

33 Kɔ Yesu ɛntɔkɛ sɔ afum totubcɛnɛ tɔlɔma, pɛcloku: «Ntɛ tɔ dɛbɛ da dɛKɔm dowurɛnɛ pɛmɔ lebin ndɛ wɛran ɛŋlɛk pɛnɔktɛrɛnɛ di kɛmbɛfɛ kilo wɛcɔ mɛrɔŋ (20) mɔ. Kɔ kɛmbɛfɛ fɔp kɛmpɛ!»

Ta ake tɔ Yesu onclokɛnɛ motubcɛnɛ-ɛ?

Mark 4.33-34

34 Mamɔkɔ fɔp Yesu oncloku mi kɛnay ka afum dɛmotubcɛnɛ. Ti disrɛ Yesu oncloku fɛ ntɛ o ntɛ ta oloku totubcɛnɛ ta ti-ɛ,

35 ntɛ tɔŋsɔŋɛ moloku mɛmɛ sayibɛ ŋanaloku mɔ mɛlarɛ: «Motubcɛnɛ m'indɛlok-lokɛrɛ ŋa.

Indɛdɛŋk moloku mɛmɛ mɔŋgbɔpɛnɛ kɛyɛfɛ dɛkɛcɔp da doru mɔ.»

Yesu oloku tɛdisrɛ ta totubcɛnɛ ta defet dɔtɔt kɔ yika yɛlɛc

36 Kɔ Yesu esak kənanay ka afum k'embere deker, kɔ acepse ɔn darəŋ ɲander ɲaloku kɔ: «Məloku su tedisre ta yika yelec dale disre.»

37 Kɔ Yesu oloku ɲa: «Nwe ɔmbɔf mɛŋgben mətət mə, Wan ka Wərkun ɔfɔ.

38 Dale, doru dandɛ dɔ. Defet dətət, awut a dɛbe da dəkəm ɲɔ. Yika yelec, awut a Nɔŋk Njɛlec ɲɔ.

39 Wəter nwe ɔmbɔf yi mə, ɔyɔne Nɔŋk Njɛlec. Kətɛl kəyɔne dəkəlip da doru, atɛl ɲayɔne mɛleke.

40 Pəmɔ təkɔ aŋgbuktu yika yelec paləm yi dənenc mə, itɔ pəndeyi dəkəlip da doru.

41 Wan ka Wərkun endekere mɛleke mme mendewure dɛbe dɔn disre aŋe ɲaŋsɔŋe akɔ kəbere kiciya kɔ akɔ ɲaŋyɔ pələc mə,

42 mendeləm alɛc dənenc da Yahanama, difɔ kəbok kəŋkɔyi kɔ kəŋaŋərəne sek.

43 Alompu ɲandekəmot pəmɔ dec ndɛ deyi nde dɛbe da Papa kəŋan mə. Məna nwe məŋyɔ ləŋəs mə, mənɛ ti!»

Totubcɛne ta daka dətət dəgbɔpne

44 Kɔ Yesu endɛŋər sɔ totubcɛne nte: «Nte tɔ dɛbe da dəkəm dowurene pəmɔ daka deyeŋki kəway nde dəŋgbɔpne dale mə. Wərkun nwe ɛnəŋk di mə, pəgbəkere sɔ di kəmɛŋk. Pələre pəbotu, pəkɔ pəcaməs daka dəkɔ ɔyɔ dɛcaməs mə fəp, pəder pəway dale dandɛ.

45 Dɛbe da dəkəm dowurene sɔ nte: Wəcaməs nwe ɛnten tɛncəmbəl pa kɛma mə.

46 Nte ɔŋkɔ pənəŋk tɛncəmbəl pa kɛma pətət mə, k'ɔŋkɔ pəcaməs daka dəkɔ ɔyɔ mə fəp kəkəway tɛncəmbəl pa kɛma papəkɔ.»

Totubcɛne ta manta

47 Kɔ Yesu oloku sɔ totubcɛne nte: «Dɛbe da dəkəm dowurene manta mme aŋgbal dəkəba mə, kɔ mosumpər lɔp dokom fəp.

48 Kɔ mɛlare-ɛ, palin mi nde pəwosu, pandɛ kəpit-piti yəkɔ yentesɛ mə, pabɛr dətəŋku, pagbal yelec yəkɔ.

49 Itɔ pəndeyi dəkəlip da doru. Mɛleke mendekɔ mɛgbey alompu alɛc dacɔ.

50 Mendeləm alɛc dənenc da Yahanama, difɔ kəbok kəŋkɔyi kɔ kəŋaŋərəne sek.»

Totubcɛne ta daka dofu kɔ dokur

51 Kɔ Yesu eyif acepse ɔn darəŋ: «Nəncərə tedisre ta maməkɔ inatəksɛ nu mə ba? Kɔ ɲawosɛ: «Ey.»

52 Kɔ Yesu oloku ɲa: «Ti tɔsɔŋe nte atəksɛ fəp aŋe ɲayɔne acepse darəŋ a dɛbe da dəkəm mə ɲawurene kɔ wəkirin ka kələ nwe oŋwure daka dɔn dacɔ ca yofu kɔ yokur mə.»

Aka Nasaret ɲafati kəgbəkər Yesu kəlan

Mark 6.1-6; Luk 4.16-30

⁵³ Nte Yesu elip kəloku totubcɛnɛ tantɛ mɔ, k'eyɛfɛ di,

⁵⁴ k'ɔŋkɔ dare dɔn Nasarɛt. Dɔndo, kɔ Yesu eyɛfɛ kətəkɛ nde dəkətola Kanu danjan, nte cusu cəwos afum mɔ, kɔ ŋayɛfɛ kəyiftɛnɛ: «Deke Yesu ɔsɔtɔ kəcərə kəkɔtɛnɛ mes kətɔt kanjɛ kɔ mes mɛwɛy-wɛy mamɛ-ɛ?»

⁵⁵ Bafɔ wan ka kamdɛr ɔfɔ ba? Bafɔ kɛrɛ anjwe Mari kɔ awɛnc anja Sak, Isifu, Simɔŋ kɔ Yuda ba?

⁵⁶ Bafɔ akirɛ ɔn ŋayi su dacɔ ba? Deke ɔsɔtɔ mamɛ fəp-ɛ?»

⁵⁷ Mes maməkɔ mɛnayamsɛ ŋa kəgbəkər Yesu kəlanj. Awa kɔ Yesu oloku ŋa: «Afɔfati kələlɛs sayibɛ, mɛnɛ dare dɔn kɔ kələ kɔn disrɛ.»

⁵⁸ Dɔndo Nasarɛt, Yesu ɛnayɔ fɛ di mes mɛwɛy-wɛy mɛlarəm, bawo aka di ŋanabut kəlanj.

14

Defi da Aŋnabi Saŋ Batis

Mark 6.14-29; Luk 9.7-9

¹ Tɛm tatəkɔ, Herodu nwe ɛnatəmpər dɛbɛ da Kalile mɔ, ene pacloku teta Yesu.

² K'oloku afum ɔn aka dəsəŋka: «Saŋ Batis ɔfɔ! Afum afi dacɔ ɔfɔtɛ, it'ɔsɔŋɛ nte ɛntam kəyɔnɛ mes mɛwɛy-wɛy mɔ.»

³ Herodu ɛnaloku ti bawo nkɔn ɛnasom afum, ŋasumpər Saŋ Batis, ŋakot kɔ, ŋabɛr kɔ dɛbili teta Herodiyad wəran ka wɛnc Filip.

⁴ Saŋ oncloku Herodu: «Sariyɛ sɛmɔn'am kənɛncɛ kɔ.»

⁵ Herodu ɛnafanj kədif Saŋ, mba ɛncnɛsɛ kənay ka afum, bawo ŋanacɛm-cɛmɛnɛ a sayibɛ sɔ Saŋ ɔyɔnɛ.

⁶ Kəsata ka teren toluksər ta kəkɔm ka Herodu, kɔ wan wəran ka Herodiyad empisɛ fɔr ya afum anjɛ ŋanatəŋnɛ kəsata kanjɛ kɔ kirin, kɔ tɔmbɔt Herodu,

⁷ hanj kɔ Herodu ɛndɛrəm kəsɔŋ wan ka Herodiyad paka mpɛ o mpɛ ɛŋwer kɔ mɔ.

⁸ Kəmɛŋkəs ka iya kɔn Herodiyad, kɔ wəyɛcərə oloku: «Məsɔŋ im domp da Saŋ Batis depəlet.»

⁹ Wəbɛ Herodu, kəmɔncnɛ disrɛ, ɛnafanj fɛ kəbupərəɛ tes təkɔ ɛnadɛrəm fɔr ya afum akɔ ɛnawɛ kətəŋnɛ kəsata kɔn mɔ, kɔ Herodu osom a pasɔŋ wan ka Herodiyad domp dəkɔ ɛnawɛr kɔ mɔ.

¹⁰ K'asom kəkəgbinti domp da Saŋ Batis nde dɛbili.

¹¹ K'anjɛrɛ wəyɛcərə ka Herodiyad domp da Saŋ Batis depəlet, k'ɛŋkɛnɛ di kɛrɛ.

¹² Kɔ ɛcɛpsɛ a Saŋ Batis darəŋ ŋander ŋalɛk kəbɛl kɔn kɔ ŋanjɛ kɔ ŋawup. Nte telip mɔ, kɔ ŋanjɛ ŋasɔŋɛ ti kəcərə Yesu.

Yesu ɔsɔŋ afum wul kəcəmɛt yeri

Mat 15.32-39; Mark 6.30-44; Luk 9.10-17; Isaŋ 6.1-14

13 Nte Yesu ene moloku maməkə mə, k'elek abil k'əŋkə kəfo kəyer-yer. Mba kə kənay ka afum kənde kəcəre a Yesu eyefe di, kə ŋawur sədare səŋan, kə ŋasolne degbep kə ŋancepse kə darəŋ.

14 Nte Yesu ontor debil mə, k'ənəŋk kənay ka afum, k'əyənə ŋa nənəfər, k'entaməs acuy aŋan.

15 Nte dəfəy dəmbəp mə, kə acəpse a Yesu darəŋ ŋalətərne ŋaloku kə: «Kəfo kanke kəyə yer-yer kə dec dələp. Məsak kənay ka afum akanje ŋakə ŋawayəs yeri nde sədare səloma.»

16 Mba kə Yesu oloku ŋa: «Ali ŋaŋkə fe kəfo, nənəsərka nəsəŋ ŋa yeri.»

17 Kə acəpse ən darəŋ ŋaloku kə: «Cəcom kəcəmət kə lop mərəŋ gbəcərəm yə səyə nno.»

18 Kə Yesu oloku: «Nəkər'em yi nno.»

19 Kə Yesu osom kənay ka afum kənde yika kəron, k'elek cəcom nce kəcəmət kə lop mərəŋ, k'eyeki fər darenc, k'eyif Kanu barka. K'entepi cəcom k'əsəŋ ci acəpse ən darəŋ a ŋayer ci kənay ka afum.

20 Kə fəp fəsəm ci kə ŋanembəre, k'aŋkene Yesu cəfala wəco kə mərəŋ cəlarə cəcom cəlpəs.

21 Kənay ka afum aŋe ŋanasəm cəcom cacəkə mə ŋanabəp arkun wul kəcəmət (5.000), ta aləm aran kə awut-ε.

Yesu əŋkət kəba kəron

Mark 6.45-52; Isaŋ 6.16-21

22 Nte tencepər mə, gbəncana babəkə kə Yesu entare acəpse ən darəŋ kəberə debil, ŋanunkenə kəcəli mokuru məkə, nkən pəcsak kənay ka afum kəkə ndaraŋan.

23 Nte elip kəsak ka kənay ka afum kəkə ndaraŋan mə, k'empe tərə kəron kəkətola Kanu. Kə dəfəy dəmbəp kə di pəyi sona.

24 Tenatəŋne abil ŋəbələ pəpəŋ pəwosu, yam yecfikəli-fikəli abil, bawo kəgbofne kə ŋancnde.

25 Dəsəka dələpəs, kə Yesu ender nno ŋayi mə pəkət kəba kəron.

26 Nte acəpse ən darəŋ ŋanəŋk kə pəkət kəba kəron mə, kə pəyi ŋa yamayama. Kənesə kəŋan disre kə ŋaloku: «Tubari tə,» kə ŋaŋkule-kule.

27 Mba kə Yesu oloku ŋa gbəncana babəkə: «Nəbəkne! In'əfo, ta nənese!»

28 Kə Piyer oloku kə: «Mariki, kə təyənə mən'əfo-ε, məsom im ikət domun kəron ider nde məyi mə.»

29 Kə Yesu oloku kə: «Məder.» Kə Piyer ontor debil, k'əŋkət domun kəron, k'əŋkə nde Yesu eyi mə.

30 Mba nte enanəŋk afef ŋebək mə, k'enesə k'əŋkule-kule: «Mariki, məyac im!»

31 Gbəncana babəkə kə Yesu entenc kəca k'osumpər Piyer, k'oloku kə: «Məna məmpice kəlan, ta ake tə mənesərnene-ε?»

³² Yesu kɔ Piyer ɲambere debil, kɔ afef ɲesak kəwur.

³³ Acepse a Yesu darɛɲ aɲe ɲanayi debil mɔ ɲantontnɛne kɔ fɔr kirin, kɔ ɲaloku: «Wan ka Kanu yati mɔyɔnɛ!»

Yesu entamas acuy atɔf ɲa Kenesarɛt

Mark 6.53-56

³⁴ Yesu kɔ acepse ɔn darɛɲ ɲancali, kɔ ɲambɛp atɔf ɲa Kenesarɛt.

³⁵ Kɔ afum a dare dadɔkɔ ɲanɛpɛl Yesu, kɔ ɲandɛɲk kɛder kɔn sɛdare sɛkɔ fɛp, k'anɲkɛrɛ kɔ acuy fɛp.

³⁶ K'aletsɛnɛ kɔ pɛwɔsɛ afum ɲagbuɲɛnɛ ali dobol da burumus bɔn. Akɔ ɲanagbuɲɛnɛ di mɔ fɛp ɲanatamɛ keɲ.

15

Mɔyɔ mokur ma atem kɔ mosom ma Kanu

Mark 7.1-13

¹ AFarisi kɔ atɔkse sariye s'aSuyif ɲander nnɔ Yesu eyi mɔ kɔyɛfɛ Yerusalem, kɔ ɲayif kɔ:

² «Ta ake tɔ acepse am darɛɲ ɲantɔcɛmɛnɛ tɔyɔ tokur ta atem darɛɲ-ɛ? Bawo ɲafɔsɔkɛsnɛ saliyɛ a ɲacdi yeri-ɛ.»

³ Kɔ Yesu eyif ɲa: «Kɔ nɔna, ta ake tɔ nɔntɔcɛmɛnɛ mɛtɔkse mɛ Kanu kɛsom mɔ, kɔ nɔncɛmɛ mɔyɔ mokur ma atem anu darɛɲ-ɛ?»

⁴ Bawo Kanu kɛloku: «Mɛlɛlɛs wisi kɔ wiri» k'oloku sɔ: «Nwɛ ɔɲlok-lokɛr kas pɔyɔnɛ fɛ ti kɛrɛ pɛlɛc mɔ, padif wɛkayi.»

⁵ Mba nɔna nɛɲloku a kɔ mɛloku wisi kɔ pɔyɔnɛ fɛ ti wiri: «Paka mɛ pɛmarna isɔɲ ɔm kɛmar kam mɔ, isɔɲ pi Kanu.»

⁶ ali wɛkayi ɔyɔnɛ fɛ sɔ kas kɔ pɔyɔnɛ fɛ ti kɛrɛ tes tɔlɔma.» Ti disrɛ, nɔnimɛ tosom ta Kanu mɔyɔ mokur ma atem anu.

⁷ Nɔna abanɛnɛ kɛlomp, Esayi ɛnaloku belbel tetonu cɛsayibɛ:

⁸ «Afum akanɛ dɛcusu gbɛcɛrɛm ɲanɲlɛlɛs im, mba bɛkɛc yanɲan yɔmbɔl'em pɛpɔɲ.

⁹ Kɛsali nɛɛ ɲanctolan'em ɲaclɔɲn'em mɔ kɔyɔ fɛ dɛkɛcɛmɛ, bawo mosom mɛɛ ɲantɔkse mɔ, afum ɲapɛr mi, bafɔ Kanu.»»

Ca nyɛ yɔɲsɔɲɛ fum kɛtɔsɔk mɔ

Mark 7.14-23

¹⁰ Kɔ Yesu ewe kɛnay ka afum k'oloku ɲa: «Nɛcɛɲkɛl, nɛcɛrɛ sɔ ti belbel!

¹¹ Bafɔ peri mɛ pɛmbere fum dɛkusu mɔ pɔɲsɔɲɛ fum kɛtɔsɔk, mba mɛ pɔɲwur kɔ dɛkusu yati mɔ.»

¹² Kɔ acepse ɔn darɛɲ ɲander ɲayif kɔ: «Mɛncɛrɛ a toloku tatɔkɔ tenasɔɲɛ aFarisi kɛfɛtenɛ?»

¹³ Kɔ Yesu oloku: «Pɔbɔf mɛ o mɛ Papa kem nwɛ eyi nde dɛkɛm ɛnatɔbɔf mɔ, andɛgbuktu pi.

14 Nāce ɲa: Atɔnɔŋk ɲɔ aɲe ɲayi kəkɔtɛnɛ atɔnɔŋk alɔma mɔ. Kɔ wɔtɔnɔŋk endekɔtɛnɛ wɔtɔnɔŋk-ɛ, mɛrɔŋ maɲan fɛp ɲantɛmpɛnɛ debi.

15 Kɔ Piyɛr oloku Yesu: «Məsɔksɛr su tedisɛ ta tɛtɔksɛ tatɔkɔ.»

16 Kɔ Yesu eyif ɲa: «Nəna sɔ nəsɔɔyi kɔtɔcɛrɛ disɛ ba?

17 Nəncɛrɛ fɛ a peri mpɛ pɛmbɛrɛ fum dəkusu mɔ dəkɔr pɔŋkɔ a padewurɛ pi nde dəkofi?

18 Mba ntɛ tonɲur dəkusu mɔ, dɛbəkɔc tɛɲyɛfɛ, tatɔkɔ tɔŋsɔŋɛ fum kɔtɔsɔk.

19 Bawo mɛcɛm-cɛmnɛ mɛlɛc, kədif fum, kəsumpɛr dalakɔ, mɔkɔt mɛlɛc, deke, sede sɛlɛc, kɛfor, dɛbəkɔc mes mamɔkɔ fɛp mɛɲyɛfɛ.

20 Mes mamɔkɔ mɔŋsɔŋɛ fum kɔtɔsɔk, mba kədi peri ta mɛmbikɛnɛ kɛfɔsɔŋɛ fum kɔtɔsɔk.»

Wəran wɔcikəra ɛɲgbɛkər Yesu kələŋ

Mark 7.24-30

21 Kɔ Yesu eyɛfɛ dəndo, k'ɔŋkɔ atɔf ɲa Tir kɔ Sidɔŋ.

22 Gbəncana babɔkɔ kɔ wəran wəKanaŋ nwe ɛnayɛfɛ atɔf ɲaŋkɔ mɔ, eyɛfɛ kəkulɛ-kulɛ: «Məyɔn'em nɔnɔfɔr, Mariki, Wan ka Dawuda! Nɔŋk ɲin ɲɛlɛc ɲontɔŋkulu-tonɲkulu wan kem wəran pɔpɔŋ.»

23 Ali toloku Yesu ɛnaloku fɛ kɔ. Kɔ acɛpse a Yesu darəŋ ɲander ɲaletsɛnɛ nkɔn Yesu: «Məbɛlɔs kɔ, bawo eyi kəkulɛ-kulɛ su kumunt darəŋ.»

24 Kɔ Yesu olukɛ ɲa: «Mba Kanu kəsom im nda aYisrayel gbɛcɛrɛm, aɲe ɲayi pɛmɔ ɲkesiya nyɛ yɔsɔlɛ mɔ.»

25 Mba kɔ wəran nwe ender pɔtontnɛnɛ Yesu fɔr kirin pɛclɔku: «Mariki, mɛdɛ mɛmar im!»

26 Mba kɔ Yesu oloku kɔ: «Pəntesɛ fɛ kɛkɛkər awut kɛcom mɛlɛmɛ ki cen.»

27 Wəran nwe olukɛ kɔ: «Kance kɔ, Mariki. Mba mɛcen, yeri nyɛ yɛntɛmpɛnɛ amɛsa dɛntɔf ya aka mi mɔ, yɔ mendi.»

28 Kɔ Yesu oloku kɔ: «Wəran, kələŋ kam kɛmbɛk! Kanu kəsɔŋɛ tɛfaŋ tam teyi.» Gbəncana babɔkɔ bɔ wan kɔn wəran ɛnatamnɛ.

Yesu ɛntaməs acuy alarəm

Mark 7.31

29 Kɔ Yesu eyɛfɛ kəfo kanɲkɔ k'osumpɛr dɔpɔ da agbɛp ɲa kəba ka Kalile. K'ɔŋkɔ pɛpɛsɛ tɔrɔ kɔrɔŋ k'ɛndɛ.

30 Kɔ kənay ka afum alarəm kənder nnɔ Yesu eyi mɔ. Kɔ afum atɔtam kəkɔt, atɔnɔŋk, bobo, alaɲyiru kɔ acunɛ docu dɛlarɛm, kɔ ɲander ɲabocɛr ɲa Yesu dɛntɔf, k'ɛntaməs ɲa,

31 kɔ cusu cəwos kənay ka afum kənɔŋk bobo ɲaclɔk-loku, aka laɲyiru ɲaluksɛrɛnɛ sɔ kɛtamnɛ, atɔtam kəkɔt ɲackɔt, atɔnɔŋk ɲacnɔŋk. Kɔ ɲaɲkor-koru Kanu ka Yisrayel.

Yesu əsəh arkun wul maŋkələ yeri

Mark 8.1-10

³² Kə Yesu ewe aɕɛpsɛ ən darəh k'oloku ɲa: «Nənəfər deyi'm teta kənay ka afum kaŋkɛ: Mata maas ɲayi kə ina, ɲayə fɛ sə paka o paka pedi. Ifaŋ fɛ kəsak ɲa ɲakənɛ dor, iɲnese ta dis dəkələl ɲa dəpə.»

³³ Kə aɕɛpsɛ ən darəh ɲayifkə: «Deke səh kəsətə nənə kəfo kəyer-yer kaŋkɛ cəcom nɛ səndenembərsɛ kənay ka afum alarəm akaŋɛ mə-ɛ?»

³⁴ Kə Yesu eyif ɲa: «Cəcom cəke cə nəyə-ɛ?» Kə aɕɛpsɛ ən darəh ɲaloku: «Cəcom camət-mɛrəh kə molop mələma.»

³⁵ Kə Yesu osom kənay ka afum kəndɛ dəntəf.

³⁶ Kə Yesu ɛlək cəcom nɛ camət-mɛrəh kə lop, nte elip kəyif Kanu barka mə, k'entepi yi, k'eyɛfɛ kəsəhəs yi aɕɛpsɛ ən darəh ɲayerəs kənay ka afum.

³⁷ Kə kənay ka afum kədi yeri nyɛ kə ɲanembərə, k'awɛtəs cəcom cəlpəs nɛ cənalare cəfala camət-mɛrəh mə.

³⁸ Arkun aɲɛ ɲanadi yeri yayəkə mə ɲanabəp afum wul maŋkələ (4.000), ta aləm aran kə awut-ɛ.

³⁹ Nte Yesu ɛsak kənay ka afum kə ɲalukus nde ndaranan mə, kə nkən embərə debil k'əh kə atəf ɲa Makadaŋ.

16

AFarisi kə aSadisi ɲawer Yesu tɛgbəkərə tɛwɛy-wɛy ta dəkəm

Mark 8.11-13; Luk 12.54-56

¹ AFarisi kə aSadisi ɲaŋkə ɲabəp Yesu kə ɲancəpɛ kə towul dəmoloku, kə ɲawer kə a pəmentər ɲa tɛgbəkərə tɛwɛy-wɛy nte tementər a Kanu kəsom kə mə.

² Kə Yesu olukɛ ɲa: «Dec dərəfəy kə kəm kəyimbərə-ɛ, nəloku a pəndenayə waŋkərə.

³ Bətbət kə kəm kənəh kəl pəyim kə pəbi-ɛ, nəloku: «Afɛf ɲəpəh ɲende məkə wur!» Kə nəhgbətne kəm-ɛ, nəncərə kəloku təkə kəndenayi mə, mba nəncərə fɛ kəloku mɛgbəkərə ma tem tosu!

⁴ Dɛtemp dɛləc dətəcəmə danapa da Kanu darəh ɲayi kəten tɛgbəkərə tɛwɛy-wɛy nte tementər a Kanu kəsom im mə, mba afəsəmentər ɲa tɛgbəkərə nte o nte kə pəntəyənɛ ta Yunusa-ɛ.» Kə Yesu ɛsak ɲa k'əh kə.

Mɛtəksɛ mɛləc m'aFarisi k'aSadisi

Mark 8.14-21

⁵ Nte aɕɛpsɛ darəh a Yesu ɲanccali mokuru məkə mə, kə ɲampələrne kələk cəcom.

⁶ Kə Yesu oloku ɲa: «Nəkəmbərne lebin d'aSadisi kə d'aFarisi!»

⁷ Kə aɕɛpsɛ ən darəh ɲayɛfɛ kəgbəkələne taŋan: «Nte səntələk cəcom mə toŋloke ti.»

⁸ Kɔ Yesu encərə məcemcəmne maŋan, k'eyif ŋa: «Ta ake tɔ nəŋyifene-ε, nana apice kəlan, nəcloku a nəyɔ fe cəcom?»

⁹ Haŋ ndəkəl nantacərə fe? Nəncem-cəmne fe teta cəcom kəcamət nce arkun wul kəcamət (5.000) ŋanasəm kɔ cəfala cəke c'anaker'em cəcom cəlpəs-ε?

¹⁰ Nəncem-cəmne fe sɔ cəcom camət-mərəŋ nce arkun wul maŋkələ (4.000) ŋanasəm, kɔ cəfala cəke cɔ nənalukəs'em cəcom cəlpəs-ε?

¹¹ Cəke cɔ nantam kətɔcərə a bafɔ teta cəcom t'iyi kəloku nu-ε? Mba nəkembərne lebin d'aFarisi kɔ d'aSadisi.»

¹² Itɔ acəpse a Yesu darəŋ ŋanacərə oŋ a bafɔ teta lebin da cəcom t'onclok-lokərə ŋa, mba teta metəkse ma aFarisi kɔ aSadisi.

Yesu ɔyɔne wəyac nwe Kanu kəŋayek-yek mə

Mark 8.27-30; Luk 9.18-21

¹³ Nte embərə sədare sa Sesari sa Filip mə, kɔ Yesu eyif acəpse ɔn darəŋ: «Nte afum ŋaŋloku mə, an'ɔ Wan ka Wərkun ɔyɔne-ε?»

¹⁴ Kɔ acəpse ɔn darəŋ ŋalukse kɔ: «Afum alɔma ŋaloku a Aŋnabi Saŋ Batis, kɔ alɔma a Eli, mba alɔma ŋaloku sɔ a Yeremy kɔ pəyɔne fe ti-ε, sayibe səlɔma sɔ ɔyɔne.»

¹⁵ Kɔ Yesu eyif ŋa: «Pecemcəmne ponu, an'iyɔne-ε?»

¹⁶ Kɔ Siməŋ Piyer oloku: «Məna, Krist məyɔne, wan ka Kanu nkɛ kəyi doru o doru mə.»

¹⁷ Kɔ Yesu oloku kɔ: «Pəbət əm, Siməŋ wan ka Yunusa, bawo bafɔ afum ŋasəŋ'am ti kəcərə, mba Papa kem nwe eyi nde dəkəm mə!

¹⁸ Mba ina, iclok'əm, Piyer məyɔne, itɔ tatəkɔ <tasar>, mpe indecəmbər kələ ka kəlonkanɛ ka alaŋ em kəron mə. Ali defi dɔfɔdetam tələm o tələm nnɔ peyi mə.

¹⁹ Indesəŋ əm masapa ma dəbe da dəkəm: Nte o nte məndeməne nnɔ doru dandɛ mə, Kanu kəndekəmənɛ ti dəkəm. Nte o nte məndewose nnɔ doru dandɛ mə, Kanu kəndekəwose ti nde dəkəm.»

²⁰ Kɔ Yesu əmənɛ acəpse ɔn darəŋ kəloku ti ali fum a Krist ɔyɔne, wəyək-yek nwe Kanu kənasəm kədəyac afum a doru mə.

Yesu endəŋk defi dən kɔ kəfɔte kən

Mark 8.31-9.1; Luk 9.22-27

²¹ Tɛm tatəkɔ kɔ Yesu oncop kəlok-lokər acəpse ɔn gbasŋa a mənɛ pəkɔ Yerusalem. Dəndo abeki, alonɛ apəŋ kɔ atəkse sariye sa aSuyif ŋaŋkətərəs kɔ pəlarəm, padif kɔ, pəfɔte afi daco tataka ta maas.

²² Kɔ Piyer ewe Yesu kəsək k'eyefe kənal kɔ, pəcloku: «Kanu kəyac əm ti, Mariki! Tatəkɔ tɔfɔbər əm few.»

²³ Mba kɔ Yesu eŋkafələ k'olukse Piyer: «Məkafəl'em kumunt darəŋ, məna Sentani! Məyamsər'em kəcəpər dɔpɔ nde pəmar

icepær mǝ. Iw'am tewe ta Sentani bawo mǝfǝcem-cemne pǝmǝ Kanu, mba pǝmǝ afum.»

²⁴ Kǝ Yesu oloku acepse ǝn darǝŋ: «Kǝ fum efaŋ kǝceps'em darǝŋ-ε, wǝkayi pǝsak kǝcem-cemne teta nkǝnsarka, pǝgbanne kǝtak kǝn kǝpǝmpǝl, pǝcem'em darǝŋ.

²⁵ Bawo nwe o nwe eŋsep kǝyac kiyi kǝn doru mǝ, kǝndesalpær kǝ, mba nwe o nwe kiyi kǝn doru kǝŋsalpær teta ina mǝ, mǝndesǝtǝ ki.

²⁶ Dǝkǝcǝme dere dǝ tǝyǝ fum kǝsǝtǝ kǝn doru kǝrkǝr, kiyi kǝn doru kǝsǝlær kǝ-ε? Ake fum ǝntam kǝsǝŋ kǝwurse ka kiyi kǝn doru-ε?

²⁷ Iloku nu ti, bawo Wan ka Wǝrkun endeder dǝnǝrǝ da debeki da Kas kǝ mǝleke ǝn, endesǝŋ nwe o nwe kǝway ka mes mǝn mǝyǝ.

²⁸ Kance icloku nu: Alǝma ŋayi su dacǝ nnǝ, aŋe ŋantǝdefi ta ŋanǝŋk Wan ka Wǝrkun pǝcder dǝbe dǝn disre mǝ-ε.

17

Kǝtǝŋkǝle ka Yesu

Mark 9.2-13; Luk 9.22-36

¹ Nte mata camǝt-tin mencepær mǝ, kǝ Yesu elek Piyer, Sak kǝ wenc Isan, k'ǝŋkekǝre ŋa kǝsak tǝrǝ tenjeci kǝrǝŋ.

² Kǝ Yesu ǝŋkǝ pǝtǝŋkǝle kǝro fǝr yanǝn kirin: Kǝ kǝro kǝn kǝncop kǝmotǝr-motǝr pǝmǝ dec, kǝ yamos yǝn pǝmǝ pǝwanǝkǝra.

³ Gbǝncana babǝkǝ kǝ acepse ǝn darǝŋ ŋanǝŋk Aŋnabi Musa kǝ Aŋnabi Eli ŋawurǝr Yesu ŋaclok-loku.

⁴ Kǝ Piyer oloku Yesu: «Mariki, pǝntese su kǝyi nnǝ! Kǝ mǝwose-ε, incǝmbǝr nnǝ ŋgbancan maas, ŋin ŋa mǝna, ŋin ŋa Musa kǝ ŋin ŋa Eli.»

⁵ Nte Piyer eyi kǝlok-loku mǝ, gbǝncana babǝkǝ kǝ kǝp kǝmotǝr-motǝr kǝŋgbǝpǝrne ŋa. Awa kǝ dim dowur dǝkǝp kǝŋkǝ docloku: «Wǝkawε, wan kem nwe imbǝtǝr mǝ ǝfǝ, nkǝn ǝbǝt im mes belbel. Nǝcǝŋkǝl kǝ!»

⁶ Nte acepse darǝŋ a Yesu ŋane moloku mamǝkǝ mǝ, kǝ ŋantǝmpene ŋagbǝpse nte kǝnese kǝpǝŋ kǝsumpǝr ŋa mǝ.

⁷ Mba kǝ Yesu ǝlǝtǝrne, k'ǝŋgbunǝne ŋa kǝca kǝn k'oloku: «Nǝyεfe, ta nǝnese!»

⁸ Nte ŋayekti fǝr mǝ, ŋanǝŋk fe fum nwe o nwe mǝne Yesu sona.

⁹ Nte ŋanctor dǝtǝrǝ mǝ, kǝ Yesu osom ŋa nte: «Ta nǝloku nwe o nwe nte nǝnǝŋk mǝ han Wan ka Wǝrkun pǝfǝte afi dacǝ.»

¹⁰ Kǝ acepse darǝŋ a Yesu ŋayif kǝ toloku nte: «Ta ake tǝ atǝkse sariye s'aSuyif ŋanloke a mǝne Aŋnabi Eli pǝnunǝkene kǝder kǝresna a wǝyεk-yεk pǝdeder-ε?»

11 Kɔ Yesu olukɛ ɲa: «Kance kɔ, a mɛnɛ Eli pɛnuɲkɛnɛ pɛder kɛdelompɛs mes fɛp.

12 Mba icloku nu a Eli elip kɛder: ɲanɛpɛl fɛ kɔ, kɔ ɲayɔ kɔ pɛmɔ tɔkɔ ɲafan mɔ. Itɔ ɲandɛtɔrɛs sɔ Wan ka Wɛrkun.»

13 Kɔ aɛpɛsɛ darɛɲ a Yesu ɲancɛrɛ oɲ a teta Sanj Batis tɔ Yesu eyi kɛloku.

Yesu entamɛs wan nwe docu da kɛtempɛnɛ dɛnayi mɔ

Mark 9.14-29; Luk 9.37-43

14 Ntɛ Yesu kɔ aɛpɛsɛ ɔn darɛɲ ɲalɔtɛrɛnɛ kɛnay ka afum mɔ, kɔ wɛrkun wɛlɔma ender pɛcɛpɛ kɔ suwu fɔr kirin,

15 pɛcloku: «Mariki, mɛyɔnɛ wan kem nɔnɔfɔr, nwe ɔyɔ docu da kɛtempɛnɛ mɔ, tɔntɔrɛs kɔ belbel. Dɛnɛnc kɔ dɛromun elasnɛ kɛtempɛnɛ.

16 Inkenɛ kɔ aɛpɛsɛ am darɛɲ mba ɲantam fɛ kɛtamɛs kɔ.»

17 Kɔ Yesu oɲkulɛrɛnɛ: «Nɛna afum a dɛtemp da tɛm tante dɛkafɛlɛ-kafɛlɛ, dɔtɔlanj Kanu, ake tɛm t'indɛsɔyi kɔ nɛna-ɛ, icɛmɛ nu dɛntɔf hanj tɛm tɛrɛ-ɛ? Nɛkɛr'em kɔ nnɔ.»

18 Kɔ Yesu ɛɲgbɛɲ-gbɛɲɛr ɲɔɲk ɲɛlɛc ɲaɲɔkɔ, kɔ ɲowur wan wɛrkun nwe, k'ɛntamɛnɛ gbɛncana babɔkɔ.

19 Kɔ aɛpɛsɛ ɔn darɛɲ ɲander ɲayif Yesu yɔkyɔk: «Ake'sɔɲɛ ntɛ sɛna sɛntɔtam kɛbelɛs ɲi sɛnasɛrka mɔ-ɛ?»

20 Kɔ Yesu oloku ɲa: «Bawo kɛlanj konu kɛmpicɛ. Kance, icloku nu, kɔ kɛlanj konu kɛyi pɛmɔ tɛɲgbɛn tɛfɛt-ɛ, nɛɲloku tɔrɔ tante: «Mɛcɛpɛ nnɔ, mɛkɔ ndɛ,» pɛncɛpɛ di. Tes o tes tɔfɔyi ntɛ nɛntɔtam mɔ.» [

21 *]

Yesu ɔɲgbɔkɛrɛ sɔ kɛsɔɲɛ kɛcɛrɛ defɛ kɔ kɛfɔtɛ kɛn

Mark 9.30-32; Luk 9.43-45

22 Dɔsɔk dɔlɔma ntɛ aɛpɛsɛ a Yesu darɛɲ ɲanalonjkanɛ Kalile mɔ. Kɔ Yesu oloku ɲa: «Andɛlɛk Wan ka Wɛrkun, pabɛr kɔ arkun dɛwaca.

23 Akakɔ ɲandedif kɔ, mba tataka ta maas ta defɛ dɔn pɛfɔtɛ afɛ dacɔ.» Kɔ aɛpɛsɛ ɔn darɛɲ ɲamɔncnɛ hanj kɔ tɔntɔrɛs ɲa dɛbɛkɛc.

Kɛsɔɲɛ dut da kɛlɔ kɛpɔɲɛ ka Kanu

24 Ntɛ Yesu kɔ aɛpɛsɛ ɔn darɛɲ ɲambɛrɛ dare da Kaparnam mɔ, k'abanɛs dut da kɛlɔ kɛpɔɲɛ ka Kanu ɲander ɲayif Piyɛr: «Wɛtɛkɛ konu ɔfɔsɔɲɛ dut da kɛlɔ kɛpɔɲɛ ka Kanu ba?»

25 Kɔ Piyɛr owosɛ, «Ey, ɔɲsɔɲ di.» Tɛm ntɛ Piyɛr ɛncɛrɛ kɛlɔ disrɛ mɔ, kɔ Yesu ɔnuɲkɛnɛ kɛlɛk moloku, k'eyif: «Simɔɲ, cɛkɛ cɔ mɛncɛm-cɛmnɛ-ɛ? Are ɲɔ pɛmar kɛsɔɲɛ abɛ a doru dandɛ

* **17:21** Yecicɛs yokur yɔlɔma yɛdɛɲɛr moloku mamɛ: «Mba kɛtola Kanu kɔ kɛsɔɲɛ gbɛcɛrɛm kɔ mantam kɛbɛlɛsɛ yɔɲk pɛmɔ yayɛ.»

dut da teren kɔ dɔkɔ ambanɔsɛr arkun tɛm tɔlɔma mɔ: Afum aka tɔf yanɔn, kɔ pɛyɔnɛ fɛ ti acikɛra ba?»

²⁶ Kɔ Piyɛr oloku: «Acikɛra nɔ pɛmar nɔsɔn di.» Kɔ Yesu oloku kɔ: «Afum aka dɔtɔf nɔ nɔfɔsɔn dut.

²⁷ Mba ta payamsɛr abanɔs dut anɛ. Itɔ mɛndekɔnɛ nde dɛkɛba mɛfɛkɛs, alop nɔcɔkɔ-cɔkɔ nɔkɔ mɛnkɔsumpɛr mɔ, mɛmɛpi nɔi kusu. Mɛnɔkɔbɛp nɔi disrɛ pɛsam, mɛlɛk pi mɛsɔn dut dem kɔ dam.»

18

Nwɛ embɛk dɛkɛcɛmɛ nde dɛbɛ da dɛKɔm mɔ

Mark 9.33-37; Luk 9.46-48

¹ Tɛm tatɔkɔ kɔ acɛpɛsɛ darɔn a Yesu nɔander nɔayif kɔ: «An'ɛbɛk dɛkɛcɛmɛ nde dɛbɛ da dɛKɔm-ɛ?»

² Kɔ Yesu ewe wanfɛt, k'ɛncɛmbɛr kɔ nɔa daco,

³ k'oloku: «Kance, icloku nu: Kɔ nɛntɔsɛkpɛr mɛra nɔyi pɛmɔ awut afɛt-ɛ, nɛfɔdekɔbɛrɛ dɛbɛ da dɛkɔm.

⁴ Ti tɔsɔnɛ, nwɛ o nwɛ ontore banca pɛmɔ wanfɛt wɛkawɛ mɔ, nkɔn endekɔyɔnɛ nwɛ embɛk dɛkɛcɛmɛ nde dɛbɛ da dɛKɔm mɔ.

⁵ Nwɛ o nwɛ embanɔ wanfɛt pɛmɔ wɛkawɛ tewɛ ta ina Yesu mɔ, ina yati embanɔ.»

Kɛbɛnɛ kɛpɔn

Mark 9.42-48; Luk 17.1-2

⁶ Mba kɔ fum ɔsɔnɛ wanfɛt kɛlonɛ nwɛ ɛnɔgbɛkɛr im kɛlanɔ mɔ-ɛ, pɛlɛc papɔkɔ pɛncɛpɛr kɛgbɛk kɔ tasar tɔpɔn dɛkilim, palɛm kɔ dɛkɛba.

⁷ Apayo, pɛlɛc pɛrɛ pɛyi doru! Mes mɛmɛ mɔnɔsɔnɛ afum kɛlonɛ mɔ mɛla! Mes mamɔkɔ mɔfɔlip, mba pɛlɛc pɛyi nwɛ ɔnɔsɔnɛ mes mamɔkɔ kɛyi mɔ!

⁸ Kɔ kɛca kam kɔ pɛyɔnɛ fɛ ti kɛcɛk kam kɛndɛsɔn'am kɛciya-ɛ, mɛgbinti ki mɛlɛm ki kɛbɔl'am. Kɛbɛrɛ kiyi kam ka doru o doru mɛyɔ kɛca kin kɔ pɛyɔnɛ fɛ ti kɛcɛk kin kɛncɛpɛr kɛlɛm kam yahanama mɛyɔ waca mɛrɔn kɔ wɛcɛk mɛrɔn. Bawo dɛndo nɛnc dɔfɔnimɛ di doru o doru.

⁹ Kɔ tɔyɔnɛ dɔfɔr dam dɛndɛsɔn'am kɛciya-ɛ, mɛkakti di mɛlɛm dɛbɔl'am. Kɛbɛrɛ kiyi kam ka doru o doru mɛyɔ dɔfɔr din kɛncɛpɛr kɛlɛm kam dɛnɛnc da yahanama mɛyɔ fɔr mɛrɔn.

Totubcɛnɛ ta anɔkesiya nɔsɔlɛ nɔnɛ nɔlukus mɔ

Luk 15.3-7

¹⁰ Ta nɛdɛncɛs tɛta fum wɛfɛt nwɛ o nwɛ, icloku nu, a mɛlɛkɛ maɔan mɛmɛ mɛyi nde dɛkɔm mɔ, mɛnyɔi tɛm fɔp fɔr ya Kanu Papa kem nwɛ eyi nde dɛkɔm mɔ.

¹¹ [*]

* **18:11** Yɔnɔgbɛkɛrɛ yokur ya Yɛcɛs Yosokɔ yɛlarɛm yɛndɛnɔr moloku mɛmɛ: «Bawo Wan ka Wɛrkun endɛr kɛdetɛn kɔ kɛyɔc anɛ nɔanasɔlɛ mɔ.»

12 Cæke cɔ nāncem-cemne-ε? Kɔ fum ɔyɔ ŋkesiya tasar tin (100), ŋin ŋɔsɔle-ε, fum nwe ɔfɔsak ŋkesiya yɔkɔ wɔcɔ camət-manjkæle kɔ camət-manjkæle (99) nde dɛmɔrɔ kɛkɔten ŋin ŋɔkɔ ŋɔsɔle mɔ ba?

13 Kance icloku nu: Kɔ fum enɔŋk ankesiya ŋɔsɔle ŋɔn ŋin-ε, teta ŋin ŋanɔkɔ enɔŋk mɔ tɔmbɔt kɔ tetas ta yɔkɔ wɔcɔ camət-manjkæle kɔ camət-manjkæle (99) nye yenatɔsɔle mɔ.

14 Tin tayi tɔ: Kanu Papa konu nwe eyi nde dɛkɔm mɔ, εfan fε afɛkɛl ŋa wɛkin ŋɔsɔle awut akanε daco.

Mɔyɔ nte kɔ wenc æm ɔyɔ'm pɔlɛc-ε

15 Kɔ wenc æm enciyan'am-ε, mɛkɔ mɛbɛp kɔ mɛrɔŋ monu, mɔloku kɔ ti. K'enen'am toloku tatɔkɔ-ε, mɛntam kɔ.

16 Mba k'ɔntɔnen'am toloku tatɔkɔ-ε, mɛkɔ mɛten fum wɛkin kɔ pɛyɔne fε ti afum mɛrɔŋ, nte tɔŋsɔŋε afum mɛrɔŋ, maas ŋayɔne toloku tatɔkɔ sede mɔ.

17 K'εfati sɔ kɛcɔŋkɛl ŋa-ε, mɛkɔ mɔloku ti aka kɔlɔŋkanε ka alaŋ a Yesu, k'εfati sɔ kɛcɔŋkɛl kɔlɔŋkanε kanjkɔ-ε, nɛsumpɛr kɔ pɛmɔ wɔtɔlaŋ kɔ wɛbanjɛs dut.

18 Kance icloku nu, tes nte o nte nɛndemɔne doru dandε mɔ, Kanu kɛndekɔmɔne ti nde dɛKɔm, tes nte o nte nɛdewose nno doru dandε mɔ, Kanu kɛndekɔwose ti nde dɛKɔm.

19 Kance icloku nu sɔ: Kɔ tɔyɔne afum mɛrɔŋ ŋasɔl kɛtɔŋne disre ŋatola Kanu mpe o mpe, Papa kem Kanu nwe eyi nde dɛkɔm mɔ ɔŋsɔŋ ŋa pi.

20 Bawo nno afum mɛrɔŋ, maas ŋambɛpsene teta tewe tem mɔ, inyi ŋa daco.

Totubcene ta wɛmarɛs nwe εŋfati kɛŋaŋne mɔ

21 Kɔ Piyer ender pɛyif Yesu: «Kɔ wenc im ender pɛciyan'em, cæke cɔ pɛmar im injaŋnene kɔ-ε? Haŋ camət-mɛrɔŋ ba?»

22 Kɔ Yesu oloku: «Iloku f'am haŋ camət-mɛrɔŋ gbɛcɛrɛm, mba haŋ wɔcɔ camət-mɛrɔŋ yoboc camət-mɛrɔŋ (70 yoboc 7).

23 Bawo dɛbe da dɛKɔm dowurene nte: Wɛbe nwe εŋfan kɛsɔtɛr amarɛs ɔn debe dɔn mɔ.

24 Nte oncop ti kɔyɔ mɔ, k'anjkere kɔ wɛmarɛs wɛkin nwe εnatɔmpɛre kɔ pɛsam pɔpɔŋ mɔ.

25 Nte wɛmarɛs εnatɔtam kɔlukse pɛsam mpe mɔ, kɔ wɛbe kɔn osom a pacamɛs kɔ pɛyɔne wɛcar, wɛran kɔn kɔ awut ɔn kɔ daka dɔkɔ ɔyɔ mɔ fɛp, nte tɔŋsɔŋε pɛsɔŋ debe dɔn mɔ.

26 Kɔ wɛmarɛs nwe encɛpe wɛbe kɔn suwu fɔr kirin, pɛcloku kɔ: «Mɛŋaŋne, ta mɛbɛlkɛr im, indeluks'am debe dam fɛp!»

27 Kɔ wɛbe kɔn ɔyɔne kɔ nɔnɔfɔr, k'εŋaŋnene kɔ pɛsam papɔkɔ, k'εsak wɛmarɛs kɔn k'ɔŋkɔ.

28 Nte wɛmarɛs nwe owur mɔ, kɔ ŋambɛpene kɔ wanapa kɔn wɛmarɛs wɛlɔma nwe εnatɔmpɛre sɔ nkɔn debe da tapɛsam pepic mɔ. Nkɔn nwe anatɔmpɛre tapɛsam mɔ, osumpɛr

wətəmpərə kən pəsam duma dəkilim, pəcloku: «Məluks'em debe dəkə məntəmpər'em mə.»

²⁹ Kə wanapa kən osumpər kə wəcək, pəclətsənə kə: «Mənaḡnə, ta məbəlkar im, indeluks'am debe dam!»

³⁰ Mba kə nwe antəmpərə debe mə efati, k'ənkekərə wanapa kən, k'əḡkə pəber kə dəbili, haḡ tēm nte endelukse kə pəsam pəkə əntəmpərə kə mə.

³¹ Nte amarəs alpəs akə ḡnaḡḡk təkə tencder mə, kə kəməncnə kəpəḡ kəyi ḡa. Kə ḡaḡkə ḡaləmər wəbe kəḡan məkə mənacəpər mə fəp.

³² Kə wəbe ewe sə wəmarəs nwe, k'oloku kə: «Məna wəmarəs wələc, inaḡaḡḡnən'am debe dəkə mənatəmpər'em mə fəp, bawo mənaletsən'em,

³³ mba məna məntam fə kəyənə wanapa kam nənəfər, pəmə təkə ina iyən'am nənəfər mə ba?»

³⁴ Metələ disrə, kə wəbe əsəḡ wəmarəs wələc nwe asədar, ḡaber kə dəbili ḡactərəs kə haḡ pəclukse kə debe da pəsam fəp, mpe enatəmpərə kə mə.

³⁵ Tatəkə tə Kanu Papa kem nwe eyi nde dəKəm mə, endəkəyə nəna dacə nwe o nwe əntəḡaḡḡnənə wənc abəkəc ḡosoku pəs mə.»

19

Kətəksə ka Yesu teta kəcənənə ka anəncənə

Mark 10.1-12

¹ Nte Yesu elip moloku maməkə mə, k'eyefe atəf ḡa Kalile k'əḡkə atəf ḡa Yude ntende mokuru ma kəḡḡbəkə ka Yurdən.

² Kə kəḡay ka afum alarəm kəncəmə kə darəḡ, k'entaməs di afum.

³ K'aFarisi ḡander ḡawakəs kəcəpe Yesu towul dəmoloku, ḡacyif kə: «Sariyə səwosə wərkun kəcə wəran kən teta tes təlma ba?»

⁴ Kə Yesu olukse ḡa: «Nəḡkarəḡ fə Yecicəs Yosoku ba? Dəkəcəp da doru kə Kanu kəsəl afum wərkun kə wəran,

⁵ kə Kanu kəloku sə: «Wərkun endesak kas kə kərə pəsektərne wəran kən, ḡakafələ ḡayənə tēsəm tin.»

⁶ Ti disrə, ḡayi fə sə mērəḡ mba tēsəm tin. Ta fum pəḡbey təkə Kanu kəḡabəmbərənə mə!»

⁷ Kə aFarisi ḡayif Yesu sə: «Awa, ta ake tə Musa osome a məḡḡkənə məsəḡ wəran kam areka ḡecənə kə a mədewurənə kə ndaram-ε?»

⁸ Kə Yesu oluku ḡa: «Teta bəkəc yonu yeyənki tə Musa owosənə nu kəcə aran anu. Bafə tatəkə tə tənayi dəkəcəp.

⁹ Mba icloku nu: Nwe ence wəran kən pənəncə wələma mə, dalakə də ḡayi kə wəkəkə, mənə təyənə a kənəncənə kəḡkə kəyi fə sariyə disrə.»

10 Kɔ aɔɛpɛɛ darəŋ a Yesu ŋaloku: «Kɔ tɔyɔnɛ tatɔkɔ teyi wɛrkun kɔ wɛran daco-ɛ, kɛtɔnɛncɛ kɛncɛpɛr kɛnɛncɛ.»

11 Kɔ Yesu oloku ŋa: «Bafɔ fɔp fɛwɔsɛ tɛtɔksɛ tatɔkɔ, mɛnɛ akɔ asɔŋ ti mɔ.

12 Mes mɛla mmɛ mɔŋsɔŋɛ wɛrkun kɛtɔnɛncɛ mɔ: Alɔma ŋayi aŋkɔmɛ ŋa ti, alɔma ayamsɛ ŋa kɛnɛncɛ teta kɛdif pokɔmɛ paŋan, alɔma ŋafɔnɛncɛ ŋasɛrka kɛfan kɛŋan kɛbɔcɛ dɛbɛ da dɛKɔm. Mɛna nwɛ mɔŋwɔsɛ kɛsumpɛr ti mɔ, mɛsumpɛr ti.»

Yesu ontolanɛ awut pɛtɔt

Mark 10.13-16; Luk 18.15-17

13 Tɛm tatɔkɔ tɔ afum ŋanakɛrɛ Yesu awut afɛt nɛ tɔŋsɔŋɛ pɛdɛŋ ŋa waca, pɛtolanɛ ŋa sɔ Kanu mɔ. Mba kɔ aɔɛpɛɛ ɔn darəŋ ŋaŋgbɔŋ-gbɔŋɛr ŋa.

14 Kɔ Yesu oloku aɔɛpɛɛ ɔn darəŋ: «Nɛsak awut! Ta nɔyamsɛr ŋa kɛdɛr nnɔ iyi mɔ, bawo afum aŋɛ ŋayi pɛmɔ awut afɛt akanɛ mɔ ŋayɔ dɛbɛ da dɛKɔm.»

15 Kɔ Yesu endɛŋɛs ŋa waca dɛsɛbomp, k'ontolanɛ ŋa pɛtɔt, k'ɛyɛfɛ k'ɔŋkɔ.

Wɛtɛmp wɛka daka dɛlarɛm

Mark 10.17-31; Luk 18.18-30

16 Gbɛncana babɔkɔ kɔ wɛrkun wɛlɔma endɛr pɛyif Yesu: «Wɛtɔksɛ, cɔkɛ cɔ pɛmar iyɔ tɔtɔt nɛ tentam kɛsɔŋ im kiyi wɛyɛŋ ka doru o doru mɔ-ɛ?»

17 Mba kɔ Yesu eyif kɔ: «Ta ake tɔ mɛyif'em nɛ tɔyɔnɛ tɔtɔt mɔ-ɛ? Kanu sona gbɔŋ ɔyɔnɛ wɛtɔt. Kɔ mɛfan kɛsɔtɛr Kanu kiyi wɛyɛŋ ka doru o doru-ɛ, mɛlɛlɛs mosom.» Kɔ wɛrkun nwɛ eyif Yesu: «Mosom mɛrɛ?»

18 Kɔ Yesu oloku kɔ: «Ta mɛdif fum. Ta mɛsumpɛr dalakɔ. Ta mɛbanɛ fum sɛdɛ sa yem. Ta mɛkiyɛ.

19 Mɛlɛlɛs wisi kɔ wiri. Mɛbɔtɛr wɛnc ɛm pɛmɔ tɔkɔ mɛmbɔtɛrnɛ mɔ.»

20 Kɔ wɛtɛmp nwɛ oloku Yesu: «Ilɛlɛs mamɔkɔ fɔp, akebut im sɔ-ɛ?»

21 Kɔ Yesu oloku kɔ: «Kɔ mɛfan kɛlarɛ decempi nɛ tɔŋsɔŋɛ pɛsɔŋ ɛm kiyi wɛyɛŋ ka doru o doru mɔ-ɛ, mɔkɔ mɛcamɛs daka dɔkɔ mɛyɔ mɔ, mɛsɔŋ pɛsam papɔkɔ atɔyɔ daka. Kɔ mɛyɔ ti-ɛ, mɛndɛkɔsɔtɔ daka dɛlarɛm ndɛ dɛKɔm. Kɔ mɛlip-ɛ, mɛdɛr mɛɛps'em darəŋ.»

22 Nɛ wɛtɛmp nwɛ ɛnɛ moloku mamɔkɔ mɔ, k'olukus dis dɛdɛncɛ kɔ, bawo ɛnɔyɔ daka dɛlarɛm.

23 Awa, kɔ Yesu oloku aɔɛpɛɛ ɔn darəŋ: «Kance, icloku nu: Pɛncuca wɛka daka kɛbɛrɛ dɛbɛ da dɛKɔm.

24 Icloku nu sɔ, kɛbɛrɛ ka yɔkɔmɛ dɛabi ŋa tɛsɛmbɛ kɛfɛfɛrɛnɛ kɛtas kɛbɛrɛ ka wɛka daka dɛbɛ da dɛKɔm.»

²⁵ Nte acepse ɔn darəŋ ɲane moloku maməkə mə, kə tɔsɔŋe ɲa kənaŋkane cusu kəwos. Kə ɲayiftene: «Awa an'entam ɔŋ kəfis-e?»

²⁶ Kə Yesu ɔmɔmən acepse ɔn darəŋ, k'oloku ɲa: «Afum ɲafɔtam, mba Kanu kəntam mes fəp.»

²⁷ Kə Piyer oloku Yesu: «Məcəŋkəl, səna səsak ca fəp kə səncəm'am darəŋ. Cəkə cə tetosu tendekəyi-e?»

²⁸ Kə Yesu oloku ɲa: «Kance icloku nu teta nəna aŋe nənceps'em darəŋ mə: Kə doru dofu dendeder-e, Wan ka Wərkun endelek debe pənde dɔcəm da nɔrɔ da debeki dən, nəna sɔ nəndekənde səcəm wəco kə mɛrəŋ sa debe, nəckiti cusuŋka wəco kə mɛrəŋ ca Yisrayel.

²⁹ Nwe o nwe esak wəlo, awenc aŋa, kas, keɛɛ, awut kə pəyɔne fe ti dalɛ dən teta tewe tem, endekəsɔtɔ tasar tin ta yayəkə esak mə, pəsɔtɔ sɔ kiyi wəyɛŋ ka doru o doru.

³⁰ Akirin alarəm ɲandekəyɔne adarəŋ, adarəŋ alarəm ɲayɔne akirin.

20

Abɛc a nde dəŋgbəŋkələ ya wɛn

¹ «Nte tɔ debe da dəkəm dowurɛne wəka abɔf wələma nwe ɛnawur bətbət suy kəkɔten afum aŋe ɲaŋkəbɛce kə nde ɲgbəŋkələ yɔn ya wɛn mə.

² Kə ɲantəŋne kə afum akɔ ɔsɔtɔ kəkəbɛce kə mə, dəsək din pəsam gbələŋ bin, k'ɛŋkekəre ɲa kəbɛc nde ɲgbəŋkələ ya wɛn yɔn.

³ Kə wəka abɔf nwe owur walaha, k'ɔŋkə pənəŋk afum aləma ɲayi dare disɛ ta ɲayi kəyɔ nte o nte-e.

⁴ K'oloku ɲa: «Nəna sɔ nəkə nəbɛc nde dəŋgbəŋkələ ya wɛn, indekəsɔŋ nu kəway nke pəmar mə.»

⁵ Kə afum aŋe ɲaŋkə ɲabɛc. Kə wəka abɔf nwe owur dan kəkɔten sɔ abɛc aləma, pəndeyi salifana k'owur sɔ.

⁶ Pəndeyi lahansara, kə wərkun nwe owur, k'ɔŋkə pənəŋk arkun aləma dare disɛ ta ɲayi kəbɛc nte o nte-e, k'eyif ɲa: «Ta ake tɔ nəyine nnɔ tɛbətɛtɛt haŋ dɔfɔy ta nəmbɛc təlɔm o təlɔm-e?»

⁷ Kə afum aŋe ɲaloku kə: «Fum ɔtɔlek su yɛbɛc.» Kə wəka abɔf oloku ɲa: «Nəna sɔ nəkə nəbɛc nde dəŋgbəŋkələ yem.»

⁸ Nte pəndecop kəbiye mə, kə wəka abɔf nwe oloku wəkirin ka abɛc ɔn: «Məwe abɛc, məsəŋ ɲa kəway. Məcɔp aŋe ɲander tɛlpəs mə, mələpsər akɔ ɲanuŋkenɛna mə.»

⁹ Akɔ ɲancop yɛbɛc lahansara mə ɲander, kə ɲasɔtɔ-sɔtɔ nwe o nwe gbələŋ bin bin.

¹⁰ Kə akɔ mariki ɛnanuŋkenɛ kələk yɛbɛc mə ɲander ɲaccem-cemne kəsɔtɔ pəsam ɲacepər akɔ anuŋkenɛna kəsəŋ kəway mə, mba kə ɲa sɔ ɲasɔtɔ nwe o nwe pəsam gbələŋ bin bin.

11 Nte ɲayi kɛbaɲ kɛway kɛɲan mɔ, kɔ ɲancɔpɛnɛ teta mariki wɛka yɛbɛc nwe.

12 Kɔ ɲaloku: «Akanɛ ɲander tɛlpɛs mɔ, dec din gboɲ dɔ ɲambɛc, kɔ mɛsɔɲ ɲa kɛway sɛtɛɲnɛnɛ, sɛna aɲɛ sɛlɔpɛ dec kɛbɛc nne yowon disrɛ mɔ.»

13 Kɔ wɛka abɔf oloku wɛkin ɲa dacɔ: «Wanapa, iyɔ f'am pɛlɛc, bafɔ pɛsam gbɛlɛɲ bin bɔ sɛntɛɲnɛna ba?»

14 Mɛbaɲ pɔkɔ pɔyɔnɛ pam mɔ, mɛkɔ. Tante isɔɲ ɛm mɔ, t'indɛsɔɲ wɛkɔ enderna tɛlpɛs mɔ.

15 Pɛmar f'em kɛyɔ daka dem tɔkɔ infaɲ mɔ ba? Kɛraca kɔ mɛyɔ nte iyɔ tes tɔtɔt mɔ ba?»

16 Ti disrɛ akirinɲ ɲandekɔyɔnɛ adarɛɲ, adarɛɲ ɲayɔnɛ akirinɲ.»

Yesu ɔsɔɲɛ kɛcɔrɛ ta maas defi kɔ kɛfɔtɛ kɔn afi dacɔ

Mark 10.32-34; Luk 18.31-34

17 Nte Yesu ɛncpɛ Yerusalem mɔ, k'ɛlɛk taciɲa acɛpɛsɛ ɔn darɛɲ aɲɛ wɛcɔ kɔ mɛrɛɲ, k'oloku ɲa dɔpɔ:

18 «Nɛcɛɲkɛl im, Yerusalem ayi kɛpɛ. Aɲkɔlɛk Wan ka Wɛrkun, pabɛr kɔ aloɲnɛ apɔɲ, kɔ atɛkɛ sariyɛ s'aSuyif dɛwaca. Akakɔ ɲadenɲɛr kɔ sariyɛ sa defi.

19 ɲandɛbɛr kɔ atɔyɔnɛ aSuyif dewaca nte tɔɲsɔɲɛ ɲafani kɔ, ɲasut kɔ, ɲacanɲ kɔ dɛtɔk yɛpɛmpɛl. Tataka ta maas, pɛfɔtɛ afi dacɔ.»

Totola ta iya ka awut a Sebede

Mark 10.35-45

20 Iya ka awut a Sebede ɔlɔtɛrnɛ Yesu kɔ awut ɔn, k'ontontnɛ pɛtola.

21 Kɔ Yesu eyif kɛrɛ kɛɲan: «Cɛkɛ cɔ mɛfaɲ-ɛ?» K'olukɛ kɔ: «Mɛsɔɲ im temer a awut em mɛrɛɲ akanɛ mɛɲgbɛtɛnɛ mɔ, wɛkin pɛnd'am kɛca kɛtɔt, wɛkɔ pɛnd'am kɛca kɛmeriya kɔ mɛndeyi dɛbɛ dam disrɛ-ɛ.»

22 Kɔ Yesu oloku: «Nɛncɔrɛ fɛ nte nɛyi kɛtola mɔ. Nɛntam kɛwɔsɛ kɛtɔrɛs nɛ ina indɛsɔtɔ mɔ ba?» Kɔ ɲawɔsɛ «Ey, sɛntam ki kɛwɔsɛ.»

23 K'oloku ɲa: «Awa nɛna sɔ nɛndɛsɔtɔ kɛtɔrɛs nɛ indɛsɔtɔ mɔ, mba nte tɔyɔnɛ kɛndɛ kɛca kem kɛtɔt kɔ kɛmeriya mɔ, bafɔ in'ɔɲsɔɲ ti. Afum akɔ Papa kem olompɛsɛ dɛkɛcɛmɛ dadɔkɔ mɔ ɲayɔ di.»

24 Nte acɛpɛsɛ ɔn darɛɲ aɲɛ wɛcɔ ɲane moloku mamɔkɔ mɔ, kɔ pɛntɛlɛ ɲa nnɔ awɛnc aɲɛ mɛrɛɲ ɲayi mɔ.

25 Kɔ Yesu ewe nnɔ eyi mɔ k'oloku ɲa: «Nɛncɔrɛ a akirinɲ a tɔf ya doru ɲantasɛrnɛ afum aɲan k'abeki apɔɲ ɲaɲkɔtɛnɛ kɛtam afum aɲan kɛroɲ.

26 Ta tatɔkɔ teyi nu dacɔ. Nwe o nwe ɛɲfaɲ kɛbɛk nu dacɔ mɔ, endeyɔnɛ wɛmarɛs konu.

²⁷ Nwe o nwe eɲfaɲ kəcəme dəkəcəme dəcəkə-cəkə mə, pəmar pəyɔne wəcar konu.

²⁸ Ti disre Wan ka Wərkun ender fe padebəce kə, mba ender kədəbəcə afum pəsəɲ sɔ kiyi kən wəyeɲ pəwurus kənay ka afum.»

Yesu entaməs atənəɲk merəɲ

Mark 10.46-52; Luk 18.35-43

²⁹ Nte Yesu kə acəpse ɔn darəɲ ɲawur Yeriko mə, kə kənay ka afum alarəm kəncəme Yesu darəɲ.

³⁰ Atənəɲk merəɲ ɲanandə dɔpɔ kəsək, kə ɲane a Yesu eyi kəcəpər, awa kə ɲaɲkule-kule: «Məyɔne su nənɔfər, Mariki, Wan ka Dawuda!»

³¹ Kə kənay ka afum kəgbəɲ-gbəɲər ɲa a ɲacaɲk, mba ɲancnaɲkanə kənaɲkanə dəm kəkule-kule: «Məyɔne su nənɔfər, Mariki, Wan ka Dawuda!»

³² Kə Yesu encəme, k'ewe atənəɲk aɲe pəcyif ɲa: «Cəke cɔ nəfaɲ a iyɔne nu-ε?»

³³ Kə atənəɲk aɲe ɲaloku kə: «Mariki, məsəɲe su fər kəmepe, yeɲəɲk!»

³⁴ Kə nənɔfər dosumpər Yesu tetanjan, k'ɔɲgbuɲene ɲa fər. Gbəncana babəkə, kə ɲaluksərne sɔ kənaɲk, kə ɲancəme nkən Yesu darəɲ.

21

Yesu emberε dare da Yerusalem

Mark 11.1-11; Luk 19.28-40; Isan 12.12-19

¹ Nte Yesu kə acəpse ɔn darəɲ ɲancɔtərne Yerusalem, ɲasərəyi Bεtfase ntende tərɔ ta Tək ya Olif mə, k'osom acəpse ɔn darəɲ merəɲ,

² pəcloku ɲa: «Nəkə nde dare dəkə deyi nu tekirin mə, nəɲkəbəp di sɔfale səran pakot si, səfet səyi si kəsək. Nəsikəli sɔfale sasəkə nəker'em.

³ Kə tɔyɔne fum pəyif nu tes təloma-ε, nəloku kə: «Pəmar Mariki pəyɔne si tes təloma.» Aɲsake nu si katəna.»

⁴ Tatəkə tenayi nte təɲsəɲe moloku məkə Sayibe enaloku mə meyi:

⁵ «Nəloku afum aka Siyɔɲ nse səyɔne Yerusalem mə: Məməmən! Wəbε kam endeder nnə məyi mə! Elare pəbotu.

Sɔfale səran s'endε kəron,

sɔfale səfet wan ka wεsem nwe wεɲsare-sare mə.»

⁶ Kə acəpse ɔn darəɲ ɲaɲkə kəyɔ təkə Yesu enasom ɲa mə.

⁷ Kə ɲaɲkerε sɔfale səran kə səfet, nse ɲanaderɲsər suma səɲjan mə. Kə Yesu endε si kəron.

⁸ Kɔ afum alarəm akɔ ɲanayi di mɔ, ɲamper-peri suma sɔɲan dɔpɔ teta kɔyɛk-yekɛs kɔ. Alɔma ɲaccɛp wara wa tɔk ɲacper-perɛ kɔ wi dɔpɔ.

⁹ Kɔnay ka afum kɔnckɔt kɔ tekirin, kɔ akɔ ɲanacɛmɛ kɔ darɔɲ mɔ ɲackulɛ-kulɛ pɔpɔɲ: «Hosana, pɔlɛl pɔyi Wan ka Dawuda! Kanu kɔpɔcɛ pɔtɔt nwe enderɛnɛ tewe ta Mariki mɔ! Hosana,* pɔlɛl peyi Kanu mofɔ mɛɲɛci ma dɔKɔm!»

¹⁰ Ntɛ Yesu embɛrɛ Yerusalem mɔ, kɔ dare fɔp dendikcɛ pacyiftɛnɛ: «Ana wɔrkun wɔkawɛ ɔyɔnɛ-ɛ?»

¹¹ Kɔ kɔnay ka afum kɔlɔku: «Aɲnabi Yesu wɔka Nasarɛt ɔfɔ, dare da atɔf ɲa Kalile.»

Yesu nde kɔlɔ kɔpɔɲ ka Kanu

Mark 11.15-17; Luk 19.45-46

¹² Kɔ Yesu embɛrɛ nde kɔlɔ kɔpɔɲ ka Kanu disrɛ. K'embɛlɛs akɔ ɲanccamɛs kɔ akɔ ɲancway dɔndo kɔlɔ kɔpɔɲ ka Kanu mɔ, pɔcɣbal mɛsa ya asɔkpɔr pɔsam kɔ sɔbɛnc sa acamɛs ntan-toriya.

¹³ Yesu pɔcloku ɲa: «Ancic: Pɔmar pawe kɔlɔ kem «Dɔkɔtɔla Kanu da afum», mba kɔ nɔna nɔɲkafɔli dɛ tɔɣbɔkɛnɛ ta cal-bante.»

¹⁴ Awa, atɔnɔɲk kɔ atɔtam kɔkɔt ɲalɔtɔrnɛ Yesu dɔndo kɔlɔ kɔpɔɲ ka Kanu, k'ɛntamɛs ɲa.

¹⁵ Mba kɔ pɔntɛlɛ alɔɲɛ apɔɲ kɔ atɔksɛ sariyɛ s'aSuyif kɔnɔɲk kɔɲan mes mɛmɛ mocwɔsɛs cusu mɛmɛ nkɔn Yesu ɔncyɔ mɔ, kɔ awut akɔ ɲanckulɛ-kulɛ kɔlɔ kɔpɔɲ ka Kanu disrɛ mɔ: «Pɔlɛl peyi Wan ka Dawuda!»

¹⁶ Alɔɲɛ kɔ atɔksɛ akakɔ ɲayif Yesu: «Mɔnɛ tɔkɔ ɲayi kɔlɔku mɔ?» Kɔ Yesu olukɛ ɲa: «ɛy, ali katin nɔɲkaraɲ fɛ moloku mame: «Mɔsɔɲɛ ali awut kɔ cɔnaka ɲakor-kor'ɔm?»»

¹⁷ Kɔ Yesu ɛsak ɲa, k'owur dare disrɛ k'ɔɲkɔ dare da Betani nde ɛnaccɛpɛrɛnɛ pibi mɔ.

Yesu ontolanɛ pɔlɛc kɔtɔk

Mark 11.12-14,20-25

¹⁸ Dɔckɔsɔk bɔtbɔt ntɛ Yesu eyi kɔlukus dare mɔ, kɔ dor dɔyɔ kɔ.

¹⁹ K'ɛnɔɲk kɔtɔk ka yokom ya fik dɔpɔ, k'ɔlɔtɔrnɛ ki, mba bɔpɔr gbɛcɔrɛm y'ɛnabɔp. K'ɔlɔku kɔtɔk kaɲkɛ: «Ta pokom pɛdɛtɔrnɛ sɔ mɔna!» Gbɛncana babɔkɔ kɔ kɔtɔk kaɲkɔ kɔwos.

²⁰ Ntɛ accɛpɛ ɔn darɔɲ ɲanɔɲk ti mɔ, kɔ pɔnciyane ɲa ɲacyifnɛ: «Cɔkɛ cɔ kɔtɔk ka fik nkɛ kɔntam kɔwos gbɛncana bambɛ-ɛ?»

²¹ Kɔ Yesu olɔku ɲa: «Kance icloku nu: Kɔ nɔntɔmpɔr kɔlan ta nɔnesɔrnɛ-ɛ, nɔntam kɔyɔ ntɛ ayɔ kɔtɔk ka fik kaɲkɛ mɔ. Mba

* **21:9** Hosana, cɔArame = «Mɔyac su!» Toloku ta kɔkor-koru Kanu tɔ. **21:13** Moloku ma Aɲnabi Esayi kɔ Yeremy: Esayi 56.7; Yeremy 7.11 **21:16** Yabura 8.3

icloku nu sɔ, ali nɛloku tɔrɔ tante: «Mɛyotɛ nnɔ mɛkɔ mɛlɛmnɛ dɛkɛbɛ», tatɔkɔ tenyi.

²² Ntɛ o ntɛ nɛntola Kanu kɛlanj disrɛ mɔ, nɛnʒɔtɔ ti.»

Deke kɛtam ka Yesu kɛnyɛfɛ-ɛ ?

Mark 11.27-33; Luk 20.1-8

²³ Kɔ Yesu ɔɲkɔ nde kɛlɔ kɛpɔɲ ka Kanu. Pɛyi kɛtɔksɛ, alɔɲnɛ apɔɲ kɔ abeki a dɔtɔf ɲander ɲayif kɔ: «Kɛtam kɛrɛ kɔ mɛɲyɔnɛ mamɛ-ɛ? An'ɔsɔɲ ɛm kɛtam kanjɔkɔ-ɛ?»

²⁴ Kɔ Yesu olukɛ ɲa: «Ina sɔ, iyif nu toloku tin gbɔɲ, kɔ nɛluks'em toloku tatɔkɔ-ɛ, injloku nu kɛtam nkɛ inyɔnɛ mamɛ mɔ.»

²⁵ Deke kɛgbɔt dɛromun ka Saɲ kɛnayɛfɛ-ɛ? Dɛkɔm, ka dɛafum?» Kɔ afum aɲɛ ɲayɛfɛ kɛgbɛkɛlɛnɛ ɲacloku: «Kɔ sɛlukɛ: «Dɛkɔm», ɛnyif su: «Ta ake tɔ nɛnatɔlanjɛ Saɲ-ɛ?»

²⁶ Mba kɔ sɛlukɛ: «Dɛafum-ɛ», sɛɲnɛsɛ kɛnay ka afum, bawo fɛp fɛnacɛrɛ a Saɲ sayibɛ s'ɛnayɔnɛ.»

²⁷ Kɔ ɲalukɛ Yesu: «Sɛncɛrɛ fɛ.» Kɔ Yesu nkɔn oloku ɲa sɔ: «Ina sɔ, ifɔloku nu kɛtam nkɛ inyɔnɛ mamɛ mɔ.»

Totubcɛnɛ ta awut arkun mɛrɛɲ

²⁸ Kɔ Yesu endɛɲɛr sɔ: «Nɛcɛɲkɛl taruku tante indeloku nu mɔ. Cɛke cɔ nɛncɛm-cɛmnɛ tɛta ti-ɛ? Wɛrkun ɛnayi nwɛ ɛnayɔ awut arkun mɛrɛɲ. K'oloku Coco cɔn: «Wan kem, mɛkɔ mɛkɔ mɛbɛc nde ɲgbɔɲkɛlɔ ya wɛn wɛm.»

²⁹ Kɔ wan wɛkakɔ olukɛ kas: «Ala, ifɔkɔ.» Ntɛ tɛm tepic tencepɛr mɔ, kɔ abɛkɛc ɲɛɲkafɛlɛ wan, k'osumpɛr dɔpɔ, k'ɔɲkɔ dɛkɛbɛcɛ kas.

³⁰ Kɔ kas kɛɲan oloku sɔ toloku tin tayi Tɔɲɔ. Kɔ wɛkakɔ owosɛnɛ kas: «Awa Papa, injɔkɔ,» mba ɛnakɔ fɛ di.

³¹ Awa, icyif nu: Awut akanjɛ mɛrɛɲ, wɛrɛ ɔyɔ tɛfan ta kas kɛɲan-ɛ?» Kɔ ɲalukɛ: «Coco.» Kɔ Yesu oloku ɲa: «Kance icloku nu: Abaɲɔs dut kɔ aran ayi yamayama ɲandekɔgbontu nu kɛbɛrɛ ka dɛbɛ da dɛkɔm.

³² Bawo Saɲ Batis ɛnader k'ɛmentɛr nu dɔpɔ dolompu da Kanu, kɔ nɛntɔlanj kɔ. Mba awerɔs dut kɔ aran ayi yamayama ɲanalanj kɔ, ali ntɛ nɛnanɔɲk ti mɔ, tɛnasɔɲɛ fɛ nu kɛsɛkpɛr bɛkɛc a nɛlanj kɔ.»

Totubcɛnɛ ta abɛc a ɲgbɔɲkɛlɔ ya wɛn alɛc

Mark 12.1-12; Luk 20.9-19

³³ Kɔ Yesu endɛɲɛr sɔ: «Nɛcɛɲkɛl totubcɛnɛ tɔlɔma: Wɛka abɔf wɛlɔma ɛnabɔf ɲgbɔɲkɛlɔ ya wɛn. K'ɔsɔnɛ yi sanjka hanj k'ɔnɔɲkɛr, k'ɛɲkay dɛkɛfɔcɔs da wɛn, k'ɛncɛmbɛr tetek tobumɛ, k'ɔsɔɲ yɛbɛc ya abɔf ɲa ɲgbɔɲkɛlɔ ya wɛn yayɔkɔ afum alɔma, ɲatɛɲnɛ kɔ akakɔ kɛcsɔɲ kɔ kɛway, kɔ nkɔn owur k'ɔɲkɔ marɛnt.

³⁴ Tem ta kəpim ka yokom ya ngbɔŋkələ tendebəp, kɔ wəka ngbɔŋkələ osom acar ɔn nnɔ abɛc ɔn ŋayi mɔ kəkɔban təkɔ pəmar pəsɔtɔ mɔ.

³⁵ Kɔ abɛc a ngbɔŋkələ ya wɛn ŋasumpər acar akanɛ, kɔ ŋasut wəkin, kɔ ŋandif wəka mɛrɛŋ kɔ ŋanca-case wəka maas masar.

³⁶ Kɔ wəka ngbɔkələ osom sɔ acar alɔma, aŋɛ ŋanala ŋatas acɔkɔ-cɔkɔ mɔ. Kɔ abɛc aŋɛ ŋayɔ akakɔ təkɔ ŋanayɔ afum acɔkɔ-cɔkɔ akɔ pəcuy pin payi mɔ.

³⁷ Tɛlpəs oŋ, kɔ wəka ngbɔŋkələ osom wan kɔn yati, pəclokunɛ: «Nte wəkawɛ ɔyɔnɛ wan kem mɔ, ŋaŋkɔlelɛs kɔ!»

³⁸ Mba nte abɛc ŋanəŋk wan nwe mɔ, kɔ ŋalokɛnɛ: «Wələk kɔn kɛ ɔfɔ, wəkawɛ! Nəder, padif kɔ, kɛ kəndeyɔnɛ kosu.»

³⁹ K'abɛc ŋasumpər wan nwe, kɔ ŋaŋkekəɛ kɔ saŋka sa ngbɔŋkələ ya wɛn tadarəŋ, kɔ ŋandif kɔ.

⁴⁰ Awa, kɔ wəka ngbɔŋkələ ya wɛn nwe endeder-ɛ, cəke c'endeyɔ abɛc akanɛ-ɛ?»

⁴¹ Kɔ ŋalukɛ Yesu: «Pədifət ayeŋki bəkɛc akanɛ, ali nɔnɔfɔr ta pəyɔnɛ ŋa. Pəsəŋ yɛbɛc ya ngbɔŋkələ ya wɛn yayɔkɔ abɛc alɔma aŋɛ ŋande ŋacsəŋ kɔ yokom ya ngbɔŋkələ tem ta kəpim ka yi mɔ.» ***

⁴² Kɔ Yesu eyif: «Nəŋkaraŋ fɛ ali katin dəYecicəs Yosoku yayɛ ba? «Togbu mpɛ acəmbər kələ ŋanace mɔ pɛnader pəyɔnɛ oŋ togbu pətət pa dacɔ. DəMariki tɛyɛfɛ, tes tɔ nte tenciyanɛ su dəfɔr mɔ.»

⁴³ Ti tɔsəŋɛ nte iloku nu: Kanu kəndebanəŋ nu akip ŋa dəbɛ dɔn, pəsəŋ ŋi afum acuru aŋɛ ŋendekomər yokom yətət mɔ.

⁴⁴ [Nwe entɛmpɛnɛ togbu tatəkɔ kəron mɔ, entɛpɛ. Məna nwe pɛntɛmpɛnɛ kəron mɔ, pomputuk əm.»]†

⁴⁵ Nte ŋane totubcɛnɛ tatəkɔ mɔ, alonɛnɛ apəŋ kɔ aFarisi ŋancəɛ a tetanən tɔ Yesu eyi kəloku.

⁴⁶ Kɔ ŋantɛn kəsumpər kɔ, mba kɔ ŋanesɛ kənay ka afum, bawo ŋanalaŋ a sayibɛ sɔ Yesu ɛnayɔnɛ.

22

Totubcɛnɛ ta yeri ya kəsata ka kəgbanɛ

Luk 14.16-24

¹ Kɔ Yesu ɔŋgbəkəɛ sɔ kəlɔk-lokər afum aŋɛ dəmotubcɛnɛ, k'oloku:

² «Dɛbɛ da dəkɔm dowurɛnɛ nte: Wəbɛ wəlɔma ɛnayi, nwe ɛnalompəs yeri yɛlarəm ya kəgbanɛnɛ ka wan kɔn wərkun mɔ,

³ k'osom acar ɔn kəkɔwɛ afum aŋɛ anawɛ kədetəŋnɛ kəgbanɛnɛ kan kɔ mɔ, mba kɔ afum aŋɛ ŋafati kəder.

21:42 Yabura 118.22-23 † **21:44** Moloku ma werse 44 meyi fɛ nde yecicəs yokur yɔlɔma.

⁴ K'ɔŋgbəkəɛ sɔ kəsom acar alɔma pəcloku ɲa: «Nəkɔ nəlɔku aɲɛ awe mɔ: Awa alip kəlompəs yeri, mura mem kɔ cəna cəboŋu cem andifət ci. Yɛbəc ya kəlompəs yeri fəp yelip. Nəder pawoləs!».

⁵ Mba aɲɛ awe kəsata kanjɔ mɔ, ɲancem-cɛmnɛ fɛ kəkɔwosɛ kəwɛ kanjɔ: Kɔ wəkin ɔŋkɔ dalɛ dɔn, kɔ wəkɔ nkɔn ɔŋkɔ dəyɛbəc yɔn ya kəcəməs.

⁶ Kɔ alɔma ɲasumpər acar kɔ ɲayɔ ɲa pələc kɔ ɲandif ɲa.

⁷ Kɔ mɛtɛlɛ meyi wəbɛ, k'osom asɔdar ɔn ɲakɔ ɲamələk adifət afum akanɛ ɲacɔf sɔ dare daɲan.

⁸ Kɔ wəbɛ oloku acar ɔn: «Yɛbəc ya kəlompəs ka yeri ya kəgbəɲɛ yelip, mba aɲɛ awe mɔ, ɲayɔ fɛ delel dedinɛ yeri yayɛ.

⁹ Nəkɔ nde sɔpɔ səkɔ səwur dare mɔ, nəwɛ nwe o nwe nəmbəp di mɔ, pədetəɲɛ kəgbəɲɛ kanjɛ.»

¹⁰ Kɔ acar ɲalɛk dɔpɔ, kɔ ɲalɔŋka afum atɔt kɔ alɛc aɲɛ ɲanabəp di mɔ fəp, nte tɔŋsɔɲɛ akut ɲɛlarɛ afum aɲɛ awe kəgbəɲɛ mɔ tɛp.

¹¹ Kɔ wəbɛ embɛɛ pəcməmən aɲɛ ewe mɔ, kənəɲk wərkun wəlɔma nwe ɔntəbɛrɛnɛ yamos ya kəsata mɔ.

¹² K'eyif kɔ: «Wanapa, cəke cɔ məntam kəbɛɛ nnɔ ta məmbɛrɛnɛ yamos ya kəsata-ɛ?» Mba wərkun nwe ɛnaluksɛ fɛ wəbɛ toloku o toloku.

¹³ Kɔ wəbɛ oloku abəc ɔn: «Nəkɔt kɔ wɛcək kɔ waca, nələm kɔ nde kubump ka dabanjka disɛ. Difɔ kəbok kɔ kəɲaɲərənɛ sek kəndəkɔyi.»

¹⁴ Kɔ Yesu endɛɲər: « Afum alarəm ɲɔ Kanu kəɲwɛ kəbɛɛ dəbɛ da dəkəm, mba apic ɲanayek-yek kəbɛɛ ka di.»

Dut ndɛ asɔɲ wəbɛ Sesar mɔ

Mark 12.13-17; Luk 20.20-26

¹⁵ Mata maməkɔ disɛ k'aFarisi ɲalɔŋkanɛ, ɲactɛn kəcəpɛ Yesu towul ɲasumpər kɔ dəmɔloku.

¹⁶ K'aFarisi ɲasom acɛpɛ aɲan darəɲ alɔma kɔ afum a Herodu. Kɔ afum akakɔ ɲaɲkɔ ɲalɔku Yesu: «Wətəkɛ, səncərə a məɲloku kance, kɔ məntəkɛ afum dɔpɔ da Kanu kance fəp disɛ, kənɛsɛ ka fum kəfɔyi əm, bawo məfɔməmən dəkəcəmɛ daɲan.

¹⁷ Awa məloku su tɛcem-cɛmnɛ tam: Sariyɛ səwosɛ su kəsɔɲ Sesar wəbɛ wəkə tɔf ya Rom dut ba, ka səwosɛ fɛ su kəsɔɲ kɔ di?»

¹⁸ Mba Yesu nwe ɛnacərə mɛcem-cɛmnɛ maɲan mɛlɛc mɔ, oluksɛ ɲa: « Nəna abanɛnɛ kəlomp! Ta ake tɔ nəɲwakəs em-ɛ, ?

¹⁹ Nəmentər im gbələɲ mbɛ aɲsɔɲɛ dut mɔ.» Kɔ ɲaɲkɛɛ kɔ gbələɲ ba pəsam papəkɔ.

²⁰ Kɔ Yesu eyif ɲa: «Alulu kɔ yecic ya ana yeyi gbɔlɛɲ bambɛ kɔron-ɛ?»

²¹ Kɔ ɲalukɛ Yesu: «ɲa wɔbɛ Sesar ɲɔ.» Kɔ Yesu oloku ɲa nte: «Nɔsɔɲ Sesar yɔkɔ yɔyɔnɛ yɔn mɔ, kɔ Kanu sɔ yɔkɔ yɔyɔnɛ yɔn mɔ.»

²² Nte ɲane moloku mme mɔ, kɔ pɔnciyane ɲa kɔ ɲasak Yesu kɔ ɲaɲkɔ.

Ayif Yesu teta kɔyɛfɛ ka afi dacɔ

Mark 12.18-27; Luk 20.27-38

²³ Awa aSadisi ɲancɛm-cɛmnɛ a kɔyɛfɛ defi kɔyi fɛ. Dɔsɔk din dadɔkɔ kɔ alɔma ɲa dacɔ ɲander ɲayif Yesu:

²⁴ «Wɔtɔkɛ, Musa ɛnaloku: Kɔ fum efi ta ɔyɔ wan, mba pɔsak wɔran-ɛ, pɔmar wɛnc ka wɔfi pɔlɛk wɔcɔbokɛra wɔkɔkɔ pɔnɛncɛ, pɔsɔɲ wɛnc wɔfi yuruya.

²⁵ Mɛcɔɲkɔl, awɛnc camɔt-mɛrɔɲ alɔma ɲanayi su dacɔ. Kɔ wɔcɔkɔ-cɔkɔ ɛnɛncɛ k'efi, mba nte ɛnatɔyɔ wan mɔ, k'ɛsakɛrɛ wɛnc wɔran kɔn.

²⁶ Tatakɔ tɔ wɔka mɛrɔɲ, wɔka maas han wɔka camɔt-mɛrɔɲ ɲanafis-fis sɔ fɔp, ali wɔkin ɛnasak fɛ wan.

²⁷ Nte dɛwɛnc aɲa delip kɔfis-fis mɔ, kɔ wɔran ɛfɔntɛrɛ sɔ k'efi.

²⁸ Awa, sɔyif ɛm: Dɔsɔk ndɛ afi ɲandekɔyɛfɛ defi mɔ, awɛnc aɲa akanɛ camɔt-mɛrɔɲ an'endekɔsɔtɔ wɔran wɔkawɛ-ɛ? Bawo fɔp faɲan ɲananɛncɛ kɔ!»

²⁹ Kɔ Yesu olukɛ ɲa: «Mɛcɛm-cɛmnɛ monu mɔsɔk fɛ, bawo nɔncɛrɛ fɛ Yecicɔs Yosoku, nɔncɛrɛ fɛ sɔ fɔnɔntɛr fa Kanu.

³⁰ Dɔsɔk ndɛ afi ɲandekɔyɛfɛ dɔdefi mɔ, wɔrkun ɔfɔnɛncɛ, wɔran ɔfɔlɔ, afɔdekɔ pɔncɛncɛ pɔmɔ mɛlɛkɛ mme meyi dɔkɔm mɔ.

³¹ Nte tɔyɔnɛ ta afum kɔyɛfɛ dɔdefi mɔ, nɔnakaraɲ fɛ nte Kanu kɔnaloku nu dɔYecicɔs Yosoku mɔ ba?

³² In'ɔyɔnɛ Kanu ka Abraham, ka Siyaka, kɔ ka Yakuba.) Bafɔ Kanu ka afi k'ɔyɔnɛ, mba ka ayi wɔyɛɲ.»

³³ Cusu cɔnawos kɔnay ka afum aɲɛ ɲancɔɲkɔl mɛtɔkɛ mɔn mɔ.

Tosom nte tɛmbɛk dɔkɔcɛmɛ mɔ

Mark 12.28-34; Luk 10.25-37

³⁴ Nte aFarisi ɲane a moloku mɔtɔt ma Yesu mɔsɔɲɛ aSadisi kɛmɛp cusu mɔ, kɔ ɲa sɔ ɲalɔɲkanɛ.

³⁵ Wɔkin ɲa dacɔ nwe ɛnayɔnɛ wɔtɔkɛ sariyɛ s'aSuyif mɔ, eyif Yesu toloku nte tɔɲsɔɲɛ pɔcɔpɛ kɔ towul mɔ pɔsumpɛr kɔ dɔmoloku mɔn:

³⁶ «Wɔtɔkɛ, tosom tere tɛbɛk dɔkɔcɛmɛ mosom ma sariyɛ fɔp dacɔ-ɛ?»

³⁷ Kɔ Yesu olukɛ kɔ: «Mɔbɔtɛrɛ Mariki Kanu kam abɔkɔc ɲam fɔp, afɔkɔl ɲam fɔp kɔ mɛcɛm-cɛmnɛ mam fɔp.»

38 Tatakɔ tɔyɔnɛ tosom tɔpɔŋ tɔcɔkɔ-cɔkɔ.

39 Tosom ta merɛŋ nte towurɛnɛ tɔcɔkɔ-cɔkɔ mɔ: «Mɛbɔtɛr wɛnc ɛm pɛmɔ tɔkɔ mɛmbɔtɛrnɛ mɔ.»

40 Sariyɛ sa Musa kɔ mɛtɔksɛ ma sayibɛ fɛp, mosom mamɔkɔ mɛrɛŋ mɔ mɛŋgbɛkɛrnɛ.»

Wɔbɛ nwe Kanu kɔyɛk-yɛk mɔ ɔyɔnɛ Wan ka Dawuda

Mark 12.35-37; Luk 20.41-44

41 Nte aFarisi ŋanalonŋkanɛ mɔ, kɔ Yesu eyif ŋa toloku nte:

42 «Cɔke cɔ nɔncɛm-cɛmnɛ teta Krist wɔbɛ nwe Kanu kɔyɛk-yɛk mɔ-ɛ? Wan ka ana ɔfo-ɛ?» Kɔ aFarisi ŋaloku: «Wan ka Dawuda ɔfo.»

43 Kɔ Yesu eyif ŋa: «Ak'ɛnasɔŋɛ Dawuda kɔwɛ Krist «Mariki mem»-ɛ? Nte Amera ŋa Kanu yati ŋenasɔŋɛ Dawuda kɔloku dɔYecicɔs Yosoku:

44 «Kɔ Mariki Kanu oloku Mariki mem:

Mɛdɛr mɛnd'em nnɔ kɔca kem kɔtɔt,

haŋ iclip kɔboc atereɛnɛ am wɛcɔk wam dɛntɔf.

45 Kɔ Dawuda ewe oŋ Krist wɔbɛ nwe Kanu kɔyɛk-yɛk mɔ «Mariki mem»-ɛ, cɔke cɔ wɔkɔkɔ ɛntam sɔ kɔyɔnɛ wan ka nkɔn Dawuda-ɛ?»

46 aFarisi dacɔ, ali wɔkin ɛnatam fɛ kɔlukɛ kɔ toloku. Kɔlɛk dɔsɔk dadɔkɔ, ali fum eyɛŋk fɛ sɔ abɔkɔc kɔyif kɔ toloku.

23

Yesu embɛŋnɛ atɔksɛ sariyɛ s'aSuyif kɔ aFarisi

Mark 12.38-40; Luk 20.45-46

1 Kɔ Yesu ɛŋkafɛlɛ k'oloku kɔnay ka afum kɔ acɛpɛsɛ ɔn darɔŋ:

2 «Atɔksɛ sariyɛ s'aSuyif kɔ aFarisi, ŋatɔmpɛr kɔtɔksɛ sariyɛ sa Musa.

3 Ti disrɛ nɔcyɔ, nɔccɛmɛ sɔ mes mɔkɔ ŋande ŋacloku nu mɔ fɛp, mba ta nɔcyɔ mes mɔkɔ ŋanyɔ mɔ, bawo tɔkɔ ŋaŋloku mɔ, bafɔ itɔ ŋanyɔ.

4 Ŋa ŋaŋsarɛsɛr afum yɛsarɛ nyɛ yoncuca kɔsarɛ mɔ, mba ŋasɛrka ŋafɔwosɛ ali telɛr taŋan tin kɔgbuŋɛnɛ yi.

5 Ŋayɔ mɔyɔ maŋan fɛp nte tɔŋsɔŋɛ afum ŋanɔŋk ŋa mɔ. Ti disrɛ, ŋambɛksɔs sɛbɛ sɔŋan sɔkɔ ŋaŋkotnɛ dɔtɔbu kɔ dɔkɔca mɔ, ŋawɔkɔlɛs tegberɛ suma sɔŋan cɔsɔk.

6 Pɛmbɔt ŋa kɔcndɛ mofɔ mmɛ aŋlɛlɛs ŋa dɔkɔdi yeri dɔcɔsata mɔ, kɔ sɔcɔm sɔkirɛŋ sa dɔkɔtɔla Kanu daŋan.

7 Pɛcbɔt ŋa sɔ nte anyif ŋa pɔlɛl mofɔ mmɛ ambɔpsɛnɛ mɔ, afum ŋacwɛ ŋa «Atɔksɛ.»

8 Mba nɔna, ta nɔwosɛ pawɛ nu «Atɔksɛ,» bawo dɛwɛnc ŋa dɔ nɔyɔ fɛp fonu, Wɔtɔksɛ wɔkin gbɔŋ nɔyɔ.

⁹ Ta n̄ələləs n̄wε o n̄wε doru dandε n̄əwε w̄əkayi «Papa» bawo, w̄əkin gboŋ ɔyɔnε Papa konu, Papa mp̄ε peyi nde d̄əkəm m̄ɔ.

¹⁰ Ta n̄əwose pawe nu «abε,» bawo w̄əbε w̄əkin gboŋ n̄əyɔ n̄wε ɔyɔnε Krist m̄ɔ.

¹¹ N̄wε emb̄ək d̄əkəc̄əmε nu dacɔ m̄ɔ, p̄əmar p̄əyɔnε w̄əb̄əcε konu.

¹² N̄wε endeyoknε m̄ɔ, andetore kɔ. N̄wε endetore banca m̄ɔ, andep̄εnε kɔ.»

*Yesu enal at̄əksε sariyε s'aSuyif kɔ aFarisi teta k̄ətɔlomp k̄əŋan
Mark 12.40; Luk 11.39-52; 20.45-47*

¹³ «P̄ələc peyi nu n̄əna at̄əksε sariyε s'aSuyif kɔ aFarisi, n̄əna ab̄əŋenε k̄əlomp, n̄əŋgb̄ət̄ər afum kumba ka d̄əb̄ε da d̄əkəm, n̄əna n̄əf̄əb̄ere, n̄əwose fε sɔ akɔ ŋafan̄ k̄əb̄ere m̄ɔ ŋab̄ere.

[

¹⁴ *]

¹⁵ P̄ələc peyi n̄əna at̄əksε sariyε s'aSuyif kɔ aFarisi, n̄əna ab̄əŋenε k̄əlomp! N̄əckɔ mar̄ənt k̄əba kɔ antɔf k̄əroŋ k̄əten ka fum w̄əkin n̄wε n̄əmb̄ers̄enε dine donu m̄ɔ, kɔ fum w̄əkakɔ elip oŋ k̄əb̄ere-ε, n̄əs̄ɔŋε kɔ k̄əyɔnε wan w̄əka yahanama p̄əcep̄ər n̄əna k̄əmer̄əŋ.

¹⁶ P̄ələc peyi nu, n̄əna at̄əŋəŋk aŋε ŋəŋk̄ət̄enε afum m̄ɔ! N̄ən'ent̄əksε a kɔ fum end̄er̄əm k̄əlɔ k̄əroŋ ka Kanu-ε, a t̄əyɔ fε t̄əlɔm o t̄əlɔm. Mba kɔ t̄əyɔnε p̄əder̄əm k̄ema ka k̄əlɔ k̄əroŋ ka Kanu-ε, tat̄əkɔ t̄əyɔ tes.

¹⁷ Aton̄kulu at̄əŋəŋk! Ca yayɔkɔ m̄er̄əŋ pere p̄əb̄ək d̄əkəc̄əmε-ε, k̄ema ba, ka k̄əlɔ k̄əroŋ ka Kanu n̄kε k̄əmpus k̄ema m̄ɔ?

¹⁸ Kɔ fum oloku nu k̄əder̄əm tetek tolon̄nε Kanu-ε, t̄əyɔ fε tes. Mba kɔ fum end̄er̄əm polon̄nε mp̄ε p̄ef̄ənt̄ərə tetek tolon̄nε k̄əroŋ m̄ə-ε, ti t̄əyɔnε tes.

¹⁹ N̄əna at̄əŋəŋk! P̄ərə p̄əb̄ək d̄əkəc̄əmε-ε: polon̄nε ba, ka tetek tolon̄nε mp̄ε pompus pi m̄ɔ?

²⁰ Awa icloku nu: M̄əna n̄wε m̄ənder̄əm tetek tolon̄nε m̄ɔ, m̄ənder̄əm pi kɔ ca yɔkɔ yeyi pi k̄əroŋ m̄ɔ f̄əp.

²¹ M̄əna n̄wε m̄ənder̄əm k̄əlɔ k̄əroŋ ka Kanu m̄ɔ, m̄ənder̄əm ki kɔ Kanu n̄kε k̄əyi ki disr̄ε m̄ɔ.

²² M̄əna n̄wε m̄ənder̄əm k̄əm m̄ɔ, m̄ənder̄əm d̄əc̄əm da d̄əb̄ε da Kanu kɔ Kanu n̄kε k̄əndε di m̄ɔ.

²³ P̄ələc peyi nu, n̄əna at̄əksε sariyε s'aSuyif kɔ aFarisi, n̄əna ab̄əŋenε k̄əlomp! N̄əcs̄əŋ farilε fa m̄erk̄et, fa malan̄kan kɔ fa ces, n̄əcsak mes m̄əkɔ melele d̄əsariyε sa Kanu m̄ɔ, mes m̄m̄ε

* **23:14** Yecic̄əs yokur yɔlɔma yenden̄ər moloku mame: «P̄ələc peyi n̄əna at̄əksε sariyε s'aSuyif kɔ aFarisi, n̄əna ab̄əŋenε k̄əlomp! N̄əban̄ər w̄əlɔ wa ac̄əbokara, kɔ n̄əctola sali s̄əbolu n̄tε t̄əŋs̄əŋε afum ŋaf̄t̄ε k̄əc̄em-c̄əm̄nε a afum at̄ət n̄əyɔnε. Teta kaban̄enε k̄ələc n̄kε n̄əndes̄ətɔ kiti k̄əȳəŋkil!»

mə pəmar nəcyə: Nəmentər dolompu, nənəfər kə kəsektərne teta Kanu, mba ta nəcsak kəcyə melpəs məkə.

24 Nəna atənəjk aņe ņajkətene afum mə! Tococ pə nəyi kəcəņ-cēņ, nəcmer yəkəme!

25 Pələc pəpəņ peyi nu, nəna atəkse sariye s'aSuyif kə aFarisi, nəna abanəne kəlomp! Nən'ēņyakəs takəroņ ta apət kə apəlet, mba yelare yeri nyē nəmbanšər afum deke kə dečelək disre mə.

26 WəFarisi wətənəjk! Məsəkəs kəresna tedisre ta apət, nte təņsəņe takəroņ ta ņi təsək sə mə.

27 Pələc peyi nu, nəna atəkse sariye s'aSuyif kə aFarisi, nəna abanəne kəlomp! Cufu nce ancem pəfer mə cə nəwurene. Cətese todoru mba cəlarē bent ya afum afi kə ca yətəsək fəp.

28 Nəna sə todoru nəwurene alompu nno afum ņayi mə, mba tedisre tonu, nəlare kəbanəne kəlomp kə pələc.

29 Pələc peyi nəna, atəkse sariye s'aSuyif kə aFarisi, nəna abanəne kəlomp! Nəna aņe nəncəmbər cufu cətət ca sayibē, nəcnekəs cufu ca alompu mə,

30 nəcloku: «Pəcyəne a sənayi doru tēm ta atem asu-ε, kə sənənəjkəl fē ņa kəloņ ka mecir ma sayibē alarəm.

31 Ti disre nəna yati nəwose sede sa ti, a nən'əyənē yuruya ya akə ņanadifət sayibē mə.

32 Awa, nələpəs təkə atem anu ņanacop mə!

33 Nəna bok, dokom da ņkisin! Cəke cə nəntam kəyeksər kiti ka yahanama-ε?

34 Nəcəņkəl: Ti təsəņe nte indesom Sayibē, afum acəre kəkətene mes kə atəkse sariye nno nəyi mə. Nəndekə nəcdif aləma nəccəņ ņa tək yepəmpəl kəroņ, nəcsute akə mərəņkən nde wəb wonu wa dəkətola Kanu, nəcbeləs ņa dəsədare kə sədare,

35 nte təņsəņe, nəsarē teta mecir ma alompu məkə moloņe kəyefē tēm ta Abel wəlompu haņ kəbəp ka mecir ma Sakary wan ka Barasi, nwe nənadif aņgbip kə tetek toloņne dacə mə.

36 Icloku nu kance: Kəloņ ka mecir maməkə fəp dečemp dandē dendesarē ki.»

Yesu ombok teta Yerusalem

Luk 13.34-35

37 «Yerusalem, Yerusalem, məna nwe məndif sayibē mə, məcca-cas akə Kanu kəņsom nno məyi mə, isep pəlarəm kəloņka ka awut am pəmə nte acəkə ņokombəra ņoņloņka awut banca ya ņi dəntəf mə! Mba mənawose fē ti.

38 Awa nəcəņkəl! Andesakəre nu kəbə konu kəyə fos.

39 Bawo, icloku nu, nəfəsənəjk im haņ tēm nte nənde nəcloku: «Kanu kəpocē pətət nwe enderene tewē ta Mariki mə!»

24

Yesu oloku a andeləsər kələ kəpəŋ ka Kanu

Mark 13.1-37; Luk 21.5-36

¹ Nte Yesu owur nde saŋka sa kələ kəpəŋ ka Kanu pəckə mə, kə aɕpse ɔn darəŋ ŋander ŋasəŋe kə kəkəkce tɛcəmbər ta kələ.

² Mba kə Yesu olukse ŋa: «Nəŋnəŋk mame fəp? Icloku nu kance, tasar pəfədedeŋse tasar kəroŋ nno, mpe antədewuŋ mə.»

Pələc kə kətərəs nke kəyi kəder mə

Mark 13.5-13; Luk 21.8-19

³ Tem nte Yesu enandɛ tərɔ ta Tək ya Olif mə, kə aɕpse ɔn darəŋ aləma akə ŋanasol kə nkən mə, kə ŋayifət kə ŋabəkəre: «Məloku su, tem tere tɔ kələsər ka kələ kəpəŋ ka Kanu kəndeder-ɛ? Tɛgbəkəre tere tendementər su a kəder kam nərɔ da debeki dam disre kə kəlip ka doru kəmbəp-ɛ?»

⁴ Kə Yesu olukse ŋa: «Nəkembərne ta nwe o nwe pəsəŋe nu kəsələ!

⁵ Afum alarəm ŋandeder ŋacbaŋene kəbəcə tewe tem, ŋacloku: «In'ɔyone Krist wəsom wəka Kanu!» ŋandetalər kənay ka afum alarəm.

⁶ Nəndene pacloku teta kəwan nke kələtərne mə, kə pəyone fe ti pacfor teta ki-ɛ: Nəkembərne ta nənese, mēne mes maməkə meyi, mba təfədeyone kərəsna kəlip ka doru.

⁷ Bawo afum a atəf ŋələma ŋandeyefərəne kə afum a atəf ŋocuru, dəbe dəyefərəne kə dəbe. Dor kə antəf kəyikce kə yendeyi mofo mɛlarəm.

⁸ Maməkə fəp mendeyi pəmɔ kəcop ka pucuy pa dokombəra.

⁹ Awa, tem tatəkə t'andelek aləma nu dacɔ paber pəcuca dəwaca, padif aləma nu dacɔ. Afum a təf ya doru fəp ŋandeter nu teta tewe tem.

¹⁰ Tem tatəkə, aɕpse darəŋ alarəm ŋandesak kəgbəkər kəlan Kanu, ŋandetiŋkərəne, ŋandeterene aŋe kə akə.

¹¹ Sayibe sa yem səlarəm səndewur, ŋasəŋe afum alarəm kəsələ.

¹² Pələc pende pɛcsamsər kəsamsər dəm, təsəŋe kəbətər ka afum alarəm kəfər.

¹³ Mba nwe endebəkne ti haŋ mes maməkə melip mə, Kanu kəndeyac kə.

¹⁴ Andedəŋk Kibaru Kətət ka dəbe da Kanu nde dender mə afum a təf ya doru fəp, nte təŋsəŋe aŋe ŋantəcəre Kanu mə fəp ŋane ti. Awa, tem tatəkə tendecəpər a doru dedelip.

Pucuy pendebəkər afum alarəm

Mark 13.14-23; Luk 21.20-24

15 Kə nāndenəŋk pəyikyik pələsər pəpəŋ mpe Mariki enter mə, mpe Sayibe Daniyel enaloku ta pi mə, pənde nde kəfo kəsoku-ε, pəmar wəkarəŋ ka buk bambε pəcəre tantε:

16 Awa tεm tatəkə, aŋε ŋandeyi atəf ŋa Yude mə, pəmar ŋa ŋayekse ŋape mərə kəron.

17 Nwε tendebəp pəyi daban̄ka mə, ta pəberε kələ kən disre kəkələk paka,

18 nwε tendebəp pəyi dalε mə, ta pəlucus nde ndərən kəkələk duma dən.

19 Pucuy pere pə tendeyəne abekəs, kə aŋε ŋande ŋacmesər dəsək dadəkə mə!

20 Nətola Kanu ta kəyekse konu kədesurεne dərəŋ kə pəyənε fε ti-ε dəsək da kəŋesəm nde ampuse Mariki mə.

21 Bawo pəcuy pendebek, mpe pentatəyi kəyefε nte doru doncop mə haŋ ndekəl, fum o fum afəsətərəs pəmə tatəkə.

22 Mba Kanu pənətəbelər mataka maməkə-ε, k'ali fum əfədəkəfis. Mba εnabelər mataka maməkə teta akə εnayek-yek mə.

23 Awa, kə wələma oloku nu: «Məcəŋkəl: Krist eyi nnə,» kə pəyənε fε ti, «Eyi nde-ε,» ta nəlaŋ wəkayı.

24 Bawo abarəne kəyənε Krist kə sayibe sa yem ŋandewur doru, ŋacyə megbekəre mēwēy-wēy kə mes mocuca, nte təŋsəŋε, kə təyənε ŋactam-ε, ŋatalər akə Kanu kənayek-yek mə.

25 Nəcəŋkəl! Iloku nu mes mame ta məntabəp-ε.

26 K'aloku nu: «Nənəŋk, eyi nde dətεgbərəε-ε,» ta nəyeksarne kəkə di. K'aloku nu sə: «Nənəŋk, eyi nde dukulə dəfet dəkə-ε,» ta nəlaŋ ti.

27 Ti disre kəder ka Wan ka Wərkun kəndeyi pəmə təkə pəmot pəŋsəŋ pəwan̄kəra kəyefε nde dec dəmpε haŋ nde dεŋkalε mə, tatəkə tə kəder ka Wan ka Wərkun kəndeyi.

28 Nde kəbel kəndeyi mə, difə yəfən yendebəpsenε.»

*Kəder ka Wan ka Wərkun
Mark 13.24-27; Luk 21.25-28*

29 Kə Yesu endəŋər sə: «Kə pucuy pa mata maməkə pen-cepər-ε, gbəncana babəkə bə pəndeyə gbərəp, ŋof ŋəfədəsəmar, cəs cəndetemprenε kəyefε dəkəm, fənəntər fa kəm fəndeyikεε.

30 Tεm tatəkə, tεgbekərə ta kəder ka Wan ka Wərkun tendewur dəkəm, afum a təf ya doru fəp ŋandekule-kule kənese disre, ŋacnəŋk Wan ka Wərkun pəcder kəp kəron dəfənəntər kə nərə da debeki dən disre.

31 Tεgbekərə ta kəfula luk pəpəŋ itə Wan ka Wərkun endsom mēlekε ən, məkə molon̄ka afum aŋε eyek-yek mon̄kubut man̄kələ ma dəkəm kə antəf mə.»

Tetəkəs ta totubcəne ta kətək ka fik

Mark 13.28-31; Luk 21.29-33

³² Kə Yesu endenər sə: «Nətəkəs totubcəne nte kətək ka fik kəmentər mə: Kə wara wa ki wəcaŋk wəleŋk-ε, nəcəre a kətən kələtərne.

³³ Nəna sə, kə nəndenəŋk maməkə fəp-ε, nəcəre a Wan ka Wərkun ələtərne yati.

³⁴ Kance icloku nu: Dətemp dandə dəfəcəpər ta maməkə fəp meyi-ε.

³⁵ Kəm kə antəf yendesəle mba moloku mem məfədesəle.»

Kanu gbəcərəm kəcərə tem nte doru dendelip mə

Mark 13.32-37; Luk 17.26-30,34-36

³⁶ Kə Yesu oloku sə: «Nte təyənə ta dəsək kə tem nte doru dendelip mə, ali fum encərə fe ti, ali melekə kə Wan ɲa sə ɲancərə fe ti, mənə Papa sona gboŋ.

³⁷ Təkə tenayi tem ta Nuha mə, itə teta kəder ka Wan ka Wərkun kəndeyi.

³⁸ Ta mataka ma kutup məntabəp-ε, afum ɲancdi yeri ɲacmun, ɲacnence, ɲacsəŋ sə awut anjan aran kələ haŋ dəsək nde Nuha ənabere debil mə,

³⁹ ali kəcəmcəmnə kəfet kənayi fe ɲa haŋ kə kutup kənder kə kəmələk ɲa fəp. Tatəkə tə kəder ka Wan ka Wərkun kəndeyi.

⁴⁰ Awa, kə arkun mərəŋ ɲayi dale-ε, palək wəkin, pasak wəka mərəŋ.

⁴¹ K'aran mərəŋ ɲayi kəbifəli məŋgben-ε, palək wəkin, pasak wəka mərəŋ.

⁴² Nəkəmbərne, nəckar kəder kən tem fəp, bawo nəncərə fe dəsək nde Mariki monu mendeder mə.

⁴³ Nəcərə ti belbel kə təyənə wəka kələ pəcərə tem ta pibi nte wəke endeder dəŋkiyə mə, wəka kələ əfədire pəcbum kumba kən ta wəke pəbere kələ kən disre.

⁴⁴ Ti tendesəŋe nəna sə kəcəmə nəckar, bawo Wan ka Wərkun endeder tem nte nəntəyə kə amera mə.»

Wəmarəs wəlompu kə wətəlomp

Luk 12.41-48

⁴⁵ Kə Yesu endenər sə: «Wəmarəs wəsektərne mariki mən pəckətene amera kəyə pətət wəre mariki mən encəmbər kəyənə wəbum ka amarəs alpəs akə, pəcsəŋ ɲa yeri tem nte pəmar mə-ε?

⁴⁶ Pəbət wəmarəs wəkəkə mariki mən mender məbər kə pəsumpər yəbəc nyə enasom kə mə!

⁴⁷ Kance icloku nu: Mariki mən mendesəŋe kə kəyənə ka wəcəmbər-cəmbər ka daka dən fəp.

⁴⁸ Mba kə wəmarəs olokune dəbəkək: «Mariki mem entayefe fe kəder,»

49 k'oncop kəsut anapa ən amarəs, pəcdi yeri pəcmun kə acis,

50 mariki ma wəmarəs wəkakə endeder dəsək nde əntəyə kə amera mə, dec nde əntəcərə mə,

51 pəbeləs wəmarəs wəkakə, pətərəs kə pəpəy pəmə təkə antərəs abanənə kəlomp mə. Difə kəbok kəndeyi kə kəyənərəne sek.

25

Totubcənə ta ayecərə wəco atəcərə arkun

1 Kə Yesu əntəcər nte: «Təm tatəkə, dəbe da dəkəm dendeyi pəmə ayecərə wəco atəcərə arkun anje njanlek səlamp kəkəbərəne kə wəgbanne mə.

2 Kəcamət kənayi nja daco anje anatonjkulu mə, kəcamət kəyi nja daco anje njanacərə kəkətənə mes mə.

3 Nte atonjkulu njanlek səlamp səyan mə, njanlekənə fə moro.

4 Mba ayecərə anje njanayənə acərə mes mə, njanlek səlamp səyan kə njanəmpərəne sə nwe o nwe moro dətəkəbə.

5 Nte wəgbanne oncwon kəder mə, kə mere məyə ayecərə kə njanidre.

6 Cəkəkək cəndebəp, kə dim dowur: «Awa wəgbanne ender, nəwur pade pafaynə kə!»

7 Kə ayecərə anje njanime kə njanefə kəlompəs səlamp səyan.

8 Kə ayecərə atonjkulu njanoku acərə kəkətənə mes: «Nəpocə su moro monu, kənime kə səlamp sosu səndə!»

9 Mba kə acərə kəkətənə mes njanoku: «Moro mosu məfətəyənə su kəmotənə kə nəna. Mənə nəkə nəway nda akə njanaməs moro mə!»

10 Ayecərə atonjkulu njanur kəkəway moro, kə wəgbanne ender kumunt kəyan darəy, ayecərə anje njanayi di mə njanberə dukulə kə wəgbanne, k'ancan kumba.

11 Nte pəwon pipic mə, kə ayecərə atonjkulu njaner kə njanoku: «Mariki, mariki, məgbite su!»

12 Mba kə mariki mme molumkə nja: «Kance icloku nu: Incərə fə nu!»

13 Ta nəpələp, bawo nəncərə fə dəsək, nəncərə fə sə dec nde indeder mə.»

Totubcənə ta amarəs maas

Luk 19.11-27

14 «Towurənə pəmə nte wərkun enfan kəkə marənt, pəwe acar ən pəsəy nja daka dən kəməyjk.

15 Kə wərkun nwe əsəy kəma kilo kəcamət wəcar wəkin, k'əsəy wəka mərəy kilo kəmərəy, kə wəka maas kilo katin, nte əsəy nwe o nwe təkə entam mə, k'eyefə k'əyjkə marənt.

16 Wəcar nwe anasəŋ kəmeŋk kema kilo kəcamət mə, əŋkə pəckafəli-kafəli waca haŋ k'əsətə sə kema kilo kəcamət kədeŋərne.

17 Nwe anasəŋ kema kilo kəmerəŋ kəmeŋk mə, nkən sə əŋkə pəckafəli-kafəli waca haŋ k'əsətə kema kədeŋərne kilo merəŋ.

18 Wəcar nwe anasəŋ kema kilo kin kəmeŋk mə, əŋkə pəkay abi k'eməŋk pəsam pa mariki mən.

19 Nte pəwon mə, kə mariki maŋan mender, k'ewe acar aŋe kədeyif ŋa nte ŋambəc mə.

20 Wəcar wəkə anasəŋ kema kilo kəcamət kəmeŋk mə, ender pəloku mariki mən: «Mariki, mənasəŋ im kəmeŋk kema kilo kəcamət, iŋkafəli-kafəli waca k'isətə sə kilo kəcamət kədeŋər.»

21 Kə mariki mən moloku kə: «Tentesə, wəcar wətət məyənə nwe pəmar palaŋ mə! Məlas kəlaŋ teta tes tefət, awa dəkəcəmə dəpəŋ d'indəsəŋ əm kətəmpər. Pəbət əm kə mariki mam.»

22 Wəcar nwe anasəŋ kema kilo merəŋ kəmeŋk mə, ender pəloku: «Mariki, mənasəŋ im kəmeŋk kema kilo merəŋ, nte iŋkafəli-kafəli waca mə, k'isətə kilo merəŋ kədeŋər ka ki.»

23 Kə mariki mən moloku kə: «Tentesə, wəcar wətət məyənə nwe pəmar palaŋ mə! Məlas kəlaŋ teta tes tefət, awa dəkəcəmə dəpəŋ d'indəsəŋ əm kətəmpər. Pəbət əm kə mariki mam.»

24 Wəcar wəkə anasəŋ kəmeŋk kema kilo kin mə ender pəloku: «Mariki, incərə a fum wəcuca məyənə: Kəfo kə məntel nke mənatəgbal defet mə, məcpim yokom nyə mənatəbəf mə.

25 Inanesə, kə təsəŋ'em kəkəmət kema kam dəntəf: Ikə nke, məbaŋ daka dəkə dəyənə dam mə.

26 Kə mariki mən moloku kə: «Wəcar wələc, wəfan! Məna mənacərə a intel nde intəgbal defet mə, icpim yokom nyə intəbəf mə?»

27 Pənamar məsəŋ pəsam pem aməŋk pəsam, kə nte ilukus mə, k'imbaŋ pəsam pem isətə sə pi kəroŋ kəntəŋgbə.»

28 Kə mariki mme moloku: «Nəbaŋər kə kema, nəsəŋ ki wəkə əsətən'em kema kilo wəco mə.

29 Bawo, andeberənə wəkə əyə mə haŋ pəlar kə, mba wətəyə, andebaŋər kə ali pəkə əyə mə.

30 Nəbeləs wəcar wətəyə dəkəcəmə dəkubump ka nde dabaŋka. Difə kəbok kə kəŋaŋərənə sek kəŋkəyi.»

Kəgbey ka alompu kə aləc tēm nte doru dendelip mə

31 Kə Yesu endəŋər sə: «Kə Wan ka Wərkun endeder nərə da debeki dən disre kə melekə fəp-ε, pəndə dəcəm dən da dəbe.

32 Andeloŋka afum a təf ya doru fəp fər yən kirin. Pəgbey aŋe kə akə pəmə nte wəkək eŋgbey ŋkesiya kə cir mə:

33 Pəcəmbər alompu kəca kətət kə aləc kəca kəmeriya pəmə nte wəkək encəmbər ŋkesiya kəca kən kətət, kə cir kəca kən kəmeriya mə.

³⁴ Awa, wəbe pəloku akə ηayi kə kəca kətət mə: «Nəder nənə aηe Papa kem ompoce pətət mə. Nələk ke, debe nde anacəmbəre nu kəyefe nte doru denacop mə.

³⁵ Bawo dor denasumpər im kə nəsoη im yeri, kə amera ηowos im kə nəsoη im domun, k'iyəne wəcikəra kə nəmbəη im,

³⁶ inawur dis fos kəfe kəctərəs im kə nəmber im yamos, k'incu kə nəten'em acəl, k'iyi dəbili kə nənder nənəηk im.»

³⁷ Awa, alompu ηalukse kə kəyif: «Mariki, ake tēm tə sənanəηk əm dor dosumpər əm, kə səsoη əm yeri-ε? Ake tēm tə amera ηenawos əm, kə səsoη əm domun-ε?

³⁸ Ake tēm tə sənanəηk əm məyənə wəcikəra, kə səmbəη əm-ε? Ake tēm tə mənayi dis fos kə səsoη əm yamos-ε?

³⁹ Ake tēm tə sənanəηk əm məccu kə sənten'am acəl-ε? Ake tēm tə mənayi dəbili, kə sənder kədenəηk əm-ε?»

⁴⁰ Kə wəbe oloku ηa: «Kance icloku nu: Tēm o tēm tə nəyə tes tin ta mes mətət maməkə nwe efete dəkəcəme awenc im aηa fəp dacə mə, ina yati nəyə ti.»

⁴¹ Kə tətəkə telip-ε, wəbe pədeloku akə ηayi kə kəca kəmeriya mə: «Nəbəl'em day, nənə aηe Kanu kəsəη pələc mə. Nəkə nəbərə dənenc nde dəntənimə doru o doru mə, nde analompse ηəηk ηələc kə mələke ma ηi mə.

⁴² Bawo dor denay'em kə nəntəsəη im yeri, kə amera ηowos im kə nəntəsəη im domun.

⁴³ Inayi decikəra kə nəntəbəη im, inawur dis fos kəfe kəctərəs im, kə nəntəsəη im yamos, inacu k'iyi dəbili kə nəntəkə kənəηk im.»

⁴⁴ ηa sə ηayif: «Mariki, ake tēm tə sənanəηk əm dor dəy'am, kə pəyənə fe ti amera ηowos əm, kə pəyənə fe ti məyi decikəra, məyi dis fos, məyi ta məntəmnə, kə pəyənə fe ti məyi dəbili ta səηkə səmar əm-ε?»

⁴⁵ Wəbe pəluke ηa: «Kance icloku nu: Nte nənatəyənə ti wəkin akə ηafete mə dacə, ina nəntəyənə ti.»

⁴⁶ Akakə ηandebərə kəctərəs disre ka Kanu nke kəntəlip doru o doru mə, mba alompu ηandebərə kəyi wəyən ηa doru o doru.»

26

Abə ηaseke Yesu tēηkəndəm

Mark 14.1-2; Luk 22.1-2

¹ Nte Yesu elip kəloku moloku mame mə, k'oloku acεpse ən darəη:

² «Nəncərə a kə mata mērəη mendecəpər-ε, kəsata ka Kəcəpər ka Mələke Medif kəηyi. Andeber Wan ka Wərkun afum dəwaca nte təηsoηe ηacəη kə tək yepəmpəl kəroη mə.

³ Aləηne apəη kə abeki aSuyif ηandekəloηkanə nde kələ kəpəη ka wəloηne wəpəη nwe aηwe Kayif mə,

⁴ ɲatəɲne kəsumpər Yesu cəpənpən disre ɲadif kə.

⁵ Ti disre kə ɲalokene: «Ta pasumpər kə kəsata disre ta tedesəɲe pidikce pedeyi afum dacə.»

Wəran wəloma oloɲər domp da Yesu labunde

Mark 14.3-9; Luk 7.36-50; Isaɲ 12.1-8

⁶ Nte Yesu enayi Betani ndena Siməɲ wəcunə sen,

⁷ kə wəran wəloma ɔlətərne Yesu. Wəran nwe pətəmpər təkəbə pa alabatər * pɛlare labunde da nar tɛp nde deyeɲk kəway mə, Yesu pəyi demesa kə wəran nwe ender pəloɲər kə labunde nde fəp dəromp.

⁸ Kə pəntele acɛpse a Yesu darəɲ əloma, kə ɲayifne: «Ta ake tə wəran wəkawe eləsəre-ləsəre labunde dandɛ-ɛ?»

⁹ Anatam di kəcəməs kəway kəyeɲki, pasəɲ pəsam papəkə atəyɔ daka.»

¹⁰ Mba kə Yesu oloku: «Nəcə kə! Ta ake tə nəɲnale kə-ɛ? Təyɔ tətət t'əyɔ nnə ina iyi mə.

¹¹ Atəyɔ daka, ɲayi nu dacə tɛm fəp. Mba ina, nəfədey'em tɛm fəp.

¹² Nte oloɲər im labunde dandɛ dərɪs mə, kəbel kem k'eyi kəlompəs a pacwup ki.

¹³ Kance icloku nu: Nnə o nnə andedəɲk Kibaru Kətət karɲe doru dandɛ kərkor mə, aɲloku sə təyɔ tətət nte wəran wəkawe əyɔ mə kəcəm-cəməs ka doru.»

Yudas efaɲ kəber Yesu abɛ a aloɲne apəɲ dəwaca

Mark 14.10-11; Luk 22.3-6

¹⁴ Wəkin acɛpse a Yesu darəɲ wəco kə mɛrəɲ dacə, nwe ancwe Yudas wəka dare da Keriyot, əɲkə nde abɛ a aloɲne ɲayi mə,

¹⁵ kəkəyif ɲa: «Kə təyənɛ ilek Yesu ibɛr nu dəwaca-ɛ, pəsam cəke pə nəndesəɲ im-ɛ?» Kə abɛ aɲɛ ɲələm gbɛti gbəleɲ wəco maas (30), kə ɲasəɲ kə.

¹⁶ Kə Yudas eyefe oɲ kəten təyɔ nte endeberɛ Yesu abɛ akakə dəwaca mə.

Yesu kə acɛpse ən darəɲ ɲaloɲkane kəboc kəsata

Mark 14.12-21; Luk 22.7-14,21-23; Isaɲ 13.21-30

¹⁷ Dəsək dəcəkə-cəkə da kəsata ka Cəcom Cətənəɲkəl Lebin, acɛpse a Yesu darəɲ ɲayif kə: «Deke məfaɲ səkəlomp's'am yeri ya kəsata ka Kəcɛpər ka Mɛləkɛ Medif-ɛ?»

¹⁸ Kə Yesu oloku: «Nəkə nəberɛ dare ndena fum wəloma, nəloku kə: «Wətəkse kosu oloku: Tɛm tɛm tələtərne, nnə ndaram indecɛpərəne kəsata ka Kəcɛpər ka Mɛləkɛ Medif kə acɛpse em darəɲ.»»

* **26:7** *Təkəbə pa alabatər* = Təkəbə pə mpɛ anclompse tasar pefɛr pɛpat mə. Tasar pətət papəkə p'aɲwe «alabatər».

19 Kɔ aɕɛpsɛ a Yesu darəŋ ɲayɔ tɔkɔ enasom ɲa mɔ, kɔ ɲalompəs yeri ya kəsata kan̄kɔ.

20 Nte dɔfɔy dɛmbəp mɔ, Yesu ɲandɛ dɛmɛsa kɔ aɕɛpsɛ ɔn darəŋ aɲɛ wɔco kɔ mɛrəŋ.

21 ɲayi kədi yeri, kɔ Yesu oloku: «Kance icloku nu: Wəkin nu dacɔ, endɛbɛr im aɛrɛnɛ em dɔwaca.»

22 Kɔ dis dɛndɛncɛ ɲa kɔ ɲamɔncnɛ, kɔ ɲayɛfɛ kəyifət Yesu: «Mariki, in'ɔfɔ ba?»

23 Kɔ Yesu oloku: Nwɛ sɛmbɛr waca dap din disrɛ kədi yeri mɔ endɛbɛr im aɛrɛnɛ em dɔwaca.

24 Wan ka Wərkun endɛfi pəmɔ tɔkɔ ancic ti mɔ. Mba pələc pere peyi wərkun wəkawɛ endɛbɛr Wan ka Wərkun aɛrɛnɛ ɔn dɔwaca mɔ! Kənatɔkom ka wərkun wəkawɛ kənatam kətesɛ kɔ!»

25 Yudas nwɛ ɛnayi kəyɔ Yesu cəpənɲən mɔ, eyif Yesu: «Wətəkse, in'ɔfɔ ba?» Kɔ Yesu oluksɛ kɔ: «Mən'oloku ti.»

Yesu kɔ aɕɛpsɛ ɔn darəŋ ɲampəŋnɛ kədi yeri tɛlpəs

Mark 14.22-25; Luk 22.15-20; 1Ko 11.23-26

26 Nte ɲancdi yeri mɔ, kɔ Yesu ɛlɛk kəcom, k'eyif Kanu barka, k'entepi ki k'ɔsəŋəs aɕɛpsɛ ɔn darəŋ pəcloku: «Nəban̄ ɲəsəm kəcom kan̄kɛ, dis dem dɔ.»

27 K'ɛlɛk sɔ tɔmbəl ta wɛn, nte elip kəyif Kanu barka mɔ, k'ɔsəŋ ɲa pəcloku: «Nəmun wɛn wawɛ fəp,

28 mecir mem mɔ, mmɛ alon̄ɛ kəcaŋəs ka danapa da Kanu kɔ kənay ka afum teta kəŋaŋnɛnɛ ka kiciya mɔ.

29 Kance icloku nu: Ifɔsɔmun wɛn haŋ dɔsək ndɛ indɛgbəkɛrɛ sɔ kəmun wi kɔ nən̄a, ndɛ dɛbɛ da Papa kem mɔ.»

30 Nte ɲalip kələŋəs melen̄ mokor-korɛ Kanu mɔ, Yesu kɔ aɕɛpsɛ ɔn darəŋ ɲawurnɛ ntɛndɛ kəca ka tɔrɔ ta Tɔk ya Olif.

Yesu oloku Piyɛr a endɛgbɛkəl kəcərə kən

Mark 14.26-31; Luk 22.31-34; Isaŋ 13.37-38

31 Nte Yesu kɔ aɕɛpsɛ ɔn darəŋ ɲambəp tɔrɔ tatɔkɔ mɔ, k'oloku ɲa: «Nən̄a akan̄ɛ fəp nəndɛlukus im darəŋ, bawo Yecicəs Yosoku yoloku: «Indesut wəkɛk, ɲkesiya yɔcɔl yesamsər.»

32 Mba k'indɛfɔtɛ afi dacɔ-ɛ, indɛkəkər nu Kalilɛ.»

33 Kɔ Piyɛr oloku kɔ: «Ali fəp fəlukus əm darəŋ, ina ifɔlukus əm darəŋ.»

34 Kɔ Yesu oloku Piyɛr: «Kance, iclok'əm, pibi pampɛ yati, məndɛgbɛkəl kəcər'em kəmaas a kicipi kəccam.»

35 Mba Piyɛr pəcgbɛkəl ti: «Ali səcfi kɔ mən̄a, ifɔgbɛkəl a incər'am.» Aɕɛpsɛ a Yesu darəŋ akɔ fəp toloku tin tayi tɔ ɲancloku.

Yesu ontola Kanu ndɛ Ketseməne

Mark 14.32-42; Luk 22.40-46

36 Ti disre kɔ Yesu ender kɔ acepse ɔn darəŋ nde kəfo nke aŋwe Ketsemane† mɔ, k'oloku acepse ɔn darəŋ: «Nənde nno, ibɔle nu pipic itola Kanu.»

37 Kɔ Yesu elɛkene Piyer kɔ awut a Sebede merəŋ, nte dis dɛndence Yesu kɔ abəkɛc ɲelɛce-ɛce kɔ mɔ,

38 k'oloku ɲa: «Abəkɛc ɲenanɲkanɛ kədenc'em pəmɔ ifi. Nəyi nno, ta padire!»

39 Kɔ Yesu ɔmbɔlene ɲa pipic, k'ontotne k'embelkər kəcɔp tobu dɛntɔf, k'ontola nte: «Papa kem, kɔ tɔyɔne məwose ti-ɛ, mɔbɔlen'em tɔmbɔl pa kətɔrəs pampɛ! Mba bafɔ tɔkɔ ifaŋ ti mɔ, mba tɔkɔ mɔna Papa mɔfaŋ ti mɔ.»

40 Kɔ Yesu ender pəbɔp acepse ɔn darəŋ ɲacdire. K'eyif Piyer: «Nəntam fe kətɔdirɛ kɔ ina ali dec din ba?

41 Ta nədire, nətola Kanu nte tɔŋsɔŋe ta nəmbere kəwakəs nke kəŋsɔŋe nu kəyɔ mes mɛɛc mɔ. Pəmbas mera yonu kəyɔ pətɔt, mba nəyɔ fe səkət kəyɔ ti.»

42 Kɔ Yesu ɔmbɔle sɔ ta merəŋ k'ontola Kanu nte: «Papa kem, kɔ tɔyɔne a tɔmbɔl pampɛ pɔfɔbɔle ta imun pi-ɛ, awa, tɛfaŋ tam teyi!»

43 Kɔ Yesu olukus, k'ender pəbɔp acepse ɔn darəŋ ɲacdɔŋəs, nte fɔr yenalɔl ɲa mɔ.

44 Kɔ Yesu ɛsak ɲa k'ɔmbɔle sɔ, k'ontola sɔ Kanu ta maas, pəcgbəkəre sɔ moloku min mayi.

45 Kɔ Yesu oluksərne nno acepse ɔn darəŋ ɲayi mɔ, k'ɛŋgbəŋgbəŋɔr ɲa: «Nəndirɛ sɔ, kəŋesəm kɔ nənde! Nəcəŋkəl: Tɛm tɛmbɔp, amber Wan ka Wərkun aciya dəwaca!

46 Nəyɛfe, paŋkɔn! Bawo nwe eyi kəber im afum dəwaca mɔ, ɔɔtərne.»

Kəsumpər ka Yesu

Mark 14.43-50; Luk 22.47-53; Isaŋ 18.2-11

47 Yesu pəsɔrɔlok-loku, gbəncana babɔkɔ kɔ Yudas nwe ɛnayı acepse a Yesu aŋe wəcɔ kɔ merəŋ dacɔ mɔ, ender pəsɔle kənaŋ ka afum alarəm aŋe ɲanatəmpər-təmpər sakma kɔ tɔk yosutneɛ mɔ. Aloŋne aɔŋ kɔ abeki aSuyif ɲanasom ɲa.

48 Yudas nwe ɛncber Yesu aterene ɔn dəwaca mɔ, ɛnasɔŋ asɔdar tɛmance nte: «Nwe inɲkɔcup mɔ, nkɔn ɔfɔ wəkakɔ. Nəsumpər kɔ.»

49 Gbəncana babɔkɔ kɔ Yudas ender, k'ɔɔtərne Yesu, k'ewe kɔ: «Iyif əm, Wətəkse,» k'oncup kɔ.

50 Kɔ Yesu oloku kɔ: «Wanapa, nte mənder kəyɔ mɔ, məyɔ ti.» Kɔ afum akakɔ ɲancɔŋne kɔ ɲantəpsər Yesu waca, kɔ ɲasumpər kɔ.

51 Gbəncana babɔkɔ kɔ wəkin asol a Yesu dacɔ, owure dakma k'encɛp wəcar ka wəloŋne wəpɔŋ aləŋəs, k'ɛŋgbinti ɲi.

† 26:36 Ketsemane ito tatɔkɔ cəArame «Dəkəfɔcəs moro».

⁵² Kɔ Yesu oloku kɔ: «Məluxɛ dakma dam dobom, bawo nwe o nwe endeyefərəne dakma mə, dakma dendedif kɔ.

⁵³ Məncem-cemne a ifətam kəwe Papa kem nwe entam kəkər'em mələke asɔdar alarəm cəgba wəco kɔ mərəj ca wul kɔ wul ba?

⁵⁴ Cəke cɔ Yecicəs Yosoku yentam kəlarɛ-ɛ? Bawo yenaloku a tantɛ tɔ pəmar mes mamɛ medecəpər?»

⁵⁵ Gbəncana babəkɔ bɔ Yesu enaloku kənay kanjɔ: «Nəwur kədesumpər im, nətəmpər-təmpər sakma kɔ tək yosutnɛnɛ pəmɔ nte injɔnɛ kalbante mə. Dɔsɔk o dɔsɔk inder inde nde kələ kəpɔj ka Kanu ictəkɛ ta nənder nəsumpər im-ɛ.

⁵⁶ Mba mamɛ fəp meyi nte tɔjɔnɛ Yecicəs ya sayibɛ yelare mə. Kɔ acəpsɛ darəj ɲasak Yesu kɔ ɲayɛksɛ.

Yesu eyi nda aboc kiti

Mark 14.53-65; Luk 22.54-55,63-71; Isaɲ 18.12-24

⁵⁷ Afum aɲɛ ɲanasumpər Yesu mə ɲanjkekərə kɔ ndena wəloɲnɛ wəpɔj Kayif, dəndo atəkɛ sariyɛ kɔ abeki aSuyif ɲanabəpsɛnɛ.

⁵⁸ Piyɛr ɛnacəmɛ Yesu darəj pəbələ han nde abanjka ɲa kələ ka wəloɲnɛ wəpɔj. Kɔ Piyɛr emberɛ dəsəjka k'ɔɲkɔ pəndɛ k'abum a kələ ka wəloɲnɛ Kayif kəsək pəkəkɛ nte mes ma Yesu mendəkɔlip mə.

⁵⁹ Aloɲnɛ apɔj k'aboc kiti aSuyif fəp ɲanctɛn yem nyɛ ɲantam kəyemsɛnɛ Yesu, nte tɔjɔnɛ padif kɔ mə.

⁶⁰ Mba ɲanasɔtɔ fɛ, ali nte sede alarəm ɲanader ɲaboncɛ kɔ yem mə. Tɛlpəs kɔ sede mərəj sənder,

⁶¹ nɛ sənaloku: «Yesu oloku: «Intam kəkəkəli kələ kəpɔj ka Kanu, icəmbər sɔ ki mata maas disrɛ.»»

⁶² Kɔ wəloɲnɛ wəpɔj ɛyɛfɛ k'eyif Yesu: «Məfəluxɛ su təlɔm o təlɔm ba? Cəke cɔ mənɲoku teta moloku ma sede mme akanɛ ɲambonc am mə?»

⁶³ Mba kɔ Yesu ɛncəjɲ. Kɔ wəloɲnɛ wəpɔj oloku kɔ: «Tewe ta Kanu nke kəyi mə, məloku su kɔ tɔyɔnɛ mən'ɔyɔnɛ Krist, Wan ka Kanu-ɛ.»

⁶⁴ Kɔ Yesu olukɛ kɔ: «Mən'oloku ti. Mba icloku nu, kəyɛfɛ oɲ ndəkəl, nəndenəjɲ Wan ka Wərkun pəndɛ kəca kətɔt ka Kanu nke kəntam mes fəp mə, pəcder nərə da debeki dən disrɛ kəp ka dəkəm kəroɲ.»

⁶⁵ Kɔ wəloɲnɛ wəpɔj ɛwal-wali yamos yən pəcloku: «ɔləməs Kanu! Sede sərə sɔ pəmar payif-ɛ? Nəne təkɔ ontubcɛnɛnɛ Kanu mə, kələməs ka Kanu kɔ.

⁶⁶ Cəke cɔ nəncem-cemne-ɛ?» Kɔ ɲalukɛ moloku: «Mɛnɛ padif kɔ.»

⁶⁷ Ti disrɛ kɔ ɲayukər Yesu lin dəkəro, kɔ ɲantiməs kɔ ɲkulma, aləma ɲacsut kɔ waca dəkəncə, ɲacloku:

68 «Krist wəyək-yək wəka Kanu, məboncər su ma, nwe osut əm mə!»

Piyer eηgbekəl kəcərə ka Yesu

Mark 14.66-72; Luk 22.56-62; Isay 18.17,25-27

69 Piyer pəndə nde dabanjka, kə wəcar wəyecərə wələma ələtərnə kə, k'oloku: «Məna wəkəkə məndə mə, nən'enayi kə Yesu wəka Kalile.»

70 Mba kə Piyer eηgbekəl ti afum fəp fər kirin, pəcloku: «İna, incərə fə nte məna məfanj kəloku mə.»

71 Nte nkən Piyer əncəkə dəkusunja kəwur mə, kə wəran wələma ənəjk kə sə, k'oloku afum akə ηanayi dənda mə: «Wəkawə, ηa ηanayi kə Yesu wəka Nasaret.»

72 Kə Piyer eηgbekəl sə tatəkə k'enderəm: «İncərə fə wərkun wəkawə!»

73 Pəwon fə akə ηanacəmə di mə ηələtərnə Piyer kə ηayif kə: «Məna sə afum akanə ηə nəyi, tolok-loku tam tementər ti.»

74 Kə Piyer eyəfə kədərəm: «Kanu kətərəs im kə pəyəne a kəyəmə k'ində-ə! İncərə fə fum wəkawə nəηlə mə!» Gbəncana babəkə kə kicipi kəncam.

75 Kə Piyer encəm-cəmnə moloku məkə Yesu ənaloku kə mə: «Məndəgbekəl kətəcər'em kəmaas a kicipi kəccam.» Kə Piyer owur dabanjka k'ombok belbel.

27

Aηkekərə Yesu ndena Pilat

Mark 15.1; Luk 23.1-2; Isay 18.28-32

1 Nte bətbət bəmbəp mə, alonjə apəη kə abeki aSuyif fəp ηalonjkanə kə ηantəηnə a padif Yesu.

2 Nte ηalip kəkot kə mə, kə ηankekərə kə, kə ηambər kə Pilat dəwaca nwe ənayəne wəkirinj wəka sədare sa Yude mə.

Defi da Yudas

Asom 1.18-19

3 Nte Yudas nwe ənawurə Yesu pəber kə aterənə ən dəwaca ənəjk a kədif k'aηkə Yesu mə, kə abəc ηəmbərə kə. K'olukse gbətə gbələη wəco maas alonjə apəη kə abeki,

4 pəcloku: «İnciya, imber wətəciya nu dəwaca nte təηsəηə padif kə mə.» Mba alonjə apəη kə abeki ηaloku: «Yudas, tatəkə təməmən fə səna! Məna tatəkə təməmən!»

5 Kə Yudas eηgbal pəsam dəndo kələ kəpəη ka Kanu, k'eyəfə kəfo kəηkə, k'əηkə pəgbəkne k'əfi.

6 Kə alonjə apəη ηalonjka gbələη ba gbətə mbə, kə ηaloku: «Sariyə səwosə fə su kəber pəsam papəkə kələ ka kələ kəpəη ka Kanu, bawo kəway ka mecir kə.»

7 Nte ηanəηkənə mə, kə ηantəηnə kəwayə ka gbətə babəkə dale da wəsəl, pəyəne di dəkəwup da acikərə.

⁸ Ti tāsōŋe k'asārōwe dākəwupene dadəkō haŋ məkō «Dale da Mecir.»

⁹ Kō tōyōne moloku mme sayibe Yeremy enadəŋk mō, melare: «Ŋanalek gbeti gbəleŋ wəco maas. Gbeti babəkō bō aka Yisrayel ŋanatəŋne kəsōŋe kō,

¹⁰ kō ŋasōŋe bi teta dale da wəsəl, pəmō nte Mariki enasom im ti mō.»*

Yesu encəme fər kirij ya Pilat kəkiti

Mark 15.2-5; Luk 23.2-5,9-10; Isaŋ 18.29-38

¹¹ Kō wəbē Pilat eyif Yesu: «Mən'ōyōne wəbē ka aSuyif ba?» Kō Yesu olukse kō: «Mən'oloku ti.»

¹² Mba ali toloku tin Yesu enaloku fe kəlukse moloku ma kəyemsene mme alonŋe apōŋ kō abeki ŋanaboncē kō mō.

¹³ Ti disre, kō wəbē Pilat eyif kō sō: «Mes melec melarəm mme ŋambonc am mō, məfōne mi ba?»

¹⁴ Mba ali toloku tin Yesu enalukse fe kō, ti tenawosəs wəbē Pilat kusu pəpōŋ.

Wəbē Pilat osom a padif Yesu

Mark 15.6-14; Luk 23.13-23; Isaŋ 18.39-40

¹⁵ Kəsata ka Kəcepər ka Mələke Medif, wəkiriŋ ka sədare sa Yude encsake afum yeŋən kəren o kəren tataka ta kəsata kaŋke, fum wəkin ayi dəbili dacō nwe kənay ka afum kəncfan mō.

¹⁶ Tem tatakō wəyi dəbili wəlōma enayi nwe tewe tənəsam dətōf mō, pacwe kō Yesu Barabas.

¹⁷ Nte ŋanalōŋkanē mō, kō Pilat eyif ŋa: «Yesu Barabas kō Yesu nwe aŋwe Krist mō, an'ō nəfan isak kō yeŋən-ε?»

¹⁸ Pilat enacəre a kəraca kənasōŋe ŋalək Yesu ŋaber kō dəwaca.

¹⁹ Tem nte Pilat enandē dəŋkiti mō, kō wəran kən osom pakoloku kō: «Ta təlōm o təlōm tey'am dacō kō fum wəlōmpu wəkawē! Bawo pibi pa məkō intərōna belbel icwerəp teta fum wəkawē.»

²⁰ Kō alonŋe apōŋ kō abeki ŋagbiŋər kənay ka afum kəlōku a pasake ŋa Barabas, padif Yesu.

²¹ Kō wəbē Pilat eyif kənay: «Afum akaŋe merəŋ an'ō nəfan a pasake nu yeŋən-ε?» Kō ŋalukse kō: «Barabas!»

²² Kō Pilat eyif ŋa sō: «Ak'indeyōne oŋ Yesu nwe aŋwe Krist mō?» Kō fəp fəlōku: «Məcaŋ kō dətək yeṗəmpəl!»

²³ Kō Pilat ŋgbəkəre sō kəyif ŋa: «Pələc pere p'ōyō-ε?» Mba kō kənay ka afum kənaŋkanē kəkule-kule: «Məcaŋ kō dətək yeṗəmpəl!»

²⁴ Nte Pilat enacəre a əfōtam tes o tes, kō pidikce pa kənay ka afum pəmbək kəbək dəm, k'ələk domun k'embikene waca fər

* **27:10** Sakary 11.12-13 kō məmāmān sō Yeremy 18.2-3; 19.1-2; 32.6-15

ya afum kiring, k'oloku: «Isare fe kiciya ka defi da fum wəkawε. Nən'endesare kiciya ka kədif kən!»

²⁵ Kε afum fεp ηaloku: «Səwose kəsare teta defi dən, səna kε awut asu!»

²⁶ Kε Pilat εsake afum aηe Barabas, kε Barabas oηkε yeηən. Nte Pilat elip kəsom pasute Yesu tərəjkən mε, k'ember kε afum dεwaca a pacan kε dətək yeηəmpəl.

Asɔdar ηafani Yesu

Mark 15.16-20; Luk 23.11; Isaη 19.2-3

²⁷ K'asɔdar a Pilat ηaηkekεre Yesu tedisre ta kεlε kən kεpən, kε ηalonka dεηgbεηk dadεkε fεp ndε denakel kε mε.

²⁸ K'asɔdar ηawure Yesu yamos yən kε ηamber kε burumus beyim.

²⁹ Kε ηandune kε aηgbəηkεlε ηa bεηk nηe ηanacεp kε dεromp mε, kε ηamber kε kεgbo dεkεca kėtət kεyone kε kεηgbasar k'abε, kε ηancεpe kε suwu ηacfani kε, ηacloku: «Iηyif εm, wεbe ka aSuyif!»

³⁰ Kε ηayukεr Yesu lin kε ηalek kεgbo ηacsut kε dεromp.

³¹ Nte ηalip kεfani Yesu mε, kε ηawure kε burumus bεkε ηanaber kε mε, kε ηamber kε sε yamos yən. Kε ηaηkekεre kε kεkεcan kε dətək yeηəmpəl.

Ancan Yesu dεkėtək kεpəmpəl

Mark 15.21-32; Luk 23.26-43; Isaη 19.16-24

³² Nte asɔdar ηancwur dare mε, kε ηanəηk wεrkun wεka dare da Siren wεloma nwe ancwe Siməη mε, kε ηancεmbεr kε yeβεc ya kεgbəηne tək yeηəmpəl nyε anakε kεcan Yesu mε.

³³ Kε ηaηkε ηabεp kεfo nke aηwe Kolkota mε, itε tatεkε «Kεfo ka Kεmbεmbεle.»

³⁴ K'asɔdar ηasəη Yesu wen wənəηkεl pədokət, mba nte εnatεm wi temer mε, εnawose fe wi kεmun.

³⁵ Nte ηalip kεcan kε dətək yeηəmpəl mε, kε ηaηkot yam-puηpuη teta kayer yamos yən.†

³⁶ Kε ηandε ηacbum kε.

³⁷ K'antεp kε domp takεron yecicεs nyε yenaloku tes nte tεsəηe k'andif kε mε: «Fum wəkawε Yesu εfε, wεbe ka aSuyif.»

³⁸ Ancan sε Yesu kεsək dətək yeηəmpəl tem tin kε calbante mεrəη, wεkin pεyi kε kεca kėtət, wεkε pεyi kε kεca kεmeriya.

³⁹ Afum acepεr ηaclomεs kε ηacfεk kε domp.

⁴⁰ ηacloku: «Mεna nwe mancekεli kεlε kεpən ka Kanu, mεcεmbεr sε ki mata maas disre mε, mεyacne mεnasεrka! Kε tεyone a Wan ka Kanu mεyone-ε, mεtor oη dətək yeηəmpəl yayε!»

⁴¹ Alonε apən, atεkse sariye s'aSuyif kε abeki sε ηancfani Yesu ηacloku:

† 27:35 Məməmən Yabura 22.18

⁴² «Enayac alɔma, mba ɔfɔtam kɔyacne nkɔnsərka! Wɔbe ka Yisrayel ɔyɔne: Awa pɛtor oŋ ma dɛtɔk yepɔmpɛl yayɛ, tɔsɔŋɛ sɛgbɛkɛr kɔ kɛlan kosu!

⁴³ Eŋgbɛkɛr Kanu amera, awa Kanu kɔyac kɔ oŋ ma, kɔ tɔyɔne Kanu kɛmbɔtɛr kɔ. Bawo oloku: «Wan ka Kanu iyɔne!»

⁴⁴ Calbante aŋɛ anacɔŋ kɔ Yesu mɔ ŋaclɔmɔs kɔ tin tayi.

Defi da Yesu

Mark 15.33-41; Luk 23.44-49; Isaŋ 19.28-30

⁴⁵ Pɛndeyi dan kɔ kubump kɛntɔr dɛntɔf fɛp han salifana.

⁴⁶ Salifana sɛndebɛp, kɔ Yesu oŋkule-kule: «*Eloyi, Eloyi, lema sabaktani?*» Itɔ tatɔkɔ: «Kanu kem, Kanu kem, ta ake tɔ mɔsak'em-ɛ?»

⁴⁷ Kɔ afum alɔma akɔ ŋanayi di mɔ, ŋanane kɔ dim. Ŋancloku kɛfɔtɔ disre a Aŋnabi Eli eyi kɔwe.

⁴⁸ Kɔ fum wɛkin eyekse kɛkɔlek yangba, nyɛ enapuk dɛmɛncɔncɔ mɔ, k'ɛnɛpsɛr yi dɛkɛmota k'encenc kɔ yi a pɛmun.

⁴⁹ Mba kɔ akɔ ŋaloku: «Mɛkar ma, pamɔmɔn belbel kɔ tɔyɔne Eli endeder kɛdeyac kɔ-ɛ.»

⁵⁰ Kɔ Yesu oŋkule sɔ pɛpɔŋ, a k'olukse Kanu afɔkɛl ŋɔn.

⁵¹ Tɛm tatɔkɔ tɔ kɛloto kɛlɛl nke kɛŋkɛŋk tɔksɔ ta kɛlɔ kɛpɔŋ ka Kanu mɔ kɛŋgbɛre dacɔ, kɔyɛfɛ takɔroŋ han tantɔf. Kɔ antɔf ŋɛyɛfɛ kɔyikɛ pɛpɔŋ kɔ masar mɛŋgbɛre,

⁵² kɔ cufu cɛŋgbite, kɔ cɛbel ca afum a Kanu alarɛm ŋafɔte afi dacɔ.

⁵³ Kɔ ŋayɛfɛ dɛcufu nte Yesu ɔfɔte afi dacɔ mɔ, kɔ ŋambɛre Yerusalem dare ndɛ ampuse Kanu mɔ, kɔ ŋamentɛrne afum alarɛm.

⁵⁴ Wɔbe k'asɔdar wɛRom kɔ amarɛne ɔn asɔdar akɔ ŋanayi di ŋacbum kɛbel ka Yesu mɔ, ŋanesɛ pɛpɔŋ nte ŋananɛŋk antɔf kɔyikɛ, kɔ tɔkɔ tɛnayi kɛfi ka Yesu mɔ, kɔ ŋaloku: «Wɛkawɛ, Wan ka Kanu yati enayi!»

⁵⁵ Aran alarɛm ŋanacɛme pɛbɔle ŋacmɔmɔn, aran aŋɛ ŋanasol kɔ Yesu kɔyɛfɛ Kalile kɛdebɛce kɔ mɔ.

⁵⁶ Aran akakɔ dacɔ, Mari wɛka Makdala, Mari iya wɛka Sak kɔ Isifu, kɔ iya ka awut arkun a Sebede.

Antore Yesu dɛkufu

Mark 15.42-47; Luk 23.50-56; Isaŋ 19.38-42

⁵⁷ Nte dɔfɔy dɛmbɛp mɔ, kɔ wɛrkun wɛka daka wɛlɔma ender, wɛka dare da Arimate enayi, pacwe kɔ Isifu. Nkɔn sɔ wɛɛpsɛ Yesu darɔŋ wɛlɔma enayi.

⁵⁸ Kɔ wɛrkun nwe oŋkɔ ndena Pilat k'oŋkɔ pɛtola kɔ kɛbel ka Yesu. Kɔ Pilat osom a pasɔŋ kɔ ki.

⁵⁹ Kɔ Isifu elɛk kɛbel ka Yesu, k'ɛnɛpsɛr ki kasanjke ka kɛloto kɛtelɛr kɛfu,

⁶⁰ k'ontorɛ kɛbel ka Yesu dɛkufu nkɛ anatɔtorɛ wɛfi kɛrɛsna mɔ, kufu nkɛ nkɔn Isifu anayɔk ka nkɔnsɛrka dɛtasar mɔ, k'osunce dɛkɛbɛrɛ da kufu kanjko tasar tɔpɔŋ, k'ɔŋkɔ.

⁶¹ Awa, Mari wɛka Makdala kɔ Mari nwe ɛnayɔnɛ iya ka Sak kɔ Isifu mɔ ŋanayi di, ŋande ŋatɛfɛrnɛ kufu.

Kɛbum ka kufu

⁶² Dɔckɔsɔk da tataka tolompɛsnɛnɛ dɔsɔk da kɛŋɛsɛm, aloŋnɛ apɔŋ k'aFarisi ŋasol kɔ ŋanjko ndena Pilat,

⁶³ kɔ ŋaloku: «Mariki, sɛncɛm-cɛmnɛ a wɛyɛmɛ wɛkawɛ ɛnaloku nte ɛnayi wɛyɛŋ mɔ: «Tataka ta maas ta defi dem, indefɔtɛ afi dacɔ.»

⁶⁴ Awa, mɛsom afum ŋacbum kufu kɔn hanj tataka ta maas, ta acɛpsɛ ɔn darɔŋ ŋadeder ŋakiyɛ kɛbel kɔn, ŋakafɛlɛ kɛlɔku afum: «Nɛnɛŋk, ɔfɔtɛ afi dacɔ!» Yem yayɔkɔ yendebɛk sɔ yɛcɛpɛr yɔcɔkɔ-cɔkɔ.»

⁶⁵ Kɔ Pilat oloku ŋa: «Iwosɛ kɛsɔŋ nu asɔdar, nɛyɔ ŋa ŋabum kufu kanjko pɛmɔ tɔkɔ nɛfan ti mɔ.»

⁶⁶ Awa, kɔ ŋanjko ŋalompɛs tobum ta kufu nkɛ, kɔ ŋasunce ki tasar pɔpɔŋ, kɔ ŋancɛmbɛr afum ŋancbum ki.

28

Yesu kɛfɔtɛ kɔn afi dacɔ

Mark 16.1-10; Luk 24.1-12; Isan 20.1-10

¹ Dɔckɔsɔk da dɔsɔk da kɛŋɛsɛm, sandɛŋ bɛtbɛt, Mari wɛka dare da Makdala kɔ Mari wɛlɔma ŋander kɛmɔmɛn kufu.

² Gbɛncana babɔkɔ kɔ antɔf ŋeyikɛ pɔpɔŋ, bawo mɛlɛkɛ ma Mariki mɛnator dɛntɔf kɛdebɛŋkɛli tasar, mɛndɛ sɔ pi kɛrɔŋ.

³ Mɛlɛkɛ mamɔkɔ mɛnayi pɛmɔ pɛmot pa dɛkɔm, yamos ya mi yɛfɛrɛ pɔŋ.

⁴ Kɔ asɔdar abum a kufu ŋayikɛnɛ kɛnɛsɛ, ŋamɔmpnɛ pɛmɔ nte ŋanfi mɔ.

⁵ Mba kɔ mɛlɛkɛ moloku aran: «Ta nɛna nɛnɛsɛ, bawo incɛrɛ a Yesu wɛkɔ anacan dɛtɔk yɛpɛmpɛl mɔ, nɛyi kɛtɛn.

⁶ Eyi fɛ dɛ, ɔfɔtɛ afi dacɔ pɛmɔ tɔkɔ ɛnaloku ti mɔ. Nɛder nɛmɔmɛn nɔɔ kɛfo nkɛ anaboc kɔ mɔ.

⁷ Nɛkufɛ nɛkɔlɔku acɛpsɛ ɔn darɔŋ a Yesu ɔfɔtɛ afi dacɔ, awa a nɛŋkɔbɛr kɔ Kalile, difɔ nɛŋkɔnɛŋk kɔ. Nɛcɛŋkɛl: Tatɔkɔ t'iyɔna tolɔku nu.»

⁸ Kɔ aran anɛ ŋambɔlɛ kufu nkɛ katɛna kɛnɛsɛ kɔ pɛbotu pɔpɔŋ disrɛ, kɔ ŋayɛkɛ kɛkɔlɔku ti acɛpsɛ a Yesu darɔŋ.

⁹ Gbɛncana babɔkɔ kɔ Yesu ender aran anɛ tekirin k'eyif ŋa: «Iyif nu!» Kɔ aran anɛ ŋalɔtɛrnɛ kɔ ŋancɛpɛ kɔ suwu kɔ ŋasumpɛr kɔ wɛcɛk tɛta kɛlɛlɛs kɔn.

¹⁰ Kɔ Yesu oloku ɲa: «Ta nɛnesɛ, nɛkɔ nɛloku awɛnc im aɲa a ɲakɔ Kalile, a difɔ ɲandekɔnɛɲk im.

Abum kufu ɲalɔmɔr abɛ mes mmɛ mɛnacepɔr nde dɔkufu mɔ

¹¹ Ntɛ aran aɲɛ ɲanayi dɔpɔ kɛkɔ mɔ, awa kɔ abum a dɔkufu alɔma ɲambɛrɛ dare kɔ ɲalɔmɔr alɔɲɛ apɔɲ mes mɔkɔ mɛnacepɔr mɔ fɔp.

¹² Ntɛ ɲalɔɲkanɛ kɔ abeki mɔ, kɔ ɲantɔɲɛ kɛsɔɲ asɔdar akakɔ pɛsam pɛlarɔm,

¹³ Kɔ ɲasom asɔdar akakɔ ntɛ: «Nɔde nɛloku: <Acɛpsɛ ɔn darɔɲ ɲanderna ɲakiyɛ kɔ, tɛtɔɲɛ sɔdirɛ.>

¹⁴ Kɔ wɛkirɪɲ ene ti-ɛ, sɔɲkɔcɛrɛ kɛlok-lokɔr kɔ, ntɛ tɔɲsɔɲɛ ta antɔrɛs nu mɔ.»

¹⁵ Kɔ asɔdar ɲamban pɛsam kɔ ɲayɔ tɔkɔ analoku ɲa mɔ. Kɔ taruku pa yem papɔkɔ pɛsam aSuyif dacɔ haɲ mɔkɔ.

Yesu ementɔrɛ acɛpsɛ ɔn darɔɲ

Mark 16.14-18; Luk 24.36-49; Isan 20.19-23; Asom 1.6-8

¹⁶ Kɔ acɛpsɛ a Yesu darɔɲ aɲɛ wɛcɔ kɔ pin ɲaɲkɔ Kalile, nde tɔrɔ tɔkɔ Yesu ɛnabɔncɔr ɲa mɔ.

¹⁷ Ntɛ ɲanɔɲk Yesu mɔ, kɔ ɲantontɛnɛnɛ kɔ, mba kɔ alɔma ɲa dacɔ ɲanalip fɛ kɛlaɲ tetɔn.

¹⁸ Kɔ Yesu ɔlɔtɔrɛnɛ ɲa, k'oloku: «Kanu kɛsɔɲ im kɛtam fɔp kɛyɛfɛ dɔKɔm haɲ dɛntɔf.

¹⁹ Nɛkɔ, nɛsɔɲɛ afum a tɔf ya doru fɔp kɛyɔnɛ acɛpsɛ em darɔɲ, nɛcgbɔt ɲa dɛromun tewɛ ta Kas, ta Wan kɔ t'Amera Nɛcɛmpi,

²⁰ nɛctɔksɛ ɲa kɛlɛlɛs mosom mɔkɔ isom nu mɔ fɔp. Awa kɔ ina iyi nu dacɔ dɔsɔk o dɔsɔk haɲ doru delip.»

MARK

Kəsəkəs ka Kibaru Kətət teta Yesu nkə Mark encicəs mə

Kibaru Kətət ka Mark buk bin ba Kədəm Kəfu bə bəyənə səbuk nse maŋkələ dacə nse səloku tecepərəne doru ta Yesu Krist mə. Buk mbə o mbə səbuk saŋse maŋkələ dacə, «Taruku ta Kibaru Kətət» t'aŋwe bi. Matiye, Mark, Luk kə Isan ŋanacicəs səbuk saŋse defi da Yesu Krist tadarəŋ. Ancem-cemne a taruku tante tə ananunkenə kəcicəs meren wəco camət-tin (60) kəbəp ka meren wəco camət-merəŋ (70) nte kəkom ka Yesu Krist kəncepər mə. Acərə taruku alarəm ŋancem-cemne a dare da Rom anacic buk bambə, teta kəyənəkəs bəkəc ya alaŋ a Yesu aka Rom. Mark, nwe anacərə sə tewe ta «Isan Mark» mə, wanapa ka asom a Yesu Pol kə Barnabas enayi. Mba kəpə kən tewe kənacop nte enasak kəkət marənt teta kəsamsər tosom ta Yesu mə (Asom 13.13). Nte tencepər mə, Mark enader pəkət marənt kə Barnabas (Asom 15.37-39). Anacərə Mark kəyənə ka wanapa wətət ka Piyer (1 Piyer 5.13). Ali nte kəyi doru ka Yesu kənatəcepər fər ya Mark kirin mə, acərə taruku ŋancem-cemne a Mark enamənəkərne moloku ma sede sa Piyer mme məyənə mogbu ma Taruku ta Mark mə. Dəkibaru Kətət kaŋkə disre, Mark oloku teta acəpse a Yesu darəŋ kə mətəkse ma Yesu teta tem telpəs ta doru.

Tokotərəne ta Taruku ta Kibaru Kətət ka Mark

1. Mark ementər buk (1.1-13)
2. Mark oloku təkətene mes ma Yesu nte enayi Kalile mə (1.14-8.21).
3. Kə tēyefe danda, k'oloku kəkə marənt ka Yesu Yerusalem (8.22-10.52).
4. Dəkəlpəsər, kə Mark encicəs tecepərəne doru ta Yesu Krist nde Yerusalem kələkenə defi kə kəfətə kən afi dacə (11.1-16.8).

Taruku ta Aŋnabi Saŋ Batis

¹ Dəkəcop da Kibaru Kətət teta Yesu Krist* Wan ka Kanu də dandə.

² Deyi pəmə nte ancic ti nde buk ba sayibə Esayi disre mə:

«Indekekərə wəsom kem fər yam kirin pəkəlolomps'am dəpə.

³ Fum wəkə dim dən deyi kəwur nde dətəgbərə mə əfə:

«Nəlompəs dəpə da Mariki,
nəlompe səpə sən sa wəcək!»

* **1:1** Krist = Tewe ta dəkəcəmə da nwe Kanu kəyək-yək kəyənə ka wəyac ka afum a doru mə. **1:2** Malaki 3.1 **1:3** Esayi 40.3

⁴ Itə Anjnabi Sanj Batis enaderene nde dətəgbərə, pəckawandi a pagbət afum dərömun teta kəsəkpər bəkəc ηacəme pəlompu darəñ, nte tənşəñe Kanu kəderəñneñe ηa kiciya kəñjan mə.

⁵ Afum aka atəf ηa Yude kə aka Yerusalem fəp ηanckə nde eyi mə, ηacsətər kə kəgbət dərömun teta Kanu, nde kəñgbəkə ka Yurden ηaccəñ kiciya kəñjan afum daco.

⁶ Yamos ya cəfon ca yəkəme yə Sanj encberne, pəcgbəncne bəlet ba akata defi. Cəlanəkəma c'əncsəm kə mēse ma cəme ca dəkulum.

⁷ Pəcdəñk: «Fum eyi kəder im tadarəñ, nwe əyə fənəntər pətas im mə, isətə fə dofum dotulneñe isikəli cəfta cən.

⁸ Ina, dərömun iñgbət nu teta Kanu, mba nkən dəAmerā Nəcempī ηa Kanu ende pəcgbət nu.»

⁹ Mata maməkə kə Yesu ender kəyefe Nasaret dare da Kalile, k'əsətər Sanj kəgbət dərömun teta Kanu nde kəñgbəkə ka Yurden.

¹⁰ Yesu endepə dərömun, gbəncana babəkə k'ənəñk kəm kəñgbere, k'ənəñk sə Amerā ηa Kanu ηətorər kə pəmə antantoriya.

¹¹ Kə dim dontor kəyefe dəkəm: «Wan kem məyənə nwe imbətər mə, mən'əbət im mes belbel.»

¹² Gbəncana babəkə kə Amerā ηa Kanu ηeñkekəre Yesu nde dətəgbərə.

¹³ K'encepərene di mata wəco mañkələ (40), Sentani səwakəs kəsəñe kə kəciya. Səm ya dəkulum yə ηanayi, melekə meckekəs kə.

Acepse darəñ a Yesu acəkə-cəkə añe mañkələ

¹⁴ Nte analip kəsəñ Sanj kəber dəbili mə, kə Yesu ender Kalile, pəcdəñk Kibaru Kətət ka Kanu,

¹⁵ pəcloku: «Tem tembəp kə dəbe da Kanu dələtərne. Nəsəkpər bəkəc nəlomp, nəgbəkər kəlanj Kibaru Kətət ka Kanu!»

¹⁶ Nte Yesu eyi kəcepər agbep ηa kəba ka Kalile kəsək mə, k'ənəñk Siməñ kə Andəre wənc ka Siməñ, ηacgbal manta dəkəba, bawo awent ηə ηanayənə.

¹⁷ Kə Yesu oloku ηa: «Nəder nəceps'em darəñ, indesəñe nu kəyənə awent a afum.»

¹⁸ Gbəncana babəkə kə ηasak manta mañjan kə ηancəme Yesu darəñ.

¹⁹ Nte əñkə kirin pəpic mə, k'ənəñk Sak wan ka Sebede kə wənc Isanj añe ηanayi abil ηañjan disre ηaclompəs-lompəs manta mə.

²⁰ Gbəncana babəkə k'ewe sə akakə mērəñ nte tənşəñe ηayənə acepse ən mə. Kə ηasak kas kəñjan Sebede debil kə akə ηacbəc mə, kə ηancepse Yesu darəñ.

Fum nwe ηəñk ηələc ηəntərəs kə mə

21 Kə ɲambere dare da Kaparnam. Nte ɲaɲkə dəkətola Kanu da aSuyif simiti, dəsək da kəɲesəm mə, kə Yesu oncop kətəkse.

22 Cusu cənwos ɲa kətəkse kən, bawo enctəkse pəmō fum nwe ɔntəmpər kətam mə, enctəkse fe pəmō atəkse sariye s'aSuyif.

23 Tenatəɲne wərkun wələma nwe ɲəɲk ɲelec ɲenabere mə pəyi dəkətola Kanu da aSuyif dadəkə disre, pəckule-kule:

24 «Ta ake tō məmberene mes mosu-ε, Yesu wəka Nasaret? Dəkələsər su mənder ba? Səncəre belbel nwe məyənne mə: Wəcəmpi wəka Kanu!»

25 Kə Yesu enɲbəɲ-gbəɲər ɲi, pəcloku: Məməp kusu! Məwur fum wəkawε dərīs.

26 Kə ɲəɲk ɲelec ɲowur kə dərīs ɲecyikək kə pəpəɲ, ɲockule-kule sō pəpəɲ.

27 Kə cusu cəwos afum fəp, ɲacgbəkələne taɲan: «Tere tō tante-ε? Kətəkse kəfu, dəbe dere! ɔntəmpər ali dəbe da yəɲk yelec, nyε yeɲləs mosom mən mə!»

28 Kə debeki da tewe tən dəsamsər katəna katəna məmpəmpō ma Kalile fəp.

Yesu entaməs acuy alarəm

29 Nte ɲawur dəkətola Kanu da aSuyif mə, nkən Sak kə Isan ɲaɲkə ndena Siməɲ kə Andəre.

30 Iya wəka wəran ka Siməɲ enafəntərə ta entamnε-ε, fiba fənayi kə, gbəncana babəkə k'aloku Yesu tetən.

31 K'əncəɲne, k'osumpər kə kəca k'eyekti, kə fiba fəsak kə, k'eyerəs afum yeri.

32 Nte dəfəy dender, kə dec deɲkale mə, k'aɲkere kə acuy fəp kə aɲe yəɲk yelec yəncərəs mə.

33 Kə afum a dare fəp ɲaləɲkanε nde kusunka ka dəkələ.

34 K'entaməs acuy alarəm aɲe ɲanccune docu yamayama mə, pəcbeləs yəɲk yelec yelarəm. Encsak fe yəɲk yelec yolok-loku, bawo yenacərə kə.

Yesu ɲkətene Kalile

35 Bətbət ta pəntayō wəɲkərə-ε, k'eyefe k'owur kəkə ka kəfo kəyer-yer kələma, k'əɲkə pəcəme kətola Kanu.

36 Siməɲ kə asol ɔn ɲambəlkər kətən kə.

37 Nte ɲanəɲk kə mə, kə ɲaloku kə: «Fəp fəyi kətən əm.»

38 Kə Yesu oloku ɲa: «Paɲkən kəfo kələma, nde sədare nse səltərne mə, nte təɲsəɲe dəndo sō idəɲk Kibaru Kətət mə, bawo itə iwurene.»

39 Kə Yesu ɲkətene atəf ɲa Kalile fəp, pəckawandi Kibaru Kətət dəkətola Kanu d'aSuyif, pəcbelsene sō yəɲk yelec.

Yesu entaməs wəcunε sen

40 Kə wəcunε sen wələma ender nnō Yesu eyi mə, k'encəp suwu pəclətene Yesu: «Kə məfaj ti-ε, məntam kəsəkəs im.»

41 Kə Yesu əyənə kə nənəfər, k'entenc kə kəca, k'onğbuñenə kə, k'oloku: «İfañ ti, məsək!»

42 Gbəncana babəkə kə sen səsak kə, k'əsək.

43 Kə Yesu embeləs kə pəctiñ-tiñ kə:

44 «Ta məloku ti fum o fum, mba məkə məmentərnə wəloñnə, məkenə kə poloñnə teta kəsəkəs kam pəmə təkə Musa encic ti mə, tendeyənə afum fəp kəcərə a məntamnə.»

45 Mba wərkun nwe, nte nkən əñkə mə, k'eyefe kədəñk ti pəpəñ, pəcsamsərənə toloku tatəkə, kə təsəñe Yesu kətətam sə kəberə dare. Dare kəsək encyi, mofə meyer-yer mme afum ñanətə kəcyi mə, afum ñancder kə kəyefe mofə fəp.

2

Yesu kətaməs kən fum wətətam kəkət

1 Nte mata mələma mencepər mə, kə Yesu ender Kaparnam. K'ane a Yesu eyi dekər,

2 k'afum alarəm ñaloñkanə hañ kə dəkəcəmə delip ali nde dəkəsunğa. Yesu pəccam ña toloku ta Kanu.

3 K'əñkerə kə wəfi wəcək nwe afum mañkələ ñanagbañnə mə.

4 Nte agbañnə əñ ñanətətam kəkəkərə kə hañ nde Yesu eyi mə teta dəlay da afum, kə ñampəsə kələ kəronj* ñasurenə da Yesu ənəcəmə mə, kə ñafeni da ñanatorenə yala nyə wətətam kəkət wəkəkə ənafəntərə mə.

5 Nte Yesu ənəñk kəlañ kəñan mə, k'oloku wəfi wəcək: «Wənc im, añañnen'am kiciya kam.»

6 Atəkse sariyə s'aSuyif ələma añe ñanandə di mə, ñaccəm-cəmnə dəbəkəc nte:

7 «T'ake tənlok-loke tantə-ε? Kələməs k'endə Mariki! An'entam kəñañnənə kiciya kə pəntəyənə Kanu sona-ε?»

8 Kə Yesu ənəcərə gbəncana babəkə amera ñən disrə məcəm-cəmnə mme mənayi atəkse sariyə akakə mə. Kə Yesu eyif ña: «T'ake tə məcəm-cəmnə mame meyinə nu-ε?»

9 Mosom mərəñ mə mame, tosom tere tətəcuca kəloku wəfi wəcək-ε: «Añañnen'am kiciya kam,» kə kəloku: «Məyefe, mələk pəko pam, məkət?»

10 Awa, indeyə nu tantə, nte tənşəñe nəcərə a ina, Wan ka Wərkun, intəmpər kətam kəñañnənə ka kiciya nno doru dandə.» Kə Yesu oloku wəfi wəcək:

11 «İlok'am: Məyefe, mələk pəko pam, məkə nde ndaram!»

12 Kə wərkun nwe eyefe, k'ələk gbəncana babəkə pəko pən, k'owur fər ya afum fəp kirin, nte towosəs afum cusu mə, kə fəp fəñkor-koru Kanu ñacloku: «Səntənəñk fə towurənə ta tantə!»

Yesu ewe Lewy kəcəpsə kə darəñ

* 2:4 Dəndə atəf ña Palestin, añsalkən di wələ darenc, nte tənşəñe afum ñactam kəcərə wələ kəronj, ñacsali mə.

13 Kə Yesu əḡkə sə kəca ka dəkəba. Kə afum alarəm ḡander nno eyi mə, pəctəkse ḡa.

14 Nte eyi kəcepər mə, k'ənəḡk Lewy wan ka Alfe, pəndə nde aḡbancan ḡa abanəs dut. Kə Yesu oloku kə: «Məcəps'em darəḡ,» kə wəkəkə eyefe k'encepsə kə darəḡ.

15 Nte ḡanadi yeri nda Lewy, kə abanəs dut alarəm kə aciya ḡandə kə Yesu kə acəpsə ən, bawo afum akakə ḡanacəpsə kə darəḡ mə, ḡanala.

16 Nte aFarisi kə atəkse sariyə s'aSuyif † ḡanəḡk Yesu pəcdi yeri kə abanəs dut kə aciya mə, kə ḡayif acəpsə a Yesu darəḡ: «Ta ake t'endine yeri kəfo kin kə abanəs dut kə aciya-ε?»

17 Yesu nwe εnane ti mə, oloku ḡa: «Bafə atamnə ḡafan wəten cəl de, mba acuy. Inderənə fə teta kəwe k'alompu, mba teta aciya.»

Yesu kə kusun

18 Dəsək dələma, acəpsə a Saḡ darəḡ kə aFarisi ḡasun. K'afum ələma ḡander ḡayif Yesu: «T'ake tə acəpsə a mənə darəḡ ḡantəsunε-ε, nte acəpsə a Saḡ darəḡ kə aFarisi ḡasun mə?»

19 Kə Yesu eyif ḡa: «Afum aḡə awe kəḡbanənə mə ḡantam kəsun ḡasərəyi wəfura kəsək ba? Təm nte ḡayi wəfura kəsək mə, ḡafəsun.

20 Dəsək dendebər nde ḡandegbeyənə kə wəfura mə, awa ḡandesun dəsək dadək.»

21 «Ali fum əfəpərə kəpol ka kələto kəfu yamos yeməcə-məcə, kə pəyənə fə ti-ε kəpol ka kələto kəfu kanəkə kəḡḡos-ḡosu yamos yeməcə-məcə yayəkə, təsənə yamos yayəkə kəwələ pətəs kəwələ kəcəkə-cəkə.

22 Fum o fum əfəber wən wofu dətələba pa akata pokur, kə məyə ti-ε, wən wəḡwesəli tələba, məyi əḡ məsətə fə wən, məsətə fə sə tələba. Wən wofu, dətələba pofu!»

Yesu kə dəsək da kəḡesəm nde ampuse Mariki mə

23 Dəsək dələma da kəḡesəm nde ampuse Mariki mə, Yesu pəccali dale, acəpsə ən darəḡ ḡasol kə nkən, kə ḡayefe kəcḡosuru səbomp sa mənḡben.

24 Kə aFarisi ḡayif Yesu: «Məcəḡkəl! Ta ake tə ḡanyənə nte Sariyə səntəwosə kəyə dəsək da kəḡesəm nde ampuse Mariki mə?»

25 Kə Yesu eyif ḡa: «Ali katin nəkaran fə dəYecicəs Yosoku təkə Dawuda ənayə nte ənayi dəpəcuca, dor dəyə kə, nkən kə akə ḡanasol mə ba?

26 Nte Dawuda ənabərə kələ ka Kanu disrə təm ta wəkiriḡ ka ələḡnə Abiyatar mə, pəsəm cəcom nce ancləḡnə Kanu, cəcom

† 2:16 *WəFarisi/aFarisi* = Kəḡba k'abeki aSuyif aḡə ḡacəpərəḡ ḡasektərənə sariyə kə məyə mokur ma aSuyif mə.

nce Sariye sənawose alonje gbəcərəm kəsəm mə. Mba Dawuda enasəm ci, k'əsəjəne sə cələma asol ən.»

²⁷ Kə Yesu oloku ɲa: «Kanu kənawure dəsək da kəjəsəm nde ampuse kə mə teta kəmar ka afum, mba kənawure fe afum teta dəsək da kəjəsəm de!

²⁸ Ti təyone Wan ka Wərkun əyone mariki ali ma dəsək da kəjəsəm nde ampuse Mariki mə.»

3

Yesu entaməs wərkun dəsək da kəjəsəm nde ampuse Mariki mə

¹ Kə Yesu olukus nde dəkətola Kanu da aSuyif. Dəndo, wərkun wələma enayi di pədəmtər kəca.

² Kə aFarisi* ɲəjəkəkce kə pəyone a Yesu əjəkətaməs kə dəsək da kəjəsəm nde ampuse Mariki mə-ε, nte təjəne ɲayemsene kə mə.

³ Awa, k'oloku wərkun nwe enadəmtər kəca mə: «Məyefe məcəmə nnə afum dəcə.»

⁴ Kə Yesu eyif ɲa: «Cəke cə Sariye səwose dəsək da kəjəsəm nde ampuse Mariki mə-ε: Kəyə ka pətət ba, ka pələc? Kəyəc fum ba, ka kədif kə?» Mba kə akakə ɲancəjək.

⁵ Awa, kə Yesu əməmən ɲa dəcəro fəp fəjan dəmetele disre, kə kətəyone kəjan nənəfər kəntərəs kə dəbəkəc. K'oloku wərkun nwe: «Mətenci kəca!» Kə wərkun nwe entenci ki, kə kəca kən kəntamne.

⁶ Kə aFarisi ɲawur dəkətola Kanu danjan kəkənəjkene kə afum a Herodu nte təjəne ɲatəjne tedife ta Yesu mə.

Afum alarəm ɲander Yesu

⁷ Kə Yesu əjəkə ntende dəkəba kə acəpse ən darəj. Kə kənay k'afum kəncəmə Yesu darəj, anje ɲanayefe təf ya Kalile kə Yude mə.

⁸ aka Yerusalem, aka Idume, aka mokuru ma kəjəbəkə ka Yurden kə akə ɲayi Tir kə Sidəj kəsək mə. Kənay k'afum kəjəkə ɲancne mes fəp mmə Yesu əncyə mə, kə ɲander nnə eyi mə.

⁹ Kə Yesu oloku acəpse ən darəj a ɲalompse kə abil ɲin, nte təjəne ta kənay kədəgbəcərəne kə mə.

¹⁰ Bawo enctaməs afum alarəm, akə ɲanayə docu mə fəp ɲancmərne kə nte təjəne ɲatam kəgbuɲene kə mə.

¹¹ Nte yəjək yelec yencnəjək Yesu mə, yonctontne ne kə dəntəf, yockule-kule: «Məna, Wan ka Kanu məyone!»

¹² Mba Yesu pəctiɲ-tiɲ yi, pəcəməne yi kələku afum nwe əyone mə.

Yesu eyək-yeək asom ən wəco kə mərəj

* 3:2 WəFarisi/aFarisi = Kəgba k'abeki aSuyif anje ɲacəpərər ɲasəktərəne sariye kə məyə mokur ma aSuyif mə.

13 Kə Yesu empə nde tərə kəronj, k'ewe akə enafanj mə, kə akakə ηander nnə eyi mə.

14 K'eyək-yək afum wəco kə mərənj, k'əsən ηa tewe ta «asom», nte tənşənə ηayi kə nkən, pəcsom ηa kəkədənjk Kibaru Kətət mə,

15 k'əsənənə ηa sə dəbe dəbelsənə yənjk yelec.

16 Mewe ma afum wəco kə mərənj anj enayək-yək mə mame: Simən nwe Yesu enasən tewe ta Piyer mə,

17 Sak wan ka Sebede, kə Isan wənc ka Sak anj enasən tewe ta «Bowanerses» mə. Itə tatəkə «Awut a pəkule-kule pa dəwe».

18 Kə Yesu endənər sə Andəre, Filip, Bartelemy, Matiye, Təma, Sak wan ka Alfe, Tade, Simən wəKananj,

19 kə Yudas wəka dare da Keriyot nwe enader pəber Yesu aterənə ən dəwaca mə.

Afum a Yesu ηafanj kəkəkərə kə dəker

20 Nte tencepər mə, kə Yesu olukus nde enayi decikəra mə, kə afum ηalənkanə sə. Yesu kə acəpsə ən darən ηanatam fə kədi yeri yati.

21 Nte aka kələ disrə a Yesu ηane ti mə, kə ηawur kəkəsumpər kə, bawo ηanaloku: «Dotonjkulu deyi kə.»

Yesu enjbekal yem nyə amboncə kə mə

22 Atəkse sariye s'aSuyif anj ηanayefe Yerusalem mə ηaloku: «Yesu əyə Belsebul, wəkiriη wəka yənjk yelec! Nkən ənsənə Yesu kəbələs ka yənjk yelec!»

23 Kə Yesu ewe ηa pəctəkse ηa mes pəctubcənə mi mələm: «Cəke cə Sentani səntam kəbələs Sentani-ε?

24 Kə atəf ηeyerənə ηisərka-ε, atəf ηanəkə ηəfəsətam kəcəmə.

25 Kə aka kələ kin ηayerənə tənjan-ε, kələ kanjkə kəfəsətam kəcəmə.

26 Awa, kə Sentani səyefərne sisərka-ε, səfətam kəcəmə gbinj. Ta si tenlip tem tatəkə.

27 Ali fum əfətam kəberə kələ ka wəka səkət disrə, pəfonət daka dən ta onunkenə pəsekət wəka səkət wəkəkə-ε, a pədefonət daka da kələ kən.

28 Kance icloku nu ti, andenənənə afum kiciya kə kələməs nkə ηələməs Mariki mə fəp,

29 mba nwe o nwe ənləməs Amera Nəcempi ηa Kanu mə, afədəkənənənə kə, endesərə kiciya kanjkə doru o doru.»

30 Kə Yesu oloku ηa ti, bawo ηanaloku: «ηənjk ηelec ηeyi kə.»

Iya kə awənc a Yesu

31 Iya kə awənc a Yesu ηander, ηacəmə dabanjka, kə ηasom pawənə ηa Yesu.

32 Kənay ka afum kənandə kəkəl kə, k'aloku kə: «Iya kam, awənc əm anj arkun kə aran ηancəmə dabanjka, mən'ə ηayi kətən.»

33 Kə Yesu oloku: «Iya kem k'awənc im anj, are ηə-ε?»

34 K'ənkətəne fər kəməmən ka akə njanande njakel kə mə, k'oloku: «Iya kem k'awənc im anja nj'akanje!

35 Bawo nwe o nwe endeyə tefanj ta Kanu mə, nkən əyənə wənc im, wəkire kə iya kem.»

4

Totubcəne ta wəbəf

1 Kə Yesu oluksərne sə kəctəkse nde agbep nja kəba. Kə kənay ka afum alarəm kənkə kəlonkanə nnə eyi mə, kə təsəne kə kəbəkə debil, k'endə. Kə kənay ka afum akakə fəp kəncəmə agbep nja kəba.

2 Kə Yesu entəkse nja mes melarəm pətubcəne mi mələm, k'oloku nja kəctəkse kən disre:

3 «Nəcənkəl: Kə wəbəf owur kəkəgbal defet.

4 Nte encgbal defet mə, kə meŋgben mələma məntəmpəne dəpə, mba kə bəmp yender yəsəm mi.

5 Kə meŋgben mələma məntəmpəne antəf nja masar kəron nde kəbof kəlarəm kənatəyi mə. Nte antəf njənədəm mə, kə meŋgben maməkə mompon katəna.

6 Mba nte nne yənədəwəne mə, kə buma yayəkə yowosərene, bawo yənayə fə ncənc.

7 Kə meŋgben mələma məntəmpəne dəbənjk, kə bənjk yəmpə kə yendi mi, kə tənşəne meŋgben mətət kətəkom.

8 Kə meŋgben mələma məntəmpəne antəf njətət kəron, kə mompon kə məsənk, kə mələpsər kəsənj yokom. Kə mələma moŋkom wəco maas (30), mələma wəco camət-tin (60) kə mələma tasar tin (100).»

9 Kə Yesu oloku: «Məna nwe mənyə lənjəs yənəne mə, mənə ti!»

Ta ake tə Yesu entəkse dəmotubcəne-ε?

10 Nte njəngbeyne kəsək mə, acəpse a Yesu darənj anje wəco kə mərənj kə akə njəkəl kə mə njayəfə kəyifət kə teta mes mme entəkse nja pətubcəne mi mələm mə.

11 K'oloku nja: «Nəna njə Kanu kəsəne kəcəre kance kəgbəpne ka dəbe da Kanu, mba akə, motubcəne gbəcərəm mə njane,

12 ti təsəne nte: «Njəngbətne belbel, mba njafənəjk, təsəne njaccənkəl belbel, mba njafəcəre tələm o tələm, pətəyənə ti-ε, kə njaluksərne Kanu, Kanu kənjənəne nja!»

Yesu oloku tedisre ta totubcəne ta wəbəf

13 Kə Yesu eyif nja sə: «Nəncəre fə totubcəne tantə! Awa, cəke cə nəntam kəcəre motubcəne fəp-ε?

14 Wəbəf, Toloku ta Kanu t'əmbəf.

15 Afum aņe ņayi dəpə dacə mə, ņ'ambəfe Toloku ta Kanu. Kə ņane ti-ε, gbəncana babəkə Sentani səder səbanjər ņa Toloku Tətət nte anabəf ņa mə.

16 Kə meņgben məkə anabəf kəfo ka masar mə, məyənε afum aņe ņajne Toloku, ņaban ti pəbotu disre,

17 mba ņafəwose ncənc* kətər ņa, pəpic pə ņancəme ti darəņ. Kə pəcuca kə kətərəs kənder teta Toloku tatəkə-ε, ņasak ti fəw gbəncana babəkə.

18 Anabəf mələma dəbeņk, ņa ņayənε afum aņe ņajne Toloku ta Kanu,

19 mba pəyeņki pa tēm tatəkə, pəbas pa daka kə mes mələma medi toloku tatəkə, təsəņε ti kətəkom.

20 Təlpəs, anabəf mələma antəf ņətət. Antəf ņətət ņayənε afum aņe ņajne toloku ta Kanu, ņaban ti, ņasəņε ti kəkom, nte wəco maas (30), təkə wəco camət-tin (60), kə tələma tasar tin (100).»

Totubcəne ta lamp

21 Kə Yesu eyif ņa sə: «Amber lamp dəkafala kə pəyənε fe ti kəfənc dəntəf ba? Bafə andet di kədet dəm ba?

22 Bawo nte o nte təņgbəpne mə, tendewur dəsək dələma. Nte o nte təyənε təgbəpne mə, mənε tedewur təyə afum wanjəra.

23 Kə fum əyə ləņəs yenε-ε, pəne ti!»

24 Kə Yesu oloku ņa sə: «Nəkembərne təkə nəņne mə: Potubcə pəkə nəntubcə akə mə, ip'andekəsətubcə nu, padəņəre nu sə.

25 Wəkə əyə pələrəm mə amberε kə sə, mba wəkə əyə pəpic mə, ambanjər kə yati pəkə əyə mə.»

Totubcəne ta meņgben mme momponj misərka mə

26 Kə Yesu oloku sə: «Dəbe da Kanu deyi pəmə nte wərkun endewur pəcgbal meņgben məbəf dəntəf mə,

27 təyənε a endire kə endire fe-ε, pibi kə dan, meņgben momponj, məbek ta encəre ti nte o nte-ε.

28 Antəf ņəņsəņε yəbəf kəponj: Antəf ņisərka ņəņsəņε yəbəf kəponj: Pəcop buma, meņgben mocop kəwurəs dəbuma, məlas.

29 Meņgben mənckənaləl, pəber mi kətetiya, bawo tēm tətəl ta mi tēmbəp.»

Totubcəne ta təņgben tətət

30 Kə Yesu eyif sə: «Ak'andətubcəne dəbe da Kanu-ε? Totubcəne tere t'andelokε di-ε?

31 Dəbe da Kanu deyi pəmə təņgben tətət mpe ambəf pəfətε pətəs yəbəf ya dəntəf fəp mə,

32 mba k'ambəf pi-ε, pəpε pəbek pətəs yəbəf fəp ya dələkə, pəsəņ wara wəpəņ təsəņε bəmp ya darenc kəctam kənde katəkəp ka ki dəntəf.»

* 4:17 Kəcənc, ncənc = «kəntəntəl», «ntəntəl»

33 Dəmotubcənə mələrəm Yesu oncloku ɲa moloku ma Kanu, kəbəp ka təkə ɲactam kəcərə mə.

34 Yesu onclok-lokər fə afum fəp ta pəyənə motubcənə-ε, mba kə ɲaɲgbəynə-ε, oncloku acəpsə ɔn darəɲ tedisrə ta mi fəp.

Yesu ontore-tore afef

35 Dəsək dadəkə yati nte pəmbiyə mə, kə Yesu oloku acəpsə ɔn: «Pacali ntende mokuru.»

36 Nte acəpsə ɔn darəɲ ɲasak kənay ka afum mə, Yesu pəyi debil kə ɲaɲkəkərə kə. Cibil cəloma cənayi kə kəsək.

37 Kə afef ɲəpəɲ ɲeyefə kəwur, yam yəcberə debil haɲ kə abil ɲefəɲ kələrə domun.

38 Yesu nkən pəfəntərə, pəfakənə pədəmət, pəcdirə nde abil darəɲ. Kə acəpsə ɔn ɲantimi kə ɲacloku: «Wətəkse, kəfi kə sənder, kə məyi ta məwe ti daka-ε?»

39 Nte entimə mə, k'ɲɲgbəɲ-gbəɲər afef, k'oloku kəba: «Məcaɲk, mətor!» Kə afef ɲəsak, kə pəyɔ yen!

40 Kə Yesu eyif ɲa: «Ta ake tə nəferənə fər tantə-ε? Nəntayɔ fə kələɲ haɲ ndəkəl ba?»

41 Kə kənesə kəpəɲ kəsumpər ɲa, kə ɲayifənə aɲə kə akə: «Ake fum wəkawə ɔyənə-ε, nte afef kə kəba yəncəmə tefəɲ tən darəɲ mə?»

5

Yesu entaməs wərkun nwe yəɲk yələc yənayi mə

1 Kə Yesu ɔɲkə ntende kəba mokuru nde kulum ka Kerasa.

2 Nte endewur debil mə, kə fum wəloma owur cufu dacə, ɲəɲk ɲələc ɲeyi kə. K'ender pəcəmə kə fər kirin.

3 Fum wəkakə dəndo cufu dacə ɲayi, fum o fum ɲctam fə kəkot kə, ali gbekce.

4 Tələrəm ɔncyɔ fəc dəwəcək packotə kə gbekce, mba oncopu gbekce pəctep-tepi fəc, ali fum ɲayɔ fə səkət səcəmbərse kə.

5 Pəyi dəndo cufu dacə kə mərə kəron təm fəp, pibi kə daɲ, pəckulə-kulə, pəcbopərne masar.

6 K'ɲəɲk Yesu pəbələ, k'ender pəcəpə kə suwu fər kirin,

7 k'ɲkule-kulə pəpəɲ: «Yesu Wan ka Kanu nkə kəyi darenc mə, ta ake tə məmbərənə mes mem-ε? İlətsən'am teta tewe ta Kanu, ta mətərəs im!»

8 Bawo Yesu ɲaloku kə: «Məwur wərkun wəkawə, məna ɲəɲk ɲələc.»

9 Kə Yesu eyif kə: «Cəke cə aɲw'am-ε?» K'oloku Yesu, «Kənay k'aɲw'em, bawo səla.»

10 K'ɲɲgbəcər kələtsənə Yesu a ta pəsəɲə kə kəwur dəkulum.

11 Dəndo tərə kəron səp yələrəm yənayi di yəcsəmət.

12 Kə yəŋk yelec yeletsene Yesu: «Məkekəre su nde səp yayə yeyi mə, nte tənşəŋe səberə yi disre mə.»

13 Kə Yesu owosene yi. Kə yəŋk yelec yowur dəfum kə yemberə dəsəp, kə səp yeyekse kətor dəkəba yeyefe dətəro. Delay da səp yayəkə dənçəp wul mərəŋ (2.000). Kə yeŋgbətsə, kə yefis-fis dəndo dəkəba.

14 K'akək a səp aŋe ŋayekse kə ŋasamsərene toloku tatəkə dare kə sədare səkəsək, kə afum ŋander kədəməmən təkə tenacepər mə.

15 Nte ŋander nno Yesu eyi mə, kə ŋambəp fum wəkə ŋəŋk ŋelec ŋəntərəs mə, pəsəkəp pənde kə amera ŋən fəp, nkən nwe «kənay» kənayi mə. Afum aŋe ŋanader kəməmən mə, ŋanese.

16 Afum akə ŋananəŋk təkə tenacepər mə, ŋaləməp ader təkə tenasətə wəkə yəŋk yelec yəntərəs mə kə səp.

17 Awa! Kə ŋayefe kəletsene Yesu, a pəbəle atəf ŋaŋan.

18 Nte ŋəkə kəberə debil mə, fum nwe yəŋk yelec yəntərəs mə eltsene Yesu a pəwose ŋayi kə nkən.

19 Yesu enawosene fe kə ti, mba k'oloku kə: «Məkə ndaram, ndena afum am, mələməp ŋa mes mme Mariki əyən'am mə fəp, nənəfər nde əyən'am mə.»

20 Kə fum nwe yəŋk yelec yenayi mə ŋəkə pəcop kədəŋk dəSədare Wəco mes mme Yesu enayəne kə mə fəp. Kə tenciyanə afum fəp.

Wan ka Yayirəs kə wəran wəcu

21 Kə Yesu ŋəkə nde kəba mokuru, kə afum kənay ŋaləŋkanə kə kəsək, nkən pəyi kəba kəsək.

22 Kə wəkiriŋ ka dəkətola Kanu da aSuyif, nwe ancwe Yayirəs mə ender. Nte enəŋk Yesu mə, k'ontontne kə dəntəf, k'osumpər kə wəcək.

23 K'eltsene kə pəlarəm: «Dəkəfi wəyecəra kem eyi. Məder mədenər kə waca, nte tənşəŋe pətəmmə pəyi sə doru mə.»

24 Kə Yesu ŋaŋkə kə fum nwe. Kə kənay ka afum kəsəl kə ŋa, ŋacgbəcərəne kə cəsək fəp.

25 Dəndo, wəran wələma enayi di, docu da kəwur mecir deyi kə tenasətə meren wəco kə mərəŋ.

26 Tenatərəs wəran wəkəkə pəlarəm, teta atən cəl aŋe enanəŋk, pəsəŋse ti daka dəkə enayə mə fəp, mba ali məten enasətə fe, mēne nte docu dən dənçənəŋkanə kə mə.

27 Nte wəran nwe ene pacloku teta Yesu mə, k'ender kənay ka afum tadarəŋ, k'əŋgbuŋene yamos ya Yesu,

28 bawo onclokune: «K'ingbuŋene yamos yən-ε, intəmmə.»

29 Gbəncana babəkə kə docu dən da kəwur mecir dəsakə, k'encərəne dərīs a docu dən dənçənə.

³⁰ Kə Yesu encərə gbəncana babəkə a səkət sələma səwur kə dəris, k'ənkafələrne kənay pəcyif: «Anə ogbuɲene yamos yem-ε?»

³¹ Kə acəpse ɔn darəɲ ɲaloku kə: «Mənəɲk nte kənay kəɲgbəcərən'am waca fəp mə, məcyif sə a anə ogbuɲen'em-ε?»

³² Mba k'ənkafəli fər kəməmən nwe enagbuɲene yamos yən mə.

³³ Nte enacərə təkə teyi kə mə, kə wəran eyefe kəyikce, k'enesə, k'ender pətəmpene kə wəcək dəntəf, k'oloku kə kance fəp.

³⁴ Mba kə Yesu oloku kə: «Wan kem, kəlan kam kəntaməs əm, məkəne abəkəc ɲoforu, docu dam dentamn'am.»

³⁵ Yesu enayi kələk-loku nte afum ɲanader kəyefe ka ndena wəbe ka dəkətola Kanu da aSuyif mə, ɲacloku Yayirəs: «Wan kam wəran efi, ta ake tə məndəsətərse wətəksə-ε?»

³⁶ Mba Yesu enaləm fə moloku maɲan nte o nte, k'oloku wəbe ka dəkətola Kanu da aSuyif: «Ta mənese, məlan gbəcərəm.»

³⁷ Yesu enawose fə nwe o nwe pəcəme kə darəɲ, mənə Piyer, Sak kə Isəɲ wənc ka Sak.

³⁸ Kə ɲander ndena wəbe ka dəkətola Kanu da aSuyif, dəndo kə Yesu enəɲk təkə afum ɲanckafəle-kafəle mə, afum ɲacbok, ɲackule-kule pəpəɲ.

³⁹ Kə Yesu embere k'eyif ɲa: «Ta ake tə nənkafələne-kafələne, nəcbok tantə-ε? Wan wəkawə efi fə, kədire k'ende.»

⁴⁰ Kə afum ɲayefe kəfani Yesu. Mba kə Yesu embeləs ɲa fəp, k'ewe wəyecəra kas kə kere kə akə enasole mə, k'embere nde wəyecəra enayi mə.

⁴¹ K'osumpər wan wəran kəca, k'oloku kə: «*Talita kum*», itə tatəkə: «Wəyecəra, iclok'əm, məyefe!»

⁴² Gbəncana babəkə kə wan wəran eyefe, k'oncop kəkət. Wəyecəra wəkəkə enasətə meren wəco kə merəɲ, kə cusu cəwos ɲa pəpəɲ.

⁴³ Kə Yesu embenəsne ɲa, a ta fum o fum pəcərə ti, k'oloku ɲa kəsəɲ wan yeri.

6

Aka Nasaret ɲalan fə Yesu

¹ Nte Yesu eyefe di mə, k'əɲkə dare dən Nasaret, kə acəpse ɔn ɲancəme kə darəɲ.

² Nte simiti, dəsək da kəɲesəm dəmbəp mə, k'eyefe kətəksə nde dəkətola Kanu da aSuyif. Kə afum alarəm acəɲkəl aɲe cusu cənwos teta metəksə mən mə, ɲaɲyiftene: «Deke mame məɲyefe kə-ε? Kəcərə kəkətene mes kəre kə kanke asəɲ kə mə? Cəke cə waca wən wəɲyɔ mes məwəy-wəy mame-ε?»

³ Bafə kamder əfə, wan ka Mari, wənc ka Sak, Yoses, Yuda kə Siməɲ ba? Bafə akire ɔn ɲayi su de dacə ba?» Mes maməkə mənasəɲe ɲa kətəgbəkər kə kəlan.

⁴ Kə Yesu oloku ɲa: «Afəfati kələləs sayibe, mənə nde ndəwən, akomənə ɔn daco kə aka kələ kən disre.»

⁵ Ali tes təwəy-wəy enatam fe kəyɔ di, mənə nte enataməs acuy aləma, pədenɲer ɲa waca mə.

⁶ Kə pənciyənə Yesu, bawo aka di ɲanabut kəlanɲ. K'encepər-cepər sədare səcəsək sa dətəf fəp pəctəkse.

Kəsom ka acepse aɲe wəco kə mərəɲ

⁷ Nte ewe acepse ɔn darəɲ wəco kə mərəɲ mə, kə Yesu eyefe kəsom ɲa mərəɲ mərəɲ, pəcsəɲ ɲa fənəntər fətame yəɲk yelec.

⁸ K'endenɲer ɲa kəcloku a ta ɲatəmpərəne daka o daka teta dɔpɔ, mənə kəgbɔ gbəcərəm. K'oloku ɲa: «Ta nətəmpərəne kəcom, aləba, ta nəgbəncənə pəsam dəfi,

⁹ mba nəberne cəfta cin gboɲ, ta nəberne səburumus mərəɲ.»

¹⁰ Kə Yesu oloku ɲa sə: «Kələ nke nəmberə mə, nəyi ki disre haɲ nəyefe kəfo kanɲkə.

¹¹ Kə təyənə kəfo kələma afum ɲawose fe kəbaɲ nu, ɲawose fe kəcəɲkəl nu, kə nənɔde kəcyefe di-ε, nəkoɲ kəfəl ka wəcək wonu, ti tendeyənə ɲa sede a ɲanabaɲ fe nu.»

¹² Kə acepse ɔn ɲaɲkə, ɲaccam nte təɲsəɲe ɲaɲsəkpər bəkək, ɲaɲlomp.

¹³ Kə ɲambeləs yəɲk yelec yelərəm, ɲacsop acuy alərəm moro, ɲactaməs ɲa.

Defi da Saɲ Batis

¹⁴ Kə Herodu nwe enatəmpər dəbe da Kalile mə, ene pacloku teta Yesu, bawo tewe tən tenasam, pacloku: «Saɲ əfɔ, wəkə enɔgbət dərɔmun teta Kanu mə, nkən əfətə afi daco, itəsəɲe nte entam kəyənə mes məwəy-wəy mə.»

¹⁵ Aləma ɲacloku: «Eli əfɔ,» aləma ɲacloku sə: «Sayibe sə, nse səwurene sayibe sa təm tokur aɲa mə.»

¹⁶ Mba nte Herodu ene mes maməkə mə, k'oloku: «Saɲ nwe inasom k'anɲgbinti domp mə, nkən əfətə afi daco!»

¹⁷ Herodu yati enasom afum, ɲasumpər Saɲ ɲakot kə, ɲamber kə dəbili teta Herodiyad wəran ka wənc Filip, nwe Herodu enabaɲər kə pənence mə.

¹⁸ Saɲ oncloku Herodu: «Sariye səmən'am kənence wəran ka wənc əm.»

¹⁹ Herodiyad enater Saɲ pəfaɲ kədif kə, mba enctam fe,

²⁰ bawo Herodu əncsəɲ Saɲ pələl, pəcərə sə a wəkun wəlompu Saɲ əyənə, pəsək sə, Herodu enckekəs kə. Kə Herodu endecəɲkəl Saɲ-ε, pəncyi kə yamayama, mba kəcəɲkəl kən kəncbət kə.

²¹ Kə dəsək dende dəbəp ndə Herodu enaboc kəsata ka teren toluksər ta kəkəom kən mə, k'ewe asəɲkənə ɔn dəbe, abe asodar, k'abeki a Kalile kəkə di yeri.

22 Kə wan ka wəran kən Herodiyad embere k'empise, kə təmbət Herodu kə abe akə nənayi di mə. Kə Herodu oloku wəyecəra: «Məwer im paka mpe o mpe məfan mə, isəη əm pi.»

23 K'enderme kə toloku nte: «Mpe məηwer im mə, inəη əm pi, ali pəyənə dəbe dem kəsək kin.»

24 Kə wan wəran owur k'əηkə pəyif kere: «Ak'inəower kə-ε?» Kə kere oloku kə: «Domp da Saη Batis.»

25 Kə wan wəran embelkər kəlüksərne nde wəbe eyi mə pəkəwer kə: «İfan a məsəη im gbəncana bambə depəlet domp da Saη Batis.»

26 K'abəc ηembere wəbe Herodu, mba teta kəderəm kən kə akə nənayi di mə, enafəη fe kəbupəre kəderəm kən.

27 Kə wəbe osom gbəncana babəkə wəsədar a pəkere kə domp da Saη. Kə wəsədar əηkə pəgbinti Saη domp dəbili.

28 K'əηkere domp da Saη depəlet. Kə Herodu əsəη di wəyecəra, kə nkən əsəη di kere.

29 Nte acepse a Saη Batis ηane ti mə, kə ηander ηələk kəbel kən kə ηawup.

Yesu əsəη afum wul kəcamət yeri

30 Kə asom ηələηkanə Yesu kəsək, kə ηələmər kə təkə nənayo kə təkə nənatakse mə fəp.

31 Kə Yesu oloku ηa: «Nəder nnə kəsək, nnə kəfo kəyer-yer, nəjesəm pəpic.» Bawo afum alarəm nancder ηaclukus, nənayo fe təm tedi yeri yati.

32 Kə ηambere debil kəkə kəfo kəyer-yer.

33 Kə afum alarəm nənəηk ηa nte nənəkə mə, kə nənəpəl ηa. Kə afum a sədare səcəsək ηayekse sə kəkəgbintərne ηa.

34 Nte Yesu ontor debil mə, k'ənəηk kənay ka afum alarəm, k'əyənə ηa nənəfər, bawo nənayi pəmə ηkesiya nye yəntəyə wəkək mə, k'eyefe kətəkse ηa mes melarəm.

35 Nte dec dəncləpe mə, kə acepse ən ηələtərne ηacloku kə: «Kəfo kanke kəyə yer-yer, dec deyī kələp,

36 məloku ηa ηakə nətən yeri, nte təηsəηe ηakə ηawayene yeri dəmadare məfet məfet, kə sədare səcəsək mə.»

37 Mba kə Yesu oloku ηa: «Nənasərka nəsəη ηa yeri.» Kə acepse ηayif kə: «Nte məfan mə səkə səwaye afum akanə fəp yeri pəsəm mpe pəmbəp gbələη masar mərəη mə ba?»

38 Kə Yesu eyif ηa: «Cəcom cəke cə nəyə-ε? Nəkə nəməmən.» Nte nənəkə nənəmən mə, kə ηaloku Yesu: «Cəcom kəcamət kə lop mərəη.»

39 Kə Yesu oloku acepse ən ηadəs afum cəgba cəgba yika yobuk kərəη.

40 Kə ηandəs afum cəgba ca tasar tin (100) kə cəgba ca wəco kəcamət (50).

41 Kə Yesu elək cəcom nce kəcamət kə lop nyε merəη, k'eyekti fər darenc, k'eyif Kanu barka. K'entepi cəcom k'eyεfe ci kəsəηəs acεpse ən, ηayerəs ci afum. K'eyer sə lop yayəkə afum fəp.

42 Kə fəp fəsəm ci kə ηanembəre,

43 k'aluksε yeri cəcom kə lop yelpəs cəfala nce wəco kə merəη.

44 Arkun aηe ηanasəm cəcom cacəkə mə, ηanabəp arkun wul kəcamət (5.000).

Yesu əηkət kəba kəroη

45 Nte tencepər mə, gbəncana babəkə kə Yesu entare acεpse ən kəberε debil ηanuηkene kəcali məkuru məkə, ntende Betsayida, nkən pəcgbəcene kəloku kənay ka afum kəluku ndaraηan.

46 Nte elembərne ηa mə, k'əηkə kətola Kanu nde tərə kəroη.

47 Nte dəfəy dəmbəp mə, abil ηeyi kəba dacə, nkən sona pəyi dəntəf.

48 Kə Yesu enəηk təkə pənacuca acεpse ən kəηas mə, bawo afef ηə ηancgbofne, pibi pəbəle k'ender nnə ηayi mə pəckət kəba kəroη kəkəcepər ηa.

49 Nte acεpse ən ηanəηk kə pəckət kəba kəroη mə, kə ηafətə a tuberi tə, kə ηaηkule-kule,

50 bawo fəp faηan ηancnəηk kə, kə kənesε kəyi ηa. Mba gbəncana babəkə kə Yesu olok-lokər ηa, pəcloku: «Nəbəkne! In'əfə, ta nənesε!»

51 Kə Yesu embere debil kə afef ηesak kəwur. Kə cusu cəwos ηa.

52 Bawo acεpse ən ηanacəre fe nte o nte teta cəcom, pənasək fe ηa anə Yesu əfə-ε.

Yesu entaməs acuy nde atəf ηa Kenesaret

53 Nte ηalip kəcali kəba kə acεpse ən mə, kə ηambəp atəf ηa Kenesaret kə ηaηkot di abil.

54 Nandətor debil k'anəpəl Yesu,

55 kə afum a atəf ηaηəkə fəp ηayekse kəder, ηackere acuy dəsapoko nnə o nnə ancne a Yesu eyi mə.

56 Nnə o nnə enberε mə, pəyənε tadare kə pəyənε fe ti dare dəpəη, kə pəyənε fe ti dəkulum, anchoc acuy abanηa ηəpəη, paclətsenε Yesu kəwose acuy ηagbuηenε ali dobol da burumus bən. Acuy aηe o aηe ηancgbuηenε di mə, ηanctamne.

7

Kətəkse nkε atem ηanatəkse mə

1 AFarisi* kə atəkse sariye s'aSuyif aləma aηe ηanader kəyεfe Yerusalem mə, ηaləηkanε nde Yesu eyi mə, ηakəl kə.

* 7:1 *WəFarisi/aFarisi* = Kəgba k'abeki aSuyif aηe ηacepərər ηasəktərəne sariye kə məyə məkur ma aSuyif mə.

² Kɔ̄ ŋanɛŋk aɛɛpsɛ a Yesu darɛŋ akin akin ŋacdi yeri ta waca waŋan wɔsɔk-ɛ, itɔ tatɔkɔ ta ŋasumpɛr saliye-ɛ.

³ Awa, aFarisi kɔ̄ aSuyif fɛp ŋancdi fɛ yeri ta ŋambikɛnɛ waca ŋasumpɛr saliye-ɛ, bawo ŋanacɛmɛ mɔyɔ mokur maŋan darɛŋ.

⁴ Kɔ̄ ŋalukus kɔ̄yɛfɛ nde aban̄ka ŋɔpɔŋ-ɛ, ŋancdi fɛ yeri mɛnɛ ŋalip kɛsumpɛr saliye, ŋanacɛmɛ sɔ mɔyɔ mokur mɛlarɛm darɛŋ, pɛmɔ tɛyakɛs ta mɔmbɛl, mɔndɛ, kɔ̄ yɛbɛrɛ domun†.

⁵ aFarisi kɔ̄ atɛksɛ sariye s'aSuyif ŋayif Yesu: «Ta ake tɔ aɛɛpsɛ am ŋandine yeri waca waŋan weyik-yik, ta ŋasɔkɛsnɛ saliye, ŋacɛmɛ tɔyɔ tokur ta atɛm darɛŋ-ɛ?»

⁶ Kɔ̄ Yesu oloku ŋa: «Esayi ɛnaloku belbel tetonu ɛsɔyibɛ, nɛna aban̄ɛnɛ kɛlomp, pɛmɔ tɔkɔ ancic ti mɔ: «Afum akan̄ɛ dɛcusu gbɛcɛrɛm ŋan̄lɛlɛs im, mba bɛkɛc yan̄an yɔmbɔl'em pɔpɔŋ.»

⁷ Kɛsali nke ŋanctolan'em ŋaclɔŋn'em mɔ kɔ̄yɔ fɛ dɛkɛcɛmɛ, bawo mosom mmɛ ŋantɛksɛ mɔ, afum ŋapɛr mi, bafɔ Kanu.»

⁸ Nɛsak mosom ma Kanu, nɛcɛmɛ mɔyɔ mokur ma afum darɛŋ.»

⁹ K'oloku ŋa: «Pɛfɛfɛrɛnɛ nu kɛfɛn tosom ta Kanu, nɛccɛmɛ mɔyɔ mokur monu darɛŋ.»

¹⁰ Bawo Musa ɛnaloku: «Mɛlɛlɛs wisi kɔ̄ wiri,» k'oloku sɔ: «Nwɛ ŋɔlok-lokɛr kas kɔ̄ pɔyɔnɛ fɛ ti kɛrɛ pɛlɛc mɔ, padif wɛkayi.»

¹¹ Mba nɛna nɛŋloku: «Kɔ̄ fum oloku kas kɔ̄ pɔyɔnɛ fɛ ti kɛrɛ-ɛ, paka pɔkɔ pɛmarna isɔŋ ɛm kɛmar kam mɔ, isɔŋ pi Kanu,»

¹² ti disrɛ nɛna nɛwosɛ a ta pɔyɔnɛ sɔ kas kɔ̄ kɛrɛ tɔlɔm o tɔlɔm.

¹³ Nɛnimɛ tatɔkɔ toloku ta Kanu mɔyɔ mokur mmɛ nɛnctɛksɛ mɔ. Nɛŋyɔ mes mɛlɛc mɛlarɛm mmɛ mowurɛnɛ mamɔkɔ mɔ.»

Mɔyɔ mmɛ mɔŋsɔŋɛ fum kɛtɔsɔk mɔ

¹⁴ Kɔ̄ Yesu ewe sɔ kɛnay ka afum, k'oloku ŋa: «Nɛcɛŋkɛl im belbel, nɛcɛrɛ sɔ!»

¹⁵ Daka o daka deyi fɛ todoru ta fum ndɛ dɛmbɛrɛ kɔ̄ disrɛ dɔŋsɔŋɛ kɔ̄ kɛtɔsɔk mɔ. Mba ntɛ tɔŋwur dɛfum mɔ tɔŋsɔŋɛ kɔ̄ kɛtɔsɔk.

¹⁶ Nɛcɛŋkɛl belbel, kɔ̄ tɔyɔnɛ nɔyɔ lɛŋɔs nɛcɛnɛ-ɛ.»

¹⁷ Ntɛ Yesu olukus dɛkɛr mɔ, pɛbɔlɛ kɛnay ka afum, kɔ̄ aɛɛpsɛ ɔn ŋayif kɔ̄ tɛta totubcɛnɛ tatɔkɔ.

¹⁸ K'eyif ŋa: «Nɛna sɔ, nɛsɔrɔyi kɛtɔcɛrɛ disrɛ ba? Nɛncɛrɛ fɛ a daka o daka ndɛ dɛŋyɛfɛ todoru dɛbɛrɛ dɛfum mɔ, dɛfɔsɔŋɛ kɔ̄ kɛtɔsɔk?»

† 7:4 Yecicɛs yokur yɔlɔma yɛndɛŋɛr «kɔ̄ sɛcɛm», kɔ̄ pɔyɔnɛ fɛ ti-ɛ, «kɔ̄ kɛfɛnc.» 7:7 Esayi 29.13 7:10 Kɛwur 20.12, Sariye 5.16 7:10 Kɛwur 21.17, ALewy 20.9

19 Bawo daka dadəkə dəfəbərə kə dəbəkəc, mba dəkor dəmbərə kə, kə telip-ε pəwure di dəkofī.» Ti disre, Yesu enasəksə alaŋ ɔn yeri fəp.

20 K'oloku sə: «Nte toŋwur dəfum mə, tɔŋsəŋe kə kətəsək.

21 Bawo dəbəkəc məcem-cemne məlec moŋwur: Dowon, deke, kədif ka fum,

22 kəsumpər dalakə, dəcelək, məcem-cemne ma kəyɔ mes məlec, cəmpənpən, dəyamayama, kəraca, kəlomas ka Mariki, kədot banca kələc dotonkulu disre.

23 Mes məlec maməkə fəp dəfum moŋwur, məcsəŋe kə kətəsək.»

Wəran wəcikəra əlaŋ Yesu

24 Kə Yesu eyefe dəndo k'əŋkə atəf ŋa Tir. K'əŋkə pəbərə kələ kəloma. Ənafəŋ fe nwe o nwe pəcərə ti, mba enatam fe kəyi kəgbəpne disre.

25 Wəran wəloma nwe ŋəŋk ŋələc ŋenatəŋkələ wan kən wəran mə, enane gbəncana babəkə pacloku tetən, kə wəran nwe ender pətəmpene Yesu wəcək dəntəf.

26 Wəran wəkəkə wəkresi enayi, pakom kə Siriya Fenisiya. K'ontola Yesu a pəbeləs ŋəŋk ŋələc ŋŋe ŋeyi wan kən mə.

27 Kə Yesu oloku: «Məkar kərəsna awut ŋanəmbərə, bawo pəntese fe kələkər awut kəcom mələme ki cen.»

28 Mba kə wəran nwe olukse Yesu: «Mariki, mecen amesa dəntəf meŋyi mecdi yeri yelpəs ya awut.»

29 Kə Yesu oloku wəran nwe: «Teta toloku tam, məkə, ŋəŋk ŋələc ŋowur wan kam wəran.»

30 Nte wəran nwe embərə ndərən mə, k'əmbəp wan nwe pəfəntərə dəkəfənc. ŋəŋk ŋələc ŋowur kə.

Yesu entaməs wərkun nwe enatə kəcne ta oŋlok-loku sə mə

31 Kə Yesu eyefe atəf ŋa Tir, k'oluksərne ta Sidəŋ kəca ka kəba ka Kalile, k'encali atəf ŋa Sədare Wəco.

32 K'əŋkərə kə wətəne nwe enctarpene kəlok-loku mə, k'alətsene kə kədenər kə kəca.

33 Kə Yesu eŋkekərə wətəne kakə kəsək pəbələ kənay ka afum, k'əmbər kə telər dələŋəs, k'oyuk lin k'osopte kə yi telər dətəmer.

34 K'eyekti fər darenc teta kətola Kanu, k'empene kifir pəpəŋ, k'əncəp kusu kəŋan: «*Effatal!*», ti təyənə «*Məgbite!*»

35 Gbəncana babəkə, kə ləŋəs yən yenɡbite, kə temer pən pesikələ. K'olok-loku pəcempi cələŋ.

36 Kə Yesu oloku ŋa kətəloku ti ali fum, mba təkə Yesu əncməne ŋa ti mə, itə ŋancdəŋk ti.

37 Cusu cənawos afum pəpəŋ, ŋacloku: «Mes mme ŋyɔ mə fəp mentese! ŋsəŋe atəne kəne, pəsəŋe atəlok-loku kəlok-loku!»

8

Yesu əsənjə afum wul maŋkələ kəneɓərə

1 Mata maməkə, nte kənay ka afum kələma sə kənatəyɔ yeri yedi mə, k'ewe aɓɓɓe ɔn darəŋ, k'oloku ɲa:

2 «Nənəfər deyi'm teta kənay ka afum kaŋkə. Mata maas ɲayi kə ina, ɲayɔ fɛ sə paka o paka pedi.

3 K'isənjə ɲa kələkus nde ndaraŋan ta ɲandi peri-ɛ, iŋnese ta dis dəkələl ɲa dəpə, bawo aləma pəbələ pə ɲayɛfɛ.»

4 Kə aɓɓɓe ɔn darəŋ ɲayif kə: «Awa, deke antam kəsətə cəcom nɛ andenɛɓərəsɛ ɲa, nnə kəfo kəyer-yer kaŋkə mə?»

5 Kə Yesu eyif ɲa: «Cəcom cəke cə nəyɔ-ɛ?» Kə ɲaloku kə: «Cəcom camət-mɛrəŋ.»

6 Awa, k'oloku kənay a ɲandɛ dəntəf. Nte elɛk cəcom nɛ camət-mɛrəŋ mə, k'eyif Kanu barka, k'entep-tepi ci, k'eyɛfɛ kəsənjəs ci aɓɓɓe ɔn darəŋ nte təŋsənjə ɲayerəs ci kənay k'afum mə.

7 Molop mələma mənayi sə. Nte elip kəyif Kanu barka teta mi mə, k'oloku a payer sə maməkə.

8 Kə kənay ka afum kəndi kə kəneɓərə, k'asətə cəfala camət-mɛrəŋ cələre cəcom cəlpəs.

9 Kənay ka afum kaŋkə kənaɓəp afum wul maŋkələ (4.000), nte telip mə, kə Yesu eleɓərne ɲa.

10 Gbəncana babəkə k'embɛrɛ debil kə aɓɓɓe ɔn darəŋ, kə ɲaŋkə sədare sa Dalmanuta.

aFarisi ɲawer Yesu tɛgbəkərə tɛwɛy-wɛy

11 Kə aFarisi ɲander, kə ɲancop kəgbəkələne kə Yesu, nte ɲafan kəsumpər kə dəmoloku mə, kə ɲawer kə tɛgbəkərə tɛwɛy-wɛy tələma nte tementər a Kanu kəsom kə mə.

12 Kə Yesu ontore kifir pəpəŋ, k'eyif: «Ta ake tə dɛtemp dandɛ dɛŋwɛnɛ tɛgbəkərə tɛwɛy-wɛy nte tementər a Kanu kəsom im mə-ɛ? Kance icloku nu: Afəmentər dɛtemp dandɛ tɛgbəkərə nte o nte.»

13 Nte elip kələk-lokər ɲa mə, kə Yesu ɛsak ɲa, k'embɛrɛ sə debil kəkə ka mokuru.

Lebin da aFarisi kə da Herodu

14 Aɓɓɓe a Yesu darəŋ ɲanapələrne kələk cəcom. Kəcom kin gbəŋ kə ɲanayɔ dəndo debil.

15 Kə Yesu oloku ɲa tosom nte: «Nəməpi fər, nəkəɓərne lebin da aFarisi kə da Herodu.»

16 Kə aɓɓɓe ɲayɛfɛ kəgbəkələne taŋan, bawo ɲanayɔ fɛ cəcom.

17 Kə Yesu ɛncərə tes nte ɲancəcərəne kiti mə, k'eyif ɲa: «Ta ake tə nəncəcərəne kiti nəcloku a nəyɔ fɛ cəcom-ɛ? Nəntasətə fɛ mera haŋ ndəkəl? Nəfəcərə? Nəna nəmbiyɛ səbomp?»

18 Nəyɔ fər, mba nəfənəŋk? Nəyɔ ləŋəs, mba nəfəne? Nəncɛm-cɛmne fɛ,

19 nte inatep-tepe arkun wul kəcamət (5.000) cəcom kəcamət mə, cəcom cəlpəs cəfala cəke cə nənasətə-ε?» Kə acəpse ηaloku Yesu: «Wəco kə mērəη.»

20 «Nte inatep-tepe afum wul maηkələ (4.000) cəcom camət-mērəη mə, cəfala cəke cə nənasətə cəcom cəlpəs-ε?» Kə ηaloku Yesu: «Cəfala camət-mērəη.»

21 Kə Yesu eyif ηa: «Haη ndəkəl nəntacərə fe ba?»

Yesu entaməs wətənəηk nde Betsayida

22 Yesu kə acəpse ən ηander Betsayida. K'anəkere kə wətənəηk k'alətsene kə, a pədenη kə kəca.

23 Kə Yesu osumpər wətənəηk wəkakə kəca k'enkekərə kə dare kəsək. K'oyukər kə lin dəfər, k'endenər kə waca, pəcyif kə: «Məηəηk paka pələma ba?»

24 Kə wətənəηk emepi fər pəcloku: «İηəηk afum, iηəηk ηa pəmə tək, mba ηaηkət.»

25 Kə Yesu əηgbəkərə sə kədenη kə waca dəfər, nte wətənəηk nwe endegbəkərə kəmeπi fər pəpəη mə, k'entamne, pəcnəηk pəwanəkəra.

26 Kə Yesu elembərne kə, pəkə nde ndərən, k'oloku kə: «Ta məberε dare de!»

Piyer oloku a Yesu əyənε wəyek-yek

27 Kə Yesu ηawur kə acəpse ən darəη ntende dare da Sesari sa Filip. Nəyi dəpə, k'eyefe kəyifət acəpse ən: «Nte afum ηaηloku mə, an'iyənε-ε?»

28 Kə acəpse ηaloku kə: «Aləma ηaloku a Aηnabi Saη Batis, kə aləma a Eli, kə aləma sə a sayibe sələma.»

29 Kə Yesu eyif ηa: «Pecemcemne ponu, an'iyənε-ε?» Kə Piyer oloku: «Məna, Krist* məyənε.»

30 K'entij-tij ηa kətəloku tetən ali fum.

Yesu endəηk defi dən kə kəfəte kən

31 Kə Yesu oncop kətəkse ηa pəclenε: «Mene patərəs Wan ka Wərkun pəlarəm. Abeki, aləηne apəη, kə atəkse sariye sa aSuyif ηandewənəs kə, padif kə, mba pəfəte afi dacə kə tataka ta maas tencepər-ε.»

32 Yesu oncloku moloku mamε pəsoku pəs. Kə Piyer ewe Yesu kəsək, k'eyefe kənal kə.

33 Mba Yesu olukus, k'əηgbətne acəpse ən, k'əηgbəη-gbəηər Piyer: «Məkafəl'em kumunt darəη, məna Sentani! İw'am tewe ta Sentani bawo məfəcem-cemne pəmə Kanu, mba pəmə afum.»

* 8:29 Krist = «Wəsom ka Kanu» tokule tə = «Nwe Kanu kəyek-yek kəsom mə teta kəyac afum a Kanu.»

³⁴ Kə Yesu ewe kənay ka afum kə acəpse ən darəŋ, k'oloku ŋa: «Kə fum efaŋ kəcəps'em darəŋ-ε, wəkayi pəsak kəcem-cəmne teta nkənsərka, pəgbanne kətək kən kəpəmpəl pəcəm'em darəŋ.

³⁵ Bawo nwe o nwe eŋsep kəyac kəyi doru kən mə, kəndesalpər kə, mba nwe o nwe kiyi doru kən kəŋsalpər kə teta ina kə Kibaru Kətət mə, endeyac ki.

³⁶ Dəkəcəme dere də təyo fum kəsətə kən doru kərkər, kiyi kən doru kəsələr kə-ε?

³⁷ Ake fum entam kəsəŋ kəwurse ka kiyi kən doru-ε?

³⁸ Nwe o nwe elapərn'em kə moloku mem dətəmp da aciya kə asumpər dalakə dandε dacə mə, Wan ka Wərkun sə endekəlapərne wəkayi k'endeder nərə da Kas disre, kə meleke mecempi.»

9

¹ Kə Yesu oloku acəpse ən sə: «İclokə nu kance: Afum aləma ŋayi nno, aŋe ŋantədefi ta ŋantanəŋk dəbe da Kanu dedereŋe fənəntər-ε.»

Kətəŋkələ ka Yesu

² Nte mata camət-tin mencepər mə, kə Yesu elek Piyer, Sak kə Isan k'əŋkekəre ŋa kəsək nde dətərə tenjici, kə ŋambəkəre. Kə Yesu əŋkə pətəŋkələ fər yaŋan kirin.

³ Kə yamos yən yomot pəfer mpe fum o fum əntətəm kəcem yi yefere pəmə tatəkə mə.

⁴ Aŋnabi Eli kə Aŋnabi Musa ŋawurər Piyer, Sak kə Isan, kə ŋanəŋk afum akanje merəŋ ŋaclok-loku kə Yesu.

⁵ Kə Piyer oloku: «Wətəkse, pəntese su kəyi nno. Pacəmbər ŋgbancan maas: Njin ŋam, ŋin ŋa Aŋnabi Eli kə ŋin ŋa Aŋnabi Musa.»

⁶ Piyer enacəre fe tələm o tələm nte əŋkəloku mə, bawo kənesə kənasumpər ŋa pəpəŋ.

⁷ Kə kəp kəŋgbəpər ŋa katəkəp, kə dim dowur kəp kəŋkə disre: «Wəkawε wan kem nwe imbətər mə əfə. Nəcəŋkəl kə!»

⁸ Gbəncana babəkə kə ŋaməmən kəsək, ŋanəŋk fe sə fum mənε Yesu sona.

⁹ Nte ŋanctor dətərə mə, kə Yesu entin-tin ŋa kətəloku təkə ŋanəŋk mə fum, haŋ Wan ka Wərkun pəcfətε afi dacə.

¹⁰ Kə acəpse aŋe maas ŋaməŋkərne toloku tatəkə, ŋacyiftene taŋan: «Cəke cə kəfətε afi dacə kəloku-ε?»

¹¹ Kə ŋayif Yesu: «Ta ake tə atəkse sariye s'aSuyif ŋanloke a mənε Aŋnabi Eli pənuŋkənε kəder kərəsna-ε?»

¹² Kə Yesu oloku ŋa: «Eli ender kərəsna kədelompəs mes fəp. Ta ake t'ancice a mənε patərəs Wan ka Wərkun pəlarəm, pawənəs kə-ε?»

¹³ Mba iloku nu a Eli ender, kə afum ŋayo kə təkə ŋafaŋ mə, pəmə təkə Yecicəs Yosoku yoloku tetən mə.»

Yesu entaməs wan nwe ɲəŋk ɲələc ɲenatonɲkulu mə

14 Nte Yesu, Piyer, Sak kə Isan ɲander ɲabəp aɕɛpsɛ alpəs a Yesu darəŋ mə, kə ɲanəŋk kənay ka afum alarəm kəkəl ɲa, atəkse sariyə s'aSuyif ɲacgbəkələne kə ɲa.

15 Nte kənay ka afum kəndenəŋk Yesu mə, kə cusu cəwos ɲa, kə ɲayeksərne kədəyif kə.

16 Kə Yesu eyif aɕɛpsɛ ɔn: «Ake nəyi kəgbəkələne kə ɲa-ɛ?»

17 Kənay ka afum disre kə fum wələma olukse Yesu moloku: «Wətəkse, wan kem inker'am, nwe ɔyɔ ɲəŋk ɲɲe ɲeɲyamse kə kəlɔk-loku mə.

18 Kəfo nke o nke encəme ɲebere kə mə, difɔ ɲeɲgbal kə dəntɔf, wan pəwure kəfoc dəkusɔ, pəɕɲanərəne sek, pəcyenkarəne. ɲetsene aɕɛpsɛ am darəŋ ɲabeləs ɲəŋk ɲələc ɲaɲe, mba ɲantam fe.»

19 Kə Yesu eyif ɲa: «Dɛtemp dətɔlan, ake tɛm t'indesɔyi kə nəna-ɛ? Icəme nu dəntɔf han tɛm tere-ɛ? Nəkər'em kə.»

20 K'ankerɛ kə wan nwe. Nte ɲəŋk ɲələc ɲendenəŋk Yesu mə, kə ɲeyikəc wan pəpəŋ, k'entempene dəntɔf pəɕbəŋkələ, pəcwure kəfoc dəkusɔ.

21 Kə Yesu eyif wan nwe kas: «Kəyefe ake tɛm tɔ tantɛ tenyi kə-ɛ?» Kə kas oloku Yesu: «Kəyefe pəfɛte.

22 Telarəm ɲəŋk ɲələc ɲaɲe ɲeɲgbal kə dənenc, tələma dərɔmun nte tɔɲsəɲe ɲedif kə mə. Mba kə tɔyɔne məntam tələma-ɛ, məyɔne su nɔnɔfər məmar su!»

23 Kə Yesu oloku kə: «Məloku a kə məntam-ɛ? Antam kəyɔ mes fəp, kə tɔyɔne patəmpər kəlan-ɛ.»

24 Gbəncana babəkə kə wan kas ɔɲkule pəpəŋ: «ɲlan! Kəlan kem kəmbut, mba məmar im!»

25 Nte Yesu enəŋk kənay ka afum kəcyekse kəder mə, k'ɛɲgbəŋ-gbəŋər ɲəŋk ɲələc pəɔloku ɲi: «Məna ɲəŋk ɲələc ɲətɔlɔk-loku, ɲətɔne, in'ɔɲsom əm, məwur wan wəkawe dərɔs, ta məbere kə sɔ!»

26 Kə ɲəŋk ɲələc ɲowur wan wəkawe dərɔs ɲɔckule-kule pəpəŋ, ɲecyikəc kə pəpəŋ. Kə wan eyi pəmɔ efi, kə afum alarəm ɲaloku a efi.

27 Mba kə Yesu osumpər kə kəca, k'eyekti kə, kə wan encəme.

28 Nte Yesu ɲalukus dəker kə aɕɛpsɛ ɔn mə, kə ɲayefe kəyifət kə yɔkyɔk: «Ta ake tɔ sənəsərka səntɔnatamə kəbeləs ɲi-ɛ?»

29 Kə Yesu oloku ɲa: «Dokom da yəŋk yələc dandɛ, kətola Kanu gbəcərəm kəntam kəwure yi dəfum.»

Yesu ɔɲgbəkərə sɔ kədəŋk defɔ dən kə kəfɔte kən

30 Nte Yesu eyefe dəndo mə, k'encali Kalile, enafan ɲe a pacərə ti.

31 Encəkse aɕɛpsɛ ɔn pəɔloku ɲa: «Dəkəber afum dəwaca Wan ka Wərkun eyi, ɲandedif kə, pəfɔte afi daco kə mata maas mencepər-ɛ.»

32 Mba toloku tantε tenasəkər fε acεpse ɔn, ηacnese kəyifət kɔ.

An'εbək dəkacəme-ε?

33 Yesu kɔ acεpse ɔn ηaηkɔ Kaparnam. Nte ηambere dekər mə, kɔ Yesu eyεfε kəyifət ηa: «Teta ake tɔ nəndenagbəkələnene dɔpɔ-ε?»

34 Mba acεpse ɔn ηanaloku fε kɔ tes o tes, bawo ηanagbəkəlene dɔpɔ, kəcərə ka nwe embək dəkacəme mə.

35 Ti disre, kɔ Yesu endε, k'ewe acεpse ɔn aηε wəco kɔ merəη, k'oloku ηa: «Kɔ fum efaη kəyɔne wəcəkɔ-cəkɔ-ε, wəkayi pəyɔne wədarəη ka fəp, pəyɔne sɔ wəmarəs ka fəp.»

36 Kɔ Yesu elək wanfət, k'enekne kɔ ηa dacɔ, k'oloku ηa:

37 «Nwe o nwe embaη wanfət pəmɔ wəkawe tewe tem mə, embaη sɔ inasərka. Nwe o nwe embaη im mə, bafɔ ina gbəcərəm embaη, mba embaη sɔ nwe osom im mə.»

Nwe ɔntəter su mə, ɔmbətər su

38 Kɔ Isaη oloku kɔ: «Wətəkse, sənəηk fum wələma pəcbelse yɔηk yelec tewe tam, kɔ səsεp kəmɔne kɔ ti, bawo wəkayi encəme fε su darəη.»

39 Kɔ Yesu olukse moloku: «Ta nəmɔne kɔ ti, bawo ali fum eyi fε nwe entam kəyɔne tewe tem tεgbəkərə tεwεy-wεy pəckəlɪp wəkayi pəloku pələc pem mə.

40 Ti disre, nwe ɔntɔce su mə, wəkayi efaη su.

41 Nwe o nwe ɔsəη nu domun təmbəl katin teta kəyɔne konu aka Krist mə, kance icloku nu: Wəkayi ɔfɔdekəbut kəsɔtɔ kəway kən kətət.»

Kəberηne kəpəη

42 Kɔ Yesu embenne ηa nte: «Mba kɔ fum ɔsəηε wanfət wəkin kəlɔηε awut akanε dacɔ nwe eηgbəkər im kəlaη kən mə-ε, kiti ka wəkayi kəyεηk kətəs təkɔ aηkotərəne kɔ tasar pəpəη dəkilim paləm kɔ dəkəba mə.

43 Kɔ kəca kam kəndesəη'am kəciya-ε, məgbinti ki! Bawo kəberε kiyi kam ka doru o doru məyɔ kəca kin kəncepər kələm kam yahanama dənenc ndε dəntənime mə, məyɔ waca merəη.

44 *

45 Kɔ tɔyɔne kəcək kam kəηsəη'am kəciya-ε, məgbinti ki. Kəberε kiyi kam ka doru o doru məyɔ kəcək kin kəncepər kələm kam yahanama məyɔ wəcək merəη.

46 †

47 Kɔ tɔyɔne dɔfər dam dəηsəη'am kəciya-ε, məkakti di. Kəberε kam akip ηa dεbe da Kanu dəntɔf məyɔ dɔfər din kəncepər kələm kam yahanama məyɔ fər merəη.

* 9:44 Yecicəs yɔgbəkərə yələma yendenər: «Yahanama, yet nye yɔηsəm dis mə yɔfɔfi, nenc ndε dəncɔf dis mə dɔfɔnime.» † 9:46 Yecicəs yokur yələma yendenər: «Dəndo yet nye yɔsəm dis yɔfɔfi, dəndo nenc dɔfɔnime haη dabada.»

48 Dəndo, «yət nyə yənsəm dis mə yəfəfi, nenc nde dāncəf dis mə dəfənimə.»

49 Bawo nwe o nwe andekəyek-yəkər kə nenc da kədusum pəmə nte aņyek-yəkər mēr dəperi mə.

50 Mēr paka pətət pə. Mba kə mēr mēndence-ε, ak'antam kədəktəsə sə mi-ε? Nəyi nənasərka pəmə mēr, nəyinε pəforu kə akə.»

10

Yesu kətəksə kən teta kəcenεε ka anεcεnε

1 Nte Yesu eyefe dəndo mə, k'əņkə atəf ηa Yude ntende mokuru ma kəņgbəkə ka Yurdən. Kə kənay ka afum alarəm kəņkə sə kəlonkane kə kəsək. Kə Yesu oncop kətəksə ηa, pəmə təkə əncyə ti mə.

2 K'aFarisi ηander bawo ηanafəņ kəcəpε kə towul dəmoloku, kə ηayif kə: «Sariye səwosε wərkun kəcə wəran kən ba?»

3 Kə Yesu oloku ηa: «Cəke cə Musa εnasom nu-ε?»

4 Kə ηaloku: «Nte Musa εnaloku mə, a məcic areka ηecene wəran a mədewurεnε kə.»

5 Kə Yesu oloku ηa: «Teta bəkəc yonu yeyenki tə Musa εnacice tosom tantε.

6 Mba dəkəcop da doru kə Kanu kəsəl ηa wərkun kə wəran.

7 Ti təsəņε nte wərkun εņsake kas kə kεrε, pəsektərne wəran kən mə,

8 afum akanε mērəņ ηakafələ ηayəne tεsem tin. Ti disrε ηayəne fε sə afum mērəņ, mba tεsem tin.

9 Ta fum pəgbey təkə Kanu kənabembərəne mə!»

10 Nte ηalukus dəkər mə, kə acεpse ən ηayefe kəyifət kə teta moloku maməkə.

11 Kə Yesu oloku ηa: «Nwe ence wəran kən pəkə pənence wəloma mə, dəkəcəme da wəsumpər dalakə d'eyine wəran wəkəkə.

12 Kə wəran ence wos, wərkun wəloma pənence kə-ε, nkən sə dalakə d'eyi.»

Yesu kə awut

13 Afum ηanckεrε Yesu awut afet nte təņsəņε pəcdeņər ηa waca teta kətolanε ηa pətət. Mba kə acεpse ən ηaņgbəņ-ğbəņər ηa.

14 Nte Yesu εnəņk ti mə, kə pəntεlε kə, k'oloku ηa: «Nəsak awut ηader nnə iyi mə, ta nəyamsər ηa kəder, bawo, afum aņε ηayi pəmə awut afet akanε mə, ηa ηayə dəbe da Kanu.

15 Kance icloku nu: Nwe o nwe əntəfayne dəbe da Kanu pəmə wanfət mə, əfədekəberε di disrε.»

16 Kə Yesu elək awut k'əntəmpər, k'eyefe kətolanε ηa pətət, pəcdeņ ηa waca dəsəbomp.

Yesu kə wərkun wəka daka

17 Ntε Yesu osumpər dəpə kəkə mə, kə fum wələma eyekse k'ende pəcəpε kə suwu pəcyif kə: «Wətəksε wətət, cəke cə pəmar im kəyə, ntε tənşəηε isətə kiyi wəyεη ka doru o doru mə-ε?»

18 Kə Yesu eyif kə: «Ta ake tə məwen'em <Wətət>-ε? Ali fum əyənε fε wətət, mənε Kanu sona gboη.

19 Məncərəε mosom ma Kanu: <Ta mədif fum, ta məsumpər dalakə, ta məkiyε, ta məbaηε fum sede sa yem, ta mədir fum, mələləs wisi kə wiri.>»

20 Kə fum nwe oloku Yesu: «Wətəksε, ileləs maməkə fəp kəyεfε isərəfεtε.»

21 Kə Yesu əməməη kə, kə tetən təmbət kə. Kə Yesu oloku kə: «Tes tin gboη tobut əm: Məkə məcaməs daka ndε məyə mə fəp, məsəη pəsam papəkə atəyə daka. Kə məyə ti-ε mändekəsətə daka dəlarəm nde dəKəm. Kə məlip-ε, məder məcəps'em darəη.»

22 Kə dis dəndəncε fum nwe kəne toloku ta Yesu, k'owur pəmənncε, bawo εnayə daka dəlarəm.

23 Kə Yesu əməməη acəpsε ən k'oloku ηa: «Pəncuca aka daka kəberε ka akip ηa dəbe da Kanu dəntəf!»

24 Kə pənciyanε acəpsε ən teta moloku maməkə. Mba kə Yesu əηgbəkərə sə: «Awut em, pəncuca kəberε akip ηa dəbe da Kanu dəntəf!

25 Pəfəfərənε yəkəme kəberε abi ηa tεsembε pətəs wəka daka kəberε ka akip ηa dəbe da Kanu dəntəf.»

26 Kə toloku tatəkə tənəηkanε kəwosəs acəpsε ən cusu, kə ηayiftənε: «Awa an'entam əη kəfis-ε?»

27 Kə Yesu əməməη ηa, k'oloku: «Afum ηafətam ti, mba Kanu kəntam ti, bawo Kanu kəntam mes fəp.»

28 Kə Piyer eyεfε kəloku kə: «Səna səsak ca fəp ntε tənşəηε səncəm'am darəη mə.»

29 Kə Yesu oloku kə: «Kance icloku nu: Fum eyi fε nwe εsakε teta ina kə Kibaru Kətət: Kələ, awenc, akirε, kεrε, kas, awut kə pəyənε fε ti antəf-ε,

30 wəkayı əηsətə tēm tantε ayi mə tasar tin ta yayəkə məsak mə fəp, kəyεfε wələ, awenc, akirε, cεrε, awut kə ntəf kətərəs disrε, pəsətə sə kiyi wəyεη ka doru o doru tēm tekirin.

31 Akirin ηalarəm ηandekəyənε adarəη, kə adarəη ηayənε akirin.»

Yesu endəηk sə tamaas defi dən kə kəfətε kən

32 Dəpə ηanayı kəpε ka Yerusalem, kə Yesu eyi ηa kirin, bəkəc yenalεcε-lεcε acəpsε ən, afum akə ηanacəme ηa darəη mə, ηanese. Kə Yesu elək sə Asom ən aηε wəco kə mērəη, k'eyεfε kələmər ηa təkə tendesətə kə mə.

³³ K'oloku ɲa: «Nəcəŋkəl im, Yerusaləm ayi kəpɛ, andekələk Wan ka Wərkun paber kə alonɲɛ apəŋ kə atəksɛ sariyɛ s'aSuyif dəwaca. Kə ɲanderɲər kə sariyɛ sa defi, ɲaber kə sə atəyɔnɛ aSuyif dəwaca,

³⁴ akakə ɲafani kə, ɲayuksər kə lin, ɲasutɛ kə tərɔŋkən, ɲadif kə. Kə mata maas mencepər-ɛ, pəfɔtɛ afi dacɔ.»

Teyifta Sak kə Isan

³⁵ Kə awut a Sebede aɲɛ mɛrəŋ Sak kə Isan ɲander ɲaloku Yesu: «Wətəksɛ, səfaŋ məyɔnɛ su nte səndetol'am mə.»

³⁶ Kə Yesu eyif ɲa: «Cəke cɔ nəfaŋ a iyɔnɛ nu-ɛ?»

³⁷ Kə ɲalukxɛ Yesu: «Məwosɛ su wəkin kənd'am kəca kətət kə wəkə kəca kam kəmeriya nde nɔrɔ da debeki dam.»

³⁸ Kə Yesu oloku ɲa: «Nəncərə fɛ nte nəyi kətola mə. Nəntam kəwosɛ kətərəs pəmɔ nke ina indesətɔ mə ba? Nəntam kəcəmə pucuy fər kirin mpe pender kəbəp im mə ba?»

³⁹ Kə ɲaloku: «Səntam ti.» Kə Yesu oloku ɲa: «Awa, nəna sə nəndesətɔ kətərəs nke indesətɔ mə, nəsətɔ sə pucuy pəpəŋ mpe pendebəp im mə.

⁴⁰ Mba nte təyɔnɛ kənd'em kəca kətət kə kəca kəmeriya mə, bafɔ in'əŋsəŋ ki. Afum akə amɛŋkɛ mofɔ mɛndɛ maməkə mə, ɲa ɲayɔ mi.»

⁴¹ Kə pəntɛlɛ acɛpɛsɛ ɔn aɲɛ wəcɔ nnɔ Sak kə Isan ɲayi mə.

⁴² Kə Yesu ewe ɲa, k'oloku: «Nəncərə a akə ancərə kətəmpər dəbɛ nde tɔf yələma mə, ɲantasərɲɛ afum aɲan, səkət sə akirin a tɔf yayəkə ɲaŋkətɛnɛ kətam afum aɲan kəron.

⁴³ Mba tatəkə teyi fɛ nnɔ nəna nəyi mə, nte təyɔnɛ mə, nwe ɛŋfaŋ kəbək dəkəcəmə nu dacɔ mə, pəmar wəkayi pəyɔnɛ wəbəcə konu,

⁴⁴ nwe o nwe ɛŋfaŋ kəyɔnɛ wəkirin nu dacɔ mə, pəmar pəyɔnɛ wəcar ka fəp.

⁴⁵ Wan ka Wərkun ender fɛ padɛbəcə kə, mba ender kədəbəcə afum pəsəŋ sə kiyi kən wəyɛŋ pəwurus kənay ka afum.»

Yesu ɛntaməs wətənəŋk

⁴⁶ Kə ɲander Yeriko. Nte Yesu ɛncyɛfɛ Yeriko ɲasol kə acɛpɛsɛ ɔn darəŋ kə kənay ka afum alarəm mə, kə wətola wətənəŋk wələma, Bartime wan ka Time pəndɛ dɔpɔ kəsək.

⁴⁷ Kə Bartime ene a Yesu wəka Nasaret ɔfɔ, k'eyɛfɛ kəkule-kule: «Wan ka Dawuda, Yesu, məyɔn'em nənɔfər!»

⁴⁸ K'afum alarəm ɲaŋgbəŋ-gbəŋər kə a pəcəŋk, mba pəcənaŋkanɛ kəkule-kule: «Wan ka Dawuda, məyɔn'em nənɔfər!»

⁴⁹ Kə Yesu ɛncəmə k'oloku: «Nəwe kə.» Kə ɲawe wətənəŋk ɲaloku kə: «Məbəkɲɛ, məyɛfɛ, ɛw'am.»

⁵⁰ Kə wətənəjk eləm duma dəkəron, k'oyokne kəyefe, k'əjkə nde Yesu eyi mə.

⁵¹ Kə Yesu eyif kə: «Cəke cə məfan a iyən'am-ε?» Kə wətənəjk oloku: «Wətəksə, iluksərne sə kənəjk!»

⁵² Kə Yesu oloku kə: «Məkə, kəlan kam kəntaməs əm.» Gbəncana babəkə, k'oluksərne sə kənəjk, k'encəme Yesu darəj.

11

Yesu embere Yerusalem

¹ Nte Yesu kə acepse ən darəj ɲalətərne Yerusalem mə, pəsəyoi kəca ka Betfase kə Betani ntende tərə ta Tək ya Olif kəsək, k'osom acepse ən darəj mərəj,

² pəcloku ɲa: «Nəkə nde dare dandə nəntefərne mə, kə nəndena kəbərə di-ε, nəjkəbəp di səfale səfet nse fum o fum entatənde kərəsna kəron mə. Nəsikəli si, nəker'em.

³ Kə təyənə fum pəyif nu: «Ta ake tə nəɲyənə ti-ε?» Nəloku kə: «Bawo Mariki efan si. K'elip-ε, əjkə ndəkəl lukse si nnə.»

⁴ K'acepse a Yesu darəj aɲe ɲəjkə, kə ɲambəp səfale səfet nse pakot si dabanaka kumba kəsək dəpə, kə ɲasikəli si.

⁵ Afum aləma aɲe ɲanayi dənda mə ɲayif ɲa: «Cəke cə nəyi kəyə-ε? Ta ake tə nəɲsikəle səfale sasəkə-ε?»

⁶ Kə ɲaloku təkə Yesu ɲaloku ɲa mə, k'akakə ɲawose ɲa kəsikəli si.

⁷ Kə ɲəjkene Yesu səfale nse, kə ɲadenɲər si suma səɲan sakəron, kə Yesu endə si kəron.

⁸ K'afum alarəm ɲamper-pere kə suma səɲan sakəron dəpə, kə aləma ɲamboce kə bat dəpə nyə ɲanacep dəkulum mə.

⁹ Afum akə ɲanckət kə tekirin, kə akə ɲanacəme kə darəj mə ɲackule-kule:

«Hosana! * Kanu kəpocə pətət nwe enderene tewe ta Mariki mə!

¹⁰ Kanu kəpocə pətət dəbe da kas kosu Dawuda nde deyi kəder mə!

Hosana pələl peyi Kanu nke kəyi dəkəm mə!»

¹¹ K'emberə Yerusalem nde kələ kəpəj ka Kanu. Nte elip kəməmən cəsək cən mə, kə pibi pender, Yesu kə acepse ən wəco kə mərəj ɲawur kə ɲəjkə Betani.

Yesu ontolanə kətək pələc

¹² Dəckəsək nte ɲacwur Betani mə, dor dənayə Yesu.

¹³ K'ənəjk pəbələ kətək ka yokom ya fik kəkumptər bəpər, k'əjkə kəməmən kə pəyənə a əɲsətər ki pedi-ε, mba nte embəp ki mə, ɲanəjk fe pokom o pokom mənə bəpər, bawo bafə təm tokom ta fik tənayi.

* **11:9** Hosana = toloku ta kusu ka Arame tə, it'oloku «O Mariki, məyac su!» **11:9**
Yabura 118.25-26

14 Kə Yesu oloku kətək: «Ta fum o fum pədi sə yokom ya mənə!» Kə aɕɛpɛ ɔn darəŋ ɲane ti.

Yesu nde kələ kəpəŋ ka Kanu

15 Kə ɲaŋkə Yerusalem. Nte Yesu embere kələ kəpəŋ ka Kanu mə, k'eyefe kəbeləs acaməs fəp kə akə ɲancway dəndo kələ kəpəŋ mə. K'ɛŋgbaləs mɛsa ya asəkpər pəsam kə səcəm sa acaməs ntantoriya,

16 ɛnawosɛ fɛ nwe o nwe kəsare-sare ca pəcepərəne dəndo kələ kəpəŋ disre.

17 Kə Yesu ɛntəkse ɲa pəcloku: «Bafə Kanu kələku dəYecicəs: «Andewe kələ kem dəkətola Kanu da afum a tɔf ya doru fəp.» Mba nənə nənəkəfəli ki tɔgbəkene ta calbante.»

18 Alonɛ apəŋ kə atəkse sariye s'aSuyif ɲane kə dim, kə ɲantən təkə ɲantam kədif kə mə. ɲancnɛse kə, bawo cusu cənawos afum fəp teta mətəkse mən.

19 Nte dɔfɔy dəmbəp mə, Yesu kə aɕɛpɛ ɔn darəŋ ɲawur dare.

Yesu kə kətək kəwosərəne

20 Bətbət, nte ɲayi kəcepər mə, kə aɕɛpɛ ɔn darəŋ ɲanəŋk kətək ka fik kəwosərəne haŋ ntəntəl.

21 Kə Piyer ɛncəm-cəmne təkə tənacepər mə, k'oloku Yesu: «Wətəkse, məməmən kətək ka fik nke mənətolane pələc mə, kəwosərəne.»

22 Kə Yesu oloku ɲa: «Nəgbəkər kəlanɲ konu Kanu.

23 Kance icloku nu: Nwe ɔŋloku tərɔ tante: «Məyefe nnə məkə mələmnɛ dəkəba,» kə mənətnesər-nesər dəbəkəc, mba məlanɲ a təkə məloku mə tɛŋyi-ɛ, aŋyɔn'am ti.

24 It'ɔsəŋɛ nte iloku nu: Nte o nte tɔ nəloku kətola Kanu disre mə, nəlanɲ a nəŋsətɔ ti, aŋyɔne nu ti.

25 Kə tɔyɔne nəndetola, pəyɔne nəmɛŋke fum mətɛle-ɛ, nəŋaŋnɛne kə, nte tɔŋsəŋɛ Kas konu nke kəyi nde dəKəm mə, kəŋaŋnɛne sə nənə pələc ponu.

26 [†]

Deke dəbe da Yesu dəŋyefe-ɛ?

27 Kə Yesu ɲalukus Yerusalem kə aɕɛpɛ ɔn, nte ɲanckət nde kələ kəpəŋ ka Kanu mə, alonɛ apəŋ, atəkse sariye s'aSuyif kə abeki a dətɔf ɲander ɲabəp Yesu

28 kədɛyif kə: «Kətam kərə kə məŋyɔne mame-ɛ? An'ɔsəŋ əm kətam nke məŋyɔne mes mame mə-ɛ?»

29 Kə Yesu oloku ɲa: «Teyif tin gboŋ t'indeyif nu, nəluks'em ti, ina sə iloku nu kətam nke ɲyɔne mame mə.

11:17 Esayi 56.7 11:17 Yeremy 7.11 † 11:26 Yecicəs yokur yələma yendəŋər moloku mame: «Mba kə nənə nəntəŋaŋnɛne akə-ɛ, Papa konu nwe eyi nde dəkəm mə ɔfəŋaŋnɛne sə nənə kəciya konu.»

³⁰ Kəgbət dəromun ka Saŋ dəkəm kəncyefe ba, ka nda afum? Nəluks'em toloku.»

³¹ Mba kə ŋayefe kəgbəkəlene taŋan: «Kə səlukse ndəkəl a dəkəm kəgbət kən kənyefe-ε, eŋyif su: <Ta ake tə nənatəlanje Saŋ-ε?>

³² Kə səloku a nda afum kəncyefe-ε, apayo! Pəyə weywey dənda!» Nəncnese kənyay ka afum, bawo fəp fənacəre a Saŋ sayibe yati s'ənyəne.

³³ Kə ŋalukse Yesu moloku: «Səncəre fe.» Kə Yesu nkən oloku ŋa sə: «Ina sə, ifəloku nu kətam nke iŋyəne mame mə.»

12

Totubcene ta abəc ŋgbəŋkələ ya wən alec

¹ Kə Yesu eyefe kəlok-lokər ŋa dətotubcene: «Fum wələma ənabəf ŋgbəŋkələ ya wən. Kə fum nwe əsəne yi saŋka haŋ k'əŋəŋkər, k'əŋkay dəkəfəcəs da wi, k'əncəmbər tetek tobume. Nte elip mə, k'əŋəŋ yəbəc ya abəf ŋa ŋgbəŋkələ ya wən yayəkə afum aləma, ŋatəŋne kə akakə kəcsəŋ kə kəway, kə nkən owur k'əŋkə marənt.

² Nte tēm tepim tēmbəp mə, kə fum nwe osom wəcar nda abəf a ŋgbəŋkələ ya wən, kəkəbaŋ yokom ya wən yəkə pəmar pasəŋ kə kəway kən mə.

³ Kə abəc a ŋgbəŋkələ ya wən ŋasumpər kə, kə ŋasut, kə ŋasak, k'olukus waca wəsəkər.

⁴ Kə wəka ŋgbəŋkələ nwe osom sə wəcar wələma, kə abəc a ŋgbəŋkələ ya wən aŋe ŋasut sə wəkakə domp, kə ŋalapəs kə dəmələməs.

⁵ Kə mariki mme məŋgbəkəre sə kəsom wələma, kə abəf aŋe ŋasumpər wəkakə kə ŋandif. Abəc akanje ŋanasut alarəm, ŋacdif alarəm.

⁶ Wan kən nwe əmbətər mə, sona s'ənacəme kə oŋ. K'osom wəlpəs wəkakə nnə ŋayi mə, pəcloku: <Ŋaŋkələləs wəkawε, wan kem əfə!>

⁷ Kə abəc a ŋgbəŋkələ ya wən aŋe ŋalokene: <Wələk kən ke əfə, wəkawε! Nəder, padif kə, ke kəndeyəne kosu.>

⁸ Kə ŋasumpər kə, kə ŋandif, kə ŋaŋgbal kəbel kən saŋka tadarəŋ.»

⁹ Kə Yesu eyif ŋa: «Cəke cə wəka ŋgbəŋkələ endeyə-ε? Wəka ŋgbəŋkələ ender pədifət abəc akakə, pələk abəc aləma, pəsəŋ ŋa yəbəc ya ŋgbəŋkələ yən.

¹⁰ Nənakaraŋ fe Yecicəs Yosoku yayε ba?: <Togbu mpε acəmbər kələ ŋanace mə, pənader pəyəne oŋ togbu pətət, pa daco.>

¹¹ DəMariki tēyefe, tes tə nte tenciyanε su dəfər mə.»

12 Kə akirinj aSuyif ηafafj kəsumpər Yesu, mba kə ηanese kənay ka afum. Nənacəre a tetanjan tō Yesu enalokene totubcene tatəko. Kə ηasak Yesu, kə ηanjko.

Akirinj aSuyif ηafafj kəcəpe Yesu towul

13 Kə akirinj aSuyif ηasom nnə Yesu eyi mə aFarisi kə afum a Herodu aləma, nte tənşəne ηacəpe Yesu towul, ηasumpər kə dəmoloku mə.

14 Kə akakə ηander ηaloku kə: «Wətəkse, səncəre a məlomp, məfənesə kələsər tewe, məfəkiti fum tənəjk tən, dəpə da Kanu yati də məntəkse afum dəkance. Awa, sariye səwose su kəsəη Sesar* wəbe wəka təf ya Rom dut ba, ka ta səsəη kə di?»

15 Nte Yesu enacəre ηa kəyənə abanənə kəlomp mə, k'olukse ηa: «Ta ake tə nəηwakəs em-ε? Nəkər'em gbələη bin ba pəsam, ider iməmən.»

16 Kə ηanjkerə kə gbələη bin. K'eyif ηa: «Alulu ηa ana ηə ηaηe kə yecicəs yayε-ε?» Kə afum aηe ηaloku: «Ya Sesar wəbe wəka Rom yə.»

17 Kə Yesu oloku ηa: «Awa, nəsəη Sesar pəkə pəyənə pən mə, kə Kanu sə pəkə pəyənə pən mə.» Kə cusu cəwos ηa pəpəη tetən.

Teyif ta kəfətə afi dacə

18 K'aSadisi† aηe ηaloku a fum əfəyefə defi mə, ηander ηayif Yesu:

19 «Wətəkse, nte tə Musa enacice su: «Kə fum efi ta əyə wan, mba pəsak wəran-ε, pəmar wənc ka wəfi pələk wəcəbokəra wəkəkə pənence, pəsəη wənc wəfi yuruya.»

20 Awənc aηa camət-məerəη ηanayi. Kə wəcəkə-cəkə enence, k'efi esak fə yuruya.

21 Kə wəka məerəη enence, nkən sə k'efi esak fə yuruya. Itə pənayi wənc wəka maas,

22 ali wəkin awənc aηa akanə camət-məerəη enasak fə yuruya. Nte ηalip kəfis-fis mə, kə wəran sə efi.

23 Ti disre, kə dəsək dəyefə da afi dendebəp, an'endeyə wəran-ε? Bawə afum akanə camət-məerəη ηananence kə!»

24 Kə Yesu oloku ηa: «Nənəjk it'əsəηe nte nənciyane mə. Nəncəre fə Yecicəs Yosoku, nəncəre fə sə fənəntər fa Kanu.

25 K'afi ηandefətə afi dacə-ε, ηafəde ηacnencene, ηandeyi pəmə mələkə mme meyi Kanu kəsək mə.

26 Kəcloku a fum endefətə afi dacə, nəηkarəη fə buk ba Musa ba? Nte Kanu kənaloku Musa nde dəerəntəm mə: «In'əyənə Kanu ka Abraham, Kanu ka Siyaka, Kanu ka Yakuba!»

* 12:14 Sesar tewe tə, nte anasəη nwe o nwe ətəmpər dəbe da təf ya Rom mə.

† 12:18 ASadisi = kəgba ka afum aSuyif aηe ηancem-cəmmə a kəyefə defi kəyi fə, mələkə meyi fə, yəjk kə arkifin yeyi fə mə. Məməmən sə Asom 23.8 12:26 Kəwur 3.6

27 Bafə Kanu ka afi k'əyənə, mba ka ayi wəyəŋ. Nəna nəsolnə fə kance!»

Tosom təkə telele tetas mosom fəp mə

28 Kə wətəkse sariyə s'aSuyif wələma, nwe enane ŋa sim ŋacgbəkələne mə, enəŋk a Yesu olok-lokər ŋa belbel, k'ender pəcyif Yesu: «Tosom tere təkək dəkəcəmə mosom fəp dacə-ε?»

29 Kə Yesu oloku kə: «Tosom tayi təyənə: «Məcəŋkəl Yisrayel! Mariki, Kanu kosu sona gboŋ s'əyənə Mariki.

30 Məbətərə Mariki Kanu kam abəkək ŋam fəp, afəkəl ŋam fəp, məcəmcəmnə mam kə səkət sam fəp.»

31 Təcənc ta ti təyənə: «Məbətər wənc əm pəmə təkə məmbətərne mə.» Tosom tələma teyi fə nte təkək tetas mame mēŋə mə.»

32 Kə wətəkse sariyə nwe oloku kə: «Tentese, Wətəkse, məloku ti kance disre: A Mariki sona sən gboŋ s'əyənə Kanu, a wələma eyi fə kə pəntəyənə nkən-ε,

33 məbətər kə abəkək ŋam fəp, kə dosoku domp dam fəp, kə səkət sam fəp, məbətər wənc əm pəmə təkə məmbətərne mə. Mosom maməkə məyə dəkəcəmə metas yəcəl nyε ancəfə Mariki mə kə yoloŋne yələma fəp.»

34 Nte Yesu enəŋk a wətəkse sariyə wəkawε oloku təkə pəmar mə, kə Yesu oloku kə: «Məmbələ fə kəberε akip ŋa dəbε da Kanu dəntəf.» Ali fum enabəkne fə sə kəyifət kə toloku tələma.

Krist kə Dawuda

35 Yesu pəctəkse nde kələ kəpəŋ ka Kanu: «Cəke cə atəkse sariyə s'aSuyif ŋantam kələku a Krist‡ wan ka Dawuda gbəcərəm əfə-ε?

36 Amera Nəcempi ŋenasəŋe nkən Dawuda yati kələku nte: «Mariki Kanu oloku Mariki mem: «Məder mənd'em nno kəca kem kətət haŋ iclip kəboc aterene am wəcək wam dəntəf.»»

37 Nkən Dawuda yati ewe wəsom wəka Kanu «Mariki», cəke cə Mariki entam kəyənə wan ka Dawuda-ε?» Kənay ka afum alarəm kəncəŋkəl Yesu pəbotu disre.

Yesu oloku kənay ka afum kəkəmbərne ka atəkse sariyə

38 Yesu oncloku kənay ka afum dəmētəkse mən: «Nəkəmbərne atəkse sariyə s'aSuyif, ŋambətər kəcəcəne suma səpəŋ, pacyif ŋa kəyif kələl mofə mme ambəpsene mə,

39 pacsəŋ ŋa səcəm səkirin sa dəkətola Kanu da aSuyif, pacsəŋ ŋa dəkəndε d'abε mofə medi yeri dəcəsata.

40 Ŋacbaŋsər acəbokəra daka daŋan, ŋacbəlse sali nte təŋsəŋe pagbəkəre ŋa mə. Andəkəkiti ŋa kiti kəyəŋki.»

Kəpocε ka wəcəbokəra wətəyə daka

41 Dəndo kələ kəpən ka Kanu, Yesu pənde pətəfərne kaŋkəra, pəgbətnə nte kənay ka afum kəmbər ki pəsam mə. Aka daka alarəm ŋancbər ki pəsam pəlarəm.

42 Kə wəcəbokəra wətəyɔ daka wələma ender pəboc fəreŋk mēreŋ nfe fənapice dəkəcəmə mə.

43 Kə Yesu ewe acəpse ɔn darəŋ k'oloku ŋa: «Kance icloku nu: Wəcəbokəra wətəyɔ daka wəkawə ompoce pətəs akə fəp aŋe ŋamboc pəsam kaŋkəra disre mə.

44 Bawo, pecerne paŋan pə akə fəp ŋamboc, mba nkən, kətəyɔ kən daka disre omboc pəkə ɔyɔ gbəcərəm pedi mə.»

13

Yesu oloku a andelasər kələ kəpən ka Kanu

1 Nte Yesu owur kələ kəpən ka Kanu disre mə, kə wəcəpse kən darəŋ wəkin oloku kə: «Wətəkse, məməmən masar mēpat mətət, məməmən wələ wəpən wa kələ kəpən ka Kanu!»

2 Kə Yesu oloku kə: «Məŋnəŋk wələ wəpən wawə! Tasar pəfədedeŋse tasar kəron nno, mpe antədewuŋ mə.»

Pələc kə kətərəs

3 Nte Yesu endə nde tərɔ ta Tək ya Olif pətəfərne kələ kəpən ka Kanu mə, Piyer, Sak, Isaŋ kə Andəre ŋayefe kəyifət kə ŋabəkəre:

4 «Məloku su ake tem tə tatəkə tendeyi-ε? Tεgbəkəre tere tendementər kələre ka mes mamə məloku mə fəp-ε?»

5 Kə Yesu eyefe kəloku ŋa: «Nəkembərne ta fum o fum pəsəŋe nu kəsəle!

6 Afum alarəm ŋandeder ŋacbaŋene kəbəcə tewe tem, ŋacloku nu: «In'əfə, wəsom wəka Kanu!» ŋandetalər kənay ka afum alarəm.

7 Kə nəndene pacloku teta kəwan kə pəyənə fe ti, pacfor teta ki-ε, ta nənese! Mene mes maməkə meyi, mba təfədeyənə kərəsna kəlip ka doru de.

8 Bawo afum a atəf ŋələma ŋandeyefərəne kə afum a atəf ŋocuru, dəbe deyefərəne kə dəbe. Antəf kəyikce kə dor yendeyi mofə mələrəm. Maməkə fəp mendeyi pəmə kəcop ka pucuy pa dokombəra.

9 Nəkembərne nənasərka nte tentam kəbəp nu mə. Andekekəre nu dəŋkiti d'aSuyif, andesut nu dəkətola Kanu da aSuyif dəlarəm. Nəndeloku təkə nəncərə tetem mə akirin ŋa sədare səpən kə abe a təf ələma fər kirin.

10 Mene padəŋkər kərəsna Kibaru Kətət afum a təf ya doru fəp.

11 K'andekəkəre nu kəkəber ŋa dəwaca-ε, ta nənese təkə nəŋkəloku mə, mba nəloku təkə aŋkəsəŋ nu gbəncana babəkə mə, bawo bafə nən'endekəlok-loku, mba Amera Ŋecempi ŋa Kanu.

¹² Wənc wendekəsəŋ wənc padif. Tatəkə tə kas kəndekəsəyə wan kən. Awut ŋandekəcəmə akombəra aŋan dəbəkək, ŋasəŋ ŋa padif.

¹³ Fəp fəndeter nu teta tewe tem, mba nwe endebəkne ti haŋ mes maməkə melip mə, Kanu kəndeyac kə.»

Pəyikyik pələsar pəpəŋ mpə Mariki enter mə

¹⁴ «Kə nəndenəŋk pəyikyik pələsar pəpəŋ mpə Mariki enter mə, pənde nnə pəntəmar pi kəyi mə, a afum akə ŋandeyi Yude mə pəmar ŋayəkse ŋape mərə kəroŋ. Pəmar wəkaraŋ ka buk bambə pəcərə tantə!

¹⁵ Nwe eŋyi dabanjka mə, ta pəberə kələ kən disre kəkələk paka.

¹⁶ Nwe eŋyi dale mə, ta pəlucus nde ndərən kəkələk duma dən.

¹⁷ Pucuy pere pə tendeyəne abekəs, kə aŋe ŋande ŋacmēsər dəsək dadəkə mə!

¹⁸ Nətola Kanu ta pucuy papəkə peder dərəŋ.

¹⁹ Bawo mataka maməkə məŋyəne mataka ma kətərəs, nke kəntəyə kəwurene kəyefe nte Kanu kəlompəs doru mə haŋ ndəkəl, fum o fum afəsətərəs pəmə tatəkə.

²⁰ Mba Mariki Kanu pənətəbelər mataka maməkə-ε, k'ali fum əfdekəfis. Mba ənabelər mataka maməkə teta aŋe ənayək-yək mə.

²¹ Kə fum wələma oloku nu: «Məməmən: Krist eyi nnə,» «Məməmən: Eyi nde,» ta nəlaŋ wəkayi.

²² Bawo abarəne kəyəne Krist kə sayibe sa yem ŋandewur doru. Nade ŋacyə megbəkəre kə mes mēwey-wey nte təŋsəŋe, kə təyəne ŋactam-ε, ŋatalər akə Kanu kənayək-yək mə.

²³ Nəkembərne belbel, iloku nu mes mamə ta məntabər-ε!»

Kəder ka Wan ka Wərkun

²⁴ «Mba mataka maməkə, kə pucuy papəkə pencepər-ε, pəndeyə gbərəp, ŋof ŋəfədesəmar,

²⁵ cəs cəndetəmpəne kəyefe dəkəm, fənəntər fa kəm fəndeyikce.

²⁶ Awa, andenəŋk Wan ka Wərkun pəcder dəkəp kə fənəntər fəlarəm kə nərə da debeki dən.

²⁷ Endesom məleke ən dəməmpəmpə ma doru fəp kəloŋka ka aŋe ənayək-yək mə dəmoŋkubut maŋkəle ma dəkəm kə antəf.»

Kətəkse nke kətək ka fik kəsəŋ mə

²⁸ «Nətəkəs totubcəne nte kətək ka fik kəmentər mə: Kə wara wa ki wəcaŋk wələŋk-ε, nəcərə a kətən kələtərne.

²⁹ Nəna sə, kə nəndenəŋk mes maməkə mecder-ε, nəcərə a Wan ka Wərkun ələtərne yati.

³⁰ Kance icloku nu: Dətemp dandə dəfəcepər ta mes mame fəp meyi-ε.

³¹ Kəm kə antəf yendesəle, mba moloku mem məfədesəle.»

Fum o fum əfəcərə tem nte Mariki endeder mə

³² «Nte təyəne ta dəsək, kə pəyəne fe ti, ta tem nte doru dendelip mə, fum o fum encərə fe ti, ali mələke mme meyi dəkəm mə fəp, ali wan, mənə Papa sona gbəη εcərə ti.

³³ Nəkembərne, ta nədəηəs, bawo nəncərə fe tem nte tendeyi mə.

³⁴ Pəndeyi pəmə nte wərkun endekə marənt, pəsak kələ kən, pəsəη acar ən nwe o nwe yəbəc yən, pəsom wəbum kəkembərne kumba.

³⁵ Nəna sə nəkembərne, bawo nəncərə fe tem nte wəka kələ endeder mə: Tentam kəyəne dəfana, cəkcekana, dəsəkana kə pəyəne fe ti-ε bətbətana.

³⁶ Ta pəder pəbəp nu nəcdire.

³⁷ Tante inloku nu mə, inloku ti fəp, nəkembərne!»

14

Abə ηaseke Yesu tənəkəndəm

¹ Cəsata ca Kəcepər ka Mələke medif kə ka Cəcom cətəηəkəl lebin pəmar cəyi kə mata mərəη mencepər-ε. Aloηne apəη kə atəkse sariyə s'aSuyif ηancten kəsumpər Yesu cəpənpən disre, ηadif kə.

² Bawo ηancloku a ta pasumpər kə dəsək da kəsata, ta tedesəηe pəyamayama pedeyi afum dacə.

Wəran osop Yesu labundə dəromp

³ Nte Yesu ənayi Betani mə, ndena Siməη wəcunə sen, kə wəran wələma embere tetəηne ηacdi yeri. Wəran nwe pətəmpər təkəbə pa alabatər* pələre labundə da nar tēp, labundə deyenki kəway. K'osuncu təkəbə mpe, k'olonşər labundə nde fəp Yesu dəromp.

⁴ Kə pəntele afum aləma, kə ηayifne: «Ta ake tə eləsəre-ləsəre labundə dandə-ε?»

⁵ Anatam di kəcəməs han pəsam gbələη masar maas, pasəη pi atəyə daka.» Kə pəntele ηa nnə wəran nwe eyi mə.

⁶ Mba kə Yesu oloku: «Nəcə kə! Ta ake tə nəcəməne kə darəη-ε? Təyə tətət t'əyə nnə ina iyi mə.

⁷ Atəyə daka, ηayi nu dacə tem fəp, nəntam kəyəne ηa pətət tem nte o nte nəηfan mə. Mba ina, nəfədey'em tem fəp.

⁸ Ÿyə təkə entam mə. Onuηkəne kəsop im labundə kələmpəs ka kəbel kem a pacwup ki.

* **14:3** *Təkəbə pa alabatər* = Təkəbə mpe anclompse tasar prefer pəpat. Anwe tasar pətət mpe «alabatər».

⁹ Kance icloku nu: Nnə o nnə andedəŋk Kibaru Kətət doru dandə kərkər mə, aŋloku sə tɔyɔ tətət ta wəran wəkawə kəcəm-cəməs ka doru.»

Yudas efaŋ kəsəŋ Yesu abe a aloŋne

¹⁰ Yudas wəka dare da Keriyot, nwe enayi acəpse a Yesu darəŋ aŋe wəco kə merəŋ dacə mə, əŋkə pəbəp abe a aloŋne, nte təŋsəŋe pəber Yesu ŋa dəwaca mə.

¹¹ Nte aloŋne ŋancəŋkəl moloku mən mə, kə pəmbət ŋa, kə ŋaloku kəsəŋ kə pəsam. Yudas pəctən tɔyɔ nte endekəber Yesu ŋa dəwaca mə.

Yesu eyi kədi yeri ya Pak kə acəpse ən darəŋ

¹² Dəsək dəcəkə-cəkə da kəsata ka Cəcom cətənəŋkəl lebin, dəsək nde ancloŋne ŋkesiya ya Kəcəpər ka Mələke medif mə, kə acəpse a Yesu darəŋ ŋayif kə: «Deke məfaŋ səkolomp's'am yeri ya kəsata ka Kəcəpər ka Mələke medif-ε?»

¹³ Kə Yesu osom acəpse ən darəŋ merəŋ, k'oloku ŋa: «Nəko dare, nəŋkənəŋk wərkun pəsare apampə ŋa domun pəder, kədəfayne nu. Nəcəme kə darəŋ,

¹⁴ nde əŋkəberε mə, nəloku wəka kəlb: «Wətəksε oloku: Deke dəkəlb deyɔ nde indedi yeri ya kəsata ka Kəcəpər ka Mələke medif kə acəpse em darəŋ-ε?»

¹⁵ Endekəmentər nu dəkəlb dəpəŋ kəlb darenc, palompəs di belbel ca fəp yeyi di. Dəndo nəŋkolompse su yeri ya kəsata kaŋkə.»

¹⁶ Kə acəpse ən darəŋ ŋaŋkə, kə ŋambere dare, kə ŋambəp ca fəp pəmə təkə enaloku ŋa ti mə. Kə ŋalompəs yeri ya kəsata kaŋkə.

¹⁷ Kə dəfɔy dəmbəp, k'ender kə acəpse ən wəco kə merəŋ.

¹⁸ Təm nte ŋanandə dəməsa ŋacdi yeri mə, kə Yesu oloku: «Kance icloku nu: Wəkin nu dacə, nwe eyi kədi yeri kə ina mə, endeber im aterεne em dəwaca.»

¹⁹ Kəmənncne disre kə ŋayεfe kəyifət kə: «In'əfɔ ba?»

²⁰ Kə Yesu oloku ŋa: «Wəkin nəna akanε wəco kə merəŋ dacə, nwe səmber waca dap din disre kədi yeri mə.

²¹ Wan ka Wərkun endefi, pəmə təkə ancic ti mə. Mba pələc pere peyi wərkun wəkawε endeber Wan ka Wərkun aterεne ən dəwaca mə! Kənatəkom ka wərkun wəkawε kənatam kətesε kə!»

Mariki kəpaŋne kən yeri, kəpus kə acəpse ən

²² Nte ŋancdi yeri mə, kə Yesu elek kəcom, k'eyif Kanu barka, k'entepi ki k'əsəŋəs ŋa pəcloku: «Nəbaŋ, dis dem də.»

²³ K'elek sə təmbəl ta wən, nte elip kəyif Kanu barka mə, k'əsəŋəs ŋa kə ŋamun fəp faŋan.

²⁴ K'oloku ŋa: «Mecir mem mə, mme aloŋ teta kəcaŋəs danapa da Kanu kə kənay ka afum mə.

25 Kance icloku nu: Ifəsəmun wən haŋ dəsək nde indegbəkəre sə kəmun wi, nde dəbe da Kanu mə.»

26 Nte ŋalip kələŋəs melen mokor-kore Kanu mə, kə ŋawurne ntende kəca ka tərə ta Tək ya Olif.

Yesu oloku a Piyer endece kəcərə kən

27 Kə Yesu oloku ŋa: «Nəna akanje fəp nəndelukus im darəŋ, bawo Yecicəs Yosoku yoloku: ‹Indesut wəkək, ŋkesiya yeşamsər.›

28 Mba k'indefəte afi dacə-ε, indekəkar nu Kalile.»

29 Kə Piyer oloku kə: «Ali fəp fəlukus əm darəŋ, ina ifəlukus əm darəŋ.»

30 Kə Yesu oloku kə: «Kance iclok'əm: Pibi pampə yati, məndegbəkəl kəmaas a mənçərə f'em a kicipi kəccam tamerəŋ.»

31 Mba Piyer pəcgbəkəl ti pəpəŋ: «Ali səcfi kə mənə, ifəgbəkəl a incər'am.» Acepse a Yesu darəŋ akə fəp toloku tin tayi tə ŋancloku.

Yesu əsali Ketseməne

32 Kə ŋambəp kəfo nke aŋwe Ketseməne mə, k'oloku acepse ən darəŋ: «Nəndə nnə tēm nte inəkətola Kanu mə.»

33 K'elək Piyer, Sak kə Isəŋ. Kə kənese kəpəŋ kəncop kəsumpər Yesu kə abəkək ŋeləcə-ləce kə.

34 K'oloku ŋa: «Abəkək ŋenanəkanə kədenc'em pəmə ifi. Nəyi nnə, ta nədirə!»

35 Nte Yesu əmbələne ŋa pəpic mə, k'embəlkər kəcəp tobu dəntəf, k'ontola nte təŋsəŋe, kə tentam kəyi-ε, tēm tocuca tatəkə təbələ kə.

36 Pəcloku: «Aba, Papa, mən'etam mes fəp, məbələn'em təmbəl pa kətərəs pampə. Ti disre, bafə təkə ifəŋ mə de, mba nte mənə məfəŋ mə.»

37 Kə Yesu ender pəbəp acepse ən darəŋ ŋacdire. K'eyif Piyer: «Siməŋ, kədirə kə məndə ba? Məntam fe kətədirə ali dec din?»

38 Ta nədirə, nətola Kanu nte təŋsəŋe ta nəmbərə kəwakəs disre mə. Pəmbas mera yonu kəyə pətət, mba nəyə fe səkət kəyə ti.»

39 Kə Yesu əmbələ sə, pəcgbəkəre totola Kanu tin tatəkə.

40 Kə Yesu olukus, k'ender pəbəp acepse ən darəŋ ŋacdəŋəs, nte fər yənaləl ŋa mə, ŋanacərə fe toloku nte ŋanlukse kə mə.

41 Kə Yesu əŋgbəkəre sə kəder tamaas k'əŋgbəŋ-gbəŋər ŋa: «Nəndirə sə, kəŋesəm kə nəndə! Telip! Nəcəŋkəl: Tēm təmbəp, amber Wan ka Wərkun aciya dəwaca.

42 Nəyefe, pəŋkən, nwe eyi kəber im afum dəwaca mə, ələtərne.»

Asədar ŋasumpər Yesu

43 Yesu pəsərəlök-łoku, kə Yudas nwe enayi acəpse a Yesu aηe wəco kə mērəη daco mə, ender pəsölə kənay ka afum aηe ηanatəmpər-təmpər sakma, kə tək yosutnəne mə. Alonəne apəη, atəkse sariye s'aSuyif kə abeki ηanasom ηa.

44 Yudas nwe ençber Yesu aterəne ən dəwaca mə, enasəη asədar tēmənçə nte: «Nwe inəkəcup mə, nkən əfə wəkəkə. Nəsumpər kə, nəkekəre, nəgbəkəre kə belbel.»

45 Gbəncana babəkə kə Yudas ender, k'ələtərne Yesu, k'ewe kə: «Wətəkse,» k'oncup kə.

46 Kə afum akəkə ηantəpsər Yesu waca, kə ηasumpər kə.

47 Wəkin acəpse ən darəη daco owure dakma dən, k'ençep wəcar ka wəlonəne wəpəη aləηəs, k'əηgbinti ηi.

48 Kə Yesu oloku ηa: «Nəwur kədesumpər im, nətəmpər-təmpər sakma kə tək yosutnəne pəmə nte inyəne kalbante mə.

49 Dəsək o dəsək incyi nu daco ictəkse nde kələ kəpəη ka Kanu, ta nənder nəsumpər im-ε. Mba tatəkə tenyi nte təηsəηe Yecicəs Yosoku yelare mə.»

50 Kə asol ən fəp ηasak Yesu, kə ηayəkse.

51 Wətəmp wələma enacəmə Yesu darəη, pəgbalərne kəloto gbəcərəm. Kə ηasumpər kə,

52 mba wəkəkə enasalpər ηa, k'əsakərəne ηa kəloto kəηkə enəgbalərne mə, k'eyəkse pəwur fos.

Yesu fər ya aboc kiti apəη

53 Kə ηaηkekəre Yesu ndena wəlonəne wəpəη. Abə a alonəne fəp, abeki kə atəkse sariye s'aSuyif ηambəpsənə.

54 Piyer ençəmə ηa darəη, pəcəmən ti pəbələ, haη nde kələ kəpəη ka wəlonəne wəpəη, nde abəηka disre. Pənde kə abum, pəsaye nenc kəsək.

55 Alonəne apəη k'aboc kiti aSuyif fəp ηancten sede nse sənəkəbərηe ηa moloku məkə ηanakədeηe Yesu, nte təηsəηe padif kə mə, mba ηanasətə fə.

56 Afum alarəm ηançbonçə kə yem, mba yem yayəkə yonçsurənə fə.

57 Aləma ηaccop kəbonçə kə yem nyə:

58 «Səne kə pəcloku: «İndələsər kələ kəpəη ka Kanu kəηkə waca wa fum wolompəs mə, mata maas disre icəmbər kələma nkə waca wa fum wəntədəlompəs mə.»

59 Ali yem yayəkə yenasurənə fə kəyəne ka sede.

60 Kə wəlonəne wəpəη eyefe afum daco, k'eyif Yesu: «Məfəlukse su tələm o tələm ba? Cəke cə məηloku teta moloku ma sede mme akanə ηambonc am mə?»

61 Mba kə Yesu ençəηk, olukse fə toloku nte o nte. Kə wəlonəne wəpəη eyif kə sə: «Mən'əyəne Krist, Wan ka Kanu nkə aηkor-koru mə ba?»

⁶² Kə Yesu oloku: «In'əfə. Nəndenəjk Wan ka Wərkun pəndə kəca kətət ka Kanu nkə kəntam mes fəp mə, pəcder nəgə da debeki dən disre dəkəp ka dəKəm.»

⁶³ Kə wəlonne wəpənj ewali-wali yamos yən k'eyif: «Sede sərə sə pəmar payif-ε?»

⁶⁴ Nəne təkə əlməs Kanu mə. Cəke cə nəncəm-cəmnε-ε?» Kə fəp fəloku a pəmar padif kə.

⁶⁵ Kə afum əloma ηayefe kəyüksər Yesu lin, ηackump kə kəro, ηacsut kə ηkulma, ηacloku: «Awa Sayibε, məloku su an'osut əm-ε?» Kə abum ηambənj Yesu kə ηafərəs kə waca dəkəncə.

Piyer ence kəcərə Yesu

⁶⁶ Təm ntε Piyer ənayi tantəf nde sanja disre mə, kə wəcar wəyecərə wəkin wəka wəlonne wəpənj ender.

⁶⁷ Nte ənəjk Piyer pəcsayε mə, k'əngbətne kə, k'oloku kə: «Məna sə Yesu wəka Nasaret nənayi.»

⁶⁸ Kə Piyer əngbekəl ti pəcloku: «İncərə fε, incərə fε ntε məna məfan kəloku mə!» K'owur kəkəndε sanja tadarənj, nde dəkəberε. Kə kicipi kəncam.†

⁶⁹ Kə wəcar wəran nwe ənəjk kə, k'əngbəkərə sə ti kəloku akə ηanayi di mə: «Wələma əfə wəkawε sə.»

⁷⁰ Mba kə Piyer əngbekəl sə. Pəwon fε, aηe ηanayi di mə, ηaloku sə Piyer: «Səlanj ti, afum akanε wəkin məyənε, bawo məna sə wəka Kalile məyənε.»

⁷¹ Kə Piyer eyefe kəderəm: «Kanu kətərəs im kə pəyənε a kəyemε k'indε-ε! İnderəm a incərə fε fum wəkawε nəjle mə!»

⁷² Gbəncəna babəkə kə kicipi kəncam sə tamεrənj. Kə Piyer encəm-cəmnε toloku təkə Yesu ənaloku kə mə: «Məndegbekəl kəmaas a məncərə f'em a kicipi kəccam tamεrənj.» Kə Piyer eyefe kəbok.

15

Yesu fər ya Pilat kirin

¹ Nte bətbət bəmbəp mə, alonne apənj kə abeki, atəkse sariye kə aboc kiti əSuyif fəp, ηalonkanε kəkətənjne ntε andeyə Yesu mə. Nte ηalip kəkot kə mə, kə ηambər kə Pilat dəwaca.

² Kə Pilat eyif kə: «Mən'əyənε wəbe ka əSuyif ba?» Kə Yesu olukse kə: «Mən'oloku ti.»

³ Alonne apənj ηanatəmpərə kə meyemsənε mələrəm.

⁴ Kə Pilat eyif kə sə: «Məfəloku ntε o ntε? Məne mame ηambonc am mə fəp!»

⁵ Mba Yesu ənalukse fε kə sə toloku ntε o ntε, ti tənawosə Pilat kusu pəpənj.

Aηkiti Yesu kəfi

† 14:68 Yəgbəkərə ya yecicas yokur yələma yəyo fε: «Kə kicipi kəncam.»

⁶ Awa kəren o kəren kəsata ka Kəcepər ka Mələkə Medif, Pilat encsake afum yeŋən wəyi dəbili wəkin nwe ŋaŋfan mə.

⁷ Tem tatəko fum wələma enayi dəbili pacwe ko Barabas nwe anaber dəbili teta kədif fum, nte ŋanayefe kəyeŋkər abe a dətəf səbomp mə.

⁸ Ko kənay ka afum kəmpə, ko ŋayefe kəyifət a payəne ŋa təkə ambət kəyəne ŋa mə.

⁹ Ko Pilat eyif ŋa: «Isakəre nu wəbe wəka aSuyif ba?»

¹⁰ Bawo Pilat enacəre a kəraca ka alonəne apəŋ kənasəŋe ŋa kələk Yesu ŋaber ko dəwaca.

¹¹ Mba ko alonəne apəŋ ŋagbiŋər kənay ka afum, nte təŋsəŋe pasake ŋa yeŋən Barabas mə.

¹² Ko Pilat əŋgbəkəre sə: «Cəke cə nəfan a iyə nwe nəŋwe wəbe ka aSuyif mə-ε?»

¹³ Ko ŋayefe kəkule-kule: «Məcaŋ ko dətək yeɾəmpəl!»

¹⁴ Ko Pilat eyif ŋa: «Pələc pere p'əyə-ε?» Mba ko afum ŋanaŋkanə kəkule-kule pəpəŋ: «Məcaŋ ko dətək yeɾəmpəl!»

¹⁵ Ko Pilat encəm-cəmne kəyə tefan ta kənay ka afum: K'əsake ŋa yeŋən Barabas. Nte elip kəsom pasute Yesu tərəŋkən mə, k'ember ko afum dəwaca a pacan ko dətək yeɾəmpəl.

Asədar ŋafani Yesu

¹⁶ Ko asədar ŋaŋkekəre Yesu nde abanəka ŋa kələ kəpəŋ ka Pilat, ko ŋawe dəŋgbəŋk dadəkə fəp.

¹⁷ K'asədar ŋamber Yesu duma d'abe deyim, ko ŋandenər ko dəromp aŋgbəŋkələ ŋa bəŋk yodu.

¹⁸ Ko ŋayefe kəfani ko ŋacyif: «Iŋyif əm, wəbe ka aSuyif.»

¹⁹ Ko ŋasute Yesu domp kəgbo, ko ŋayukər ko lin, ŋanut suwu teta kəfani ko.

²⁰ Nte ŋalip kəfani ko mə, ko ŋawure ko duma d'abe deyim ko ŋamber ko yamos yən. Ko ŋaŋkekəre ko kəkəcaŋ ko dətək yeɾəmpəl.

Ancan Yesu dətək yeɾəmpəl

²¹ Ko asədar ŋawe fum wələma nwe enayefe dale mə, pacwe wəkayi Siməŋ wəka dare da Siren, papa ka Aleksandər ko Rifis, kəkəgbanəne tək yeɾəmpəl nyə anakə kəcaŋ Yesu mə.

²² Ko ŋaŋkekəre Yesu kəfo nke aŋwe Kolkota mə, itə tatəkə «Kəfo ka Kəmbəmbələ».

²³ Ko asədar ŋafan kəsəŋ Yesu wen wənəŋkəl acəl nŋe aŋwe «mir» mə, mba Yesu enawose fe wi kəmun.

²⁴ Ko asədar ŋancaŋ Yesu dətək yeɾəmpəl, ko ŋayerene yamos yən, ŋakote ti yampunəpun nyə nwe o nwe eŋkekəre nde ndəron mə.

²⁵ Walaha wenayi nte ŋancaŋ Yesu dətək yeɾəmpəl mə.

²⁶ Tecicəs nte tə ŋanacik kəmentər ka tes nte tənəsəŋe k'andif ko mə: «Wəbe ka aSuyif.»

27 Kə ɲancan Yesu dətək yepəmpəl kə calbante mērəŋ, wəkin pəyi kə kəca kətət, wəkə pəyi kə kəca kəmeriya.

28 [*]

29 Acepər ɲacləməs Mariki Yesu, ɲacfek kə domp. ɲacloku: «Məna nwe mənəkəli kələ kəpəŋ ka Kanu, məcəmbər sə ki mata maas disre mə,

30 məyacne mənasərka, mətor dətək yepəmpəl yaye!»

31 Aloŋne apəŋ kə atəkse sariye s'aSuyif, ɲa sə ɲancfani Yesu ɲacloku: «Enayac aləma, mba əfətam kəyacne nkənsərka!

32 Krist, wəbe ka Yisrayel pətor oŋ ma dətək yepəmpəl, nte təŋsəŋe sənəŋk səlan sə ti mə!» Afum akə anacəŋ kə Yesu mə, ɲancləməs kə sə.

Defi da Yesu

33 Pəndeyi dan, dec dosurenə afum dəsəbomp, kə kubump kəntor dəntəf fəp, tənabəle kətenc haŋ salifana.

34 Salifana səndebəp, kə Yesu oŋkule-kule: «*Eloyi, Eloyi, lema sabaktani?*» Itə tatəkə: «Kanu kem, Kanu kem, ta ake tə məsak'em-ε?»

35 Afum aləma akə ɲanayi di mə ɲanane kə dim. ɲancloku kəfətə disre: «Məcəŋkəl, Aŋnabi Eli eyi kəwe tatəkə.»

36 Kə fum wələma eyekse, k'əŋkə pəpuk yaŋgba dəməncəncə, k'ənepsər yi dəkəmotə, k'əsəŋ Yesu a pəmun, pəcloku: «Nəkar ma, pəməmən belbel kə təyənə a Eli endeder kədetore kə-ε.»

37 Mba kə Yesu owure dim dəpəŋ, k'əŋgbij kifir.

38 Kə kəloto kələl nke kəŋkəŋk təkə ta kələ kəpəŋ ka Kanu mə kəŋgbere daco, kəyefe takəroŋ haŋ tantəf.

39 Nte anəŋk Yesu kəgbij kən kifir mə, kə wəbe k'asədar wəRom nwe enayi di pətəfərne kə mə, oloku: «Fum wəkawe, Wan ka Kanu yati enayi.»

40 Aran sə ɲanacəme pəbəle ɲacməmən. Aran akanə daco: Mari wəka Makdala, Mari iya wəka Sak wəfet kə Yoses, kə wəran wələma nwe ancwe Salome mə.

41 Aran akakə ɲanacəme Yesu darəŋ, ɲacbəce kə nte enayi Kalile mə, kə aran alarəm aləma aŋe ɲanape kə nkən Yesu Yerusalem mə.

Ambər Yesu dəkufu

42 Dəfəy dəmbəp, mba nte pənayənə dəsək da kələmpəsne nte simiti dəsək da kəŋesəm mə,

43 wəka Arimate wələma nwe ancwe Isifu mə embəkne, k'əŋkə ndena Pilat kəkətola kə kəbel ka Yesu nte təŋsəŋe pəwup ki mə. Isifu, fum wəpəŋ enayi aboc kiti aSuyif daco, nwe kəder ka dəbe da Kanu kənabəs mə.

* **15:28** Yecicəs yokur yəkəkə-cəkə yələma yəyə fe moloku mame: «Tatəkə tə tecicəs tənamentərne, nte tənəloku: «K'ancəmbər kə calbante daco.» (Məməmən sə Luk 22.37 kə Esayi 53.12.) **15:34** Yabura 22.1

44 Kə pənciyane Pilat kəne a Yesu elip kəfi katəna. Kə Pilat ewe wəbe wəsədar k'eyif kə, kə təyənə a Yesu efina pəwon-ε?

45 Nte wəbe wəsədar oloku kə təkə tenayi mə, kə Pilat owosə Isifu kələk kəbel ka Yesu.

46 Kə Isifu əway arəfən ηa kəloto kətelər, k'ontore Yesu dətək yepəmpəl, k'ənepsər kə ηi, k'omboc kə dəkufu nkə anayək dətasar mə. Nte elip mə, k'embinəkəli tasar mpə enasuncə dəkəberə da kufu kanjko mə.

47 Mari wəka Makdala kə Mari, iya ka Yoses, ηacgbekərə nde kəfo nkə anaber kə mə.

16

Yesu kəfəte kən afi daco

1 Nte simiti dəsək da kəñesəm dencepər mə, dəcəkəsək sandeη, kə Mari wəka dare da Makdala, Mari iya ka Sak, kə wəran wələma Salome ηaway moro mobotu ambənc, kədesop mi kəbel ka Yesu.

2 Tataka ta sandeη bətbət suy, kə ηander nde dəkufu.

3 Nacyiftənə taηan: «An'əηkəbinjələ su tasar təkə asuncə dəkəberə da kufu mə-ε?»

4 Nandeyekti fər, kə ηanəηk tasar pəpəη papəkə pabinjəli pi.

5 Nte ηancberə dəkufu mə, kə ηanəηk wətemp wələma pəndə kəca kətət, pəberne duma dobolu defer, kə ηanesə.

6 Kə wətemp nwε oloku ηa: «Ta nənesε. Yesu wəka Nasaret nənten, wəkə anacəη dətək yepəmpəl mə. Əfəte afi daco, eyi fε nnə! Nənəηk kəfo nkə k'anaboc kə.

7 Mba nəkə nəloku acεpsε ən darəη kə Piyer a Yesu eyi nu kirinj kəkə Kalile: Difə nəηkənəηk kə, pəmə təkə enaloku nu ti mə.»

8 Kə aran aηe ηawur dəndo dəkufu kə ηayekse, ηacyikce, cusu cəwos ηa. Ali tes ηanaloku fε fum, bawo ηananesə.

Yesu ementərne Mari wəka Makdala

9 [Nte Yesu əfəte defi mə, bətbət ba tataka təcəkə-cəkə ta tataka toluksər, k'owurər kərəsna Mari wəka Makdala, wəkə Yesu enabeləs yəηk yelec camət-merəη mə.

10 Kə Mari wəka Makdala əηkə pəloku moloku maməkə akə ηanakə kə nkən, ηayi kəbal ka defi da Yesu, ηacbok mə.

11 Nte afum akanəηe ηanane a eyi wəyēη, a nkən Mari wəka Makdala enanəηk kə mə, ηanalaη fε ti.

Yesu ementərne acεpsε ən darəη

12 Nte tatəkə tencepər mə, kə Yesu ementərne sə teyi tələma acεpsε ən darəη merəη aηe ηanckə dəkulum mə.

13 Kə akakə merəη ηander sə ηaloku ti acεpsε a Yesu darəη alpəs akə. Nə sə, ηanalaη fε ηa.

Yesu ementərne acεpsε ən darəη aηe wəco kə pin

¹⁴ Təlpəs oñ, kə Yesu ementərne acəpse ən darəñ añe wəco kə pin, tem nte ɲacdi yeri mə, k'enal ɲa kəbut kəñan kəlan kə kəyənjk domp kəñan, bawo ɲanaləñ fe akə ɲananəñk kə nte enafətə afi dacə mə.

¹⁵ Kə Yesu oloku ɲa: «Nəkə doru dandə fəp, nəkə nəcam Kibaru Kətət nnə afum a doru fəp ɲayi mə.

¹⁶ Məna nwe məñyənə wəlan, məsətə kəgbət dəromun teta Kanu mə, anyac əm, mba məna nwe məntəlan mə, antərəs əm dəsək da kəkiti.

¹⁷ Nənəñk məgbəkəre mme mendesole añe ɲandeyənə alan mə: Tewe tem tendesəñe ɲacbeləs yəñk yelec. ɲande ɲaccəp cusu nce ɲanatəcərə mə.

¹⁸ ɲande ɲacsumpərə bok waca. Pəmun pəkəntəñ mpe o mpe pə ɲamun pəfəyə ɲa tələm o tələm. ɲande ɲacdeñ acuy waca, akakə ɲactammə.»

Yesu olukus Kanu kəsək

¹⁹ Mariki Yesu, nte elip kələk-lokər ɲa mə, k'ampene kə dəkəm, k'əñkə pəndə Kanu kəsək.]*

²⁰ Kə acəpse a Yesu darəñ ɲəñkə mofə fəp kəkəsamsər Kibaru Kətət. Mariki ençbəc kə ɲa, pəcsəñe dəməgbəkəre mme ɲancwure, pacləñ moloku maməkə.†

* **16:19** Yecicəs yecəpər yokur mərəñ, kə yələma nyə alan mə, yəyə fe moloku məlpəs ma kibaru kəñkə kəyefe sora 9 hañ 19. Moloku mame dəyecicəs yofu yəlpəs meyi. † **16:20** Moloku mme meyi fe Yecicəs Yosoku yokur fəp: «Mba pəpic pə ɲancloku asol a Piyer nte anasom ɲa kələku mə. Nte tencepər mə, Yesu nkənsərka osom ɲa kəkəkərə kawandi kəpus nke kəntəlip mə kəyefe nde dec dəmpə kəkə ka nde dəñkale mə, kəyac ka doru o doru nke kəntəlip mə. Amina»

Kibaru Kətət ka Luk

Kəberε ka kəcop moloku ma Luk

¹ Nte afum alarəm ɲancop kəlompəs ka mes mme menacepər su dacə mə,

² pəmō təkō akō ɲananəɲk mi dəkəcop, akō ɲanasom kəloku ka afum toloku ta Kanu mə.

³ Kələlās kam, Teyofil, itō pəwuren'em fō pəntesε ina sō, nte inten mi belbel kəyεfε dəkəcop mə. Awa, isəɲ'am mi kəcərə dəmecicəs pəmō təkō inatəkəs mi mə,

⁴ nte təɲsəɲε məcərə kance ka mes mme antəks'am mə.

*Mεleke moloku kədəkom ka Aɲnabi Saɲ**

⁵ Tem nte Herodu enayəne wəbε ka atəf ɲa Yude mə, wəloɲne ka Kanu wələma enayi pacwe kō Sakary, wəka kəgba ka aloɲne nke ancwenε wətem Abiya mə enayəne. Wəran kən pəwur dokom da Aruna, pacwe kō Elisabet.

⁶ Mεrəɲ maɲan fəp ɲanalomp fər ya Kanu kirin, ɲacəme sō dərō kō mosom ma Mariki fəp darəɲ pəmō təkō pəmar mə.

⁷ Mba ɲanayō fε wan, bawo Elisabet enayəne fε wəran wəkombəra, mεrəɲ maɲan fəp ɲanasikər.

⁸ Dəsək dələma Sakary pəcbəc yεbəc yən ya kəloɲne ka Kanu, bawo kəgba kəɲan kənəkō kətəmpər kəloɲne kəɲkō.

⁹ Pəmō təkō aloɲne a Kanu ɲanayō ti mə, k'anɲbal kōla†, kō kōla kəmentər Sakary dəsək dadəkō kəberε ka dəkəfo kəcempi ka kəlō kəpəɲ pəkəmotε Mariki curay.

¹⁰ Afum alarəm ɲanayi nde dabanɲka **ɲaclok-lokər Kanu** tem tatəkō ancmot curay mə.

¹¹ Awa, kō mεleke ma Mariki mowurər Sakary, mεcəme nde kəca kətət ka tetek nte aɲmotε Mariki suray mə.

¹² Nte Sakary enəɲk mεleke mme mə, kō pəyi kō yamayama, kō kənesε kəsumpər kō.

¹³ Mba kō mεleke mme moloku kō:

«Ta mənese Sakary,

bawo Kanu kələk kətola kam:

Elisabet, wəran kam, endekom'am wan wərkun

məde məwe kō tewe ta Saɲ‡.

¹⁴ Wan wəkakō endesəɲ'am kəyεkti domp pəbət əm sō mes, kəkōm kən kəndesəɲε afum alarəm kəselsər.

¹⁵ Bawo fum wəpəɲ endeyi fər ya Mariki kirin,

* **1:4** *Saɲ Batis* = «Yaya», itō «Saɲ, wəgbət afum dəromun teta kəsəkəs bəkəc yaɲan.».

† **1:9** *K'anɲbal kōla* = tatəkō tō ancyeke-yek wəloɲne aloɲne dacə nwe pəcmar kəberε kəfo kəcempi kəkəmotε Kanu curay nde kəlō kəpəɲ mə. Kō kōla kəmentər nwe Kanu kəfan mə. ‡ **1:13** *Saɲ* = «Yaya»

ɔfɔde pɛcmun member, ɔfɔde pɛcmun yomunɛs nyɛ yencisɛs mɔ,

endelarɛ **Amera Njecempi ŋa Kanu** pɛsɔrɔyi kɛrɛ dɔkor.

16 Endeluxe awut a Yisrayel alarɛm nnɔ Mariki, Kanu kɛŋan kɛyi mɔ.

17 Kanu kɛndesak Saŋ pɛyi Wɔbɛ kirin kɛderɛnɛ amera kɔ fɛnɔntɛr ya wɛdɛŋk wɛka Kanu Eli.

Endekafɛli bɛkɛc ya cas nnɔ awut ŋayi mɔ,

bɛkɛc ya atanɛ lɛŋɛs nnɔ kɛsɔk domp ka alompu kɛyi mɔ,

pɛlomɛs afum aŋɛ ŋandeyi kiyi ka Mariki tɛm fɛp mɔ.»

18 Kɔ Sakary eyif mɛlɛkɛ: «Cɔke cɔ indecɛrɛnɛ, a kance kɔ-ɛ? Bawo wɛtem iyɔnɛ kɔ wɛran kem sɔ embɛk.»

19 Kɔ mɛlɛkɛ mɔsɔŋɛ kɔ kɛcɛrɛ, mocloku kɔ : «Ina ɔyɔnɛ Yibirila nwɛ encɛmɛ Kanu fɛr kirin mɔ! Asom im kɛsom dɛm kɛdelok-lokɛr ɛm, ilok'ɛm toloku tɔtɔt tantɛ.

20 Mba nte mɛntɔlan moloku mem mɔ, mɛfɔdesɔtam kɛlok-loku haŋ dɔsɔk ndɛ tendeyi mɔ, tɛm nte Kanu kɛndefan mɔ.»

21 Nte afum fɛp ŋackar Sakary ndɛ dabanɛka mɔ, kɔ pɛnde pɛciyanɛ ŋa, bawo oncwon dɛndo kɛfo kɛcɛmpi.

22 Sakary endewur, ɛntam fɛ kɛlok-lokɛr ŋa, kɔ afum ŋancɛrɛ a Kanu kɛsɔŋɛ Sakary kɛnɛŋk tes tɔlɔma dɛndo kɛfo kɛcɛmpi disrɛ. Kɔ Sakary ɔyɔnɛ wɛtɔtam kɛlok-loku, k'ɛyɛfɛ kɛlok-lokɛrɛ ŋa waca.

23 Nte mataka mɔn ma yɛbɛc mencepɛr mɔ, k'olukus ndɛ kɛlo kɔn.

24 Pɛwon fɛ, kɔ wɛran kɔn Elisabɛt embɛkɛs. K'ɔŋgbɔpɛnɛ yof kɛcamɛt, pɛcloku:

25 «Nte tɔ Mariki ɔyɔn'em, ɛntɛp ɔŋ kɛdewosɛ kɛwur'em malap nnɔ afum ŋayi mɔ.»

Mɛlɛkɛ moloku kɛdekom k'Arŋnabi Yesu

26 Nte Kɛbɛkɛs ka Elisabɛt kɛsɔtɔ yof camɛt-tin mɔ, kɔ Kanu kɛsom mɛlɛkɛ mɔn Yibirila ndɛ dare dɔkɔ aŋwe Nasarɛt mɔ, atɔf ŋa Kalile,

27 ndena wan wɛran wɛtɔcɛrɛ wɛrkun, nwɛ ancwe Mari mɔ. Isifu wɛka dokom da Dawuda ɛncfac kɔ.

28 Kɔ mɛlɛkɛ mɛmbɛrɛ ndena Mari, kɔ moloku: «Pɛbɔt ɛm, mɛna nwɛ Kanu kɛmar kifɛli mɔ! Mariki osol'am!»

29 Kɔ toloku tatɔkɔ tɔsɔŋɛ kɔ pɛyi Mari yamayama. K'ɛyifnɛ nte kɛyif kanɛ kɛloku mɔ.

30 Kɔ mɛlɛkɛ moloku kɔ:

«Ta mɛnesɛ Mari, bawo mɛsɔtɔ kɛmar kifɛli nkɛ kɛyɛfɛ ndena Kanu mɔ.

31 Mɛnɛŋk fɛ! Kɛbɛkɛs kɔ mɛnder, mɛkom wan wɛrkun, mɛdɛ mɛwɛ kɔ tewɛ ta Yesu.

32 Fum wɛpɔŋ endeyi, pacwɛ kɔ wan ka Wɔbɛ wɛka darenc,

Mariki Kanu Kəpəŋ kəndesəŋ kə kəŋgbasar § ka dəbe da Dawuda, wətem kən.

33 Nkən endekekəre dəbe da doru o doru nnə aka dolom da Yakuba * ŋayi mə, dəbe dən dəfədelip.»

34 Kə Mari eyif mələke: «Cəke cə tatəkə tentam kəyi-ε, bawo incəre fe wərkun?»

35 Kə mələke moloku kə:
«**Amera N**ecempi **ŋa Kanu** ŋendeder əm, fənəntər fa Wəbe wəka darenc fəkump əm katəkəp kən.

Itə endesəŋe wan nwe andekom mə kəcemp, packule kə «Wan ka Kanu.»

36 Mənəŋk fe! Elisabet wəkomene kam, nkən sə embekəs wan wərkun detembəra dən disre. Nkən nwe anckule kətəkom mə, ŋof ŋən ŋa camət-tin ŋa kəbekəs ŋeyi ŋaŋe,

37 bawo Kanu kəfətarpenε tes o tes.»

38 Kə Mari oloku: «Kanu kəyən'em tatəkə mənəp kəcloku mə. Wəcar ka Kanu Kəpəŋ iyəne. Intola teyi pəmə tantε məlok'im ti mə.» Kə mələke mēyefe kə day kə mənəkə.

Mari kəkətəs ndena Elisabet pəkənəŋk kə

39 Mata maməkə, kə Mari eyefe kəkə katəna katəna dare da Yuda dələma, nde atəf ŋa dəməro.

40 K'əŋkə pəbere kələ ka Sakary, k'eyif Elisabet.

41 Elisabet endene kəne dəm kəyif ka Mari, kə wan εsep kə dəkor. Kə **Amera N**ecempi **ŋa Kanu** ŋelare katin Elisabet,

42 kə ŋəsəŋe Elisabet kəgbəŋe kəloku:

«Kanu kəmpoc'am pətət aran fəp daco,

43 Ak'iyəne nte iya wəka Wəbe kem endeder kəyif im mə?

44 Nte ine kəyif kam mə, kə wan εsep im dəkor pəbotu disre.

45 Pəbət nwe enalanə mə, bawo nte Kanu Kəpəŋ kənaloku kə mə tendeyi.»

Teleş ta Mari tokor-kore Kanu

46 Kə Mari oloku ŋ:

«İŋkor-koru Kanu Kəpəŋ kətam kem fəp, Kanu kəpocε pətət pokom pa kor kam!

47 Amera ŋem ŋelare pəbotu teta Kanu Kəpəŋ Wəyac kem,

48 bawo owosε kəgbal fər nnə ina, wəcar kən wəfəfər iyi mə.

Ey, kəyefe ndəkəl haŋ tēm fəp, afum ŋande ŋaclok'im a pəmbət im,

49 bawo Wəka fənəntər nwe əyən'em mes məpəŋ mə, tewe tən tencemp!

50 Kəbət ka Kanu amera kəŋyefe dεtemp kə dεtemp

§ 1:32 Kəŋgbasar = «dəcəm da dəbe», ti təyənε tegbekəre ta dəbe. * 1:33 Aka dolom da Yakuba = «afum aka Yisrayel»

akɔ ɲaleləs ki mə.

⁵¹ Kəmentər fənəntər fa kəca kən:

kɔ kəsamsər afum akɔ ɲanabək bəkək mə,

⁵² kɔ kəŋgbal abe apəŋ dəbe danjan

kɔ kəncəmbər afəfər kirinj.

⁵³ Kɔ kəsəŋe kənembərə pətət aŋe dor dənayɔ mə,

kɔ kəmbeləs akɔ ɲanayɔ daka mə waca wəsəkər.

⁵⁴ Kɔ kənder kədəmar aka Yisrayel, amarəs ən:

kəmpələrne fɛ kəmentər dobotu amera dən

⁵⁵ a Abraham kɔ yuruya yən ta doru o doru

—pəmɔ təkɔ enaloku ti atem asu mə.»

⁵⁶ Kɔ Mari ɲayi kɔ Elisabet haŋ yof maas, k'olukus nde ndərən.

Kəkom ka Aɲnabi Saŋ Batis†

⁵⁷ Kɔ tɛm tɛmbəp nte pənamar Elisabet pəkom mə, k'ɔŋkom wan wərkun.

⁵⁸ Ande ən kɔ akomene ən ɲane, a Kanu kəntore kɔ pəforu disre, kɔ pəmbət ɲa fəp faŋan.

⁵⁹ Tataka ta camət-maas ta kəkom kən, kɔ ɲander kədəkənc ka wan, kɔ ɲasəŋene kɔ tewe ta kas Sakary.

⁶⁰ Mba kɔ kere elək moloku, k'oloku: «Ala, Saŋ sɔ andewe kɔ.»

⁶¹ Mba afum ɲaloku kɔ: «Ali fum eyi fɛ dokom dam nwe aŋwe tewe tantɛ mə.»

⁶² Kɔ afum ɲayefe kəyifətɛ kas waca, tewe ta wan nte efan pawe kɔ mə.

⁶³ Kɔ Sakary ewe tabam, k'encic: «Saŋ sɔ andewe kɔ.» Kɔ pənciyane afum fəp.

⁶⁴ Kɔ kusu kən kəmepe katina, kɔ temer tən tɛyefe, k'eyefe kəkər-koru Kanu.

⁶⁵ Kɔ kənesɛ kəyi ande ən fəp, kɔ mes maməkɔ mɛmban atəf ɲa Yude fəp, pacyifətene mi.

⁶⁶ Nwe o nwe ene pacloku mi, tenyi kɔ dəbəkək, ɲacyifne: «Ake wan wəkəkɔ endeyəne ɔŋ-ɛ?» Kɔ fənəntər fa Kanu Kəpəŋ fəncəme kɔ darəŋ.

Telɛŋ ta Sakary tokor-kore Kanu

⁶⁷ K'**Amera** Nəcəmpi **ɲa Kanu** ɲelare Sakary papa ka Saŋ, k'eyefe kədəŋk moloku mme Kanu kənasəŋ kɔ kəloku mə, pəcloku:

⁶⁸ «Inkor-kor'am məna Mariki, Kanu ka aka Yisrayel,

bawo kənder kəmar afum ən, kɔ kəmban ɲa.

⁶⁹ Kəwure su wəyac wəpəŋ,

dokom da Dawuda, wəmarəs kən.

⁷⁰ —Itɔ Kanu kənalok-loke cusu ca adəŋk ən acempi kəyefe nte pənawon mə—

† 1:56 Saŋ Batis, məməmən 1.6

71 kənasəŋ su temer kədəbaŋ su aterene asu dəwaca
kə kətam ka akə ŋantəfaŋe su pətət mə.

72 Itə kənamentəre amera ŋobotu ŋa ki atem asu,
kə kəncem-cemne **kəcaŋəs kəcempi kəŋan kəyi tes tin.**

73 Pəmō **kəderəm** kaŋkə Kanu kənaderme Abraham wətem
kosu, itə elase su ki,

74 a kə kəndebaŋ su aterene asu dəwaca-e,
kəndesəŋe su tem tatəkə packor-koru kə bəkac yoforu disre,

75 nte təŋsəŋe pakor-koru kə decempi kə dolompu disre fər yən
kiriŋ

kiyi kosu doru fəp mə.

76 Kə mənə wan kem, wədəŋk wəka Wəbe wəka darenc ə
andew'am.

Mənə endeyi Mariki kiriŋ, məclompəs səpə sən.

77 Məkə məsəŋe afum ən kəcəre a Kanu kənder kədəyac ŋa,
kəŋaŋneŋe ŋa kiciya kəŋan.

78 Ey! Teta dərənc kə dobotu amera da Kanu kosu,
kəmot su pəwaŋkəra pa darenc, mpə powurene kə pəwaŋkəra
pa dec depeŋce mə.

79 Nte təŋsəŋe akə ŋayi kubump kə akə ŋayi katəkəp ka defi
dəntəf mə, ŋasətə pəwaŋkəra,

kəsolə su sə dəpə da pəforu.»

80 Kə wan embək, pəcsətə fənəntər fa amera. K'eyi dāndo
dətegbəre haŋ dəsək nde enamentərne nnə afum aka Yisrayel
ŋayi mə.

2

Kəkom ka Aŋnabi Yesu (Isa)

Mat 1.18-25

1 Mata maməkə mə, Okustu wəbe wəpəŋ wəka təf ya Rom fəp,
osom kələm ka afum aŋe ŋanayi dəbe dən dəntəf mə fəp.

2 Kələm kəcəkə-cəkə kaŋkə kənayi tem nte Okustu enacəmbər
Kurenayo, pəyənə wəbe ka atəf ŋa Siri mə.

3 Kə afum fəp ŋaŋkə kəsəŋne mewe nwe o nwe nde dare dən
dəpəŋ nde aŋkom kə mə.

4 Kə Isifu nkən sə empe kəyefe dare da Nasaret atəf ŋa Kalile
kəkə dare da Dawuda nde aŋwe Betlehem mə, bawo Isifu wəka
kələ kə dokom da Dawuda də enayənə.

5 Nte təŋsəŋe pəsəŋne tewe kə Mari, wəran nwe enfac mə,
wəkəkə pəbəkəs.

6 ŋanasəryi di, kə tem ta Mari tokom tembəp,

7 k'əŋkom wan kən wəcəkə-cəkə wərkun. K'əfəktər kə
dəkəloto, k'əŋkə pəboc kə dətaŋku nte ančere yəcəl yeri mə,
bawo ŋanasətə fe kəfo dāndo dəkarwaŋse.

Meleke ma Kanu mowurər akək yəcəl

⁸ Atəf ɲin ɲaɲəkə ɲenayə akək aɲe ɲanccəpərəne pibi dəkulum kəbum ka yəcəl yaɲan mə.

⁹ Kə mələke ma Kanu Kəpəɲ mowurər ɲa, kə **pəmot pa debeki da Kanu Kəpəɲ** pɲɲkel ɲa. Kə kənese kəpəɲ kəyi ɲa.

¹⁰ Mba kə mələke moloku ɲa: «Ta nənese! Bawo toloku tətət tə inder kədəloku nu, nte tendebətəs afum fəp bəkək mə:

¹¹ Məkə, nde dare da Dawuda disre, aɲkome nu wəyac, nwe əyone Wəbe, nwe Kanu kəyek-yek mə. *

¹² Nte tendeyone nu tenepəle taka ti: Nəɲkəbəp kənaka pafəktər ki dəkəlo, kəfəntərə dətəɲku nte ambere yəcəl yeri mə.

¹³ Gbəncana babəkə kə kənay ka mələke ma darenc kəmepne katina məcəkə-cəkə kəkər-koru ka Kanu, mocloku:

¹⁴ «**Debeki da Kanu** deyɲ darenc, bəkək yəfər akə ɲayi dəntəf ak'əmbətər ɲa mə!»

Akek kəkə kəɲan Bet Lehem

¹⁵ Nte mələke mesak ɲa kə məmpe darenc mə, kə akək ɲalokene: «Awa, pəɲkən haɲ Betlehem, pakə pəɲəɲk təkə teyi mə, nte Kanu Kəpəɲ kəsəɲe su kəcəre mə.»

¹⁶ Kə akək ɲambelkər kəkə, kə ɲaɲkə ɲabəp Mari kə Isifu, kənaka kəfəntərə təɲku pəbere pa yəcəl yeri.

¹⁷ Nte ɲalip kənəɲk ti mə, kə ɲaləm təkə analoku ɲa teta wan kakə mə.

¹⁸ Akə ɲanacəɲkəl moloku məkə akək ɲancləmər ɲa mə fəp, kə menciyanə ɲa.

¹⁹ Kə Mari eməɲkərne moloku maməkə fəp, pəcem-cemne mi dəbəkək.

²⁰ Kə akək ɲaluksərne sə nde ɲanayefe mə, **ɲaccam debeki da Kanu**, ɲanckor-koru Ki teta moloku məkə mələke menaloku ɲa, a kə ɲanəɲk sə mi mə.

Kəwure ka Aɲnabi Yesu doru

²¹ Nte kəkə kom ka wan kəsətə mata camət-maas mə, k'aɲkənc kə, k'awe kə Yesu, tewe nte mələke menaboncər ɲa, ta antabəkəs kə mə.

Kəmentər ka Aɲnabi Yesu nde kələ kəpəɲ ka Kanu

²² Nte mataka maɲan ma kəsəkəsne melip pəmə nte sariye sa Musa səloku ti mə, kə ɲaɲkəkəre kə Yerusalem kəkəmentər kə Wəbe Kanu.

²³ ɲanayə məyə məkə ancic buk ba sariye sa Wəbe disre mə: «Awut arkun acəkə-cəkə aɲe aran ɲaɲkom mə fəp, pəmar pasəɲ ɲa Wəbe Kanu ɲayone acempi.»

* **2:11** *Wəsom ka Kanu* = «Krist» tokule tə = «Nwe Kanu kəyek-yek kəsom mə».

24 Pəmar sə akombəra a wan wəkakə ɲalɔŋne Kanu «məpay mərəŋ, kə pəyənə fə ti-ε, ntantoriya yowut mərəŋ,» pəmɔ təkə aloku ti sariye sa Wəbε disrε mɔ.

25 Təm tatəkə fum wəlɔma ɛnayi Yerusalem pacwe kə Simeyɔŋ. Fum wəlompɔ ɛnayi pəcəmə dɔpɔ da Kanu darəŋ, pəckar nwe endeyac Yisrayel mɔ, **Amera Nəcempi ɲa Kanu** ɲenayi kə kəron.

26 Amera Nəcempi ɲaŋəkə ɲenasəŋε kə kəcərə, a ɔfɔfi ta ɛnəŋk Krist, wəbε nwe Kanu Kəpɔŋ kəyək-yək mɔ.

27 Kə **Amera Nəcempi ɲa Kanu** ɲəncɔŋəs kə, k'ɔŋkə nde **kələ kəpɔŋ ka Kanu**. Nte akombəra a Yesu ɲaŋkekərə kə kəkɔyɔnε kə təkə sariye səlɔku mɔ,

28 kə Simɔŋ ɛlɛk wan dəwaca k'eyif Kanu barka pəcloku:

29 «Wəbε, məntam ɔŋ kəsak wəcar kam pəfine abəkəc ɲoforu pəmɔ təkə mənalɔku ti mɔ,

30 bawo fər yem yati yɔ inəŋkε nte məyɔ kəyac ka afum am mɔ—

31 Nwe məlompəs afum fəp fər kirin mɔ—

32 endeyənε pəmɔ pəmot mpε pendesəŋ afum a tɔf ya doru fəp pəwanəkəra it'ɔŋsəŋε ɲacərə Kanu. Nwe endeyənε pələl pa afum am, aka Yisrayel.»

Siməŋ kəlɔku ka təkə Kanu kəndeyɔ mɔ

33 Kə pənciyənε akombəra a Yesu nte Siməŋ oncloku teta Yesu mɔ.

34 Kə Simeyɔŋ ontolanε ɲa, k'oloku Mari iya wəka Yesu: «Kanu kəŋkərə wan wəkawε kədesəŋε aka Yisrayel alarəm kətempnε, pəyekti sɔ alarəm. Paka pa Kanu pɔ mpε pendesəŋε afum kəgbəkələnε mɔ.

35 Endeber pəwanəkəra bəkəc ya akə ɲayɔ məcəm-cəmne məgbəpne mɔ. Kə mənə Mari, pəcuy pəndefut'am abəkəc pəmɔ təkə kəŋgbasar kəŋfutu mɔ.»

Wədəŋk wəka Kanu wəran Hana

36 Wədəŋk wəran wəlɔma ɛnayi pacwe kə Hana, wan ka Panuyel, wəka kusunka ka Aser. Wəran wəsikər ɛnayi. ɛnalɔ nda wərkun meren camət-mərəŋ kəyefε nte anagbaŋne kə mɔ.

37 Kə wos ende pəfi, k'eyi ɔŋ ta ɔyɔ wərkun-ε. Hana pəsɔtɔ meren 84 k'eyi, ta ɔmbɔlε **kələ kəpɔŋ ka Kanu**-ε pəcəc məfan ma Kanu dan kə pibi **kələk-ləkər Kanu** kə kəsun disrε.

38 Kə nkən ɔŋkə sɔ pəbərə di təm tatəkə Siməŋ oncloku teta wan pəckor-koru sɔ Kanu mɔ, pəcuyif Kanu nəwali, pəcloku teta wan akə ɲanckar Kanu kədeyac Yerusalem mɔ.

Kəlukus ka Nasarət

39 Nte akombəra a Yesu ɲalip kəyɔ ka məyɔ məkə aloku sariye sa Kanu Kəpɔŋ disrε mɔ, kə ɲalukus nde ndaraŋan Kalile, nde dare da Nasarət.

40 Awa, wan pəcbək, pəcsəto fənəntər. Pəlarə kəcərə kəkətene mes, kəmar kifəli ka Kanu kəyi kə kəronj.

Aḡnabi Yesu kəkə ka nde Kəlo kəpəŋ teren tən ta wəco kə merəŋ

41 Kəren o kəren, akombəra a Yesu ḡanckə Yerusalem kətəŋne kəsata ka aSuyif ka Kəcəpər ka Mələkə Medif.†

42 Nte Yesu əsəto meren wəco kə merəŋ mə, kə akombəra ən ḡasole kə kəkətəŋne kəsata ka Kəcəpər ka Mələkə Medif dəndo Yerusalem pəmə təkə ḡancyə ti kəren o kəren mə.

43 Nte mataka ma kəsata melip mə, kə akombəra a Yesu ḡasumpər dəpə kəlukuš ndaraŋan, mba kə wan Yesu nkən eyi Yerusalem, ta akombəra ən ḡancərə ti-ə.

44 Akombəra ən ḡanacəm-cəmne a Yesu ḡasol kə alukuš, kə ḡaŋkət tataka tin. Kə ḡantən Yesu akomene kə acərəne aŋan dacə.

45 Mba ḡananəŋk fe kə. Kə ḡaluksərne sə Yerusalem ḡacten kə.

46 Mata maas disre, kə ḡaŋkə ḡanəŋk kə nde **kəlo kəpəŋ ka Kanu** disre, pənde atəkse dacə pəcəŋkəl ḡa, pəcyifət ḡa moloku.

47 Aḡe ḡanccəŋkəl kə mə fəp, cusu cənawos ḡa dosoku domp dən, kə moloku mme onclukse ḡa mə.

48 Nte akombəra ən ḡanəŋk kə mə, kə pənciyane ḡa. Kə kere eyif kə: «Wan kem, ta ake to məyənne su tantə-ə? Papa kam kə ina, bəkəc yelecə-lecə su kəten kam!»

49 Kə Yesu eyif ḡa: «Ta ake to nəntən'em-ə? Nəncərə fe a mənə isumpər ye bəc ya Papa kem?»

50 Mba akombəra ən ḡanacərə fe tedisre ta toloku tatəkə.

51 Kə Yesu eyefe kə ḡasol kə akombəra ən kəkə ka Nasaret, bawo Yesu enaleləs ḡa. Kə iya kən emenḡərne debəkəc mes maməkə fəp.

52 Yesu pəcbərəne kəcərə kəkətene mes kətət, pəcnanḡane kəbək, pəcsəto kəmar kifəli ka Kanu kə afum.

3

Kawandi ka Aḡnabi Saḡ

Mat 3.1-12; Mark 1.1-8; Isaḡ 1.19-28

1 Teren ta wəco kə kəcəmət ta wəbe wəka atəf ḡa Tiber, tem tatəkə sə Pəŋse Pilat pəyənne wəbe wəka atəf ḡa Yude, Herodu nkən pəyənne wəbe ka atəf ḡa Kalile, wənc Filip pəyənne wəbe wəka təf merəŋ; nde Iture kə atəf ḡa Tirakoniti. Lisaniyas pəyənne wəbe nde atəf ḡa Abilen.

2 Tem ta aloḡne a Kanu apəŋ Hana kə Kayifa tenayi sə. Kə toloku ta Kanu tender Saḡ, wan ka Sakary, nde dətəḡbərə.

† 2:41 *Kəsata ka kəcəpər* = Kəsata kəpəŋ ka Yisrayel kə, nke kəncəm-cəməs ḡa təkə mələkə menclifət awut acəkə-cəkə a Misira a mecsak akəŋan mə.

³ Kɔ Saŋ ɔŋkɔt sɔdare fɛp nse sɔyi kɔŋgbɔkɔ ka Yurdɛn kɔsɛk mɔ, pɛckawandi kɔgbɔt afum dɛromun teta kɔsɛkpɛr bɛkɛc ɲacɛmɛ pɛlompu darɛŋ, nte tɔŋsɔŋɛ Kanu kɛdɛŋaŋnɛnɛ ɲa kiciya kɛŋan mɔ.

⁴ Pɛmɔ tɔkɔ ancic mi nde buk ba moloku ma sayibe Esayi mɔ:
«Fum wɛkɔ dim dɔn deyi kɛwɔr nde dɛtɛgbɛrɛ mɔ ɔfɔ:
Nɛlomɛs dɔpɔ da Mariki.

Nɛlomɛ sɔpɔ sɔn sa wɛcɛk!

⁵ Andelas mɔrɔ dacɔ fɛp,

mɔrɔ kɔ pɛŋɛci fɛp yendɛtɔr,

Sɔpɔ sɛnutɛsɛ fɛp sɛndelomp,

Sɔpɔ sɛcumbul-cumbul fɛp, andeyukur si,

⁶ Afum fɛp ɲandenɔŋk kɛyac ka Kanu.»

⁷ Afum alarɛm akɔ ɲancder nkɔn Saŋ pɛdegbɔt ɲa dɛromun teta Kanu mɔ, ɲɔ oncloku ti: «Nɛna aŋɛ nɔyi pɛmɔ ɲkisin mɔ! An'ɔsɔŋɛ nu kɛcɛrɛ nte aŋyɛksɛr kiti ka Kanu nkɛ kɔyi kɛder mɔ-ɛ?

⁸ Awa nɛde nɛcyɔ mɔyɔ mɔtɔt mɛmɛ mɛŋmɛntɛr a nɛsɛkpɛr mɛra kɔ nɛncɛmɛ pɛlompu darɛŋ mɔ. Ta pɛbɔt nu kɛcɛm-cɛmɛnɛ: «Abraham ɔyɔnɛ wɛtem kosu.» ɛy, icloku nu, nɛnɔŋk masar mamɛ ba? Kanu kɛntam kɛkafɛli mi mɔyɔnɛ awut a Abraham.

⁹ Nɛkɛl ɔŋ tomunt pɛlip kɛcɛmɛ kɛcɛp ka tɔk haŋ nde ntɛntɛl ya yi: Kɛtɔk nkɛ o nkɛ kɛntɔkom yokom yɔtɔt mɔ, ancɛp ki, palɛm dɛnɛnc.»

¹⁰ Kɔ cɔgba ca afum cɔyɛfɛ kɔyifɛt kɔ: «Cɛke cɔ sɛndeyɔ ɔŋ-ɛ?»

¹¹ K'oloku ɲa: «Mɛna nwe mɔŋyɔ suma mɛrɛŋ mɔ, mɛpɔcɛ wɛkɔ ɔntɔyɔ mɔ, mɛna nwe mɔŋyɔ yeri mɔ, mɛpɔcɛ wɛkɔ ɔntɔyɔ mɔ.»

¹² Kɔ abanɛs dut ɲander a Saŋ pɛgbɔt ɲa dɛromun teta Kanu, ɲacyifɛt kɔ: «Wɛtɛksɛ, cɛke cɔ pɛmar sɛdeyɔ ɔŋ-ɛ?»

¹³ K'oloku ɲa: «Ta nɛdɛŋɔr mɛpɛ o mɛpɛ antɔloku nu kɛban mɔ.»

¹⁴ Kɔ asɔdar ɲayif kɔ sɔ: «A sɛna-a, cɛke cɔ pɛmar sɔyɔ ɔŋ-ɛ?» K'oloku ɲa: «Ta nɛmɛntɛr nwe o nwe fɛnɔntɛr, ta nɛdɛŋɛ sɔ nwe o nwe yem, kɛway konu kɛtɔŋnɛ nu.»

¹⁵ Nte afum fɛp ɲanayi kɛkar mɔ, kɔ ɲaŋyifɛnɛ dɛbɛkɛc kɔ pɛyɔnɛ bafɔ Saŋ ɔyɔnɛ Krist, nwe Kanu kɛpɔŋ kɔyɛk-yɛk mɔ.

¹⁶ Kɔ Saŋ olukɛ ɲa: «Ina dɛromun ɲgbɔt nu teta Kanu de, mba wɛlɔma eyi kɛder nwe ɔyɔ fɛnɔntɛr pɛtas im mɔ, ali bɛnda ya cɔfta cɔn isɔtɔ fɛ yati dofum isikɛli ci. Wɛkakɔ, **Amera Nɛcɛmpi ɲa Kanu** disrɛ kɔ nɛnc yɔ ende pɛcgbɔt nu.

¹⁷ Pɛcɛmɛ dɛkur pɛtɔmpɛr kɛrɛbɛ dɛwaca pɛcgbɔp, pɛgbɛy mɛŋgbɛn mɔtɔt mɛmɛ endemɛŋkɛrnɛ dɛkɛlɛ mɔ, mba pɛcɔf fonta dɛnɛnc ndɛ dɛntɔnimɛ mɔ.»

18 Saŋ oncloku sɔ afum moloku mətət pəcyenɕəs ŋa sɔ bəkəc belbel.

19 Mba kɔ Saŋ enal wəbɛ Herodu teta Herodiyad, wəran nwe enabaŋər wenc k'enence mə, kɔ teta mes melec məkɔ Herodu enayɔ mə.

20 Kɔ Herodu ende pənaŋkanɛ kələsər: k'osumpər Saŋ, k'ember kɔ dəbili.

Kəsəkəs ka Aŋnabi Yesu

Mat 3.13-17; Mark 1.9-11

21 Nte afum ŋasɔtɔ kəgbət dəromun teta Kanu mə, kɔ Yesu nkən sɔ ɔsɔtɔ kəgbət dəromun. Eyi **kəlɔk-lokər Kanu**, kɔ kəm kəŋgbite,

22 kɔ **Amera Nəcempi ŋa Kanu** ŋontorər kɔ pəmɔ antantoriya. Kɔ dim dontor kəyefe dəkəm: «Wan kem məyɔnɛ nwe imbətər mə, mən'ɔbət im mes belbel.»

Akombəra a Aŋnabi Yesu

Mat 1.1-17

23 Yesu enasɔtɔ meren 30, a pədecop yebəc yɔn. Wan ka Isifu enayi pəmɔ tatakɔ anacem-cemne ti mə, wəka Heli,

24 wəka Matat, wəka Lewy,

wəka Melki, wəka Yannay, wəka Isifu,

25 wəka Matatijas, wəka Amɔs,

wəka Nahum, wəka Hesəli, wəka Nakay,

26 wəka Mahat, wəka Matatijas,

wəka Semeyin, wəka Yosek, wəka Yoda,

27 wəka Yohanaŋ, wəka Resa, wəka Sorobabel,

wəka Salatiyel, wəka Neri,

28 wəka Melki, wəka Adi, wəka Kosam,

wəka Elmadam, wəka Er,

29 wəka Yesu, * wəka Eliyɛsɛr, wəka Yorim,

wəka Matat, wəka Lewy,

30 wəka Simeyɔŋ, wəka Yuda, wəka Isifu,

wəka Yonam, wəka Eliyakim,

31 wəka Meleya, wəka Menna, wəka Matata,

wəka Natan, wəka Dawuda,

32 wəka Yisay, wəka Yobed, wəka Bɔs,

wəka Sala, wəka Nasɔŋ,

33 wəka Aminadab, wəka Admin,

* 3:29 Yesu = ceHebərə «Yosuwe»

wəka Arni, wəka Hecəronj,
wəka Perεc, wəka Yuda,
34 wəka Yakuba, wəka Siyaka, wəka Abraham,

wəka Terah, wəka Nahor,
35 wəka Seruk, wəka Rehu, wəka Pεlek,
wəka Heber, wəka Sala,

36 wəka Kayinan, wəka Arpaksad,
wəka Semy, wəka Nuha, wəka Lemεk,
37 wəka Metusela, wəka Henok,

wəka Yerεdu, wəka Mahalalel, wəka Kenan,†
38 wəka Enos, wəka Set,
wəka Adama, wəka Kanu.

4

Sentani kəfaŋ kəsəŋe Aŋnabi Yesu kəciya*
Mat 4.1-11; Mark 1.12-13

1 Kə Yesu ender kəyεε Yurdεn, pəlarε **Amera Nεcempi ŋa Kanu**. Kə Amera ŋeŋkekəre kə nde dətεgbərə,

2 nde Nəŋk Nεlec ŋenawakəs kəsəŋe kə kəciya mata wəco maŋkələ (40) disre mə. Ali paka εnadi fε mataka maməkə disre, nte mataka maməkə melip mə, kə dor dəyə kə.

3 Kə Nəŋk Nεlec ŋoloku kə: «Kə təyənε a Wan ka Kanu məyənε-ε, məloku ŋj tassar tantε təyənε kəcom.»

4 Kə Yesu oloku sentani: «Ancic ti dəbuk ba sariyε sa Kanu: «Bafə kəcom gbəcərəm kəŋsəŋe fum kəyi ka doru.»»

5 Kə sentani səmpənε kə sə tofo teŋeci kəronj, tεm tepic kə səmentər Yesu təf ya doru fəp.

6 Kə səloku kə: «Indesəŋ əm kətam fəp kə da təf yayε fəp, bawo anasəŋ im yi, ina sə ictam kəsəŋ yi nwe o nwe iŋfaŋ mə.

7 Awa, kə mənə məntontnən'em fər kirin-ε, yayε fəp yam yə yəŋyənε.»

8 Kə Yesu oloku sentani: «Ancic dəYecicəs yosoku: «Mariki Kanu kam pəmar məctontnənε fər kirin, nkən gbəcərəm pəmar məcsalənε.»»

9 Kə sentani səŋkekəre kə sə Yerusalem, kə səŋkə səcəmbər kə nde dətεlempən pa **kələ kəpəŋ ka Kanu** kəronj. Kə səloku Yesu: «Kə pəyənε a Wan ka Kanu məyənε-ε, məyoke ŋj ma nno dəntəf. Bawo dəYecicəs Yosoku ancicəs:

10 «Kanu kəndesom məlekε ŋn aŋε ŋande kəcbum əm mə.»

11 K'ancic sə: «Nəndetəmpər əm dəwaca nte təŋsəŋε ta məmpət tassar mə.»»

† 3:37 Kenan = ceKresi «Kayinam» * 4: Sentani = ceKresi «diyabolos» = «wəfor», itə wəbe wəka yəŋk yεlec, ŋj ŋəsəŋε afum kəciya, wəter ka Kanu wəcəkə-cəkə ŋə əyənε.
4:4 Sariyε 8.3

12 Kɔ Yesu oloku Sentani: «Ancicəs dəYecicəs Yosoku: <Ta məcəŋəs Mariki Kanu kam kəyɔ ka tes tɛwɛy-wɛy tən.»

13 Nte Njɔŋk ηelɛc ηelip kəwakəs Yesu kəciya mə, kɔ ηəmbɔlə kɔ haŋ tɛm tələma.

Aŋnabi Yesu kəcop ka yeβac yəŋ Kalile

Mat 4.12-17; Mark 1.14-15

14 Kɔ Yesu olukus Kalile kɔ fənəntər fa Amera ηa Kanu disre, kɔ tewe tən tɛsam dətɔf fəp.

15 Pəctəkɛ afum nde dəkətola Kanu daŋan, kɔ afum fəp ηaŋlələs kɔ.

Kəbeləs ka Aŋnabi Yesu nde Nasarət

Mat 13.53-58; Mark 6.1-6

16 Kɔ Yesu ender Nasarət nde anadusum kɔ mə. K'embɛrɛ dəkətola Kanu da aSuyif simiti, dəsək da kəŋesəm nde ampuse Mariki mə, pəmə təkɔ ɔncyɔ ti mə. K'eyɛfɛ kəkəkaraŋ dim dəpəŋ,

17 k'asəŋ kɔ buk ba wədəŋk wəka Kanu Esayi. K'emperi buk, k'embəp da ancic:

18 «Amera ηa Mariki ηey'im kəroŋ,

bawo Kanu kəyɛk-yɛk im

nte təsəŋɛ iloku afum atəyɔ daka toloku tətət mə.

Kanu kəsom im kədədəŋk kəyac ka acar aŋɛ asumpər dəkəwan mə.†

Ideloku atənəŋk a ηandenəŋk,

kədəkekərɛ aŋɛ ηayi kətam disre mə, bəkəc yoforu disre

19 kədədəŋk kəren ka kəmar nkɛ Kanu kəndənəŋnɛnɛ afum səbe nɛ ηantəmpər mə.»

20 Nte Yesu elip kəkaraŋ mə, k'ɛnɛp buk, k'əsəŋ bi wəmarəs nwe enatəmpər teta səbuk mə, k'əŋkə pəndɛ. Akɔ ηanayi dəkətola Kanu da aSuyif disre mə fəp kɔ ηaŋgbətne kɔ.

21 Kɔ Yesu eyɛfɛ kəlɔk-lɔkər ηa: «Məkɔ toloku tecic tatəkɔ nəne mə, telarɛ.»

22 Kɔ fəp fəmentər kɔ nte pəmbət kɔ nnɔ eyi mə, kɔ təkɔ pənciyane ηa moloku mətət mme moncwur kɔ dəkusu mə, kɔ ηaŋyiftɛnɛ: «Bafɔ wan ka Isifu ɔfɔ ba?»

23 Kɔ Yesu oloku ηa: «Incərə a nəndelok'im capafɔ nce: <Wətɛn cəl, mətaməsne mənəsərka!> Nəndesəlɔk'im: <Səne mes məkɔ mənɛpərənɛ Kaparnam mə fəp, məyɔ sɔ mes min mayi nnɔ aŋkom əm mə.»

24 Kɔ Yesu oloku ηa sɔ: «Kance k'indeloku nu: Ali sayibɛ afəsɛlɛnɛ belbel nde aŋkom kɔ mə.

† 4:18 Kədədəŋk kəyac ka acar aŋɛ asumpər dəkəwan mə kɔ pəyɔnɛ fɛ ti-ɛ, «Kədəloku acar kəsak kəŋan ηayi tɛfaŋ taŋan.» 4:19 Esayi 61.1-2

25 Kance kə kanʒe indesəloku nu mə: Aran aŋe awos aŋa ŋanafi Yisrayel mə ŋanala tɛm ta Eli, tɛm nte kəm kənaɣbətne meren maas yof camət-tin mə, a kə dor dəpəŋ dosumpər atəf mə.

26 Mba kənasom fe Eli nda nwe o nwe, mɛne nda wəran wətəɔ wələma, nde Sarepta nde atəf ŋa Sidəŋ.

27 Acune sen alarəm ŋanayi sə Yisrayel tɛm ta sayibe Elise. Mba ali wəkin ŋa dacə anasəkəs fe, mɛne Naman wəka Siri.»

28 Nte afum akə ŋanayi dəkətola Kanu da aSuyif, ŋanane moloku maməkə mə, kə mɛtele meyi fəp faŋan.

29 Kə ŋayefe kəbeləs kə kəwurene dare, kə ŋaŋkekəre kə nde tɔɔ teŋeci ta dare da Nasaret kəroŋ nde ŋanacəmbər dare daŋan mə, kəkəwen kə pətɛmpɛne.

30 Kə Yesu embere-bere ŋa dacə, k'əŋkə.

Fum nwe ŋəŋk ɲɛlɛc ɲɛnakafəli-kafəli mə

Mark 1.21-28

31 Kə Yesu ontor dare da Kaparnam atəf ŋa Kalile. K'əŋkə pəctəkse simiti, dəsək da kəŋesəm.

32 Cusu cənwos ŋa kətəkse kən, bawo moloku mən mənayo fənəntər.

33 Fum wələma enayi dəndo dəkətola Kanu da aSuyif, nwe ŋəŋk ɲɛlɛc ɲɛnayi mə, pəckule-kule pəpəŋ:

34 «Ta ake tə məmbereɛne mes mosu-ɛ, Yesu wəka Nasaret? Dəkələsər su mənder ba? Səncəre belbel nwe məyənə mə: Wəcempi wəka Kanu!»

35 Kə Yesu ɲɲgbəŋ-gbəŋər ŋi, pəcloku: «Məmɛp kusu! Məwur fum wəkawe dərɪs!» Kə ŋəŋk ɲɛlɛc ɲɛŋɣbal fum wəkakə dəntəf afum dacə, kə ŋowur kə dərɪs, ali pələc ɲɛnayo fe kə.

36 Kə cusu cəwos afum fəp, kə ŋayefe kəyifətɛne: «Ake toloku tə tantɛ-ɛ? Fənəntər kə kətam kən k'əŋlok-lokəre yəŋk yɛlɛc, yəcbəle ŋa.»

37 Kə tetən tɛsam məmpəmpə ma dətəf fəp.

Aŋnabi Yesu kətaməs kən acuy alarəm

Mat 8.14-17; Mark 1.29-34

38 Nte Yesu eyefe dəndo dəkətola Kanu da aSuyif mə, k'əŋkə ndena Siməŋ. K'əŋkə pəbəp iya wəka wəran ka Siməŋ pəcyikcɛne fiba fəpəŋ, kə akakə ŋayefe kələtsɛne Yesu a pəmar kə.

39 Kə Yesu entilsərne wəran nwe k'ɲɲgbəŋ-gbəŋər fiba fafəkə, kə fiba fəsək kə. Gbəncana babəkə kə wəran nwe eyefe k'eyerəs afum yeri.

40 Nte dec dɛŋkalɛ mə, aŋe ŋanayo acuy aŋe ŋanccune docu dɛyamayama mə, kə ŋaŋkɛne ŋa Yesu. K'endɛŋəsər ŋa waca fəp, kə ŋantamne.

⁴¹ Kɔ yɔŋk yɛɛc yolukus afum alarəm darəŋ, yockule-kule: «Mən'ɔyɔnɛ Wan ka Kanu!» Kɔ Yesu ɛŋgbəŋ-gbəŋɛr yi, ta oŋwose a yolok-loku-ɛ, bawo yenacəre a nkɔn ɔyɔnɛ Wəbe nwe Kanu kəyɛk-yɛk mə.

*Aŋnabi Yesu kəkawandi kən dəkətola Kanu da aSuyif
Mat 4.23; Mark 1.35-39*

⁴² Dec dendesək, kɔ Yesu owur k'ɔŋkɔ nde kəfo kəyer-yer kələma. Kɔ afum alarəm ŋawur kəten kɔ, kɔ ŋaŋkɔ ŋabəp kɔ dəndo kəfo kaŋkɔ. ŋanafan fɛ kəsak Yesu pəkɔ.

⁴³ Mba k'oloku ŋa: «Nəsak im ikədəŋk sɔ sədare sələma moloku mətət ma dəbe da Kanu, bawo itɔ anasom'em.»

⁴⁴ Kɔ Yesu ɛŋkawandi Kibaru Kətət dəndo dəkətola Kanu da aSuyif nde sədare sa Yude.

5

*Yesu kəwe acɛpse ɔn darəŋ acəkɔ-cəkɔ
Mat 4.18-22; Mark 1.16-20*

¹ Dəsək dələma, Yesu pəcəme agbɛp ŋa kəba ka Kenesaret, afum ŋamɛpne kɔ ŋaccəŋkəl toloku ta Kanu.

² K'ɛnəŋk dəndo kəba kəsək cibil mɛrəŋ, nce awent ŋanawur disre, ŋacyak manta maŋan mə.

³ Kɔ Yesu embekɛ abil ŋin disre, nŋe ŋenayɔnɛ ŋa Siməŋ mə, k'oloku kɔ a pəbəlɛnɛ agbɛp pipic. K'endɛ debil pəctəkse kənay kəŋkɔ kənacəme dəntɔf mə.

⁴ Nte ɛsak kələk-loku mə, k'oloku Siməŋ: «Məcɔŋne nde pəntukme mə, nəgbal manta monu nəsumpər lop.»

⁵ Kɔ Siməŋ oloku kɔ: «Wəkiriŋ, pibi pampɛ fəp səcgbal manta, mba ali paka səsɔtɔ fɛ. Mba nte məloku ti mə, kəgbal k'inder manta.»

⁶ Nte ɛŋgbal manta mə, k'osumpər lop yɛlarəm han kɔ manta moncop kəwale.

⁷ Kɔ ŋawe anapa aŋan akɔ ŋanayi abil ŋa mɛrəŋ ŋəkɔ disre mə, kədəmar ŋa. Kɔ akakɔ ŋander, kɔ ŋalas cibil cacəkɔ mɛrəŋ han cəcfan kəkale.

⁸ Nte ɛnəŋk tatəkɔ mə, kɔ Siməŋ Piyer ɛntɛmpɛnɛ Yesu wɛcək dəntɔf, k'oloku: «Wəbe, məbəl'em! Fum wəciya iyɔnɛ.»

⁹ Kɔ kusu kəwos kɔ, nkɔn kɔ akɔ ŋanayi mə fəp, teta lop yəkɔ ŋanasumpər mə.

¹⁰ Itɔ pənayi sɔ asol a Siməŋ, Sak kɔ Isan, awut a Sebede. Kɔ Yesu oloku Siməŋ: «Ta mənɛsɛ! Kəyɛfɛ məkɔ, afum ŋɔ mənde məcfɛkəs oŋ.»

¹¹ K'asumpər lop akakɔ ŋampɛnɛ cibil dɛgbɛp, kɔ ŋasak ca fəp, kɔ ŋancəme Yesu darəŋ.

*Yesu ɔsəkəs wətətamne
Mat 8.1-4; Mark 1.40-45*

12 Dare dɔlɔma dɔ Yesu enayi. Kɔ wɔrkun wɔlɔma nwe sen sɛnasumpɛr dis fɛp mɔ, ender. Nte enɛɲk Yesu mɔ, k'entɛmpɛnɛ dɛntɔf, k'encɔpɛ Yesu tobu, k'elɛtsɛnɛ kɔ: «Mariki, kɔ mɛfan ti-ɛ, mɛntam kɛsɔkɛs im.»

13 Kɔ Yesu entɛnc kɛca, k'ɔɲgbuɲɛnɛ kɔ, k'oloku: «Ifan ti, mɛsɔk!» Gbɛncana babɔkɔ kɔ sen sɛsak fum wɛkakɔ.

14 Kɔ Yesu oloku kɔ: «Ta mɛloku ti fum o fum, mba mɛkɔ mɛmentɔrnɛ wɔloɲnɛ. Mɛkenɛ kɔ poloɲnɛ teta kɛsɔkɛs kam pɛmɔ tɔkɔ Musa encic ti mɔ, tendeyɔnɛ afum fɛp kɛcɔrɛ a mɛntamɛ.»

15 Tewe tɔn tɛncsam kɛsam dɛm, afum alarɛm ɲaclɔɲkanɛ kɛcɛɲkɛl kɔ, kɛtɛn ka kɛtamɛs ka docu danan.

16 Mba kɔ Yesu owur afum dacɔ, k'ɔɲkɔ nde dɛtɛgbɔrɛ **dɛkɔlok-lokɔr Kanu.**

Yesu kɛtamɛs kɔn fum nwe enatɔtam kɛkɔt mɔ

Mat 9.1-8; Mark 2.1-12

17 Dɔsɔk dɔlɔma Yesu pɛctɔksɛ. AFarisi kɔ atɔksɛ a sariyɛ ɲandɛ. ɲayɛfɛ-yɛfɛ sɔdare sa tɔf ya Kalile kɔ Yude, kɔ dare da Yerusalem. Kɔ fɛnɔntɔr fa Kanu Kɔpɔɲ fɛyi kɔ Yesu, nte tɔɲsɔɲɛ pɛctamɛs acuy mɔ.

18 Kɔ afum ɲander, ɲagbaɲnɛ fum nwe efi wɛcɛk mɔ dɛpoko, ɲacɛp kɛbɛrɛ kɛkɔbɔc kɔ fɔr ya Yesu kirinɲ.

19 Nte dɛlay da afum dɔsɔɲɛ ɲa kɛtɔsɔtɔ dɛkɛbɛrɛ mɔ, kɔ ɲampɛsɛ kɛlɔ kɛrɔɲ, kɔ ɲanɲkɔ ɲafeni kɛlɔ darenc kɛfo kɛlɔma, kɔ ɲantɔrɛ wɛtɔkɔt nwe pɛyi dɛyala yɔn afum dacɔ, Yesu fɔr kirinɲ.

20 Nte Yesu enɛɲk kɛlanɲ kɛɲan mɔ, kɔ Yesu oloku fum nwe: «Wɔrkun, aɲanɲnɛn'am kiciya kam!»

21 Atɔksɛ sariyɛ kɔ aFarisi ɲayɛfɛ kɛcɛm-cɛmɛnɛ, ɲacyifɛnɛ: «Fum wɛrɛ ɔfɔ wɛkawɛ ɔɲlɔmɛs Mariki mɔ? An'entam kɛɲanɲnɛnɛ kiciya, kɔ pɛntɔyɔnɛ Kanu sona-ɛ?»

22 Kɔ Yesu encɔrɛ pɛcɛm-cɛmɛnɛ paɲan, k'eyif ɲa: «T'ake tɔ mɛcɛm-cɛmɛnɛ mame meyinɛ nu-ɛ?»

23 Mosom mɛrɔɲ mɔ mame, tosom tere tɔtɔcuca kɛloku: «Aɲanɲnɛn'am kiciya kam,» kɔ kɛloku: «Mɛyɛfɛ, mɛkɔt-ɛ?»

24 Awa indeyɔ nu tantɛ nte tɔɲsɔɲɛ nɛcɔrɛ a ina, Wan ka Wɔrkun, intɔmpɛr kɛtam nnɔ doru dandɛ kɛɲanɲnɛnɛ ka kiciya: Kɔ Yesu oloku wɛfi wɛcɛk, «Ilok'am: Mɛyɛfɛ! Mɛlɛk poko pam, mɛlukus nde ndaram!»

25 Gbɛncana babɔkɔ kɔ wɔrkun nwe eyɛfɛ fɔr yaɲan kirinɲ, k'elɛk poko pɛn, k'osumpɛr dɔpɔ kɛkɔ nde ndɔrɔn pɛckor-koru Kanu.

26 Kɔ cusu cɛwos afum fɛp, kɔ ɲa sɔ ɲayɛfɛ kɛkor-koru Kanu. Kɔ kɛnɛsɛ kɛyi ɲa, ɲaclɔku: «Sɛnɛɲk mɛkɔ nte sɛntatɔnɛɲk mɔ.»

Yesu kɛwɛ kɔn Lewy

Mat 9.9-13; Mark 2.13-17

27 Nte tatɔkɔ tencepɛr mɔ, kɔ Yesu owur k'ɛnɛnk wɛbanjɛs dut wɛlɔma, nwe ancwe Lewy mɔ, pɛndɛ nde anjɛbancan nja abanjɛs dut. Kɔ Yesu oloku kɔ: «Mɛɛps'em darɛj.»

28 Kɔ Lewy ɛsak mes fɛp, k'ɛyɛfɛ k'ɛncɛpsɛ Yesu darɛj.

29 Kɔ Lewy ɔnkɔ pɛboɛɛ Yesu kɛsata kɛpɔj nde ndɔrɔn. Abanjɛs dut alarɛm njanayi di, njandes-ndɛs dɛmɛsa kɔ afum alɔma kɔ Yesu.

30 aFarisi kɔ atɔkɛ sariyɛ s'aSuyif njaccɔpɛnɛ, njacyif aɛpsɛ a Yesu darɛj: «T'ake tɔ nɛndinɛ yeri, nɛcmunɛs kɛfo kin kɔ abanjɛs dut kɔ aciya-ɛ?»

31 Mba Yesu oloku nja: «Bafɔ atamnɛ njafan wɛtɛn cɔl de, mba acuy njafan kɔ.

32 Bafɔ alompu njɔ inder kɛwe, mba aciya, nte tɔnjɔnjɛ njasɛkpɛr bɛkɛc, njacɛmɛ pɛlompu darɛj.»

Yesu kɔ kɛsunj

Mat 9.14-17; Mark 2.18-22

33 Kɔ njaloku Yesu: «Aɛpsɛ a Sanj darɛj kɔ aFarisi, njansunj tɛm fɛp njaccɔpɛs, mba kɔ aka mɛna njandi yeri njacmun.»

34 Mba kɔ Yesu eyif nja: «Nɛntam kɛsɔnjɛ afum anjɛ awe kɛgbanjɛnɛ mɔ kɛsunj, njasɔrɔyi wɛfura kɛsɛk ba?

35 Dɔsɛk dɛndɛbɛp ndɛ njandɛgbɛyɛnɛ kɔ wɛfura mɔ, awa njandesunj dɔsɛk dadɔkɔ.»

36 Kɔ Yesu oloku nja sɔ capafɔ nɛɛ: «Ali fum ɔfɔwali kɛpɔl dɛkɛloto kɛfu kɛkɔfapɛrɛ yamos yɛmɛɛ-mɛɛ. Bawo tɔnjɔnjɛ kɛpɔl ka kɛloto kɛfu kanjɛkɔ ɛwali mɔ, kɛtɔmar yamos yɛmɛɛ-mɛɛ yayɔkɔ ɛfan kɛlompɛs mɔ.

37 Fum o fum ɔfɔbɛr wɛn wofu dɛtɔlɔba pa akata pokur. Kɔ mɛyɔ ti-ɛ, wɛn wɛnjɛwɛsɛli tɔlɔba, wɛn wolɔnjɛ. Mɛyi ɔnj mɛsɔtɔ fɛ tɔlɔba, mɛsɔtɔ fɛ sɔ wɛn.

38 Mɛbɛr wɛn wofu dɛtɔlɔba pofu!

39 Fum o fum omun wɛn wokur ɔfɔsɔfan wofu, bawo oloku: «Wokur wɛntɛnjɛ.»»

6

Ajnabi Yesu kɔ dɔsɛk da kɛnjɛsɛm ndɛ ampuse Mariki mɔ

Mat 12.1-8; Mark 2.23-28

1 Nte Yesu ɛncɛali dalɛ dɔsɛk dɔlɔma da kɛnjɛsɛm ndɛ ampuse Mariki mɔ,* kɔ aɛpsɛ ɔn darɛj njayɛfɛ kɛɛnjɔsuru sɛbomp sa mɛnjɛgbɛn njacsɛm.

2 Kɔ aFarisi alɔma njayif nja: «Ta ake tɔ nɛnjyɔnɛ nte Sariyɛ sɛntɔwɛsɛ kɛyɔ dɔsɛk da kɛnjɛsɛm mɔ?»

* 6:1 Simiti, dɔsɛk da kɛnjɛsɛm ndɛ ampuse Mariki mɔ sariyɛ sɛmɔnɛ aHebɛrɛ fɛp kɛbɛc tataka ta camɛt-mɛrɛnjɛ lokun o lokun. Difɔ anjɛwe simiti «simiti, dɔsɛk da kɛnjɛsɛm».

³ Kɔ Yesu eyif ɲa: «Nɛŋkaraŋ fɛ Yecicəs Yosoku disrɛ tɔkɔ Dawuda ɛnayo, nte dor dɛnayo kɔ, nkɔn kɔ akɔ ɲanasol mɔ ba?»

⁴—Nte Dawuda ɛnabərə kɛlɔ kɔpɔŋ ka Kanu mɔ, k'ɛlɛk cɛcom nɛ anclɔŋnɛ Kanu mɔ, k'ɔsɔm ci, k'ɔmpocɛ sɔ asol ɔn akɔ dor dɛnayo mɔ, mba alɔŋnɛ gbɛcərəm ɲɔ Sariyɛ sɛnawosɛ kəsɔm ci.»

⁵ Kɔ Yesu oloku ɲa: «Wan ka Wɔrkun ɔyɔnɛ mariki ma dɔsɔk da kɛŋesɔm ndɛ ampuse Mariki mɔ.»

Fum wɔfi kɛca

Mat 12.9-14; Mark 3.1-6

⁶ Kɔ dɔsɔk dɔlɔma da kɛŋesɔm ndɛ ampuse Mariki mɔ dɛndɛbɔp, kɔ Yesu ɔŋkɔ ndɛ dɔkɔtɔla Kanu da aSuyif pɛctɔksɛ afum. Wɔrkun wɔlɔma ɛnayi di pɛdɛmtɔr kɛca kɔtɔt.

⁷ Atɔksɛ sariyɛ kɔ aFarisi ɲaŋkɔkɛ Yesu belbel, kɔ pɔyɔnɛ a ɔŋkɔtaməs fum dɔsɔk da kɛŋesɔm ndɛ ampuse Mariki mɔ. ɲanayo ti nte tɔŋsɔŋɛ ɲasɔtɔ teyemsɛnɛ kɔ mɔ.

⁸ Mba Yesu ɛnacərə mɛcɛm-cɛmnɛ maŋan, k'oloku wɔrkun nwe ɛnadɛmtɔr kɛca mɔ: «Mɔyɛfɛ mɔcɛmɛ nnɔ afum dacɔ.» Kɔ wɔkɔkɔ ɛyɛfɛ, k'ɛncɛmɛ.

⁹ Kɔ Yesu eyif ɲa: «Icyif nu ma: Cɔkɛ cɔ Sariyɛ sɛwosɛ dɔsɔk da kɛŋesɔm ndɛ ampuse Mariki mɔ-ɛ? Kɔyɔ ka pɔtɔt ba, ka pɔlɛc? Pataməs fum ba, ka pace kɔ pɔfi?»

¹⁰ Awa, kɔ Yesu ɔmɔmɔn ɲa dɛcɔrɔ fɔp faŋan, k'oloku wɔrkun nwe: «Mɔtenci kɛca!» Kɔ wɔrkun nwe entenci ki, kɔ kɛca kɔn kɛntamɛ.

¹¹ Mba kɔ pɔntɛlɛ acicəs a sariyɛ kɔ aFarisi pɔpɔŋ, kɔ ɲayɛfɛ kɛgbɛkɛlɛnɛ tɛta pɔlɛc mpɛ ɲantam kɔyɔ Yesu mɔ.

Yesu kɔyɛk-yɛk Asom ɔn wɔcɔ kɔ mɛrɔŋ

Mat 10.1-4; Mark 3.13-19

¹² Tɛm tatɔkɔ, kɔ Yesu ɛmpɛ ndɛ dɔtɔrɔ kɛkɔsali, k'ɔŋkɔ pɔcɛpərənɛ pibi fɔp kɛlɔk-lɔkɔr Kanu.

¹³ Nte dec dɔsɔk mɔ, k'ewɛ acɛpɛ ɔn darɔŋ, k'ɛyɛk-yɛk ɲa dacɔ afum wɔcɔ kɔ mɛrɔŋ, aŋɛ ɛnasɔŋ tɛwɛ ta «asom» mɔ.

¹⁴ K'ewɛ Simɔŋ, nwe Yesu ɛnasɔŋ tɛwɛ ta Piyɛr mɔ, kɔ wɛnc Andərə, Sak, Isan kɔ Filip, Bartɛlɛmy,

¹⁵ Matiye, Tɔma, Sak wan ka Alfe, Simɔŋ wɔsimɛ tɛta atɔf,

¹⁶ Yude wan ka Sak, kɔ Yudas wɔka dare da Keriyot nwe ɛnader pɔlɔpsɔr kɛbɛr Yesu atɛrɛnɛ ɔn dɔwaca mɔ.

Yesu pɛctɔksɛ pɛctaməs

Mat 4.23-25

¹⁷ Kɔ Yesu ɲantor kɔyɛfɛ dɔtɔrɔ kɔ ɲa, k'ɔŋkɔ pɔcɛmɛ kɔfɔ kɔtɔŋnɛnɛ nkɛ acɛpɛ ɔn darɔŋ alarɔm, kɔ kɛnay ka afum alarɔm: Afum aka Yude fɔp, dare da Yerusalem, kɔ afum aka kɛba kɛsɔk ndɛ sɔdare sa Tir kɔ Sidɔŋ.

18 Afum akanɛ fəp ɲanader kədəcəŋkəl kɔ, pətaməsənɛ sɔ docu daŋan. Afum anɛ yəŋk yeɛc yəntɔrəs mɔ, ɲanatamne.

19 Afum fəp ɲacɛp kəgbuɲɛnɛ kɔ, bawo fənɔntər fəncwur kɔ nɛ fəntaməs acuy fəp mɔ.

Pətət kɔ pələc

Mat 5.1-12

20 Kɔ Yesu əməmən acɛpɛ ən darəŋ, k'oloku:

«Pəbət nu nənna atɔyɔ daka,

bawo nən'eyi akip ɲa dəbe da Kanu dəntɔf!

21 Pəbət nənna anɛ dor dɔyɔ tantɛ mɔ,

bawo nəndenɛmbərə!

Pəbət nu, nənna anɛ nəyi kəbok mɔ,

bawo nəndesell!

22 Pəbət nu kɔ afum ɲandeter nu-ɛ, ɲacbeləs nu, ɲacləməs nu, ɲacləsər nu mewe bawo nəlanɲ dim da «Wan ka Wərkun.»

23 Nəde nəwoləs kɔ dɔsək dadəkɔ dendeder-ɛ, nəyok-yokɛnɛ pəbotu, bawo kəpocɛ kəpɔŋ kəŋkar nu nde darenc. Tante tɔ atem anɲan ɲancyɔ adəŋk a Kanu.

24 Pələc peyi nu nənna anɛ nəyɔ daka mɔ!

Bawo nəlip kəsɔtɔ pənɛmpəsɛ ponu mpe pənamar nu kədəkɔsɔtɔ mɔ.

25 Pələc peyi nu nənna anɛ ca fəp yɛlar mɔ, bawo dor dendekɔyɔ nu!

Pələc peyi nu nənna anɛ nəyi kəsɛl mɔ,

bawo nəndekɔyi kəbal kɔ kəbok disrɛ!

26 Pələc peyi nu nənna anɛ afum fəp ɲandeloku pətət ponu mɔ, tante tɔ atem anɲan ɲancyɔ kɔ akɔ ɲanɛbaɲɛnɛ kəyɔnɛ Sayibɛ sa Kanu mɔ.»

Kəbətər ka anɛ ɲanter nu mɔ

Mat 5.38-48; 7.12

27 «Mba, ɲɲlɔku ti nənna anɛ nənɛcəŋkəl im mɔ: Nəbətər atɛrɛnɛ anu, nəyɔ pətət anɛ ɲanter nu mɔ!

28 Nətolanɛ pətət anɛ ɲantolanɛ nu pələc mɔ, nətolanɛ anɛ ɲaŋlɔməs nu mɔ!

29 Kɔ fum efer əm kəca dəkanca-ɛ, məcencɛ kɔ sɔ akanca ɲa mɛrəŋ ɲəkɔ. Kɔ fum ɛləkər əm burumus-ɛ, məce kɔ sɔ pələc duma dam.

30 Məpocɛ nwe o nwe ontol'am mɔ, kɔ fum ɛləkər əm paka mpe pəyɔnɛ pam mɔ, ta məwerəs kɔ pi.

31 Nəyɔnɛ afum təkɔ nəfaŋ a ɲayɔnɛ nu mɔ.

32 Kɔ təyɔnɛ nəbətər gbəcərəm akɔ ɲambətər nu mɔ, kəway kərə kɔ nəŋgbəkər sɔ mɛra-ɛ? Ali aciya ɲambətər anɛ ɲambətər ɲa mɔ!

33 Kɔ pəyɔnɛ a akɔ ɲaŋyɔnɛ nu pətət mɔ gbəcərəm ɲɔ məŋyɔnɛ pətət-ɛ, kəway kərə kɔ məntam kəgbəkər amɛra-ɛ? Ali aciya, bafɔ tatəkɔ tɔ ɲaŋyɔ pəmɔ nənna ba?

³⁴ Kə pəyənə a akə nəyɔ amera kədelukse nu mə gbəcərəm ηə nəntam kəbər-ε, kəway kərə kə nəna nəntam kəgbəkər amera-ε? Bawo ali aciya sɔ ηambər aciya nte tənɔnɔnɔ ηa kədəsətɔ pətəŋnənɔ payi mə.

³⁵ Nəbətər ater anu, nəbər ηa nəwure kəlukse debe dadəkə amera. Nəndəsətɔ kəpocɛ kəpən, nəyənə sɔ awut a Wəbɛ wəkə darenc, bawo Kanu kəntesɛ nnɔ apələrne pətət kə ayənki bəkək ηayi mə.

³⁶ Nəbət mera pəmɔ təkə Papa konu əmbət amera mə.»

Ta nəcin afum aləma

Mat 7.1-5

³⁷ «Ta nəcin fum, afəkəcin nu. Ta nəkiti akə nte tənɔnɔnɔ ta andəsəkiti nəna mə. Nəŋəŋnənɔ akə, andekəŋəŋnənɔ nu.

³⁸ Nəpocɛ, andekəpocɛ nu. Andekəbər nde yuba yonu yɔpən ya duma donu potubcɛ pətət, pasumpər, pasəŋk-səŋk, pələnər. Bawo potubcɛ mpe nəntubcɛ mə, ip'andekəsətubcɛ nu kəlukse nu kəway.»

³⁹ Kə Yesu olok-lokər ηa capafɔ: «Wətənəŋk entam kəkətənɔ wətənəŋk ba? Kə pəyənə fɛ ti-ε mɛrən məŋan fəp mə ηantempənɔ abi disrɛ.

⁴⁰ Ali wəcɛpɛ darən wəkin eyi fɛ nwe embek dəkəcəmɛ pətəs wətəkɛ kən mə, mba wəcɛpɛ darən nwe entəkɛ belbel mə, eyi pəmɔ wətəkɛ kən.

⁴¹ Ake'sənɔ nte məŋgbətne ayika nɔn ηeyi wenc əm dərəfər mə, mba ta məŋnəŋk təmbəŋk ta kətək mpe peyi mənasərka dərəfər mə-ε?

⁴² Pəlompu pə ba, kəloku wenc əm: «Wenc im məwosɛ a ilin əm ayika nɔn ηey'əm dərəfər mə,» mba dərəfər da məna dɔyɔ təmbəŋk ta kətək? Məna wəbənɔnɔnɔ kəlomp! Məlɔnɔnɔ kərəsna təmbəŋk ta kətək dərəfər dam, it'ənɔn'əm kənəŋk belbel ayika ηəkə məfan kəlɔn wenc əm dərəfər mə.»

Kətək kə yokom ya ki

Mat 7.16-20; 12.33-35

⁴³ «Kətək kətət kəfəkəkom yokom yelɛc, kətək kətətəmne kəfəkəkom yokom yətət.

⁴⁴ Kətək nkɛ o nkɛ kə, yokom ya ki y'ənɛpələ ki. Afəpim cəyabɛ† kə wen ‡ dəbənɔk.

⁴⁵ Fum wətət nde abəkək ηən ηətət ɛŋlɛk məyɔ mətət, kə fum wəlɛc nde abəkək ηən ηɛlɛc ɛŋlɛk məyɔ mɛlɛc. Bawo nte o nte kusu kəŋlɔku mə, ti teyi nde dɛbəkək.»

Wəlɔ mɛrən

Mat 7.24-27

† 6:44 Cəyabɛ = CəTabo «figue» ‡ 6:44 Pokom mpe pənkom nde Yisrayel, pi pəkə əŋfɔc kəsətɔ member mme əŋwe «wen» mə.

46 «Ta ake tɔ nɔŋwen'em <Mariki! Mariki!> ta nɔŋyɔ mes mɔkɔ iŋloku mɔ-ε?

47 Nwε o nwε eder im, pɔne moloku mem, pɔkɔt mi, imentɔr nu nwε oŋwurenε mɔ:

48 Owurenε fum nwε eyi kɛcɛmbɔr kɛlɔ pɔkay dɛntɔf haŋ pɔtukmε belbel, pɔcɛmbɔr kɛlɔ kɔn tasar teyenki kɔroŋ. Ali wɛcafɛn pɔtuf pɔlarɛm, mɛncaca mɛyekse, kɛlɔ kɔn kɛfɔtam kɛwunε, bawo anacɛmbɔr ki gbij.

49 Mba nwε o nwε ene moloku mem, ta oŋkɔtenε mi-ε, fum wɛkakɔ ŋawurenε kɔ nwε encɛmbɔr kɛlɔ kɔn katina dɛntɔf, ta eŋkay pɔtukmε pɔcɛmbɔr ki tasar kɔroŋ mɔ. Kɔ wɛcafɛn ontuf, mɛncaca mɛyekse-ε, kɛlɔ kaŋkɔ kɔŋwunε katina, kɛlɛε few!»

7

Aŋnabi Yesu kɔtamɔs kɔn wɛcar ka wɔbε ka asɔdar 100

Mat 8.5-13

1 Ntε Yesu elip kɛlok-lokɔr afum aŋε ŋancɛŋkɛl kɔ mɔ, k'embεrε dare da Kaparnam.

2 Dɛndo kɛfɔ kaŋkɔ, wɔbε k'asɔdar wɔRom wɛlɔma εnayo wɛcar nwε tetɔn tɛnayeŋk kɔ mɔ. Wɛcar wɛkakɔ εnatamnε fε, pɔcfɛŋ kɛfi.

3 Ntε wɔbε k'asɔdar nwε ene pacloku teta Yesu mɔ, k'osom abeki aSuyif alɔma, ŋakɔwenε kɔ Yesu pɛdetamɔsε kɔ wɛcar kɔn.

4 Kɔ abeki akakɔ ŋander ŋabɔp Yesu kɔ ŋalɛtsɛnε kɔ ŋacgbɔkɛrε, ŋacloku: «ɔyɔ dofum ndε pɛmar mɔyɔnε kɔ ti mɔ,

5 bawo wɔbε wɛkawε ɔmbɔtɔr atɔf ŋosu, nkɔn εnacɛmbɔr dɛkɔtola Kanu da aSuyif dosu.»

6 Kɔ Yesu oŋkɔ kɔ ŋa. ŋanabɔlɛnε fε kɛlɔ ka wɔbε wɔsɔdar, kɔ wɔsɔdar osom anapa ɔn kɛkɔloku kɔ: «Mariki, ta mɔtɔrɛsnε, bawo isɔtɔ fε dofum dɛfaynen'am nde kɛlɔ kem disrε.

7 It'ɔsɔŋε ntε inasɛrka intɔnakɔ nnɔ mɔyi mɔ. Mba mɛloku toloku tin, wɔbɔcε kem εntamnε.

8 Bawo ina wɛkawε yati abε em ŋ'iyi dɛntɔf, k'ina sɔ iyɔ asɔdar alɔma aŋε ŋay'im dɛntɔf mɔ. K'iloku wɛkin: «Mɛkɔ,» wɛkayi oŋkɔ. K'iloku wɛkɔ «Mɛdɛr,» wɛkayi ender. K'iloku wɛcar kem: «Mɔyɔ ntε-ε,» oŋyɔ ti.»

9 Ntε Yesu ene moloku mamɔkɔ mɔ, kɔ teta wɔsɔdar nwε tɛnciyɛnε kɔ. K'eŋkafɛlε, k'ɛntɛfɛrnε kɛnay k'afum akɔ ŋanacɛmε kɔ darɔŋ mɔ, k'oloku: «Icloku nu, ali nde Yisrayel inanɔŋk fε kɛlan pɛmɔ kaŋkɛ!»

10 Kɔ asom a wɔsɔdar nwε, ŋalukus ndɔrɔn. Kɔ ŋabɔp wɛcar nwε εnatɔ-tamnε mɔ, pɔtamnε kɛŋ.

Yesu ɔsɔŋε wɔfi kɛfɔtε

11 Nte telip mɔ, k'ɔŋkɔ dare nde ancwe Nayin mɔ. Atəkəs ɔn kɔ afum alarəm ŋanasol kɔ nkɔn kəkɔ.

12 Nte ŋalɔtərne kəberɛ ka dare mɔ, kɔ ŋambəpene kɔ afum ŋanckekərə fum wəfi dəkəwup, mba fum nwe sona gboŋ sɔ kere ɛnakom kɔ, wos pəfi sɔ. Afum alarəm a dare dadəkɔ ŋanckekərə wəfi wəkakɔ dəkəwup.

13 Kɔ Yesu ɛnəŋk wəran nwe, k'ɔyɔne kɔ nənɔfɔr, k'oloku kɔ: «Ta məbɔk!»

14 Kɔ Yesu ɔncɔŋne k'ɔŋgbuŋene kaŋkəra ka wəfi. Aŋe ŋanatəmpər kɔ mɔ ŋancəme. Kɔ Yesu oloku: «Wətəmp, in'olok'am: Məyefe!»

15 Kɔ wəfi eyefe k'ende, k'oncop kəlɔk-loku. Kɔ Yesu olukse wəfi nwe kere.

16 Kɔ fəp fənese, kɔ ŋayefe **kəcam debeki** da Kanu, ŋaloku: «Wədəŋk wəka Kanu wəpɔŋ eyefe su dacɔ! Kɔ Kanu kənder kəmar afum ɔn!»

17 Kɔ tɔyɔ ta Yesu tatəkɔ tesam atɔf ŋa Yude fəp, kəbər ka sədare səkɔ səŋkəl Yude mɔ.

Asom a Aŋnabi Saŋ

Mat 11.2-19

18 Kɔ aɛpse a Aŋnabi Saŋ darəŋ ŋaŋkɔ ŋaloku kɔ mes maməkɔ fəp. Kɔ Saŋ ewe aɛpse ɔn darəŋ dacɔ afum mɛrəŋ,

19 k'osom ŋa kəkɔyif Mariki kɔ pəyɔne nkɔn ɔyɔne nwe eyi kəder kədeyac afum a Kanu mɔ, kɔ tɔyɔne fe nkɔn-ɛ, pəmar pakar sɔ wəlɔma ba?

20 Nte ŋambəp Yesu mɔ, kɔ afum aŋe ŋayif kɔ: «Saŋ Batis osom su kədeyif əm: «Mən'ɔyɔne nwe eyi kəder mɔ, ka pəmar səkar sɔ wəlɔma ba?»»

21 Afum akakɔ anasom mɔ ŋaŋkɔ ŋabəp Yesu pəctaməs docu da atətamne alarəm, lanyiru, aŋe yɔŋk yeɛc yencəme darəŋ mɔ, k'ɔsɔŋe atənəŋk alarəm kənəŋk.

22 Kɔ Yesu olukse ŋa: «Nəkɔ nəloku Saŋ təkɔ nənəŋk kɔ təkɔ nəne mɔ:

Atənəŋk ŋanəŋk, atətam kəkɔt ŋaŋkɔt,

k'asəkəs acune sen, atone ŋane,

afi ŋafɔte, aŋkawandi Kibaru Kətət nnɔ atɔyɔ daka ŋayi mɔ.

23 Pəbɔt nwe ɔntɔdesak kəgbəkər im kəlan kɔn * mɔ!»

24 Nte asom a Saŋ aŋe ŋalokus mɔ, kɔ Yesu eyefe kəlɔku kənay ka afum teta Saŋ pəcyif: «Ake nənakɔ kəməmən nde dətəgbərə-ɛ: Fum nwe ɛfanɛ pəmɔ awo nŋe afef ŋeyikəc mɔ ba?

25 Mba anɔ nənakɔ ɔŋ kəməmən di-ɛ, wərkun wəsəkəp belbel ba? Mba nəcərə a asəkəp belbel nde wəlɔ w'abɛ wɔ ŋande pətət disre.

26 Mba anɔ nənakɔ ɔŋ kəməmən-ɛ, Sayibɛ ba? Ey, icloku nu, Saŋ encepər Sayibɛ fəp dəkəcəme.

* 7:23 kəsɔkɛ

27 Tetən t'ancicəs nde Yecicəs Yosoku disre: «Indekekəre wəsom kem fər yam kirinj pəkəlomps'am dəpə.»

28 Kə Yesu oloku: «İcəloku nu, ane aran nənkom mə fəp, ali wəkin eyi fe nwe encepər Saŋ dəkəcəmə mə. Mba nwe efete nde dəbe da Kanu dantəf mə, əyənə nwe encepər Saŋ dəkəcəmə mə.

29 Afum ane nənane kə kəlok-loku mə fəp, kəbər awerəs dut, kə nəwose dolompu da Kanu. Ti disre kə nəwose a Saŋ pəgbət nən dəromun teta Kanu.

30 Mba aFarisi kə atəkse a sariye nənawose fe nte Kanu kənafənə nən mə, kə nəfati a Saŋ pəgbət nən dəromun teta Kanu.

31 An'indetubcənə afum a detemp dandə-ə? Anə nəwurenə-ə?

32 Anə nənəwurenə: Nəwurenə awut ane nənandə kəfo nke afum fəp nənəbəsənə mə, a nənəwenənə kəkəloku: «Səfulanə nu luk, kə nənətpisə!»

Kə sələnsə nu melenə ma defi, kə nənətbok.»

33 Bawo nte Saŋ Batis, nwe enəgbət afum dəromun ənader mə, oncsun, ta onmun wən-ə, kə nəloku a əyənə nənə nələc!

34 Kə Wan ka Wərkun ender, pəcdi yeri pəcmun wən kə nəloku: «Wəcələk kə wəcis əfə, wanapa ka abənəs dut k'aciya!»

35 Mba awut a kəcərə kəkətənə mes ka Kanu nəwose dolompu da ki.»

Yesu nde kələ ka Simənə wəFarisi

36 Kə wəFarisi wələma ewe Yesu kəkədi yeri kə nkən. Kə Yesu emberə nde kələ ka wəFarisi wəkəkə, k'ənəkə pəndə aməsə kirinj.

37 Wəran wəciya wələma ənayi dare dadəkə, k'ene a Yesu nənəy kədi yeri nde kələ ka wəFarisi. Wəran wəkəkə elək təkəbə pə alabatər pəlarə labundə,

38 k'ənəkə pəcəmə Yesu kumunt darənə pəsumpər kə wəcək. K'eyefə kəbok pəccənəkəse mənəcər mən wəcək wa Yesu, k'efənətə wəcək wa Yesu cəfon cən, pəccup wi, pəclənəsər wi labundə.

39 Nte wəFarisi nwe ənawə Yesu nde ndərən, ənənəkə tatəkə mə, k'olokunə dəbəkək: «Fum wəkawə əyənə wədənək wəka Kanu-ə, k'encərə wəran nwe onəbuənə kə mə, fum nwe əyənə mə—Wəran wəciya.»

40 Kə Yesu elək moloku, k'oloku: «Simənə, iyə toloku tələma tolok'am.» Kə Simənə oloku kə: «Mələk'im ti, Wətəkse.»

41 «Wəbəs-bəsər wələma afum mənənə nənətpərəde debe: Wəkin nwe pətəmpərə kə gbeti mənəcəmbəl masar kəcəmət (500), kə wəka mənənə pətəmpərə kə mənəcəmbəl 50.

42 Mba nte wəbəs-bəsər nwe ənənəkə fə aləkər ən səbe nənəy fe gbeti boluksə kə mə, k'ənənənə mənənə mənənə fəp. Akəkə mənənə anə endənənəkənə kəbətər kə pətəs wəkə-ə?»

43 Kɔ Simɔŋ oloku kɔ: «Pəwuren'em, a wəkɔ enatəmpərə kɔ gbeti belarəm mə.» Kɔ Yesu oloku kɔ: «Gbes, məloku kance!»

44 Kɔ Yesu ɛŋkafələ k'entəfərne wəran nwe, k'oloku Simɔŋ: «Mənəŋk wəran nwe? Imberena nnɔ kəlɔ kam mba məsəŋna f'em domun ibikene wɛcək, mba nkɔn ɛncəŋkəsɛ wɛcək wem mɛncər mən, k'efɛŋtɛ wi cəfon cən.

45 Məncupna f'em, mba nkɔn kəyɛfɛ nte imberena nnɔ mə, a k'oncop kəcupəs im wɛcək mə, haŋ ndɛkəl itɔ eyi kəyɔ.

46 Məsopna f'em moro dərɔmp,† mba wəran wəkawɛ osop im labundɛ dəwɛcək.

47 Itɔ əsəŋɛ nte intam kəlɔk'əm a, kiciya kəlarəm nkɛ enciya mə, aŋaŋnɛnɛ kɔ ki, bawo nkɔn əmbətər pənaŋkanɛ. Məna nwe aŋaŋnɛnɛ pipic mə, pipic pɔ məmbətər.»

48 Kɔ Yesu oloku wəran nwe: «Aŋaŋnɛn'am kiciya kam.»

49 Afum aŋɛ ŋanandɛ amɛsa kirin kɔ nkɔn mə, ŋancop kəclockunɛ dəbəkɛ: «An'ɔfɔ wəkawɛ ɛŋaŋnɛnɛ ali kiciya mə?»

50 Mba kɔ Yesu oloku wəran: «Kəlan kam kəyac əm, məkɔnɛ abəkɛ ɲoforu.»

8

Aran aŋɛ ŋaŋsol kɔ Yesu mə

1 Nte tɛyɛfɛ dənda mə, kɔ Yesu ende pəckət sədare səpɔŋ kɔ səfɛt sa dətɔf fəp, pəckawandi pəcdəŋk Kibaru Kətɔt ka dəbɛ da Kanu. Ŋasol kɔ Asom ən wəco kɔ mɛrəŋ,

2 kəberɛnɛ ka aran alɔma aŋɛ enataməs docu da dis kɔ da yɔŋk yeɛc mə: Mari wəkɔ ancwe «Wəka Makdala» mə, nwe anabeləs yɔŋk yeɛc camət-mɛrəŋ mə,

3 Yohanna (wəran ka Cusa, wəlompəs ka mes ma kəlɔ disrɛ ka Herodu), Susan kɔ aran alarəm alɔma aŋɛ ŋancwure daka daŋan kəmar ka Yesu kɔ Asom ən mə.

Capafɔ ca wəbɔf

Mat 13.1-9; Mark 4.1-9

4 Kɔ kənay ka afum alarəm ayɛfɛ sədare səlɔma ŋamɛpənɛ kɔ. Kɔ Yesu oloku totubcɛnɛ nte:

5 «Nte wəbɔf owur kəkɔgbal defet dən mə, eyi kəgbal defet kɔ mɛŋgbɛn məlɔma mɛntɛmpɛnɛ dɔpɔ. Afum ŋacnas-nas mi, kɔ bɛmp yender yəsəm mi.

6 Kɔ mɛŋgbɛn məlɔma mɛntɛmpɛnɛ antɔf ŋa masar kəroŋ. Nte mompoŋ mə, kɔ mowos, bawo mɛnasɔtɔ fɛ pədəm.

7 Kɔ mɛŋgbɛn məlɔma mɛntɛmpɛnɛ dəbɛŋk, kɔ bɛŋk yompoŋ kɔ mɛŋgbɛn maməkɔ, kɔ yendi mi.

8 Kɔ mɛŋgbɛn məlɔma mɛntɛmpɛnɛ antɔf ŋɔtɔt kəroŋ. Nte maməkɔ mompoŋ mə, kɔ yɔŋkoməs, kɔ popoŋ mɛpɛ o mɛpɛ

† 7:46 Aka Yisrayel moro mə ŋancsop acikəra aŋan alɛl

ponkom menġben tasar tin (100).» Yesu oncloku toloku tatəko, pəcġbəŋe: «Məna nwe məŋyə ləŋəs yenene mə, məne ti!»

Ta ake tə Yesu oncloke totubcəne-ε?

Mat 13.10-17; Mark 4.10-12

⁹ Kə acəpse Yesu darəŋ ŋayif kə nte totubcəne tatəko toloku mə.

¹⁰ K'olukse ŋa: «Nəna ŋə Kanu kəsəŋe kəcəre kance kəġbəpne ka dəbe dən, mba kə akə dəmotubcəne aloku ŋa ki, ti təsəŋe nte: «Ŋaŋġbətne belbel mba ŋafənəŋk, ŋacəŋkəl belbel mba ŋafəcəre.»»

Yesu kəloku tedisre ta capafə ca wəbəf

¹¹ «Tedisre ta totubcəne tantə tentə: Defet, Toloku ta Kanu tə.

¹² Məŋġben mme məntəmpene dəpə daco mə, mi məyəne afum aŋe ŋaŋne mə, Ŋəŋk Ŋeɛc ŋeder ŋeliŋ ŋa dəbəkəc Toloku ta Kanu təkə enane mə, nte təŋsəŋe payaməsər ŋa kəlan ŋke kəntam kəyac ŋa mə.

¹³ Məŋġben məkə meyi kəfo ka masar mə, məyəne afum aŋe ŋanckənane Toloku ta Kanu, pəbət ŋa mə. Mba ŋayə fə ncənc,* ŋalan təm təloma, kə təm teyənki tender ŋa-ε, ŋasak ti few.

¹⁴ Məŋġben mme məntəmpene dəbən kə mə, mi məyəne afum aŋe ŋancəŋkəl Toloku ta Kanu, kə ŋalasərne mes məpəŋ mme mendi toloku tatəko mə: Məcəm-cəmne mələrəm, kəsətə ka daka kə məfan mobotu ma doru, məfəsəŋe ti kəkom yokom yololu.

¹⁵ Məŋġben mme meyi antəf ŋətət mə, afum ŋə aŋe ŋancəŋkələ Toloku abəkəc ŋətət ŋosoku, ŋameŋkərne ti, ŋacəme ti darəŋ mə, ŋa ŋaŋsəŋ yokom yətət.»

Totubcəne ta lamp

Mark 4.21-25

¹⁶ «Nwe o nwe əfəmot lamp a pəġbəpər di kəfala, əfəsəbersene di kəfənc dəntəf, mba endet di kədet dəm, nte təŋsəŋe aŋe ŋambere dəkələ mə, ŋanəŋkne pəwanəkəra.

¹⁷ Paka mpe o mpe pəŋġbəpne mə, andetam pi kənəŋk. Tes nte o nte aŋmən kə mə, andetam ti kəcəre, towur təyə afum wanəkəra.

¹⁸ Nəkəmbərne təkə nəncəŋkəl mə, bawo andekəberene wəkə əyə mə, pabelər wəkə əntəyə mə ali pəkə eŋġbekər amera kəyəne pən mə.»

Iya kə awənc a Yesu

Mat 12.46-50; Mark 3.31-35

¹⁹ Kə iya ka Yesu kə awənc ən ŋander ŋabəp kə, mba ŋanctam fə kələtərne kə nte afum ŋala mə.

* 8:13 Kəntəntəl, ntəntəl = «kəcənc», «ncənc»

20 K'anjko paloku Yesu: «Iya kam ko awenc om ana njancame nde dabanja, mana njafan kananj.»

21 Ko Yesu oloku: «Iya kem k'awenc im ana, njayone ane njancanjkel toloku ta Kanu njacame so ti daranj mo.»

Yesu kacambaras kon afef njororj

Mat 8.23-27; Mark 4.35-41

22 Dosok doloma ko Yesu embekede debil ko acerpse on daranj. K'oloku ja: «Pacali ntende kaba mokuru.» Ko njayekti abela kaka.

23 Njai kacali, ko Yesu endirorne. Ko afef njororj njeyefe kawur dakaba ko abil njefan kakale, ko naji dapawey-wey.

24 Ko acerpse on daranj njander natimi ko, njakule-kule: «Watakse! Watakse! Kafi ko sender!» Nte entime mo, k'eyefe kagban-gbaner afef ko yam yororj yoko yenayefe mo, ko yesak few. Ko poyo yen, ali tes ancne fe so.

25 Ko Yesu eyif ja: «Deke kalan konu kayi-e?» Nte njanese a ko cusu cawos ja mo, ko najifene ane ko ako: «An'ofa wakawe? Wakawe enjban-gbaner ali afef ko yam, yecame so tefan ton daranj mo!»

Yesu katamas ka fum nwe yorj yelec yenacame daranj mo

Mat 8.28-34; Mark 5.1-20

26 Yesu ko acerpse on njanko mokuru nde kulum ka Kerasa, nde pantefarene ko atof ja Kalile mo.

27 Nte Yesu owur debil mo, ko fum waloma waka dare dadoko ender pacame ko for kirin, nkon yorj yelec yelarom yenayi mo. Kayefe nte panawon mo, encberne fe duma, enayi fe dakalo, mene poyi nde cufu daco.

28 Nte fum nwe enanj Yesu mo, ko njorj yelec njosorje ko kakule-kule pororj, k'entempene Yesu wacak dantof, k'oloku pororj: «T'ake to mamberene mes mem-e, Yesu Wan ka Kanu nke kayi darenc mo? Iletsen'am ta mataras im!»

29 Fum wakako enaloku ti bawo Yesu oncloku njorj yelec nje njenabere fum wakako daris pawon mo kawur. Coko-coko, anckotarene fum wakawe gbekce dawecak ko afec njororj, mba onccoru yi, njorj yelec josole ko nekekare nde dategbare.

30 Ko Yesu eyif ko: «Cake co anw'am-e?» Ko fum nwe oloku Yesu: «Ina anwe «Kanan.» K'oloku ti bawo yorj yelec yelarom yenacame ko daranj.

31 Ko yorj yelec nye yeletsene Yesu kasak yi, ta pasorje yi kawur yoko dapajal-jal.

32 Awa, njanablene fe sor yelarom nye yoncsomat dando toro kororj mo. Ko yorj yelec yeletsene Yesu kace yi yebere dasop nye, ko Yesu owosene yi.

33 Kə yəŋk yełec yowur dəfum, kə yəŋkə yemberə dəsəp. Kə səp nyə fəp yontor kəyefə dətəwə, kə yəŋkə yotor dəkəba, kə yeŋgbətsə, kə yefis-fis fəp.

34 Nte akək səp aŋe ŋanəŋk ti mə, kə ŋayəkse kə ŋaŋkə ŋasamsərene toloku tatəkə dare kə aka sədare səkəsək.

35 Kə afum ŋander kəməmən təkə tenacepər di mə. Kə ŋander nnə Yesu eyi mə, kə ŋambəp fum wəkə yəŋk yełec yənwur dəriss mə, pəsəkəp pənde Yesu dəntəf, kə amera ŋən fəp, afum aŋe ŋanader kəməmən mə ŋanese.

36 Afum akə ŋananəŋk təkə tenacepər mə, ŋaləmər akə ŋanader kəməmən təkə anayac kə mə.

37 Kə afum a tətəf ŋa Kerasa fəp ŋaletsenə Yesu a pəyefə ndaranjan pəkə, bawo ŋananəŋkanə kənesə. Kə Yesu emberə debil, k'olukus.

38 Fum wəkə Yesu enalukse yəŋk yełec darəŋ mə, eletsenə Yesu a pətam kəce kə pəyi kə dəntəf. Mba kə Yesu ombupərə kə pəcloku:

39 «Məlukus nnə ndaram. Məkə məcloku afum təkə Kanu kəyən'am mə fəp.» Kə fum nwe ŋkə pəloku dare disre fəp mes məkə Yesu enayəne kə mə.

Wan wəran wəkə Sayirus, kə wəran wəkə enagbuŋenə yamos ya Yesu mə

Mat 9.18-26; Mark 5.21-43

40 Yesu kəlukus kən, kə afum ŋaŋkə ŋafayne kə, bawo fəp fəncəkər kə.

41 Tem tatəkə fum wələma enader pacwe kə Yayirəs, nwe enayəne wəbe ka dəkətola Kanu da aSuyif mə. Kə Yayirəs ontontne k'osumpər Yesu wəcək, pəclətsenə kə kəwosə kəder ka kələ kən.

42 Bawo enayə wan wəran wəkin gboŋ, nwe enasətə meren wəco kə mərəŋ mə, pəcfi. Nte Yesu eyefə kəkə mə, kə kənay kəməpnə kə haŋ ŋacyaməsər kə kəŋesəm.

43 Wəran wələma enayi di, pəyə docu da kəwur mecir tenasətə meren wəco kə mərəŋ ta pəncəmbərəs-ə. Wəran nwe enabərse daka dən fəp nnə atən cəl ŋayi mə, nte təŋsəŋe pataməs kə mə. Mba ali fum enatam fe kətaməs kə.

44 Kə wəran nwe ələtərne Yesu tadarəŋ, k'əŋgbuŋenə dobol da yamos yən. Gbəncana babəkə kə kəwur mecir kaŋkə kənayi kə mə kəsakə.

45 Kə Yesu eyif: «Anə ogbuŋen'em-ə?» Nte afum fəp ŋambupərə ti mə, kə Piyer oloku: «Wətəkse afum ŋaŋkəl əm waca nwe fəp!»

46 Kə Yesu oloku: «Fum wələma ŋgbuŋen'em, bawo incərə a fəntər fələma fəwur im dəriss.»

47 Nte wəran nwe encərə a Yesu encərə a fum ŋgbuŋenə kə mə, k'ender pəcyikse, k'entempənə Yesu wəcək dəntəf. K'oloku

afum fəp fər kirinj tes təkə tenasəŋe kə kəgbuŋene ka duma da Yesu mə, kə təkə docu dən denatamne gbəncana babəkə mə.

⁴⁸ Kə Yesu oloku kə: «Wan kem, kəlanj kam kəntaməs əm, məkəne abəkəc ŋoforu.»

⁴⁹ Yesu eyi kəlok-loku kaŋkə, kə fum wələma ender kəyefe ka ndena wəbe ka dəkətola Kanu da aSuyif da dare, k'ender pəloku: «Wan kam efi, ali məntərəs fe sə wətəkse kəkə di.»

⁵⁰ Mba Yesu enane fum nwe kəloku ka wəbe wəka dəkətola Kanu da aSuyif defi da wan kən, k'oloku wəbe nwe: «Ta mənese! Məlanj gbəcərəm, wan kam entamne.»

⁵¹ Nte ŋander dəker mə, Yesu owose fe fum kəberε kə nkən mēne Piyer, Isaŋ, Sak, wan wəran nwe kas kə kere gbəcərəm, ŋə enawose kəberε nnə wan wəran wəfi nwe eyi mə.

⁵² Kə afum fəp ŋambok ŋacləm pəcuuy paŋan tetən. Kə Yesu oloku: «Ta nəbok! Efi fe, kədire k'ende.»

⁵³ Kə afum ŋayefe kəfani Yesu, bawo afum aŋe ŋanacərə a wan wəran nwe efi.

⁵⁴ Kə Yesu osumpər wan wəran nwe kəca, k'oloke dim dəpəŋ: «Wan kem, məyefe!»

⁵⁵ Kə amera ŋən ŋoluksərne kə dərīs, gbəncana babəkə k'eyefe, kə Yesu oloku a pasəŋ kə yeri.

⁵⁶ Kə cusu cəwos akombəra aka wan wəran nwe, kə Yesu oloku ŋa a ta ŋələmər nwe o nwe nte tencepər mə.

9

Yesu osom acεpsε ən darəŋ wəco kə mērəŋ

Mat 10.5-15; Mark 6.7-13

¹ Kə Yesu ewe acεpsε ən darəŋ aŋe wəco kə mērəŋ, k'əsəŋ ŋa fənəntər fa kətam ka kəbeləs yəŋk yelεc fəp, kə kətaməs ka docu.

² Kə Yesu osom ŋa kəkədəŋk dəbe da Kanu, kə kətaməs ka acuy.

³ K'oloku ŋa: «Ta nətəmpərəne daka o daka teta dəpə, ta nətəmpər togbo, ta nətəmpər tələba, ta nətəmpər tocom, ta nətəmpər pəsam, ta nwe o nwe pətəmpər səburumus mērəŋ.

⁴ Kə nəndekəberε kələ nke o nkε-ε, nəyi di, difə nəndekəyefe a nəsumpər dəpə donu kəkə.

⁵ Nnə o nnə afum ŋantəkəwose nu kəyi mə, kə nəndewur dare dadəkə-ε, nəkoŋ-kəŋ wεcək wonu, it'endeyəne sede a ŋanabaŋ fe nu.

⁶ Kə asom aŋe ŋawur ŋackət sədare, ŋacdəŋk toloku tətət ta Kanu, ŋactaməs acuy mofə fəp.

Pəciyanε pa Herodu

Mat 14.1-12; Mark 6.14-29

⁷ Nte Herodu nwe enatəmpər dəbe Kalile ene mes mme menccεpər mə, kə pənciyanε kə, bawo aləma ŋancləku a Saŋ əfə, nkən əfəte afi dacə,

⁸ alōma ŋacloku, a Eli eder, alōma ŋacloku, a wədəŋk wəka Kanu wəcəkō-cəkō wəlōma oluksərne sō kəder.

⁹ Kō Herodu nkən oloku: «Inagbinti Saŋ domp! An'oyōne fum wəkawε anloku tetən mō-ε?» Kō Herodu efaŋ kənəŋk kō.

Yesu kəsəŋe ka afum wul kəcamət (5000) kənembərə
Mat 14.13-21; Mark 6.30-34; Isaŋ 6.1-14

¹⁰ Kō asom ŋander ŋalukse Yesu tōkō ŋanayō mō fəp. Kō Yesu elək ŋa kō ŋawurne kəsək, ntende dare da Betsayida.

¹¹ Kō afum ŋancərə kəwur kəŋan kō ŋancepse ŋa darəŋ. Kō Yesu owose ŋa kəder, k'əŋkō pəcloku ŋa teta dəbe da Kanu, k'entaməs sō aŋe ŋanatətamne mō.

¹² Nte dec dəyefe kəkale mō, kō acepse ɔn ŋalətərne kō ŋacloku: «Məyō ɔn məsak afum akaŋe ŋakō ŋatən dəkədire kō yeri nde sədare səcsək kō dəmadare məfet məfet mme meŋkel nnō mō, bawo dətegbərə ayi wəkawε.»

¹³ Kō Yesu oloku ŋa: «Nənasərka nəsoŋ ŋa yeri.» Kō acepse ɔn ŋayif kō: «Cəcom kəcamət kō lop mērəŋ gbəcərəm yō səyō, məfaŋ ɔn a səkō səwaye kənay kaŋke yeri ba?»

¹⁴ Mba afum aŋe ŋancbəp arkun wul kəcamət (5000). Kō Yesu oloku Asom ɔn: «Nəyō ŋa ŋaləŋkanε arkun wəcō kəcamət wəcō kəcamət (50-50).»

¹⁵ Kō asom ɔn ŋayō tōkō Yesu ɛnaloku ŋa kəyō mō, kō ŋandəs ŋa fəp.

¹⁶ Kō Yesu elək cəcom nce kəcamət kō lop nyε mērəŋ, k'eyeki fər darenc, k'eyif Kanu barka. Kō tēyefe dānda k'entepi cəcom nce a k'endesəŋəs ci acepse a ŋayerəs kənay kaŋkō.

¹⁷ Kō fəp fəsəm ci kō ŋanembərəε. Nte anawetəs yeri yeləpəs nyε mō, yenayō cəfala wəcō kō mērəŋ.

Piyer oloku a Yesu ɔyōne nwe Kanu kəyεk-yεk mō
Mat 16.13-19; Mark 8.27-29

¹⁸ Dəsək dəlōma Yesu **pəclock-lokər Kanu** taciŋa, acepse ɔn darəŋ ŋaləŋkanε kō kəsək. Kō Yesu eyif ŋa: «Toloku ta afum, anō iyōne-ε?»

¹⁹ K'acepse ɔn darəŋ ŋaloku kō: «Nte alōma ŋaloku mō, a Aŋnabi Saŋ məyōne, k'alōma ŋaloku a Eli məyōne, alōma a sayibe səlōma sō məyōne nwe eyefe afi daco mō.»

²⁰ Kō Yesu eyif ŋa sō: «Pεcεmεmne ponu, an'iyōne-ε?» Kō Piyer oloku Yesu: «Krist wəyεk-yεk wəka Kanu məyōne.»

Yesu kəcam defi dən kō kədəyefe kən afi daco
Mat 16.20-28; Mark 8.30-9.1

²¹ Kō Yesu entin-tin ŋa kəcaŋke ti, ta ŋaloku ti ali fum.

²² K'ɔnɔcər a pənamar dis dələl Wan ka Wərkun belbel. Abeki, aloŋne apəŋ kō atəkse sariye ŋandewenəs kō, padif kō, pəfəte afi daco tataka ta maas.

23 K'oloku afum fəp nte: «Kə fum efaŋ kəceps'em darəŋ-ε, wəkayi pəsak kəcem-cəmne teta nkənsərka, pəgbanne kətək kən kəpəmpəl dəsək o dəsək, pəcəm'em darəŋ.

24 Bawo, nwe o nwe eŋseŋ kəyac kəyi doru kən mə, kəŋsalpər kə, mba nwe o nwe kiyi kən doru kəŋsalpər kə tetem mə, endeyac ki.

25 Dəkəcəme dere də təyə fum kəsətə kən doru kərkor-ε, kə pəyənne a wəkayi eyi kəsəle kə pəyənne fe ti wəkayi pəcləsərne-ε?

26 Nwe o nwe elapərn'em kə moloku mem, Wan ka Wərkun endekəsədəmne lapərne mənə wəkayi k'endeder nərə da debeki dən, da Papa, kə da meleke mecempi-ε.

27 Icloku nu kance: Afum akin akin ŋayi nnə kəfo kəŋke aŋe ŋantədefi ta ŋantanəŋk kəder ka debe da Kanu-ε.»

Piyer, Isaŋ kə Sak ŋanəŋk Yesu pəyi pəmotu pa debeki da Kanu disre

Mat 17.1-8; Mark 9.2-8

28 Nte Yesu oloku moloku maməkə mə, kə mata camət-maas mencepər, k'elek Piyer, Isaŋ kə Sak, kə ŋampe tərə kəron **kəkətola Kanu.**

29 Yesu eyi kəsali, kə kəro kən kəsəkpər, kə yamos yən yənaŋkanə kəferə yocmotər-motər.

30 Pəwon fe kə afum mērəŋ ŋayefe kəlök-loku kə nkən: Aŋnabi Musa kə Aŋnabi Eli ŋanayi,

31 aŋe ancəŋk **pəmot pa pələl** pa debeki da Kanu disre mə. ŋacloku Yesu kəkə kən nke kəŋkəyi Yerusalem mə.

32 Tetəŋne Piyer k'asol ən ŋacdire pəpəŋ. Nte ŋantime mə, kə ŋanəŋk Yesu pəmot pa debeki da Kanu disre, kə afum mērəŋ akə ŋanacəme kə nkən mə.

33 Tem nte afum akəkə mērəŋ ŋancgbeyene kə Yesu mə, kə Piyer oloku kə: «Wətəkse pəntese su kiyi ka nnə. Səcəmbər **ŋgbancan ŋecepε-cepε** maas, ŋin ŋam, ŋin ŋa Musa, kə ŋin ŋa Eli.» Piyer enacəre fe nte oloku mə.

34 Nte oncloku tatəkə mə, kə kəp kənder kəgbəpərne ŋa kə kənese kəsumpər acεpse a Yesu darəŋ nte ŋananəŋk kəp kəŋkə kəcder kəgbəpərne ŋa mə.

35 Kə dim dowur kəp kəŋkə disre, docloku: «Wəkawe əyənne wan kem, nkən iyek-yek: Nəcəŋkəl kə!»

36 Nte ane dim dadəkə mə, k'anəŋk Yesu pəcəme sona. K'acεpse a Yesu darəŋ ŋancaŋk ali fum enaloku fe sə wəkos təloma nte enəŋk mə mata maməkə.

Yesu kətaməs ka wan nwe ŋəŋk ŋelεc ŋenatorŋkulu-toŋkulu

Mat 17.14-18; Mark 9.14-27

37 Dəkəsək nte ŋantor kəyefe dətərə mə, kə afum alarəm ŋander kədefayne Yesu.

38 Kɔ fɔm wɔlɔma ɔŋkulɔrne kɛnay kaŋkɔ dacɔ: «Wɔtɔkse, ilɛtsɛn'am mɛmɔmɛn wan kem, bawo wɔkin wɔkawɛ gbɔŋ iyɔ.

39 Nɔŋk ŋɛɛc ŋɔlɔma ŋɛmbɛrɛ kɔ, kɔ ŋɔsɔŋɛ kɔ kɛkulɛ-kulɛ gbɔncana babɔkɔ, kɔ ŋɛyikɔc kɔ pɔpɔŋ, kɔ ŋɔsɔŋɛ kɔ kɛfoc kɛwɔr kɔ dɔkusu, kɔ ŋɔlɔlɔs kɔ dis, pɔŋyɛŋk a ŋɛndesak kɔ.

40 Ilɛtsɛnɛ acɛpsɛ am darɔŋ kɛbɛlɔs ka ŋi, mba ŋantam fɛ ti.»

41 Kɔ Yesu ɔŋkulɔrne: «Nɔna afum a dɛtɛmp da tɛm tante dɛkafɔɛ-kafɔɛ, dɔtɔlɔŋ Kanu, ake tɛm t'iɛndesɔyi kɔ nɔna-ɛ? Tɛm cɔkɛ tɔ pɛmar sɔ icɛmɛ nu dɛntɔf-ɛ? Mɛkɛrɛ wan kam nnɔ.»

42 Ntɛ wan wɔkakɔ ɔnclɔtɔrne Yesu mɔ, kɔ ŋɔŋk ŋɛŋgbal kɔ dɛntɔf kɔ ŋɛyikɔc kɔ pɔpɔŋ. Mba kɔ Yesu ɛŋgbɔŋ-gbɔŋɔr ŋɔŋk ŋɛɛc ŋaŋkɔ, k'ɛntamɔs wan wɔkakɔ, k'ɔsɔŋ kɔ kas.

43 Kɔ cusu cɔwɔs afum fɔp kɛnɔŋk ka fɛnɔntɔr fɔpɔŋ fa Kanu.

Yesu kɔgbɔkɔrɛ kɔn kɔloku defi dɔn

Mat 17.22-23; Mark 9.30-32

Ntɛ mes mamɔkɔ Yesu ɔncyɔ mɔ mecciyɛnɛ afum mɔ, k'oloku acɛpsɛ ɔn darɔŋ:

44 «Nɔna nɔsu lɔŋɔs, nɔcɔŋkɛl belbel moloku mame: Kɛbɛr k'ander Wan ka Wɔrkun afum dɔwaca.

45 Mba acɛpsɛ ɔn darɔŋ ŋanacɔrɛ fɛ tɛdisrɛ ta toloku tatɔkɔ ɔncloku mɔ. Tɛnagbɔpɔrɛ ŋa, ntɛ tɔŋsɔŋɛ ta ŋancɔrɛ ti mɔ. Kɔ ŋanɛsɛ kɔyifɔt kɔ tɛdisrɛ ta toloku tatɔkɔ.

Anɔ acɛpɔr nu fɔp-ɛ?

Mat 18.1-5; Mark 9.33-37

46 K'acɛpsɛ ɔn darɔŋ ŋayɛfɛ kɔyifɔtɛnɛ ntɛ tɔŋsɔŋɛ ŋacɔrɛ nwe encɛpɔr ŋa dɔkɔcɛmɛ mɔ.

47 Yesu nwe ɛnacɔrɛ mɛcɛm-cɛmnɛ mmɛ meyi ŋa dɔcor mɔ, ɛɛk wan wɔfɛt wɔkin, k'ɛncɔmbɔrɔrne kɔ.

48 Kɔ Yesu oloku ŋa: «Nwe o nwe ɛban wanfɛt wɔkawɛ kɛban kɛtɔt tetem mɔ, ɛmban sɔ inasɔrka pɔtɔt. Nwe o nwe ɛban im, ɛmban sɔ wɔkɔ osom im mɔ. Bawo fɔm wɔkɔ ɛncɔmbɔrɔrne dɔkɔcɛmɛ dɛfɛt mɔ, ɔyɔnɛ wɔkɔ encɛpɔr nu fɔp mɔ.»

Nwe ɔntɔc'am mɔ, ɛfan ɔm

Mark 9.38-40

49 Kɔ Isan ɛɛk moloku k'oloku: «Wɔtɔkse sɛnanɔŋk fɔm wɔlɔma pɔcbɛlɔsɛ yɔŋk yɛɛc tɛwɛ tam, kɔ sɔfan kɛmɔnɛ kɔ, bawo wɔkayi ɛncɛmɛ f'am darɔŋ pɔmɔ sɛna.»

50 Kɔ Yesu oloku kɔ: «Ta nɛmɔnɛ kɔ ti, bawo fɔm nwe ɔntɔc'am mɔ, ɛfan ɔm.»

Dare dɔlɔma da Samari kɔfati kɛban ka Yesu

51 Ntɛ dɔsɔk dɛɛk da Yesu doru dɔnclɔtɔs mɔ, k'olokunɛ a mɛnɛ pɔkɔ Yerusalem gbɔs.

52 K'osom afum aloma ηayi kō kirinj. Kō akakō ηayi kirinj kō ηanjō ηabəp dare da Samari dōloma, nte tənşəne ηalompəsne kō mō.

53 Mba kō aka dare dadōkō ηafati kəbanj kō, bawo Yerusalem ηanckō.

54 Nte afum ane ηanənk ti mō, acəpse a Yesu darəη, Isan kō Sak ηaloku: «Wətəkse, məfanj səloku nenc dotor kəyefe dəkəm dēləsər ηa?»

55 Kō Yesu enkafəle k'entefərne ηa, k'egbən-ğbənər ηa.

56 Kō ηayefe kō ηanjō dare dōloma.

Anje ηafanj kəcəme Yesu darəη mō

Mat 8.19-22

57 Nte ηanayi dōpō kəkō mō, kō fum wəloma oloku kō: «In-decəm'am darəη nnō o nnō məndekō mō.»

58 Kō Yesu oloku kō: «Məsənk mōyō bi dəkədire kō bemp yōyō wələ dəkədire, mba ina Wan ka Wərkun iyō fe kəfo nke intam kəboc domp dem mō.»

59 Kō Yesu oloku fum wəloma: «Məcəm'em darəη.» Kō fum wəkakō oloku kō: «Mariki, məwos'em kərəsna ikō iwup papa kem.»

60 Kō Yesu oloku fum wəkakō: «Məcə afi ηawup afi, kō məna, məkō mədənk dəbe da Kanu.»

61 Kō fum wəloma oloku: «Kəcəm'am k'inder darəη Wəbe, mba məkar ikō kərəsna ilembərne aka kələ kem disre.»

62 Kō Yesu oloku kō: «Nwe o nwe edebifte cəna a wəkayi pəcməmən tadarəη mō, yōy fe dəkəcəme akip ηa dəbe da Kanu dəntəf.»

10

Kəsom ka acəpse darəη 72

Mat 10.7-16

1 Nte tatōkō tencepər mō, kō Wəbe eyek-yek sō afum 72 aloma, k'osom ηa mērəη mērəη ηayi kō tekirinj kəkət ka sədare kō mofō fəp mme pənamar kō kəkō mō.

2 K'oloku ηa: «Dale detel dəmbek, mba atel ηampicce. Nəletsene Mariki ma kətəl pəberene sō atel aloma anje ηandetele kō mō.

3 Awa! Isom nu nənkōyi pəmō nte menkesiya menyi calma dacō mō.

4 Ta nətəmpərəne pəsam pa delek, ta nətəmpərəne ləba, ta nətəmpərəne cəfta, ta nəyifene sō kō fum o fum dōpō.

5 Kələ nke o nke nəndəkəbere mō, nəkule kərəsna: «Kanu kəberse pəforu kələ kanje!»

6 Kō pəyənne, fum wəka pəforu eyi kələ kanjō-ε, pəforu ponu penyi kō kəronj, kō pəyənne fe ti-ε, pəforu papōkō poluksərne nu.

7 Nəyi kələ kanjō, nədi yeri, nəmun domun da kələ kanjō, bawo pəmar wəbəc pəsətō kəway kən. Ta nəccal-cali wələ de!

⁸ Dare nde o nde nabeere a pabaŋ nu ma, naɗi yeri yako ansoŋ nu ma.

⁹ Nɔtaməs acuy ako ŋayi di ma, naloku ŋa: «Debe da Kanu dɔlɔtɔrne nu.»

¹⁰ Dare nde o nde nako ta ambaŋ nu ma, nako nde abanƙa ŋaŋan naloku:

¹¹ «Sɔŋkoŋɔr nu kafal ka dare donu ali nke kasopte su dawecak ma, salukse nu ki, nɔtam kacare a debe da Kanu dɔlɔtɔrne.»

¹² Icloku nu a dɔsɔk nde Kanu kɔndekiti afum fɔp, tɔyo nte andeyɔ dare dandɛ ma, tendeyenƙ tetas ta aka dare da Sodom.»

Sɔdare nse sɔfati kalaŋ ma

Mat 11.20-24

¹³ «Pɔlec pɔpɔŋ peyi mɔna dare da Korasin! Pɔlec pɔpɔŋ peyi mɔna, dare da Betsayida! Bawo ko tɔcyɔne a mes mewey-wey mme Kanu kanayo nno ndoronu ma, m'anayo aka sɔdare sa Tir ko Sidɔŋ-e, ko ŋanasakpɔr bakac pɔwon, ŋacame pɔlompu darɔŋ, ŋaberne yamos ya kabal, ŋande ŋamɔncne!

¹⁴ It'endesɔŋe dɔsɔk nde Kanu kɔndekiti afum fɔp ma, pɔndeyenƙɔr nɔna pɔtas aka sɔdare sa Tir ko Sidɔŋ.

¹⁵ Ko nɔna aka Kaparnam, nɔncem-cemne a andepene nu haŋ dɔkom ba? Ala! Andetore nu dɔntɔf haŋ nde afum afi ŋayi ma.

¹⁶ Nwe encɔŋkal nu ma, encɔŋkal im. Ko nwe eŋwenəs nu ma, ewenəs so ina, k'ewenəs wako osom im ma.»

Kalukus ka acɛpse darɔŋ 72

¹⁷ Ko afum 72 aŋe anasom ma ŋalukus pɔbotu disre ko ŋaloku: «Wɔbe! Ali yɔŋk yelec fɔp yenayi su dɔntɔf tewe tam.»

¹⁸ K'oloku ŋa: «Indenanɔŋk Sentani katempene kayefe darenc pɔmo tɔko pɔŋmot ma.

¹⁹ Nɔcɔŋkal: Isɔŋ nu katam kakɔt ka bok ko mekalencɔr kɔroŋ kalɛkene fɔnɔntɔr fa ater anu fɔp, daka o daka dɔfɔtam kayamse nu ti.

²⁰ Mba ta pɔbɔt nu nte yɔŋk yelec yeyi nu dɔntɔf ma, mba pɔbɔt nu nte ancic mewe monu nde darenc, ndena Kanu ma.»

Pɔbotu pa Yesu

Mat 11.25-27; 13.16-17

²¹ Tenatɔŋne, **Amera N**ecempi **ŋa Kanu** ŋɔsɔŋe pɔnanƙane kabɔt Yesu, k'oloku: «Inƙor-kor'am Papa, Mariki ma dɔkom ko dɔntɔf, bawo mɔmɔŋkɔr mes mamako acare kakɔtene mes ko asoku sabomp, ko mɔmentɔr mi afɛt dɔkacame. Ey, Papa, bawo tatoko to mafan ti.

²² Icloku nu a Papa kem ember im ca fɔp dawaca. Nwe o nwe encare fe nwe ɔyɔne Wan ma, ko pɔntɔyɔne Papa-e. Nwe o nwe encare fe so nwe ɔyɔne Papa ma, ko pɔntɔyɔne Wan-e, ko afum ako Wan eŋfan ƙamentɔr ko ma.»

23 Kɔ Yesu ɛɲkafɔlɛ k'entɛfɔrnɛ aɕɛpɛ sɔn darɛɲ, k'eyɛl dim, pɛcloku ɲa: «Pɛmbɔt aɲɛ ɲaɲnɛɲk mɔkɔ nɔyi kɛnɛɲk mɔ!

24 Bawo sayibɛ sɛlarɛm kɔ abɛ a tɔf yɛlarɛm ɲanafɛɲ kɛnɛɲk mamɛ nɔyi kɛnɛɲk mɔ, mba ɲananɛɲk fɛ mi, ɲanafɛɲ kɛnɛ mamɛ nɔyi kɛnɛ mɔ, mba ɲanane fɛ mi.»

Totubɕɛnɛ ta wɔSamari wɔtɔt

25 Kɔ wɔtɔkɛ sariyɛ s'aSuyif wɔlɔma ɛyɛfɛ k'oloku Yesu, ntɛ ɛfan kɛɕɛpɛ kɔ towul dɛmoloku mɔ. K'eyif Yesu: «Wɔtɔkɛ, ɕɛkɛ ɕɔ pɛmar im kɛyɔ, isɔtɔ kiyi wɔyɛɲ ka doru o doru-ɛ?»

26 Kɔ Yesu eyif kɔ: «Cɛkɛ ɕɔ ancic nde buk ba sariyɛ-ɛ? Cɛkɛ ɕɔ mɛɲkarɛɲ bi disrɛ-ɛ?»

27 Kɔ fum nwɛ oloku Yesu: «Pɛmar mɔbɔtɔrɛ Mariki Kanu abɛkɛɕ ɲam fɛp, afɔkɛl ɲam fɛp, sɔkɛt sam fɛp, kɔ mɛɕɛm-ɕɛmɲɛ mam fɛp. Kɔ telip-ɛ, mɔbɔtɔr wɛnc ɛm pɛmɔ tɔkɔ mɛmbɔtɔrnɛ mɔ.»

28 Kɔ Yesu oloku kɔ: «Mɔloku ti belbel, mɔyɔ tatɔkɔ ntɛ tɔɲsɔɲ'am kɛyi wɔyɛɲ mɔ.»

29 Mba ntɛ wɔbɛ wɔka sariyɛ nwɛ ɛfan kɛmɛntɔr dolompu dɔn mɔ, k'eyif Yesu: «An'ɔyɔnɛ wɛnc im-ɛ?»

30 Kɔ Yesu ɔɲgbɔkɛrɛ moloku k'oloku: «Fum wɔlɔma ɛnayɛfɛ Yerusalem pɛckɔ Yeriko. Kɔ wɔfum wɔkakɔ ɔɲkɔ pɛbɛrɛ afum alɛɕ dacɔ, kɔ afum alɛɕ akakɔ ɲambaɲɔr kɔ daka dɔkɔ ɛnatɔmpɔr mɔ fɛp, kɔ ɲasut kɔ haɲ pɛɕbut kɛfi, kɔ ɲasumpɔr dɔpɔ kɔ ɲaɲkɔ.

31 Kɔ tosurenɛ wɔlɔɲnɛ wɔlɔma osolnɛ sɔ dɔpɔ din dadɔkɔ. Ntɛ wɔlɔɲnɛ nwɛ ɛnɛɲk fum wɔkɔ anasut mɔ, k'encepɔr dɔpɔ ntɛnde pɛbɔlɛ kɔ.

32 Kɔ wɔLewy wɔlɔma ender sɔ kɛfo kin kanɲkɔ, kɔ wɔkakɔ sɔ ɛnɛɲk fum nwɛ, kɔ nkɔn sɔ encepɔr ntɛnde pɛbɔlɛ kɔ.

33 Kɔ wɔSamari wɔlɔma nwɛ ɔncɲkɔ marɛnt mɔ, ender pɛbɔp fum wɔkawɛ ntɛ ɛnɛɲk kɔ mɔ, kɔ nɔnɔfɔr deyi kɔ.

34 Kɔ wɔSamari nwɛ ɔlɔtɔrnɛ fum nwɛ, k'olonɔr runc yɔn member, k'ɔmbɔy yi moro, k'eseɲtɔr yi. Kɔ wɔSamari nwɛ ɛlɛk fum wɔkakɔ k'endenɲ kɔ pɔkɔtɛnɛ pɔn kɛronɲ, k'ɛɲkɛkɛrɛ kɔ karwanɲɛ kɛlɔma, k'ɔɲkɔ pɛbɔɕ kɔ di, k'ɛncɛmɛ tetɔn.

35 Dɔckɔsɔk kɔ wɔSamari nwɛ owurɛ gbɔlɛɲ mɛrɛɲ ba pɛsam, k'ɔsɔɲ bi wɔka karwanɲɛ. K'oloku kɔ: «Mɛgbɛkɛrɛ kɔ, mɲɛ o mɲɛ mɛndɛsɔɲ kɔ mɔ, indɛluks'am pi dɛkɛlukus dem.»

36 Kɔ Yesu ɔnɔɕɔr: «Afum akanɲɛ maas dacɔ anɔ mɛna mɛncɛm-ɕɛmɲɛ kɛyɔnɛ ka wɛnc ka fum wɔkɔ afum alɛɕ ɲanasut mɔ?»

37 Kɔ wɔbɛ wɔka sariyɛ nwɛ oloku: «Nwɛ ɛnɛmɛntɔr kɔ amɛra ɲɔbotu mɔ.» Kɔ Yesu oloku wɔbɛ wɔka sariyɛ nwɛ: «Awa, mɛna sɔ mɛkɔ mɔyɔ tatɔkɔ.»

Yesu ndena Marta kɔ Mari

38 Yesu ηayi dɔpɔ kəkɔ kɔ acɛpsɛ ɔn darəŋ, kɔ ηambɛrɛ dare dɔlɔma, kɔ wəran wəlɔma pacwɛ kɔ Marta, embəŋ kɔ ndɔrɔn.

39 Marta ɛnayɔ wɛnc wəran wəlɔma nwe ancwɛ Mari mɔ, kɔ wɛnc nwe ɔŋkɔ pɛndɛ Wəbɛ dɛntɔf, pəccəŋkəl moloku mən.

40 Marta nkɔn pəsumpər yɛbɛc yɛlarəm. Kɔ Marta ender pəloku Yesu: «Wəbɛ tɔfɔtərəs əm tantɛ wɛnc im wəran endɛ pənd'am dɛntɔf pəsakər'em yɛbɛc yayɛ sona mɔ? Məloku kɔ pɛdɛ pəmar im.»

41 Kɔ Yesu oloku kɔ: «Marta, Marta! Məyi kəcɛm-cɛmne kɔ kəsimsɛ teta mes mɛlarəm.

42 Mba tes tin gboŋ tɔyɔ dəkəcəmɛ. Mari ɛlɛk da pəntɛsɛ mɔ, afɔsɔbəŋər kɔ dɛnda.»

11

Yesu kɔ sali

Mat 6.9-13; 7.7-11

1 Dɔsək dɔlɔma Yesu **pəclɔk-lokər Kanu** kəfo kəlɔma. Ntɛ elip mɔ, kɔ wəcɛpsɛ kɔn darəŋ wəlɔma eyif kɔ: «Wətəkse, mətəkse su kəlɔk-lokər Kanu, pəmɔ tɔkɔ Saŋ ɛnatəkse acɛpsɛ ɔn darəŋ kəlɔk-lokər Kanu mɔ.»

2 Kɔ Yesu oloku ηa: «Kɔ nəndɛ nɛctola Kanu-ɛ, nəloku:

Kas kosu!

Məsɔŋɛ paleləs decempi da tewe tam topus.

Məsɔŋɛ a dɛbɛ dam deder!

3 Məpocɛ su dɔsək o dɔsək kəcɔm kosu.

4 Məŋaŋnɛnɛ su kiciya kosu

pəmɔ ntɛ səŋŋaŋnɛnɛ nwe o nwe enciyanɛ su mɔ.

Ta məsak su sɔyɔ mes mme məŋsɔŋɛ su kəciya mɔ.»

5 Kɔ Yesu oloku ηa sɔ: «An'ɛntam kəyɔ wəkɔs wəkin nu dacɔ, nwe ɛŋyɛfɛ cɛk-cɛk pəkɔ pəbəp wanapa kɔn ndɛ ndɔrɔn pəclɔku kɔ: «Wanapa məbər im cəcɔm maas,

6 bawo wəbɔt kem wəlɔma edər ndɛ nderem cɛk-cɛk cancɛ, mba ali paka iyɔ fɛ mpe iŋsɔŋ kɔ pədi mɔ.»

7 Kɔ wanapa kɔn wəkakɔ, eyi dukəlɔ mɔ oloku kɔ: «Ta mətərs im! Aŋgbət kumba, səfəntərə kɔ awut em, ifɔtam kəyɛfɛ isɔŋ əm cəcɔm,»

8 icloku nu ti: Ali pəyɔnɛ a ɔfɔyɛfɛ pəsɔŋ kɔ ci bawo wanapa kɔn ɔfɔ, endeyɛfɛ pəsɔŋ kɔ daka o daka ndɛ ɛfan mɔ, bawo wanapa kɔn ɛŋgbɛc gbɛs a mɛnɛ pəsɔŋ kɔ.

9 Kɔ ina, iloku nu: Nətola, nəndɛsɔtɔ. Nəten, nəndɛnəŋk. Nəsut-sut kumba, andɛgbitɛ nu.

10 Bawo nwe o nwe ontola Kanu mɔ, ompocɛ kɔ. Nwe o nwe ɛntɛn mɔ, ɛŋnəŋk. Nwe o nwe ɔŋsɔt-sɔt kumba mɔ, aŋgbitɛ kɔ.

11 Kas kərə kəyi nu dacɔ, nkɛ wan kɔn ontola kɔ alop, pəsɔŋ kɔ abok mɔ?

12 Kə pəyɔnɛ fɛ ti-ɛ, wan kən pətola kə ames ɲɛgbɛɲ, nkən pəsɔɲ kə tekələncər-ɛ?

13 Kə pəyɔnɛ a nənna aɲɛ nələcɛ mə, nəncərə kəsɔɲ awut anu ca yətət-ɛ, Kas kəndənənkanɛ kəsɔɲ Amera Ɲecempi ɲən kəyɛfɛ dəkəm aɲɛ ɲantola kə ɲi mə!»

Yesu kəlukse moloku ma yem nyɛ anaboncɛ kə mə

Mat 12.22-30; Mark 3.22-27

14 Dəsək dələma Yesu pəcbələs ɲəɲk ɲɛlɛc ɲɲɛ ɲɛnasɔɲɛ fum wələma kətəlɔk-ɔku mə. Ntɛ ɲəɲk ɲɛlɛc ɲaɲəkə ɲowur kə mə, kə wətəlɔk-ɔku wəkakə ɛyɛfɛ kəlɔk-ɔku, kə cusu cəwos kənay k'afum fəp.

15 Mba kə afum aləma ɲaloku: «Bɛlsɛbul, wəkiriɲ wəka yəɲk yɛlɛc, ɛmbɛlsɛ yəɲk yɛlɛc.»

16 Ntɛ aləma ɲafan kəsumpər kə dəmɔlɔku mə, kə ɲawer kə a pəmentər **tɔyɔ tɛgbɛkərɛ tɛwɛy-wɛy tin ntɛ tementər a Kanu kəsom kə mə.**

17 Mba ntɛ Yesu ɛnacərə pɛcɛmcɛmnɛ paɲan mə, k'ɔlɔku ɲa: «Atɔf ɔ atɔf nyɛ ɲɛɲyɛfərne ɲisərka mə, ɲɛɲlɔpsər kələcɛ. Wələ wa ɲi wɛtɛmpɛnɛ win win.

18 Awa, kə pəyɔnɛ a Sentani səyi kəyɛfərne sisərka-ɛ, cəkɛ cə dəbɛ da si dɛntam kəcəmɛ gbɲɲ-ɛ? Bawo nəlɔku a Bɛlsɛbul imbɛlsɛ yəɲk yɛlɛc.

19 Kə tɔyɔnɛ ina Yesu, Bɛlsɛbul imbɛlsɛ yəɲk yɛlɛc-ɛ, afum anu ɔɲ, an'ɔ ɲambɛlsɛ yəɲk yɛlɛc-ɛ? Ti təsɔɲɛ ntɛ akakə yati ɲandeyɔnɛ akiti anu mə.

20 Mba kə tɔyɔnɛ a kətam ka Kanu k'imbɛlsɛ yəɲk yɛlɛc-ɛ, awa dəbɛ da Kanu dender haɲ nnə nəyi mə.

21 Kə fum wəka səkət ɔntəmpər posutnɛnɛ-ɛ, ombum daka dən belbel ta tələm ɔ tələm tənəɲk di-ɛ.

22 Mba kə fum wələma nwɛ ɛmbɛk kə fənɔntər ender pəsut kə kəyɛfərɛnɛ pətam kə-ɛ, wəkakə ɛmbanɲər kə yosutnɛnɛ yən nyɛ ɛnalan mə, pələk daka dən fəp pəyerəs.

23 Nwɛ ɔntɔyi kə ina mə, enter im, mba nwɛ ɔntɔlɔɲkan'em mə, ɛsamsər'em.»

Kəlucus ka ɲəɲk ɲɛlɛc

Mat 12.43-45

24 «Ntɛ ɲəɲk ɲɛlɛc ɲaɲəkə ɲowur fum nwɛ dərɪs mə, ɲɛcyara-yara mofɔ mowosu ɲɛctɛn dəkəɲɛsəm, mba ɲɛnasɔtɔ fɛ, kə ɲɔlɔkɔnɛ: «Ilucus ndɛ kələ kem nkɛ inawur disrɛ mə.»

25 Ntɛ ɲɔlucus mə, kə ɲɛmbəp kələ kanəkə pafɛɲ ki, palompəs ki belbel.

26 Awa! Kə ɲəɲk ɲɛlɛc ɲaɲəkə ɲəɲkə, ɲɛtɛn yəɲk yɛlɛc camət-mɛrɛɲ nyɛ yɛnanəkane kələcɛ yetas ɲi mə, kə yɛmbɛrɛ kələ disrɛ kə yɛndɛ. Ntɛ tɛncɛpər mə, kə pələc pənanəkane fum nwɛ pətəs təkə pənayi kə təkəkə-cəkə mə.»

Pətət posoku

²⁷ Yesu eyi kəloku moloku maməkə, kə wəran wələma oŋkulərne kənay ka afum akakə dacə: «Pəbət kor nke kənbəkəs əm mə, kə mēsə mme anaməsər'am mə!»

²⁸ Mba kə Yesu oŋkule: «Pəbət anje ŋancəŋkəl toloku ta Kanu, ŋameŋkərne ti mə!»

Kəwe ka tɔyɔ tɛgbəkərɛ tɔləma ntɛ tɛyɛfɛ ndɛ Kanu kəyi mə

Mat 12.38-42

²⁹ Ntɛ kənay ka afum kəncmɛpnɛ Yesu mə, k'ɛyɛfɛ kəloku: «Dɛtemp dɛlɛc dɛntesɛ fɛ. **Tɛgbəkərɛ ntɛ tɛmentər a Kanu kəsom im mə** tɔ ŋayi kəwer im, mba ali tin afəsəmentər ŋa kə pəyənɛ fɛ ta Yunusa-ɛ.

³⁰ Bawo təkə teta Yunusa tənayənɛ aka Niniwe tɔyɔ tɛgbəkərɛ tɛwɛy-wɛy mə, itɔ teta Wan ka Wərkun tendesəyənɛ dɛtemp dantɛ tɔyɔ tɛgbəkərɛ tɛwɛy-wɛy.

³¹ Wəbera ka atəf nɛjɛ ŋeyi Yisrayel kəca kətət mə, endetime dəsək da kiti kə afum a dɛtemp dandɛ, pəboncɛ ŋa kətəwosɛ kəcəŋkəl kəcərə kəkətɛnɛ mes kətət, bawo pəbəlɛ p'ɛnayɛfɛ kədəcəŋkəl kəcərə kəkətɛnɛ mes kətət ka Sulemani. Mba fum eyi dɛ nwe entas Sulemani dəkəcəmɛ mə.

³² Afum a Niniwe ŋandeyɛfɛ dəsək ndɛ Kanu kəndeboc kiti ka afum fəp mə, ŋaboncɛ afum a dɛtemp dandɛ kətəsəkpər bəkəc, bawo kawandi ka Yunusa kənasəŋɛ aka Niniwe kəsəkpər bəkəc yanjan yɛlɛc kə ŋalomp. Fum eyi nu dacə nwe entas Yunusa dəkəcəmɛ mə.»

*Capafɔ ca lamp da dis**Mat 5.15; 6.22-23*

³³ «Fum nwe o nwe əfəmot lamp pəkəŋk di kə pəyənɛ fɛ ti-ɛ pəmɛŋk di, mba pəfos pə ancəmbər di ntɛ təŋsəŋɛ anje ŋambɛrɛ mə ŋanəŋk pəwanəkəra.

³⁴ Dəfər dam dəyənɛ lamp da dis. Kə dəfər dam dɛntesɛ-ɛ, dis dam fəp dəŋmotnɛ, mba kə dəfər dam dəntətɛsɛ-ɛ, dis dam sɔ kubump kə dɛŋyi.

³⁵ Məkəmbərne ta pəwanəkəra mpɛ pɛy'am dərɛs mə pəyən'am kubump.

³⁶ Kə dis dam domot ta tofo o tofo teyi ntɛ teyi kubump mə, tɛm tatəkə dis dam fəp dɛmar, pəmɔ təkə lamp dəŋmot əm kə dɛndɛmar-ɛ.»

*Yesu kəboncɛ aFarisi kə atəksɛ a sariyɛ kiciya**Mat 23.1-36; Mark 12.38-40*

³⁷ Ntɛ Yesu ɛnayi kəlok-loku mə, kə wəFarisi wələma ɛlɛtsɛnɛ kə kəkədi yeri dəsək dadəkə ndɛ ndərən. Kə Yesu ɛmbɛrɛ k'əŋkə pəndɛ amɛsa kirin.

38 Kɔ pənciyanɛ wəFarisi nwe nte Yesu ɛnatəsumpər saliye *
kərəsna a pədedi yeri mə.

39 Mba kɔ Wəbɛ oloku kɔ: «Nəna aFarisi, apəlet kɔ apət takəronj yɔ nənjəkəs, mba bəkəc yonu disrɛ nəlasərnɛ deke dərɛs kɔ kəyɔ mes mɛlɛc.

40 Nəna atəcərə mes, Kanu nkɛ kəlompəs tadarənj mə, bafɔ ki kəlompəs sɔ tedisrɛ ba?†

41 Nəcpocɛ atəyɔ daka mpɛ penyi səpət kɔ dəpəlet yonu mə, fəp fa yi fəndesək nnɔ nəyi mə.

42 Mba pələc peyi nu nəna aFarisi! Bawo nən'ənjənj Kanu farilɛ fa mɛrket kɔ malanjkan, mba nəcsak dolompu kɔ kəbətər ka Kanu. Maməkɔ mə pəmar pacyɔ, mba ta nəcpələrnɛ kəcyɔ mɛlpəs məkɔ de.

43 Pələcər nu nəna aFarisi, bawo nəmbətər pacsənj nu dəkəndɛ mofɔ mmɛ aŋlɛləs nu mə, ndɛ dəkətola Kanu da aSuyif kɔ kəyif kələl ndɛ ambəpsɛnɛ mə.

44 Pələc peyi nu, bawo nəyi pəmɔ cufu ncɛ antəgbəkərə mə, packət ci kəronj ta ancərə-ɛ.»

45 Kɔ fum wəlɔma atəkse a sariyɛ dacɔ ɛlɛk moloku, k'ɔŋkulərnɛ: «Wətəkse, kɔ mələku tatəkɔ-ɛ, mənjsunu sɔ sənə!»

46 Kɔ Yesu oloku: «Pələcər sɔ nəna, atəkse a sariyɛ! Bawo nən'ɛjnsərəsər afum yəsarɛ nyɛ yoncuca kəsarɛ mə, ta nəjwosɛ kəgbuŋɛnɛnɛ yi ali tɛlər tonu-ɛ.»

47 «Pələc peyi nu! Bawo nən'ɛncəmbərə cufu ca sayibɛ masar mɛcɛm-cɛməs, sayibɛ aŋɛ atem anu ŋanadifət mə.

48 Kəmentər kɔ məndɛ tantɛ a mənə sɔ məwosɛ məyɔ ma atem anu maməkɔ, bawo ŋa ŋanadifət sayibɛ sa Kanu, kɔ nəna nəcəmbər cufu cəŋan!

49 It'əsənjɛ kəcərə kəkətɛnɛ mes ka Kanu disrɛ, kələku: «In-dekenɛ ŋa sayibɛ kɔ asom.» Kɔ ŋandifət aŋɛ, kɔ ŋantərəs akɔ.

50 It'ɛndəsənjɛ afum a tɛm tantɛ kədəkəsarɛ kiciya ka kədif ka sayibɛ saŋsɛ fəp, kələk nte doru doncop mə,

51 kəyɛfɛ mecir ma Abɛl, haŋ kəbəp ka ma Sakary, nwe anadif aŋgbip kɔ **tetek tolonj**ncɛ dacɔ mə. Ǝy, iloku nu ti: Andekəyif ti afum a dɛtemp dandɛ.»

52 «Pələc peyi nu, nəna atəkse sariyɛ! Bawo nəlinj tasapa pa kəcərə. Nənasərka nəmbərə fɛ, nəyamsər sɔ akɔ ŋafanj kəbərə mə ŋabərə.»

53 Nte Yesu owur ndɛ kələ kanj kɔ mə, kɔ pəntɛlɛ atəkse sariyɛ kɔ aFarisi nnɔ eyi mə. Kɔ ŋayɛfɛ kəgbənj-gbənjər kɔ, ŋacyifət kɔ mes fəp,

* 11:38 CəFarisi, kɔ fum əŋkɔ kədi yeri-ɛ, mɛnɛ pəgbət kərəsna waca dəromun.

† 11:40 Kanu nkɛ kəlompəs tadarənj mə, bafɔ ki kəlompəs sɔ tedisrɛ ba? kɔ pəyɔnɛ fɛ ti-ɛ, «nwe olompəs tadarənj mə, bafɔ nkən olompəs sɔ tedisrɛ ba?»

⁵⁴ ḡaccap̄e k̄o mowul, n̄te t̄oḡs̄oḡe ḡanene k̄o yem d̄amoloku m̄o.

12

N̄akemb̄arne ta n̄ab̄aḡene dofum

Mat 10.26-27

¹ Tem tatak̄o afum wul wul ḡanal̄oḡkan̄e, p̄awurene p̄am̄o ḡaden̄s̄arene, k̄o Yesu oloku ac̄ep̄se ɔn dar̄oḡ k̄aresna: «N̄akemb̄arne lebin da aFarisi nd̄e d̄oȳoḡe k̄ebaḡene dofum m̄o.

² Tes o tes t̄oḡb̄oḡne teyi f̄e n̄te ant̄oḡdec̄eḡ paloku m̄o, n̄te o n̄te t̄oḡb̄oḡne f̄e n̄te ant̄oḡdec̄are m̄o.

³ It'ɔs̄oḡe n̄te o n̄te aḡloku nu kubump̄ m̄o, n̄aḡb̄ok̄are ti k̄aloku daḡ p̄eḡ, k̄o n̄te n̄aḡm̄eḡk̄as fum d̄el̄eḡas dukul̄o m̄o, and̄ed̄eḡk̄ ti p̄əp̄oḡ mof̄o m̄eb̄əps̄ene.»

N̄we p̄amar n̄anes̄e m̄o

Mat 10.28-31

⁴ «Ic̄loku nu ti, n̄ana anapa em: Ta n̄anes̄e aḡe ḡandif dis ḡb̄əc̄ar̄am, k̄o t̄eȳefe d̄anda ta ḡantam t̄ol̄om o t̄ol̄om s̄o m̄o.

⁵ Ind̄ement̄ar nu n̄we p̄amar n̄anes̄e m̄o: N̄anes̄e n̄we endif p̄əkaf̄ale s̄o p̄ətam k̄el̄am əm yahanama m̄o. Ey! Ic̄loku nu, nk̄on p̄amar n̄anes̄e!

⁶ Baf̄o ḡbaḡa k̄əcam̄ət y'ancam̄as f̄əreḡk̄ m̄er̄eḡ? Awa! Ic̄loku nu a Kanu k̄əf̄əp̄əl ali ḡin yi d̄ac̄o.

⁷ Ali d̄elay da c̄əfon ca dom̄p̄ donu Kanu k̄ənc̄are di f̄əp̄. Ta n̄anes̄e, nn̄o Kanu k̄əyi m̄o n̄əȳo d̄ək̄əc̄ame nd̄e d̄emb̄ək̄ d̄etas da ḡbaḡa ȳaȳək̄o m̄o!»

Amera N̄ecempi ḡa Kanu ḡend̄et̄ək̄se p̄amar ac̄ep̄se a Yesu k̄aloku m̄o

Mat 10.32-33; 12.32; 10.19-20

⁸ «Ic̄loku nu ti: N̄we o n̄we owose afum f̄ər̄ kirin̄ a ina Yesu ɔȳo k̄o m̄o, Wan ka W̄ər̄kun end̄es̄ər̄əmn̄ewose nn̄o f̄ər̄ ya m̄eleke a Kanu kirin̄, a w̄ək̄on fum w̄əkak̄o ɔȳoḡe.

⁹ Mba m̄əna n̄we m̄ənd̄ek̄əb̄up̄əre k̄əc̄are kem afum f̄ər̄ kirin̄ m̄o, Wan ka W̄ər̄kun end̄ek̄əs̄ər̄əmn̄e sim̄e m̄əna w̄ək̄ayi m̄eleke a Kanu f̄ər̄ kirin̄.

¹⁰ N̄we o n̄we oḡloku p̄ələc̄ pa Wan ka W̄ər̄kun m̄o, and̄ek̄əḡaḡn̄ene w̄ək̄ayi, mba n̄we o n̄we ɔl̄om̄as **Amera N̄ecempi ḡa Kanu** m̄o, af̄oḡek̄əḡaḡn̄ene k̄o.»

¹¹ «K'ande p̄ack̄ek̄are nu nd̄e d̄ək̄ətola Kanu da aSuyif, k̄o p̄əȳoḡe f̄e ti nd̄a aboc̄ kiti, k̄o p̄əȳoḡe f̄e ti abe-ε, ta n̄əc̄em-c̄em̄ne p̄əlar̄am t̄eȳac̄ne tonu, k̄o t̄ək̄o n̄əḡk̄oloku m̄o,

¹² bawo **Amera N̄ecempi ḡa Kanu** ḡend̄ek̄ət̄ək̄se nu ḡb̄ənc̄ana bab̄ək̄o t̄ək̄o p̄amar n̄ənd̄ek̄oloku m̄o.»

Capaf̄o ca w̄əka d̄aka w̄ət̄əc̄are tes

13 Kɔ fum wə̀lɔma oloku Yesu kə̀nay kaŋkɔ disre: «Wətəkse, mə̀loku wə̀nc im a səyerɛnɛ kɛ kosu!»

14 Kɔ Yesu oloku fum wəkakɔ: «An'ɛcəmbər im kə̀yɔnɛ ka wə̀bɔc kiti nu dacɔ, kɔ pə̀yɔnɛ fɛ ti, wə̀yer nu daka donu-ɛ?»

15 Kɔ tɛyɛfɛ də̀nda, kɔ Yesu oloku ŋa: «Nəkəmbərɛnɛ kə̀bɔtər ka kə̀yɔ daka dɛlarəm, bawo bafɔ daka dadəkɔ dɔtəmpər tecepərənɛ ta fum doru, ali wəkayi pə̀yɔ daka dɛlarəm.»

16 Kɔ Yesu oloku ŋa capafɔ cə̀lɔma: «Fum wə̀ka daka wə̀lɔma ɛnəyɔ ntɔf nyɛ yencɛsɛ yɔ̀bɔf mə̀.

17 Pəcəm-cə̀mnɛ, pə̀cyifnɛ: «Cə̀ke cɔ indeyɔ-ɛ? Bawo iyɔ fɛ kə̀fo nkɛ iŋkəlonɟka yɛtɛl yem fə̀p mə̀.»

18 Kɔ fum nwe olokunɛ, «Ntɛ tɔ indeyɔ: Kə̀wəkəc k'iŋkɔ cɛlɛ cɛm, isɛl nɛɛ cə̀mbək mə̀, ilonɟka ci disre malɔ kɔ ca yem yə̀lɔma.

19 Kɔ tɛyɛfɛ də̀nda-ɛ, ilokunɛ dɛbəkəc: «Iyɔ daka dɛlarəm dɛmɛŋkərɛnɛ meren mɛlarəm. Iŋesəm oŋ, idi, imun, iwoləs.»

20 Mba kɔ Kanu kə̀loku kɔ: «Mə̀na Wə̀tonɟkulu, Wə̀tɔcərə tes! Pibi pa mə̀kɔ yati pɔ andewer ə̀m kiyi kam doru. Təkɔ mə̀lomɔpəs mə̀, anɔ mə̀ndesakərə ti-ɛ?»

21 Kɔ Yesu ɔ̀nɔcər: «Itɔ pə̀yi fum nwe endelonɟka daka dɔn, a ta Kanu kə̀ŋnəŋk kə̀yɔ kə̀n daka mə̀-ɛ.»

Kə̀lanɟ Kanu

Mat 6.25-34

22 Kɔ Yesu oloku acɛpse ɔ̀n darəŋ: «It' ɔ̀sɔŋɛ ntɛ iloku nu: Ta nəcɛm-cə̀mnɛ pə̀larəm tecepərənɛ tonu doru, paka mpɛ nəndedi mə̀. Ta nəcɛm-cə̀mnɛ sɔ teta dis donu pəkɔ nəndɛbərɛnɛ mə̀.

23 Bawo kə̀yi wə̀yɛŋ kə̀ncɛpər yeri, kɔ dis dɛncɛpər yamos.

24 Nəkəkɛɛ bɛmp yaser: Yɔ̀fɔgbal defet, yɔ̀fɔtɛl, yɔ̀fɔmɛŋkərɛnɛ, yɔ̀yɔ fɛ cɛlɛ, mba Kanu kə̀ŋsɔŋ yi yeri. Nəna nəncɛpər bɛmp yayəkɔ dəkəcəmə!

25 Fum wərə eyi nu dacɔ nwe mɛcɛm-cə̀mnɛ mən mɛntam kə̀bɔləs kiyi kə̀n doru ali kururu katin gboŋ mə̀-ɛ?

26 Kɔ pə̀yɔnɛ a nəfɔtam ali tes tɛfɛt-ɛ, ake nəŋkɔcɛm-cə̀mnɛnɛ təkɔ tɛncəmə mə̀?

27 Nəkəkɛɛ ntɛ yɛlɛŋk ya dale yomɔŋ mə̀: Yɔ̀fɔbɔc, yɔ̀fɔdu yamos, mba icloku nu, ali wə̀bɛ Sulemani kɔ daka da debeki dɔn fə̀p ɛnasɔtɔ fɛ yamos nyɛ yɛnatesɛ pəmɔ pɛlɛŋk papəkɔ pin mə̀.

28 Yika yeyi mə̀kɔ dale,alna pacləm yi dənɛnc, mba Kanu kə̀ŋsɔŋɛ pə̀mar yi. Nəna, apicɛ kə̀lanɟ, nəntam kə̀lanɟ tes tin: Pipicɛ oŋ cə̀ke o cə̀ke, Kanu kə̀ndɛbər nəna apicɛ kə̀lanɟ yamos pə̀ncɛpər tatakɔ.

29 Kɔ nəna, ta nətərəsnɛ kə̀cɛm-cə̀mnɛ teta yeri yəkɔ nəndɛ nəcdi mə̀, ta nəcɛm-cə̀mnɛ teta yomunəs yəkɔ nəndɛ nəcmunəs mə̀.

³⁰ Bawo mes maməkə mə atəcərə Kanu a doru dandə nantən tēm fəp. Mba nəna, Kas konu kəncərə a pəmar nəyɔ ca yayəkə.

³¹ Nətən dəbe da Kanu, nkən Kanu endedenərə nu ca yayəkə.»

Daka kiyi ka darenc

Mat 6.19-21

³² «Ta mənese, nəna acəps'em darəŋ! Bawo pəmbət Papa konu kəsəŋ nu dəbe.

³³ Nəcaməs daka donu, nəpocə kəway kaŋkə atəyɔ daka. Nte tənəsəŋe nəmənəkərne daka daalna ndena Kanu mə. Daka da ndena Kanu dəfəlip! Dəndo wəke eyi fə nwe əŋlətərne di mə. Ate njei fə nje njeŋsəm di mə.

³⁴ Bawo kəfo nke daka donu denyi mə, difə abəkəc ŋonu njeŋyi.»

Abəc aŋe nambum mə

³⁵ «Nəgbəncne səbelet dəfi, nəmot səlamp sonu, nəcəme belbel!

³⁶ Nəyi pəmə abum aŋe nandekar wəbe kəŋan kəder kəyefe dənŋbaŋne mə, nte tənəsəŋe wəkəkə əncəkənader pəsut-sut kumba, nje njebite kə ki katəna mə.

³⁷ Pəbət acar akakə wəbe kəŋan, əncəkənader pəbəp kə pəckar kəgbite kə mə. Amina! Icloku nu ti: Endegbəncne belet, pədəs acar akakə dəməsa kəkədi yeri, nkən pəyerəs nje yi.

³⁸ Ali pəyənə a cək-cək c'ender, kə pəyənə fə ti-ε dəsəka, mba k'embəp nje ta nandire-ε, pəbət nje!»

³⁹ «Nəcərə nte belbel a kə wəka kələ ɛncərə tēm nte wəke endeder mə-ε, əfəsak kə pəberə kələ kən disre.

⁴⁰ Nəna sɔ, nəcəme nəckar! Bawo Wan ka Wərkun endeder tēm nte nəntəyɔ kə amera mə.»

Wəbəc wəlompu kə wəbəc wətəlomp

Mat 24.45-51

⁴¹ Kə Piyer eyif Yesu: «Wəbe, səna gbəcərəm nje mənloku capafə cance, ka fəp fə mənloku ci ba?»

⁴² Kə Mariki oloku: «Wəcəmbər-cəmbər daka wəre esektərne mariki mən, pəckətene amera kəyɔ pətət-ε? Nkən əyənə nwe mariki əŋloku: «Isəŋ əm yəbəc nyε: Məcsəŋ yeri afum aŋe njei kəbəc'em mə, tēm nte pəmar mə.»

⁴³ Pəbət wəmarəs wəkəkə mariki mən mender məbəp kə pəsumpər yəbəc nyε ɛnasom kə mə!

⁴⁴ Iloku nu ti, kance kə: Mariki mən mendesəŋe kə kəyənə ka wəcəmbər-cəmbər ka daka dən fəp!

⁴⁵ Mba kə wəmarəs olokunə dəbəkəc: «Mariki mem ɛntayefe fə kəder,» pəyefe kəsut ka amarəs arkun kə aran, pəcdi yeri, pəcmun haŋ pəcis-ε,

⁴⁶ mariki ma wəmarəs wəkakə endeder dəsək nde ɔntɔyɔ kə amera mə, dec nde ɔntɔcərə mə, pəbeləs wəmarəs wəkakə, pətərəs kə pəpəŋ pəmɔ təkə antərəs acar atənene mariki manjan mə.

⁴⁷ Wəcar nwe encərə tefan ta mariki mən mə, ta olompəsne kə mə, ta ɔnyɔ təkə mariki mən efan mə, aŋsut wəcar wəkakə kəsut kəpəŋ.

⁴⁸ Mba wəcar nwe ɔntɔcərə tefan ta mariki mən mə, pəciya-ciya kəlompəs mə, wəcar wəkakə pəpic pə aŋsut kə. K'anasəŋ fum pəlarəm-ε, pəlarəm p'aŋwer kə. K'anasəŋ kə kəmenj kə pəlarəm-ε, aŋnanjkanε kəwer kə pəlarəm.»

Teta Yesu tɔsəŋε afum kəgbeyεne

Mat 10.34-36

⁴⁹ «Nenc d'inder kəber doru, k'ifanε di kəmar!

⁵⁰ Pəmar isɔtə kəgbət dəromun teta Kanu, kə kəŋwon im kəyi.

⁵¹ Nəncem-cemne a pəforu p'injkerε kəsəŋ doru ba? Ala de, mba icloku nu a kəgbey k'injkerε.

⁵² Kəyεfe ŋ tantε aŋε o aŋε ŋayi kəcamət kəlɔ disre mə, ŋandegbeyεne akə ŋayi maas akə ŋayi merəŋ.

⁵³ Kas kəgbey wan kən wərkun, wan wərkun pəgbey kas, kerε kəgbey wan kən wəran, wan wəran pəgbey kerε, kəncərə kəgbey wəran ka wan kən, wansə pəgbey kəncərə.»

Kəcərəne ka kəm

Mat 16.2-3

⁵⁴ Kə Yesu oloku sɔ kənay ka afum: «Kə nənəŋk kəp kəgbəpərne ntende dec dəŋkalε mə, nəŋkulε katina: «Kəder kə wəcafən endeder!» Pəfəwon wəcafən pəder.

⁵⁵ Mba kə nənəŋk afef ŋa kəca kətət ŋocwur-ε, nəloku: «Kəwone kə pənder,» təkə nəŋloku ti mə, itə tenyi.

⁵⁶ Nəna Abanεne dofum! Nəntam kəcərə megbekərə ma təkə antɔf kə kəm yenyi mə. Ta ake tɔ nəntɔtam kəcərəne tegbekərə ta tem tantε nəyi mə-ε?»

Məten kətəŋne kə wəterεne kam

Mat 5.25-26

⁵⁷ «Ta ake tɔ nəntɔcərəne nənasərka təkə pəmar nəyɔ mə-ε?

⁵⁸ Kə məndekə kə wəyεfərəne kam dəŋkiti-ε, məwosε nətəŋne dɔpɔ kərəsna. Kə pəyɔne fe ti-ε, eŋkekər'am dabε. Wəboc kiti pəsəŋ əm wəsɔdar nwe ɔŋkəber əm dəbili mə.

⁵⁹ Iclok'əm məfəwur dəndo ta məlip kəlukkε tapəsam pəkə məntəmpərə kə mə-ε.

13

Nəsəkpər mera, nəcəme pəlompu darəŋ, kə pəyɔne fe ti-ε, nəŋfi!

¹ Tem tatəkō kō afum alōma ḡanader ḡalōmər Yesu tōkō Pilat enadifət aKalile alōma nte ḡanclōḡne Kanu mō. Itō tatəkō Pilat enanōḡkəl mecir ma afum kəlōḡne kəḡan.

² Kō Yesu oloku ḡa: «Nāncēm-cēmne a k'anadifət aKalile akakō tatəkō-ε, a tementər oḡ a ḡananāḡkanε kēcīya ḡatas aKalile alpəs akō anatōdif mō ba?»

³ Ala! Icloku nu: Mba kō nāntōsəkpər mera nēcəme pəlōmpu darəḡ-ε,* tatəkō tō nāndeləsərne fəp pəmō akakō.

⁴ Kō pəyōne fe ti-ε, afum aḡe wəco kō camət-maas aḡe kəlō ka Siloye kənawekərne kədif mō, nāncēm-cēmne a ḡa ḡananāḡkanε kēcīya ḡatas aka Yerusalem alpəs aḡe ba?»

⁵ Ala, icloku nu, mba kō nāntōsəkpər mera nēcəme pəlōmpu darəḡ-ε, nəna sō fəp nāḡfi pəmō ḡa!»

Capafō ca kətək kəkom nke kənatəyō yokom mō

⁶ Kō Yesu oloku sō capafō nce: «Fum wəlōma enabōf kətək ka fik dale dōn dacō. K'ender kəten yokom ya ki, mba k'embəp kətək ka fik nke ta kəḡkom-ε.

⁷ Awa, k'oloku wəbəc kən wəkō oncbumε kō dale mō: «Meren maas mō mame nte inder kəpim yokom ya kətək kəḡke mō, mba ifōsōtō. Awa məcep ki! Ta ake tō kəndecəmene, kəbaḡ antōf gbəcərəm-ε?»

⁸ Kō wəbum ka dale oloku kō: «Mariki, məsak kətək kəkom kəḡke kəren nke gbəcərəm pāmōmən sō. Indekay haḡ inōḡkər, iber ma sō ncek-cek-a.

⁹ Kō tatəkō teyi-ε, tōlōma kəḡkom dok, kō pəyi fe ti-ε, məcep ki.»»

Yesu kətaməs ka wəran wəlōma dəsək da kəḡesəm nde ampuse Mariki mō

¹⁰ Kətəkse kō Yesu encnde dəkətola Kanu da aSuyif dōlōma dəsək da kəḡesəm nde ampuse Mariki mō.

¹¹ Wəran wəlōma enayi dānda nwe ḡōḡk ḡelεc ḡenasōḡe kətəkōt kəyefe meren wəco kō camət-maas mō. enanutne, ta entam kətence-ε.

¹² Nte Yesu enəḡk wəran nwe mō, k'ewe kō, k'oloku kō: «Wəran, docu dam dəsak əm.»

¹³ Kō Yesu endenḡ kō kəca. Gbəncana babōkō kō wəran nwe entence, k'eyefe **kəcām** debeki da Kanu.

¹⁴ Mba kō pəntele wəbe wəka dəkətola Kanu da aSuyif dadōkō, nte Yesu enataməs wəran wəkakō simiti, dəsək da kəḡesəm mō, kō wəbe nwe oloku afum: «Mata camət-tin meyi mme pəmar pacbəc mō, nəder nəten kətaməsne mata mamōkō disre, mba ta nəder dəsək da kəḡesəm da Kanu.»

* 13:3 Nəntubi itō «Nəsəkpəre məyō mətōt məyō melec.»

15 Kɔ Yesu oloku kɔ nte: «Nəna abanɛnɛ dofum: Dɔsɔk da kənesəm ndɛ ampuse Mariki mə, an'ontɔgbeki wana wɔn, kɔ pəyɔnɛ fɛ ti-ɛ, sɔfale sɔn pəkekərə kəkɔmun-ɛ?»

16 A wəran nwɛ owur dokom da Abraham, a kɔ Sentani səsumpər səkot kəyɛfɛ meren wəco kɔ camət-maas mə, pəmar fɛ pasikəli kɔ bənda yayɔkɔ dɔsɔk da kənesəm ba?»

17 Yesu kəlɔku moloku maməkɔ, kɔ tɔsɔnɛ ater ɔn fəp kəlapərɛnɛ, mba pənabɔt kənay fəp, məyɔ məpɔn maməkɔ Yesu ɔncyɔ mə.

Capafɔ ca tɛngbɛn tɛfɛt

Mat 13.31-32; Mark 4.30-32

18 Kɔ Yesu eyif sɔ: «Ake dɛbɛ da Kanu dowurɛnɛ-ɛ? Ak'indetubcɛnɛ di-ɛ?»

19 Tɛngbɛn tɛfɛt† nte fum ɛlɛk, pəbɔf dale dɔn disrɛ mə. Tɛngbɛn tatəkɔ topon, pəyɔnɛ kətək kəpɔn, bəmp yeder yɔlɔ wara wawəkɔ kəron mə.»

Totubcɛnɛ ta lebin

Mat 13.33

20 Kɔ Yesu oloku sɔ: «Ak'indetubcɛnɛ dɛbɛ da Kanu-ɛ?»

21 **Dɛbɛ da Kanu** dowurɛnɛ pəmɔ lebin ndɛ wəran ɛnɛlɛk pənəktərənɛ di kəmbefe kilo wəco mɛrɔn (20) mə. Kɔ kəmbefe fəp kəmpɛl.»

Capafɔ ca dəkəbɛrɛ dɛwɛkɛnɛ

Mat 7.13-14; 21-23

22 Nte Yesu ɛncali sədare səfɛt kɔ səpɔn kəkɔ ka Yerusalem mə, pəctəksɛnɛ sɔ afum.

23 Kɔ fum wəlɔma eyif kɔ: «Wətəksɛ, afum apic nɔ Kanu kəndəkɔyɔc ba?» Kɔ Yesu oloku nɔ:

24 «Nəna sɔ nəsɛp kədekəbɛrɛ dəkəbɛrɛ dɛwɛkɛnɛ dadəkɔ, bawo icloku nu: Afum alarəm nandəsɛp kəbɛrɛ ka di, mba nɔfɔdekɔtam.»

25 «Kɔ wəkə kəlɔ endəkɔyɛfɛ pəcan kumba, nəna anɛ nənyɔ doru mə, nədeyɛfɛ kəsut-sut kumba, nəcloku: «Mariki məgbite su!» Tɛm tatəkɔ endɛlukɛ nu: «Incərə fɛ kəca nke nəyɛfɛ mə!»

26 Tɛm tatəkɔ tɔ nəndəkɔcɔp kəlɔku: «Sənadi yeri, səmun kɔ mənə, məctəksɛ ndɛ səpɔ səpɔn sa dare dosu.»

27 Nkən pəcloku nu, «Incərə fɛ aka ndɛ nəyɔnɛ mə! Nəbəl'em day, fəp fonu nənyɔ mes mɛlɛc!»

28 Difɔ kəbok kɔ kənanɛrɛnɛ sek kəndəkɔyi, kɔ nənkənɛnk Abraham, Siyaka, Yakuba kɔ sayibɛ sa Kanu fəp dɛbɛ da Kanu disrɛ, paləm nəna dabanɔka.

† 13:19 Tɛngbɛn tɛfɛt = tɛngbɛn tɛfɛt ta tək ya dale, nte tompon mə-ɛ, kətək ka ki kəmbek pətəs tək yɔlɔma ya dale.

²⁹ Afum ɲandeder kəyɛfɛ kəca nke dec dempe kə nke dec deɲkale mə, kəca kətət, kə kəmerya, ɲader ɲandɛ demesa nde dɛbɛ da Kanu dəntəf.

³⁰ Ti disre, adarəɲ ɲayi aɲɛ ɲandekoyɔnɛ akirin mə, kə akirin ɲayi aɲɛ ɲandekoyɔnɛ adarəɲ mə.»

Yesu kə Yerusalem

Mat 23.37-39

³¹ Tɛm tatəkə, kə aFarisi alɔma ɲander ɲaloku kə: «Məyɛfɛ nnə məkə! bawo Herodu ɛfan kədif əm.»

³² Kə Yesu oloku ɲa: «Nəkə nəloku ayɔfən ɲaɲəkə: Kəbeləs yɔɲk yɛɛc kə kətaməs k'iyine məkə kəalna, a indeləpəs yebəc yem tataka ta maas.

³³ Mba mɛnɛ ikət məkə,alna kə dəsəkə, bawo pəmar fɛ wədəɲk wəka Kanu pəfi kəfo kəcuru ta pəyɔnɛ Yerusalem-ɛ.»

³⁴ «Yerusalem, Yerusalem, mənana nwe mənɔɲif sayibɛ mə, məcca-cas aɲɛ Kanu kəɲsom nnə məyi mə, isɛp pələrəm kəlɔɲka ka awut am pəmɔ nte acəkə ɲokombəra ɲɔɲɔɲka awut banca ya ɲi dəntəf mə! Mba mənawosɛ fɛ ti.

³⁵ Awa nəcəɲkəl! Andesakərə nu kəlɔ konu kəyɔ fos. Mba icloku nu: Nəfəsənəɲk im, haɲ tɛm tɛbəp nte nəndeloku: «Kanu kəpocɛ pətət nwe enderɛnɛ tewe ta Mariki mə.»»

14

Yesu kətaməs ka wəcuɲ wəlɔma

¹ Simiti, dəsək da kəɲesəm dəlɔma, k'awe Yesu nde kəlɔ ka wəbɛ ka aFarisi wəlɔma kəkədi yeri, kə akakə ɲaɲkəkɛ kə.

² Kə fum wəlɔma nwe docu dɛnakəfəs mə, pəcəmɛ kə fər kirin.

³ Kə Yesu eyif atəkɛ a sariyɛ kə aFarisi: «Aɲwosɛ kətaməs ka wətətamɛnɛ simiti, dəsək da kəɲesəm ba, ka afɔwosɛ?»

⁴ Kə afum aɲɛ ɲancaɲk. Awa kə Yesu ɔɲgbuɲɛnɛ wətətamɛnɛ nwe, kə wəkakə entamɛnɛ, k'ɛsak kə a pəkə.

⁵ Nte tencepər mə, kə Yesu eyif ɲa: «An'eyi nu dacɔ nwe wan kən, kə pəyɔnɛ fɛ ti wana wən wentɛmpɛnɛ dəkələmp dəsək da kəɲesəm, ta ɛmpɛnɛ wi dəsək dadəkə yati mə-ɛ?»

⁶ Kə abɛ akakə ɲantətam kəlukɛ kə məcəp.

Nte aɲyɛk-yɛk dəkəndɛ, kə nte aɲwɛnɛ fum tes mə

⁷ Kə Yesu olok-lokər afum aɲɛ anawe dəkəsata mə, bawo ɛnakəkɛ nte akakə ancgbutələnɛ dəkəndɛ dəcəkə-cəkə mə. K'oloku ɲa:

⁸ «Kə fum ew'am kəkətəɲnɛ kəsata ka kəgbəɲnɛ kən-ɛ, ta məkə mənɔɲɛ dəkəndɛ dəcəkə-cəkə, bawo təlɔma wəka kəsata ewe sɔ fum wəlɔma kəsata kaɲkə, nwe encepər mənana mə.

⁹ Ta tɔsɔɲɛ wəkə ewe nu kəsata mə, kədɛlok'əm: «Məyɛfɛ məsakərə nwe dəkəndɛ dadəkə.» Kələpərɛnɛ kə mənɲkə kəyɛfɛ dəkəndɛ dəcəkə-cəkə dadəkə kəkəndɛ dadarəɲ dəkə.

10 Mba, k'aw'am kəsata-ε, məkə mändε dəkändε dadarəη, nte təηsəηe nwe ew'am kəsata mə k'ender pənəηk əm-ε, pəlök'am: «Wanapa, məcəηne kirin.» Awa təm tatəkə mənə mələe nno afum aηe nəηkəpəηne amesa kədi yeri mə.

11 Nwe o nwe oyokne mə, andetore kə. Nwe o nwe ontore banca mə, andepene kə.»

12 Kə Yesu oloku fum nwe enawe kə kəsata mə: «Kə məwe afum kədi yeri yeraη, kə pəyənε fε ti yərəfəy-ε, ta məwenε yi akos'am aηa, ta məwenε yi awenc əm aηa, ta məwenε yi akomene am, ta məwenε yi andε am aka daka. Nte təηsəηe ta ηadetam kəlukse ayek ηa kəwenε yeri mə.

13 Mba kə mändewene afum yeri-ε, məwe atəyə daka, lanyiru, atorər kə atənəηk.

14 Təm tatəkə pəbət əm, bawo ηayə fε daka nde ηəηkəluxe'am kəway ka pətət papəkə mə. Kanu gbəcərəm kəndekətam kəluxe'am kəway kaηkə, nde ayə pətət ηandekəyefe defi mə.»

Capafə ca yeri ya kəsata

Mat 22.1-10

15 Nte afum ηane moloku mame mə, kə fum wələma nwe enandε demesa mə, oloku Yesu: «Pəbət mənə nwe mändekədi yeri nde akip ηa dεbe da Kanu dəntəf mə!»

16 Kə Yesu oloku fum wəkakə: «Fum wələma enaboc kəsata kəpəη, k'ewene ki afum alarəm.

17 Nte təm ta kədi yeri yayəkə tendebəp mə, k'osom wəcar kən kəkəloku afum aηe ewe kəsata mə: «Nəder! Alip kəcəη.»

18 Mba kə kan-kan eyefe kəletsene kə. Kə wəcəkə-cəkə oloku kə: «Məηəηnen'em, dale d'iway idə pəmar ikə iməmən. İletsen'am ta məsumpər'em ti!»

19 Kə wəka mərəη oloku kə: «İway cəna cəbifti wəco, ic'ifan kəkəwak. İletsen'am ta məsumpər'em ti!»

20 Kə wəka maas oloku sə: «İntep kəcgbəηne, itə intətam kəkəne!»

21 Kə wəcar nwe ender pəluxe mosom maməkə mariki mən, kə pəntεe kə, k'oloku wəcar: «Məkə katəna nde mofə məpəη kə nde səpə səpəη sa dare! Məwen'em atəyə daka, lanyiru, atorər kə atənəηk.»

22 Kə wəcar ender pəluku kə: «Mariki nte məsom im mə telip, mba yeri yəsərəcəme!»

23 Kə mariki mən oloku kə sə: «Məkə səpə sa dəkulum kə dəηgbancan, məloku afum ηabere nte təηsəηe kələ kem kəlare mə.»

24 Bawo, icloku nu: Arkun akakə inanunke ne kəwe kəsata kaηke mə, ali wəkin əfəsədi yeri ya ki.»

Cəke cə aηyi a patam kəyənε wəcəpse ka Yesu darəη-ε

Mat 10.37-38

25 Kənay kənacəme Yesu darəη, kə Yesu eηkafəle, k'oloku ηa:

26 «Məna nwe mənçeps'em darəŋ mə, pəmar mətam kəce wisi kə wiri, kə wəran kam, kə awut am, awənc əm anja arkun, akirə am kə kiyi kam doru yati, kə pəyi fə ti-ε, fum wəkakə ofətam kəyənə wəçepsə kem darəŋ.

27 Məna nwe o nwe məntəwosə kətərəs kə kəfi mə, məfətam kəyənə wəçepsə kem darəŋ.

28 Bawo nəna akanje daco, məna nwe mənfan kəcəmbər kələ mə, məfəndə kərəsna mələm daka dəkə mənəkəbersə teta kələ kam mə, kə pəyənə a daka dadəkə dentam kəlip kəcəmbər ka kələ kanəkə-ε.

29 Mba kə nəncop kəcəmbər kələ ta nəlip kəcəmbər ki, nwe o nwe ənəŋk ki mə, endeselər nu

30 pəcloku: «Afum akanje nancop kəcəmbər kələ mba nantam fə ki kələpəs.»

31 Itə pəyi wəbe nwe ənfan kəkəsutənə kə wəbe wələma mə, mənə pəndə pəməmən kə pəyənə, afum wul wəco (10.000) nantam kəsutənə kə afum wul wəco mərəŋ (20.000) aka wəbe wəkə nənəkəsutənə mə.

32 Kə pəyənə fə ti-ε, nənşərəbələnə, wəbe wəka afum wul wəco (10.000) pəsom nda wəbe wəka afum wul wəco mərəŋ (20.000) wəkə nənəkəsutənə mə, nte pəmar pəkət ta nəsutənə mə.

33 Awa, məna nwe o nwe məntəce ca yəkə məyə mə, məfətam kəyənə wəçepsə kem darəŋ.»

*Mər mmə mēndencə mə
Mat 5.13; Mark 9.50*

34 «Paka pətət pə mər məyənə, mba kə mər mēndencə-ε, ak'antam mi kəbətse-ε?»

35 Mər mēdenc məfətesə tēm tatəkə antəf, məfətesə ncek-cək ya yəbəf, mənə pagbal mi dəyika. Məna nwe mənjo ləŋəs məcne mə, mənə ti!»

15

*Capafə ca ankesiya nje nenasələ, k'anəŋk sə ŋi mə
Mat 18.12-14*

1 Abanəs dut kə afum aciya nələtərnə Yesu kəkəcənəkəl kə.

2 AFarisi kə acicəs a sariyə naccəpənə: «Fum wəkawə ənşələnə aciya, pəwosə kədi yeri kə ŋa.»

3 Mba kə Yesu oloku ŋa capafə nce:

4 «Nəna afum akanje daco, an'əŋjo ŋkesiya tasar tin (100), a ŋin nəsələr kə, ta əsak yəkə wəco camət-manjələ kə camət-manjələ (99) dətegbərə kəkəten ŋin nəkə nəsələr kə mə, han pənəŋk ŋi-ε?»

5 Kə wəkayi əŋkə pənəŋk ŋi-ε, pəgbanjə ŋi amera nəbotu disrə,

⁶ ɔnckɔnabɛrɛ nde ndɔrɔn, ewe anapa ɔn kɔ andɛ ɔn nde ndɔrɔn, pɛloku ŋa: «Nɛwolɛs kɔ ina, bawo inɛŋk aŋkesiya ŋem ŋɔkɔ ŋenasɔlɛr im mɔ.»

⁷ Icloku nu: Pɛbotu pɛŋkɔyi darenc teta fum wɛkin nwe ɔŋkɔsɛkpɛr amera pɛcɛmɛ dɔpɔ dolompu darɛŋ mɔ, pɛtas teta afum wɛcɔ camɛt-manɛkɛle kɔ camɛt-manɛkɛle (99) aŋɛ pɛntɔmar kɛsɛkpɛr mera, bawo ŋalomp mɔ.»

Capafɔ ca pɛsam gbɛlɛŋ mpɛ pɛnasɔlɛ, k'anɛŋk sɔ pi mɔ

⁸ «Kɔ pɛyɔnɛ fɛ ti-ɛ, wɛran wɛrɛ ɔŋyɔ pɛsam gbɛlɛŋ wɛcɔ, a gbɛlɛŋ bin bɔsɔlɛr kɔ ta omot lamp, ta ɛfɛŋ kɛlɔ, ta entɛn pi belbel, haŋ pɛnɛŋk pi mɔ?

⁹ Kɔ wɛran nwe ɛnɛŋk pɛsam gbɛlɛŋ mpɛ-ɛ, ɛŋwe anapa ɔn, kɔ andɛ ɔn, pɛloku ŋa: «Nɛwolɛs kɔ ina bawo inɛŋk pɛsam gbɛlɛŋ mpɛ pɛnasɔlɛr im mɔ.»

¹⁰ Icloku nu, pɛbotu pɛyi mɛlɛkɛ a Kanu dacɔ teta fum wɛciya wɛkin gbɔŋ nwe ɛŋsɛkpɛr amera pɛcɛmɛ pɛlompu darɛŋ mɔ.

Capafɔ ca wɛtɛmp wɛsɔlɛ, k'anɛŋk kɔ sɔ mɔ

¹¹ Kɔ Yesu oloku sɔ: «Fum wɛlɔma ɛnayɔ awut arkun mɛrɛŋ.

¹² Kɔ wɛkɔ ɛfɛtɛ mɔ, oloku kas: «Papa mɛsɔŋ im da pɛmar idesɔtɔ kɛ kam mɔ.» Kɔ kas ɛyer daka dɔn awut ɔn akanɛ mɛrɛŋ dacɔ.

¹³ Ntɛ mataka mɛpic mencepɛr mɔ, kɔ wan wɛfɛt ɛncamɛs daka dɔkɔ ɛnasɔtɔ mɔ fɛp. K'osumpɛr dɔpɔ k'ɔŋkɔ pɛbɔlɛ, atɔf ŋocuru. Nde ɛnakɔ pɛyi yamayama pɛclɛsɛr-lɛsɛr daka dɔkɔ ɛnayɔ mɔ.

¹⁴ Ntɛ wan nwe elip kɛdi daka dɔn mɔ, kɔ dor dɔpɔŋ dɛmbɛrɛ atɔf ŋaŋɔkɔ ɛnayi mɔ, kɔ ca yoncɔp kɛbut kɔ.

¹⁵ K'ɔŋkɔ pɛyi nda fum wɛlɔma wɛka atɔf ŋaŋɔkɔ, wɛkɔ ɛnasɔŋ kɔ kɛkɛk ka sɔp yɔn mɔ.

¹⁶ Wan nwe pɛfan kɛdi yeri ya sɔp, mba ali fum ɛnasɔŋ fɛ kɔ yi.

¹⁷ Awa, k'ɛyɛfɛ kɛcɛm-cɛmɛnɛ teyi tɔn, k'olokunɛ: «Afum cɛke ŋayi kɛbɛc ndena papa kem aŋɛ ŋayɔ cɛcom cɛlarɛm mɔ, a ina icfinɛ nnɔ dor.

¹⁸ Kɛyɛfɛ k'inder ikɔ ndena papa kem ikɔ iloku kɔ: Papa inciya Kanu, k'inciya sɔ mɛna.

¹⁹ Imbut pɛleli mpɛ pɛmar mɛsumpɛr'em pɛmɔ wan kam mɔ. Mba mɛsumpɛr im ɔŋ pɛmɔ wɛbɛc kam.»

²⁰ Kɔ wan nwe ɛlɛk dɔpɔ k'olukus ndena kas.»

«Ɖsɔrɔbɔlɛ, kɔ kas ɛnɛŋk kɔ, kɔ nɔnɔfɔr dɔpɔŋ dosumpɛr kɔ. Kɔ kas ɛyɛkɛ kɛkɔfayɔnɛ kɔ, k'ɛnɛpsɛrɛnɛ kɔ dɛkilim, k'ɔncup kɔ.

²¹ Kɔ wan oloku kɔ: «Papa, inciya Kanu, k'inciya'am, pɛmar fɛ sɔ mɛsumpɛr im pɛmɔ wan kam.»

²² Mba kɔ kas kɛloku acar ɔn: «Nɛkɛɛ duma dɔtɔt nɛbɛr kɔ! Nɛbɛr kɔ kurundɛ dɛtɛlɛr, nɛsɔŋ kɔ cɔfta!

²³ Nɛkɛɛ tana tetifi tɔkɔ, nɛdif pi. Padi yeri, pawolɛs!

²⁴ Bawo wan kem wɛkawɛ nɛŋnɛŋk mɔ, ɛnafi, mba olukus sɔ kɛder doru! ɛnasɔlɛ, mba inɛŋk kɔ sɔ!» Kɔ ŋayɛfɛ kɛwolɛs.

²⁵ Tɛnatɛŋnɛ Coco pɛyi dalɛ. Ntɛ wɛkakɔ ender pɛlɔtɛrnɛ kɛlɔ kɛŋan mɔ, k'ɛnɛ tɔkɔ aŋfer pacpise mɔ.

²⁶ Kɔ Coco ewe wɛcar wɛkin k'eyif kɔ tes ntɛ teyi kɛlɔ kɛŋan mɔ.

²⁷ Kɔ wɛcar oloku Coco: «Wɛnc ɛm eder, mba ntɛ olukus kɛtamnɛ disrɛ mɔ, itɔ papa kam endifɛ tana petifi pɔkɔ.»

²⁸ Kɔ pɛntɛlɛ Coco nwɛ, ta ɛfan sɔ kɛbɛrɛ dɛkɛr-ɛ. Kɔ kas owur kɛkɔlɛtsɛnɛ kɔ.

²⁹ Mba kɔ wan wɛcɔkɔ-cɔkɔ nwɛ oloku kas: «Mɛrn mɛlarɛm mɔ mamɛ, iy'ɛm darɛŋ icbɛc'am pɛmɔ wɛcar, ali dɔsɔk din inŋbɛkɛl fɛ mosom mam, mba ali dɔsɔk din sɔ mɛna mɛsɔŋ f'em tir idif sɛwolɛs kɔ anapa em.

³⁰ Mba ntɛ wan kam wɛkawɛ ender mɔ, nwɛ ɔŋkɔ pɛlɛsɛr-lɛsɛr daka dam kɔ aran ayamayama mɔ, nkɔn tan mɛndifɛ kɔ tana petifi pɔkɔ!»

³¹ Kɔ kas kɛloku Coco, «Mɛna wan kem, sɛn'eyi dɛ kɔ mɛna, daka ndɛ o ndɛ iyɔ nnɔ mɔ, dam dɔ!

³² Mba pɛmar yati paboc kɛsata, pawolɛs: Bawo wɛnc ɛm wɛkawɛ mɛŋnɛŋk mɔ, ɛnafi, k'olukus sɔ kɛyi doru. ɛnasɔlɛ, k'anɛŋk kɔ sɔ.»

16

Capafɔ ca wɛcɛmbɛr-cɛmbɛr daka

¹ Kɔ Yesu oloku acɛpsɛ ɔn darɛŋ: «Fum wɛka daka wɛlɔma ɛnayɔ wɛcɛmbɛrɛ-cɛmbɛrɛ daka, k'ander payɛmsɛnɛ kɔ, a ɛŋlɛsɛr-lɛsɛr daka da mariki mɔn.

² Kɔ mariki mɔn mɛwɛ kɔ, pɛcloku kɔ: «Cɛkɛ c'ine tetam-ɛ? Mɛsɔŋ'em kɛcɛrɛ tɔkɔ mɛncɛmbɛr-cɛmbɛr daka dem mɔ, bawo mɛfɔsɔyɔnɛ wɛcɛmbɛr-cɛmbɛr daka dem.»

³ Kɔ wɛcɛmbɛr-cɛmbɛr daka nwɛ olukunɛ dɛbɛkɛc: «Cɛkɛ c'indeyɔ-ɛ, bawo wɛka daka nwɛ oloku kɛwɛr'em kɛcɛmbɛr-cɛmbɛr daka dɔn? Iyɔ fɛ fɛnɔntɛr kɛdɛyɔnɛ wɛbifti antɔf, ilapɛrnɛ sɔ kɛctola.

⁴ Incɛrɛ ɔŋ ntɛ indeyɔ, a afum ŋabaŋ im wɛlɔ wanŋan disrɛ kɔ wɛkawɛ owur'em kɛcɛmbɛr-cɛmbɛr daka dɔn-ɛ.»

⁵ Kɔ wɛcɛmbɛr-cɛmbɛr daka nwɛ ewe fum wɛcɔkɔ-cɔkɔ wɛkɔ ɛnatɔmpɛrɛ mariki mɔn dɛbɛ mɔ. K'eyif kɔ: «Cɛkɛ cɔ mɛntɔmpɛrɛ mariki mem dɛbɛ-ɛ?»

⁶ Kɔ wɛkakɔ oloku kɔ: «Moro ma olif kokos tasar tin (100).» —«Awa, mɛlɛk areka, mɛndɛ mɛcic: 50.»

⁷ K'eyif sɔ wəlɔma: «A mənə-a, cəke cɔ məntɔmpər-ε?» Kɔ wəkəkɔ oloku: «Malɔ busul tasar tin (100).» —«Awa, məndə mələk areka, məcic 80.»

⁸ Kɔ wəka daka nwe ɔŋkor-koru wəcəmbərə-cəmbərə kən daka wətɔlomp nwe nte ɔŋkət belbel mə. Awa, afum a doru ŋancərə kəyɔ mes tarjan pətas akɔ ŋayɔne aka pəwanjkəra mə.»

⁹ Kɔ Yesu ɔnɔcər: «Icɔluku nu: Nətene daka dətɔsɔk anapa, itɔ ɔŋsɔŋe kɔ dendelip-ε, pabaŋ nu nde nəŋkɔyi doru o doru mə.

¹⁰ Mənə nwe aŋlaŋ teta tes tɛfɛt mə, antam sɔ kəlaŋ əm teta tes tɔpɔŋ. Mənə nwe məntɔlomp teta tes tɛfɛt mə, məfɔlomp teta tɛs tɔpɔŋ.

¹¹ Kɔ məntɔlomp kəcəmbər-cəmbər ka daka dətɔsɔk nde deyɔ doru dandɛ mə, an'endesɔŋ əm kəcəmbər-cəmbər ka daka dosoku-ε?

¹² Kɔ məntɔlomp teta daka da fum-ε, an'endesɔŋ əm nde dɔyɔne dam mə-ε?

¹³ Ali wəcar wəkin ɔfɔtam kəbəcə abe mɛrəŋ. Kɔ teyi-ε, enter wəkin pəbətər wəkɔ, kɔ pəyɔne fɛ ti-ε, pəsektərne wəkin, pəbər wəkɔ kumunt. Nəfɔtam kəbəcə Kanu kɔ pəsam tɛm tin.»

Moloku mənəŋksəl ma Yesu

Mat 11.12-13; 5.31-32; Mark 10.11-12

¹⁴ AFarisi, aŋe ŋanabətər pəsam mə, kəne ka moloku mame, kɔ ŋayɛfɛ kəfani Yesu.

¹⁵ Kɔ Yesu oloku ŋa: «Nənə, nəncəmbərne afum alompu nno awenc nu aŋa ŋayi mə, mba Kanu kəncərə nu bəkəc, bawo nte afum ŋampene darenc mə, itɔ Kanu nkən ence.

¹⁶ Tɛm ta Sariye sa Musa kɔ ta sayibe tenawon haŋ tɛm ta Saŋ. Kəyɛfɛ ɔŋ tɛm tatəkɔ, k'ancop kədəŋk Kibaru Kətət ka dəbe da Kanu, nwe o nwe kəsıməse k'endɛ kəberɛ ka di dəntɔf.

¹⁷ Mba pəfəfərənɛ kəm kɔ antɔf kəsəle, pətas tofo tɛfɛt ta pecic pin* pa sariye kətempene.

¹⁸ Nwe ence wəran kən pəkɔ pənence wəlɔma mə, dəkəcəme da wəsumpər dalakɔ d'eyi. Nwe o nwe enence wəran nwe wos ence mə, dəkəcəme da wəsumpər dalakɔ d'eyi.»

Capafɔ ca wəka daka kɔ Lasar

¹⁹ «Wəka daka wəlɔma enayi, pəcbərne yamos yətət, yeyenki kəway. Dəsək o dəsək pəyi pətət disre, pəcđi yeri yətət.

²⁰ Kəlɔ kən kiriŋ, fum wətəyɔ daka o daka wəlɔma, nwe ancwe Lasar mə, pəyɔ runc, pəfəntərə kusunka kən.

²¹ Lasar nwe pəfaŋ kəcburuk yeri nyɛ yentempene-tempene amesa dəntɔf ŋa wəka daka nwe mə, pəđi. Mba kɔ cen yender yɛcnɛntəs runc yən.

* 16:17 Itɔ ɔyɔne cəsoma «sigire»

22 Kɔ Lasar efi, kɔ mɛlɛkɛ mender mɛlɛk kɔ, kɔ mɛnʒekɛrɛ kɔ kɛkɔŋɛsɛm nde Abraham kɛsɛk. Kɔ wɛka daka nwɛ ender pɛfi, k'awup kɔ.

23 Nde kɛfo nkɛ afi ŋanʒkɔ mɔ, kɔ wɛka daka eyekti fɔr, k'ɛnɔŋk pɛbɔlɛ Abraham kɔ Lasar pɛɔŋɛsɛm kɔ kɛsɛk.

24 Kɔ wɛka daka nwɛ ŋɔkulɛrɛ: «Papa Abraham, mɔyɔn'em nɔnɔfɔr! Mɛsom Lasar pɛgbɛt tɛlɛr tɔn dɛromun pɛder pɛaŋkɛs im temer, bawo kɛtɔrɔ k'indɛ nnɔ nɛnc dandɛ.»

25 Kɔ Abraham oloku kɔ: «Wan kem, mɛcɛm-cɛmnɛ a mɛnasɔtɔ daka dam ntɛ mɛnayi doru mɔ, kɔ Lasar nkɔn ɔsɔtɔ pɛcuy kiyi kɔn doru. Ndekɛl ɔŋ, kɛŋɛsɛm k'eyi, mɛna mɔyi sɔ dɛmnɛ pɛcuy.»

26 Kɔ tɛyɛfɛ dɛnda-ɛ, dobo dɔpɔŋ deyi su dacɔ kɔ nɛna ntɛ tɔŋsɔŋɛ nwɛ ɛŋfan kɛcɛpɛr pɛder nnɔ sɔyi mɔ, ta ɛntam-ɛ.»

27 Kɔ wɛka daka nwɛ oloku: «Iɛtsɛn'am, Papa, mɛsom Lasar nde kɛlɔ ka papa kem.»

28 Bawo, iyɔ di awɛnc aŋa kɛcamɛt, Lasar pɛkɔ pɛloku ŋa ntɛ tɛyi nnɔ mɔ, ntɛ tɔŋsɔŋɛ ta ŋa sɔ ŋadeder nnɔ pɛcuy pampɛ peyi mɔ.»

29 Kɔ Abraham oloku: «Ala, awɛnc ɛm aŋa ŋayɔ Musa kɔ adɔŋk a Kanu. ŋacɛŋkɛl ŋa.»

30 Kɔ wɛka daka nwɛ oloku Abraham: «Ala, Papa, kɔ fum ɛyɛfɛ nnɔ afi ŋayi mɔ pɛkɔ pɛlok-lokɛr ŋa-ɛ, ŋaŋsɛkpɛr mera ŋacɛmɛ pɛlompu darɛŋ.»

31 Kɔ Abraham oloku kɔ: «Kɔ ŋantɔcɛŋkɛl Musa kɔ adɔŋk a Kanu-ɛ, ali fum ɛyɛfɛ nnɔ afi dacɔ, ŋafɔkɔcɛŋkɛl wɛkayi.»»

17

*Kiciya kɔ kɛŋaŋɛ ******

Mat 18.6-7; Mark 9.42

1 Kɔ Yesu oloku acɛpɛ ɔn darɛŋ: «Pɛfɔtam kɛyi ta mes meyi mɛmɛ mɔsɔŋɛ fum kɛlɔŋɛ mɔ. Mba pɛlɛc peyi nwɛ ɔŋsɔŋɛ mi kɛyi mɔ.»

2 Pɛfɛfɛrɛnɛ kɛkɔt wɛkayi tɛsar tɔpɔŋ dɛkilim pagbal kɔ dɛkɛba, kɔ pɛyɔnɛ wɛkayi pɛsɔŋɛ wɛfɛfɛr wɛkin kɛlɔŋɛ-ɛ*.

3 Nɛkɛmbɛrɛnɛ belbel!

Kɔ wɛnc'am enciya-ɛ, mɛgbɔŋ-gbɔŋɛr kɔ. **K'ɛsɛkpɛr amera pɛcɛmɛ pɛlompu darɛŋ-ɛ**, mɛŋaŋɛnɛ kɔ.

4 Kɔ wɛnc'am enciy'am camɛt-mɛrɛŋ dɔsɔk din disrɛ-ɛ, a pɛluksɛrɛnɛ kɛdɛr'am camɛt-mɛrɛŋ pɛclɔk'am: «Kɛsɛkpɛr k'inder amera few, incɛmɛ pɛlompu darɛŋ-ɛ,» mɛŋaŋɛnɛ kɔ.»

5 Kɔ asom a Yesu darɛŋ ŋaloku Wɛbɛ: «Mɛbɛrɛnɛ su kɛlɔŋ!»

* 17:2 Pɛsɔŋɛ fum wɛfɛfɛr wɛkin kɛlɔŋɛ = pɛsɔŋɛ fum wɛfɛfɛr kɛciya

6 Kɔ Mariki oloku ŋa: «Kɔ nɔntɔmpɛr kɛlanj nke kɛyi pɛmɔ tɛŋgbɛn tɛfɛt mɔ, nɔntam kɛloku kɛtɔk nke: Mɛgbukte nnɔ mɛkɔ mɛcɛmɛ nde dɛkɛba, kɛtɔk kanj kɔ kɛyɔ tɛfanj tonu.»

7 «Nɛna akanjɛ dacɔ, anɔ ɔyɔ wɛcar nwe embifti, kɔ pɛyɔnɛ fɛ ti wɛkayi pɛckɛk, a pɛckɔnayɛfɛ dale, pɛloku kɔ: «Mɛder katɛna mɛder mɛndɛ dɛmɛsa!»

8 Ntɛ onjloku kɔ mɔ: «Mɛlompɛs'em yeri yem, mɛbɛrne duma mɛsɔŋ im yeri, hanj ilip kɛdi yeri imun. K'ilip-ɛ, mɛna mɛdi yeri mɛmun.»

9 Wɛka wɛcar kakɔ ɛnyek-yekɛs kɔ bawo ɔyɔnɛ kɔ mes mɛkɔ ɛfanj mɔ ba? Ala!

10 Tin tayi tɔ kɔ nɛna, kɔ nɛlip k'ɔyɔ mes mɛkɔ afaŋɛr nu mɔ fɛp-ɛ, nɛloku: «Acar gbɛcɛrɛm ŋɔ sɛyɔnɛ. Ntɛ pɛmar su kɛyɔ mɔ, tɔ sɛyɔ.»»

Yesu kɛtamɛs kɛn acunɛ sen wɛco

11 Yesu eyi kɛkɔ Yerusalem, kɔ Yesu ɛyɛfɛ kɛcali atɔf ŋa Samari kɔ ŋa Kalile dacɔ.

12 Eyi kɛbɛrɛ tadare tɔlɔma, kɔ afum wɛco acunɛ sen alɔma ŋander ŋafaynɛ kɔ, kɔ ŋancɛmɛ pɛbɔlɛ.

13 Kɔ ŋampɛnɛ sim ŋacloku: «Yesu, Mariki, mɛyɔnɛ su nɔnɔfɔr!»

14 Ntɛ Yesu ɛnɛŋk ŋa mɔ, k'oloku ŋa: «Nɛkɔ nɛmentɛrne alɔŋnɛ nde kɛlɔ kɛpɔŋ ka Kanu.» Afum anjɛ ŋayi kɛkɔ, kɔ pɛyɔnɛ a ŋasɔk a kɔ ŋandeberɛ di.

15 Ntɛ wɛkin ɛnɛŋkɛnɛ pɛtamnɛ mɔ, k'oluksɛrne pɛccam debeki da Kanu dim dɔpɔŋ.

16 K'ɛfɛntɛrɛ dɛntɔf, k'osumpɛr Yesu wɛcɛk, k'eyek-yekɛs kɔ.† Fum wɛkakɔ, wɛSamari ɛnayi.

17 Kɔ Yesu eyif kɔ: «Bafɔ asɔkɛs afum anjɛ wɛco? Deke alpɛs anjɛ camɛt-manj kɛlɛ ŋayi-ɛ?»

18 Ali wɛkin ɛncɛm-cɛmɛnɛ fɛ kɛluksɛrne **pɛdecam debeki da Kanu**, mɛnɛ wɛcikɛra wɛkin wɛkawɛ?»

19 Kɔ Yesu oloku kɔ: «Mɛyɛfɛ mɛkɔ, kɛlanj kam kɛyac ɛm.»

Kɛder ka debɛ da Kanu

Mat 24.23-28,37-41

20 Ntɛ aFarisi ŋayif Yesu tɛm ntɛ debɛ da Kanu dɛdɛder mɔ, k'oloku ŋa: «**Dɛbɛ da Kanu** dɛfɔder pagbɛtɛnɛ di fɛp.

21 Afɔkulɛ di, «Id'ɛndɛ nnɔ!», «Idɔkɔ nde!» Bawo debɛ da Kanu nɛna ŋɔ deyɛ dacɔ.»

22 Ntɛ Yesu elip kɛloku ŋa ti mɔ, k'oloku acɛpsɛ ɔn darɛŋ: «Dɔsɔk dɛndebɛp nde nɛndɛfanj kɛnɛŋk dɔsɔk din da Wan ka Wɛrkun mɔ, mba nɛfɔsɔnɛŋk di.

23 Andɛloku nu: «Eyi nnɔ!» kɔ pɛyɔnɛ fɛ ti-ɛ «Eyi nde!» Ta nɛdekɔ di, ta nɛdeyɛksɛrne kɛkɔ di.

† 17:16 K'eyek-yekɛs kɔ = «k'eyif Yesu barka teta kɛtamɛs kɛn.»

²⁴ Ti disre, dəsək nde Wan ka Wərkun endeder mə pəndeyi pəmō nte pəmot pənsəŋ pəwanjəra pa darenc kəyefe kəsək kin haŋ ka merəŋ mə.

²⁵ Mba mēne pətəro pəpəŋ kəesna, afum a tēm tante ŋawenəs kə.

²⁶ Təkə tenacepər tēm ta Nuha mə, tendecəpər sə dəsək da Wan ka Wərkun.

²⁷ Afum ŋancdi yeri, ŋacmun, arkun kə aran ŋacnencene haŋ dəsək nde Nuha enabere debil mə: Kə kutup kənder nke kənamələk afum fəp mə.

²⁸ Pəndeyi pəmō tēm ta Lət. Afum ŋancdi yeri, ŋacmun, ŋacway, ŋaccaməs, ŋacbəf, ŋaccəmbər wəlo.

²⁹ Mba dəsək nde Lət owur Sodom mə, nenc kə pərbəlo yeŋatuf Sodom kə yemələk ca ya di fəp.

³⁰ Itə pəndeyi dəsək nde andementər Wan ka Wərkun mə.»

³¹ «Dəsək dadəkə nwe enyi dabanjka mə, ta pəbere dəkələ pələk ca yən. Fum nwe tēmbəp dale mə, ta pəlucus nde ndərən.

³² Nəcem-cəmnə wəran ka Lət.‡

³³ Məna nwe məndesəp kəmenj kəyi doru kam mə kəndesalpər əm, kə məna nwe kəŋsalpər mə, məndesəmenj kə ki.

³⁴ Icloku nu: Pibi papəkə, afum merəŋ ŋandefəntərə kəfənc kin, pələk wəkin, pasak wəka merəŋ.

³⁵⁻³⁶ Aran merəŋ ŋandeyi kəcə kirir kin, pələk wəkin pasak wəka merəŋ. §

³⁷ Kə acəpse ən darəŋ ŋayif kə: «Deke tatəkə tendekəyi-ε, Mariki?» Kə Yesu olokse ŋa: «Nde pefi peyi mə, difə yəfən yendebəpsene.»

18

Capafə ca wəran nwe wos efi mə, kə wəboc kiti

¹ Kə Yesu oloku ŋa capafə, kəmentər ŋa a mēne ŋaclok-lokər **Kanu** tēm o tēm ta dis dələl ŋa.

² K'oloku: «Dare dələma dənayı dəyə wəboc kiti nwe enatə kəcnese Kanu mə, ali fum ta eleləs-ε.

³ Dare dadəkə dəyə sə wəran wətəlo wələma nwe encder pəcloku kə: «Məboc'em kiti kə wəyefərene kem dacə!»

⁴ Kə wəboc kiti nwe efatər kə haŋ, k'ende pəlokune dəbəkəc: «Ali nte intəcərə Kanu, ta ileləs nwe o nwe mə,

⁵ nte wəran nwe wos efi, ələləs im dis mə, ibocə kə kiti kə wəyefərene kən dacə, nte tendesəŋe kə kətəgbəkəre-gbəkəre sə kəder mə, pədenanjkanə kələləs im dis.»»

17:27 Dəkəcop 6.9-7.24 17:29 Dəkəcop 19.24 ‡ 17:32 Məməmən Dəkəcop 19.26

§ 17:35-36 Andəŋər yeyicəs yələma «Arkun merəŋ ŋandeyi dale din dayi, pasumpər wəkin pasak wəkə.»

6 Kɔ Mariki ɔnɔcɛr: «Nɛcɛŋkɛl nte wɛboc kiti wɛtɔlomp ɔŋloku mɔ.

7 Kanu nkɔn ɔfɔdekɔboce afum ɔn aŋe kiti ba, aŋe ŋambokɛr kɔ pibi kɔ dan mɔ? Endesɔŋe ŋa kɛwon kɛkar ba?

8 Icloku nu: Ɔfɔdesɔŋe ŋa kɛwon kɛkar, endeboce ŋa kiti katɛna katɛna. Mba kɔ Wan ka Wɛrkun endeder-ɛ, endebɔp kɛlan doru ba?»

Capafɔ ca wɛFarisi kɔ wɛwɛrɛs dut

9 Kɔ Yesu oloku sɔ capafɔ nce afum alɔma aŋe ŋanacɛm-cɛmne kɛlomp, a ŋacfani akɔ mɔ:

10 «Kɔ afum mɛrɛŋ ŋampɛ kɛkɔtola Kanu nde **kɛlɔ kɛpɔŋ ka Kanu**, wɛkin nwe pɛyɔnɛ wɛFarisi, wɛkɔ pɛyɔnɛ wɛwɛrɛs dut.

11 WɛFarisi nwe pɛcɛmɛ pɛclok-lokɛr Kanu dɛbɛkɛc nte: «Kanu, iyif ɛm barka* nte intɔyi pɛmɔ afum alpɛs akɔ ŋayɔnɛ abanɛs ca ya afum mɔ, ta ŋalomp, ŋacsumpɛr dalakɔ, nte intɔyi pɛmɔ wɛwɛrɛs dut nwe mɔ.

12 Kɛmɛrɛŋ k'ɛŋsun ɔsɛk doluksɛr disrɛ, icsɔŋ sɔ farilɛ fɛp fa yɔsɔtɔ yem.»

13 Wɛwɛrɛs dut nwe nkɔn pɛcɛmɛ pɛbɔlɛ, pɛcnɛsɛ kɛyɛkti fɔr darenɛ yati, mba pɛcsut-sutnɛ abɛkɛc kɛcloku: «Kanu mɛŋaŋnɛn'em, ina wɛciya!»

14 Icloku nu: Fum wɛkakɔ ɛnalomp nnɔ Kanu kɛyi mɔ, a k'endelukus nde ndɔrɔn. Mba wɛFarisi ɛnalomp fɛ nnɔ Kanu kɛyi mɔ. Nwe o nwe ɔŋyoknɛ mɔ, andetɔrɛ kɔ. Nwe o nwe otɔrɛ banca mɔ, andepɛnɛ kɔ.»

Yesu kɛtolanɛ kɔn awut afɛt

Mat 19.13-15; Mark 10.13-16

15 Afum ŋanckɛrɛ Yesu ali cɛnaka nte tɔŋsɔŋe pɛcɔdɛŋɛr ŋa waca teta kɛtolanɛ ŋa pɛtɔt. Nte acɛpse ɔn darɛŋ ŋanɛŋk ti mɔ, kɔ ŋaŋgbɔŋ-gbɔŋɛr ŋa.

16 Mba kɔ Yesu ɔlɔtɛrnɛnɛ awut pɛcloku: «Nɛsak awut ŋader nnɔ iyi mɔ! Ta nɛyamsɛr ŋa kɛdɛr, bawo afum aŋe ŋayi pɛmɔ awut afɛt akanɛ mɔ, ŋa ŋayɔ dɛbɛ da Kanu.

17 Awa! Kance icloku nu: Nwe o nwe ɔntɔfaynɛ dɛbɛ da Kanu pɛmɔ wanfɛt mɔ, ɔfɔdekɔbɛrɛ di disrɛ.»

Wɛrkun wɛka daka ɔɛlarɛm

Mat 19.16-30; Mark 10.17-31

18 Kɔ wɛbɛ wɛlɔma eyif kɔ: «Wɛtɛksɛ wɛtɔt, cɛke cɔ pɛmar im kɛyɔ, isɔtɔ kiyi wɛyɛŋ ka doru o doru-ɛ?»

19 Kɔ Yesu eyif kɔ: «Ta ake tɔ mɛwɛn'em «Wɛtɔt»-ɛ? Ali fum ɔyɔnɛ fɛ wɛtɔt, mɛnɛ Kanu sona gbɔŋ.

* 18:11 *Iyif'ɛm barka* = *Iyek-yekɛs'ɛm*

²⁰ Māncārē mosom ma Kanu: Ta mēsumpār dalakō, ta mādif fum, ta mākīyē, ta mēbanjē fum sede sa yem, mēlelās wisi kō wiri.»

²¹ «Ilelās mamōkō fəp kāyēfē isōrōfētē,» fum wākakō pəcloku.

²² Ntē Yesu ene kō dim mō, k'oloku kō: «Awa tes tin gbonj tobut əm: Məcaməs daka nde məyō mō fəp, məyer pəsam papōkō atōyō daka, məndekōsōtō daka dēlarəm nde dəKōm. Kō mēlip-ē, mēder məcəps'em darəj.»

²³ Ntē fum nwē ene moloku ma Yesu mō, kō abōc ηembere kō, bawo enayō daka pəcəpərər.

²⁴ Ntē Yesu enəjk abōc ηembere kō mō, k'oloku: «Pəncuca aka daka kəbere ka akip ηa dēbe da Kanu dəntəf.

²⁵ Pəfəfərəne yəkōmē kəbere ka abi ηa tēsēmbē pətās wəka daka kəbere ka akip ηa dēbe da Kanu dəntəf.»

²⁶ Anjē ηancčəjkəl Yesu mō ηayif kō: «Awa, an'entam oη kəfis-ē?»

²⁷ Kō Yesu oloku ηa: «Ntē tēntambər afum mō, Kanu kəntam ti.»

²⁸ Kō Piyer oloku: «Səna səsak yosōtō yosu ntē təηsəηē səncəm'am darəj mō.»

²⁹ K'oloku ηa: «Awa! Kance icloku nu: Fum eyi fē, nwē enjək kəlō, wəran, awenc, akomēne, kō awut teta dēbe da Kanu,

³⁰ ta wəkayī oηkōsōtō pəla pəcəpərər doru dandē, pəsōtō sō kiyi wəyēj ka doru o doru tēm tekirinj.»

*Yesu endəjk tamaas defi dən kō kədeyēfē kən afi daco
Mat 20.17-19; Mark 10.32-34*

³¹ Kō Yesu elək Asom ən wəco kō mērəj, k'oloku ηa: «Nəcəjkəl im, Yerusalem ayi kəpē. Mes mmē sayibē a Kanu ηanacīcəs teta Wan ka Wərkun mō fəp, mendekōlarē.

³² Bawo andekōlek kō paber atōyōne aSuyif dəwaca. Andekōfani kō, andekōtərəs kō, andekōyuksər kō lin,

³³ andekōsutē kō tərəjkən, a padedif kō. Tataka ta maas ta defi dən pəfōtē afi daco.»

³⁴ Mba Asom ən ηanane fē ti təlōm o təlōm. Njanacərə fē ntē tatōkō toloku mō.

*Yesu kətaməs kən wətənəjk
Mat 20.29-34; Mark 10.46-52*

³⁵ Ntē ηayi kəlōtərne Yeriko mō, tətəηne wətənəjk wəlōma pəndē dəpō kəsək pəctola.

³⁶ K'ene pəkət pa kənay, k'eyif daka nde dender mō.

³⁷ K'aloku kō: «Yesu wəka Nasaret eyi kəcəpər!»

³⁸ K'oηkulərne: «Yesu wan ka † Dawuda, məyōn'em nōnōfər!»

† **18:38** Wan ka Dawuda = Ti təyōne tokule ta aYisrayel = «wəyac kəηan.»

39 Añe ñanasol kɔ Yesu ñayi kɔ tekiriñ mɔ, ñayefe kɔgbəñ-
gbəñər kɔ a pɛcañk, mba pɛcnañkanɛ kɔkulɛ-kulɛ: «Wan ka
Dawuda, mɔyɔn'em nɔnɔfɔr!»

40 Kɔ Yesu encɛmɛ, k'osom a pakere kɔ fum nwe. Nte
alɔtɛrnɛnɛ kɔ mɔ, k'eyif kɔ:

41 «Cɔke cɔ mɔfañ a iyɔn'am-ɛ?» K'oloku: «Mariki, iluksərne
sɔ kənəñk!»

42 Kɔ Yesu oloku kɔ: «Mɔluksərne sɔ kənəñk! Kɔlan kam
kəntaməs əm.»

43 Gbəncana babɔkɔ kɔ fum nwe oluksərne sɔ kənəñk, k'eyefe
k'encɛmɛ Yesu darəñ **pɛccam debeki** da Kanu. Nte afum fəp
ñanəñk tatɔkɔ mɔ, kɔ ñayefe kəkor-koru Kanu.

19

Yesu kɔ Sasey

1 Nte Yesu embere Yerikɔ mɔ, k'encali dare.

2 Awa, kɔ fum wɔlɔma, nwe ancwe Sasey, nwe enayɔne wɔbe
ka awerəs dut, pɔyɔ daka dɛlarəm,

3 pɛctɛn kɛcɛre fum nwe añwe Yesu mɔ, mba enctam fe ti,
bawo afum ñanala, nkɔn pɔbumpsɛnɛ.

4 Kɔ fum nwe encepər kirin k'ɔñkɔ pɛfərəñk dəkətɔk nte
tɔñsɔñe kɔ kənəñk Yesu mɔ, bawo dif'enakɔ kɛcepər.

5 Nte Yesu embəp kətɔt kanɔkɔ dɔntɔf mɔ, k'eyekti fər k'enəñk
fum nwe, k'oloku kɔ: «Sasey məkufe mɔtor, bawo nde kɔlɔ kam
inɔkɔ mɔkɔ iyi.»

6 Kɔ Sasey embelkər kɔtor, k'emban Yesu pɔbotu disre.

7 Nte afum ñanəñk ti mɔ, kɔ ñayefe kɛcɔpɛnɛ, ñacloku: «Ndena
fum wɔciya ɔñkɔ pɔyi.»

8 Mba Sasey nwe enacɛmɛ mariki fər kirin mɔ, oloku:
«Mariki, indesɔñ atɔyɔ daka dacɔ da kəsɔtɔ kem. Nwe o nwe
inanañkanɛ kəbanər pɛlarəm mɔ, indesɔñ wəkayi kəmanɔkɔlɛ
ka tɔkɔ inabanər kɔ mɔ.»

9 Kɔ Yesu oloku kɔ: «Mɔkɔ, Kanu kəyac aka kɔlɔ kanɔkɛ, bawo
mɔna sɔ wəka Abraham mɔyɔnɛ!

10 Bawo Wan ka Wərkun ender kɔdetɛn kɔ kəyac ka añe
ñanasɔlɛ mɔ.»

Capafɔ ca mɛncəmbəl ma kɛma

Mat 25.14-30

11 Afum ñayi kɛcəñkəl Yesu. Kɔ Yesu ɔnɔcər capafɔ cɔlɔma,
bawo ñanalɔtɛrne Yerusalem, afum ñaccem-cɛmnɛ a dɛbe da
Kanu dɔñkɔwur gbəncana babɔkɔ.

12 Kɔ Yesu oloku: «Fum wɔtɔt tokom wɔlɔma, enayefe k'ɔñkɔ
atɔf ñobol-bolu kɛkɔtɛn dɛbe a pɔdeder.

13 Kə fum nwe ewe acar ɔn wəco, k'ɔsɔŋ ɲa nwe o nwe tencəmbəl pa kema kəpəŋ kin, k'oloku ɲa: «Nəckafələ-kafələ pi waca haŋ icder.»

14 Mba afum aka dare dadəkə ɲanater kə, kə ɲasom kəkəloku nde fum nwe ɔnckə kəten dəbe mə: «Səfaŋ fe a fum wəkawe pəyɔne su wəbe!»

15 Kə fum nwe ɔŋkə pəsətə dəbe, nte olukus mə, k'ewe acar ɔn aŋe wəco kədəcəre nte nwe o nwe eŋkafəli-kafəli waca mə.

16 Kə wəcar wəkəkə-cəkə ender, k'oloku: «Mariki, isətə wəco wa kema kəŋkə mənəsəŋ im mə.»

17 Kə fum nwe oloku: «Tentesə, wəcar wətət məyɔne, bawo məlomp teta tes tɛfɛt. Ti tendesəŋe a isəŋ am kəyɔne wəbe ka sədare wəco.»

18 Kə wəcar wəka mərəŋ ender, kə wəkəkə oloku kə: «Mariki, kəcəmət ka kəŋkə mənəsəŋ im mə, k'isətə kədəŋər ka ki.»

19 Kə fum nwe oloku sɔ wəkəkə: «Isəŋ əm sədare kəcəmət, məyɔne wəbe kəŋan.»

20 Kə wələma ender pəloku: «Mariki kema kam kəŋke, inafəktər ki dəkəloto kətət iməŋk.»

21 Inanes'am, bawo fum wəcuca məyɔne: Məŋlək mpe məntəboc mə, məpim nde mənatəbɔf mə.»

22 Kə fum nwe oloku wəmarəs kən: «Moloku mam m'indekit'əm, mənə wəcar wələc! Mənacəre a incuca, k'iylək mpe intəboc mə, icpim mpe intəbɔf mə.»

23 Ak'enasəŋe nte mənatəsəŋ pəsam pem aməŋk pəsam mə-e? Kə nte ilukus mə, k'imbaŋ pəsam pem isətə sɔ pi kəron kəntəŋgbə.»

24 K'oloku afum akə ɲanayi di mə: «Nəbaŋər kə kema kəŋkə, nəsəŋ ki wəkə ɔsətən'em kilo wəco mə.»

25 Kə afum ɲaloku: «Wəbe, wəkəkə ɔsətə wəco!»

26 Kə fum nwe oloku ɲa: «Icloku nu: Mənə nwe məyɔ mə, amberene sɔ mənə wəkayi. Mba mənə nwe məntəyɔ mə, ambaŋər əm ali pəkə məyɔ mə.»

27 Tamerəŋ tayi, nəker'em ater'em aŋe ɲanatəfaŋ a iyɔne ɲa wəbe mə, nəfay ɲa mera fər yem kiriy.»»

Yesu kəkə kən Yerusalem

Mat 21.1-11; Mark 11.1-11; Isaŋ 12.12-19

28 Nte Yesu elip kəloku afum moloku maməkə mə, k'osumpər dɔpɔ afum kiriy kəkə Yerusalem.

29 Nte Yesu ɔlətərne sədare sa Bɛtfase kə Betani mə, kəca ka tərɔ təkə aŋwe tərɔ ta Tək ya Olif mə, kə Yesu osom acəpse ɔn darəŋ mərəŋ,

30 pəcloku ɲa: «Nəkə nde dare nde antefərne mə, kə nəŋkəberə-e, nəŋkəbər di səfale səfɛt pakot si, nse fum o fum entatənde mə. Nəsikəli si, nəker'em.»

31 Kə təyənə fum pəyif nu: «Ta ake tə nəŋsikələ si-ε?» Nəloku kə: «Bawo Mariki εfanj si.»

32 Kə afum anje anasom mə ŋaŋkə, kə ŋaŋkə ŋabəp səfale səfet pakot si pəmə təkə Yesu enaloku ŋa mə.

33 Ŋayi kəsikəli səfale səfet, kə asərka ŋayif ŋa: «Ta ake tə nəŋsikələ səfale sasəkə-ε?»

34 Kə asepse ɔn darəŋ mērəŋ anje ŋaloku aka səfale: «Mariki εfanj si.»

35 Kə afum anje ŋaŋkenə Yesu səfale səfet nse, kə ŋandenjəsar si suma səŋan sakəronj, kə Yesu ende si kəronj.

36 Təkə ɔnckə kirinj mə, itə afum ŋancper-pere kə suma səŋan sakəronj dəpə.

37 Nte ŋalətərne Yerusalem nde pətəmbəlar pa tərə ta Tək ya Olif mə, kə pəmbət kənay kəŋkə kənacepse kə darəŋ mə fəp. Kə ŋayefe kəkə-kəru Kanu pəpəŋ, bawo ŋananəŋk **mes mēwēy-wēy mmē Kanu kəmməntər mə.**

38 Kə ŋaloku:

«Kanu kəpocə pətət wəbe nwe enderene tewe ta Mariki mə!

Pəforu peyi dəkəm,

kə pələl peyi Kanu mofə meŋeci ma dəkəm!»

39 AFarisi akin akin akə ŋanayi kənay kəŋkə dacə mə, ŋaloku Yesu: «Mariki, məloku asepse am darəŋ ŋacaŋk!»

40 Kə Yesu oloku ŋa: «Kə ŋancaŋk-ε, masar moŋkule-kule!»

Yesu kəbok kən teta Yerusalem

41 Nte ŋalətərne Yerusalem, a kə Yesu enəŋk dare mə, k'eyefe kəbok teta di,

42 k'oloku: «Yerusalem, mən'encərə məkə təkə anjə pasətə pəforu mə! Mba ndekəl tatəkə təŋgbəpən'am, məfətam ti kəŋəŋk.

43 Bawo dəsək dendeder nde ater am ŋandenəŋkər əm kande, ŋakel əm, a ŋadegbəcərən'am waca fəp mə.

44 Ŋandeləsər əm haŋ awut am, ali tasar tin ŋafədesakər'am mpe pendedeŋse pələm kəronj mə, bawo mənacərə fe tem nte Kanu kənader kəmar əm mə!»

Yesu kəberε kən nde kəlo kəpəŋ ka Kanu

Mat 21.12-17; Mark 11.15-19; Isaŋ 2.13-22

45 Nte Yesu embere nde **kəlo kəpəŋ ka Kanu** mə, k'eyefe kəbələs acaməs.

46 K'oloku ŋa: «Dəyəcicəs, Kanu kəloku: «Kəlo kem, dəkətola Kanu də kəndeyənε,» mba nəna nəŋkafəli ki təgbəkene ta calbante.»

47 Dəsək o dəsək Yesu enctəkse afum dəndo **kəlo kəpəŋ ka Kanu** disre. Aloŋne apəŋ, atəkse sariye s'aSuyif, kə abeki a dətəf ŋacten kədif kə.

48 Mba ta ɲancərə nte ɲaɲɔ, bawo afum fəp ɲanccəɲkəl moloku ma Yesu, ta ɲafaj kəbut ali toloku tən tin kəne-ε.

20

Deke kətam mes ka Yesu kəyefε-ε?

Mat 21.23-27; Mark 11.27-33

¹ Dəsək dələma, nte Yesu eyi kətəkse afum nde **kələ kəpəɲ ka Kanu** mə, pəcloku moloku mətət. Alonɲe apəɲ, kə atəkse a sariye s'aSuyif kələkəne abeki a dətəf ɲamberər kə,

² kə ɲaloku Yesu: «Məloku su ma: Kətam kərə kə məyənɲe mes mame, kə pəyənɲe fε ti-ε, məboncər su nwe əsəɲ əm kətam kaɲkə mə.»

³ Kə Yesu oloku ɲa: «Ina sə, k'i'yif nu k'inder toloku tin. Nəluku's'em ti:

⁴ Kəgbət dəromun ka Saɲ dəkəm kəncyefε ba, ka nda afum?»

⁵ Kə ɲayefε kəgbəkələne taɲan, ɲacloku: «Kə səlukse ndəkəl a dəkəm kəgbət kən kənayefε-ε, enyif su: <Ta ake tə nənataɲe Saɲ-ε?»

⁶ Kə səloku a nda afum kəncyefε-ε, aka dətəf fəp ɲancacas su, bawo fəp fənacərə a Saɲ sayibε s'enayənɲe.»

⁷ Kə ɲalukse Yesu: «Səncərə fε.»

⁸ Kə Yesu oloku ɲa: «Ina sə, ifəloku nu kətam nke ɲyənɲe mame mə.»

Totubcənɲe ta abəc a ɲgbəɲkələ alɛc

Mat 21.33-46; Mark 12.1-12

⁹ Kə Yesu eyefε kələk-lokər afum dətətubcənɲe nte: «Fum ɲnabəf ɲgbəɲkələ ya wən, k'əsəɲ yi abəc aləma, ɲatəɲne kə akakə kəcsəɲ kə kəway, kə nkən owur k'əɲkə marənt mowonu.

¹⁰ Nte tɛm tepim tɛmbəp mə, kə wəka ɲgbəɲkələ osom wəcar nno abəc ɲayi mə, kəkəbaɲ yokom ya wən nyε pəmar ɲasəɲ kə kəway kən mə. Mba kə abəc a ɲgbəɲkələ ɲasut kə, kə ɲasak, k'olukus waca wəsəkər.

¹¹ Kə wəka ɲgbəɲkələ nwe ɲgbəkərə sə kəsom wəcar wələma, kə abəc akakə ɲasut sə fum nwe, kə ɲalapəs kə, kə ɲasak, nkən sə k'olukus waca wəsəkər.

¹² Kə wəka ɲgbəɲkələ osom sə wəka maas, kə abəc a ɲgbəɲkələ ɲambəpər sə wəkəkə, kə ɲambeləs kə.

¹³ Kə wəka ɲgbəkələ nwe eyifnɲe: <Cəke c'indeyə-ε? Wan kem nwe imbətər mə indesom. Tələma ɲaɲkələlɛs wəkəkə.»

¹⁴ Mba nte abəf a ɲgbəɲkələ ɲanəɲk wan ka wəka ɲgbəɲkələ mə, kə ɲalokənɲe: <Wələk kən ke əfə, wəkawε. Padif kə nte təɲsəɲe ɲgbəɲkələ yede yəyənɲe yosu mə.»

¹⁵ Kə abəc aɲe ɲasumpər wan ka wəka ɲgbəɲkələ, kə ɲawurɲe kə saɲka tadarəɲ, kə ɲandif.»

Kə Yesu eyif acəɲkəl ən, «Cəke cə wəka ɲgbəɲkələ nwe endeyə ɲa-ε?»

¹⁶ Kɔ Yesu ɔnɔcɔr: «Wɔka nɔgbɔnkɔlɔ pɔder pɔdifɔt abɛc akakɔ fɔp, pɔban sɔ nɔgbɔnkɔlɔ yɔn pɔsɔn yɛbɛc ya yi abɛc alɔma.» Ntɛ afum nɔane moloku mmɛ mɔ, kɔ nɔaloku: «Ta tatɔkɔ tetam kɔyi!»

¹⁷ Kɔ Yesu ɛnkafɔli kɔro k'ɔmɔmɔn nɔ, k'eyif: «Cɔke cɔ Yecicɔs Yosoku yayɛ yoloku ɔn-ɛ?»

«Togbu mpɛ acɛmbɔr kɔlɔ nɔance mɔ,
pɛnader pɔyɔnɛ ɔn togbu pɔtɔt, pa dacɔ.»

¹⁸ Nwɛ o nwɛ ɛntɛmpɛnɛ pi kɔron mɔ, ɛntɛpɛ.

Mɔna nwɛ pɛntɛmpɛnɛ sɔ kɔron mɔ, pomputuk ɛm.»

Atɔksɛ a sariyɛ s'aSuyif nɔafɔn kɔcɔpɛ Yesu towul

Mat 22.15-22; Mark 12.13-17

¹⁹ Atɔksɛ a sariyɛ kɔ alonɛnɛ apɔn nɔactɛn kɔtɔp Yesu waca tɛm tatɔkɔ, bawo nɔanacɔrɛ a tetanɔn t'ɛnalokɛ totubcɛnɛ tatɔkɔ. Mba nɔacnɛsɛ afum akɔ nɔanayi di mɔ.

²⁰ Ntɛ nɔanafɔn kɔsumpɔr Yesu dɔmoloku mɔ, kɔ nɔasom atɛnɔs mes anɛ nɔanabanɛnɛ kɔyɔnɛ alompu, ntɛ tɔnɔsɔnɛ nɔatam kɔbɛr kɔ wɔbɛ dɔwaca, nwɛ ɛnatɔmpɔr kɔtam kɔ fɔnɔntɔr fa dɛbɛ da Rom mɔ.

²¹ Kɔ afum anɛ anasom mɔ, nɔancɔn Yesu moloku: «Wɔtɔksɛ, sɔncɔrɛ a moloku mamɛ mɔnɔlɔkɔ mɔctɔksɛ mi afum mɔ mɔsɔk. Mɔfɔkiti fum kɔnɔnk kɔn, mba dɔpɔ da Kanu yati dɔ mɔntɔksɛ afum dɔkance.»

²² Awa, mɔlɔkɔ su ma, pɔmar sɔsɔn dut dosu Sesar wɔbɛ wɔka tɔf ya Rom ba, ka ta sɔsɔn kɔ di?»

²³ Mba kɔ Yesu ɛnɛpɔl towul tanɔn, k'olukɛ nɔ:

²⁴ «Nɔmentɔr im pɔsam gbɔlɛn bin. Alulu nɔ ana nɔeyi pɔsam papɔkɔ-ɛ, kɔ tewɛ ta wɔkayi?» Kɔ nɔaloku, «Sesar wɔbɛ wɔka Rom.»

²⁵ Kɔ Yesu olɔkɔ nɔ: «Awa, nɔsɔn Sesar pɔkɔ pɔyɔnɛ pɔn mɔ, kɔ Kanu sɔ pɔkɔ pɔyɔnɛ pɔn mɔ.»

²⁶ Afum anɛ nɔanatam fɛ kɔsumpɔr kɔ dɔmoloku kɔnay nke dacɔ. Mba ntɛ moloku ma Yesu mɛnaciyanɛ nɔ mɔ, kɔ nɔancɔnk.

Kɔyif ka kɔdeyɛfɛ ka defi afi dacɔ

Mat 22.23-33; Mark 12.18-27

²⁷ Kɔ aSadisi anɛ nɔanalɔkɔ a fum ɔfɔyɛfɛ defi mɔ, nɔander nɔayif Yesu moloku mmɛ:

²⁸ «Wɔtɔksɛ, ntɛ tɔ Musa ɛnaciɛ su: «Kɔ fum efi pɔnɛncɛ mba ta ɛsak wan-ɛ, wɛnc ka wɔfi, pɔlɛk wɔcɔbɔkɔra pɔsɔn wɛnc wɔfi yuruya.»

²⁹ Awɛnc camɔt-mɛrɔn nɔanayi. Kɔ wɔcɔkɔ-cɔkɔ ɛnɛncɛ, k'efi, ɛsak fɛ wan.

³⁰ Kɔ wɔka mɛrɔn ɛnasɔr wɔran wɔka wɛnc,

³¹ kɔ tɛyɛfɛ dɔnda kɔ wɔka maas ɛnasɔr kɔ. Tatɔkɔ tɔ tɛnakɔ han kɔ awɛnc anɔ anɛ camɔt-mɛrɔn fɔp nɔanɛncɛ wɔran nwɛ, mba nwɛ o nwɛ ɛsak fɛ wan.

³² Tɛlpɔs ɔn, kɔ wɔran sɔ efi.

33 Ti disrε, kə dəsək dəyεfε da afi dendebəp-ε, an'endelek wəran wəkawε-ε? Bawo afum akanε camət-mεrəŋ ŋananence kə!»

34 Kə Yesu oloku ŋa: «Arkun kə aran a doru dandε ŋanŋenceŋε.

35 Mba anε andekiti panəŋk dolompu daŋan mə, pəmar ŋafəte afi dacə ŋayi sə wəyεŋ doru ndε dender mə, ŋafəde ŋacenceŋε.

36 Ŋafətam sə kəfi, bawo pəyi ŋa pəmə mεleke, ŋa ŋandeyəne awut a Kanu, bawo Kanu kəyεkti ŋa dədefi.

37 Musa oloku pəsoku pəs a afi ŋandəfəte nte Kanu kənaloku kə nde tεrəntəm mpe pεncmar mə. Dəndo Musa ewe Mariki: «Kanu ka Abraham, Kanu ka Siyaka, Kanu ka Yakuba.»

38 Kə Yesu əncə, «Bafə Kanu ka afi k'əyənε, mba ka ayi wəyεŋ, bawo nnə Kanu kəyi mə, fəp fəŋyi wəyεŋ.»

39 Kə acicəs a sariyε aləma ŋalək moloku, kə ŋaloku: «Wətəkse, məloku belbel!»

40 Kə ŋanesε sə kəyif kə moloku mələma.

Wəyεk-yεk wəka Kanu kə Dawuda

Mat 22.41-46; Mark 12.35-37

41 Kə Yesu oloku ŋa: «Cəke cə antam kəloku a Krist wan ka Dawuda gbəcərəm əfə-ε?

42 Bawo Dawuda nkən yati oloku buk ba Yabura Dawuda disrε:

«Mariki Kanu εnaloku Mariki mem: Məder mənd'em nnə kəca kem kətət,

43 haŋ iclip kəboc atεrεnε am wεcək wam dəntəf.»

44 Kə Dawuda ewe wəsom wəka Kanu «Mariki mən», cəke cə wəkəkə entam kəyənε wan kən-ε?»

Yesu oloku a pakembərne məyə ma atəkse sariyε

Mat 23.1-36; Mark 12.38-40

45 Nte afum ŋayi kəcəŋkəl Yesu mə, k'oloku acεpse ən darəŋ:

46 «Nəkembərne atəkse sariyε s'aSuyif: Ŋambətər kəcacεne suma səpəŋ, ŋambətər pacyif ŋa kəyif kələl mofə mme ambəpsεne mə, ŋambətər pacsəŋ ŋa səcəm səkirin sa dəkətola Kanu da aSuyif, pacsəŋ ŋa dəkəndε d'abe mofə medi yeri dəcəsata.

47 Ŋacbaŋsər acəbəkəra daka daŋan, ŋacbəlse sali nte təŋsəŋε pagbəkəre ŋa mə. Andəkəkiti ŋa kiti kəyεŋki!»

21

Kəpocε ka wəran wətəyə daka nwe wos εnafı mə

Mark 12.41-44

¹ Kə Yesu eyεkti fər, k'εnəŋk nte aka daka ŋancber kəpocε kəŋan kəŋkəra ka pəsam ka **kələ kəpəŋ ka Kanu** mə.

² K'ɛnɔ̀nk sɔ̀ wɛcɛbokɛra wɛtɔ̀yɔ̀ daka pɛcbɛr fɛrɛnk mɛrɛɲ.

³ K'oloku: «Kance icloku nu: Wɛcɛbokɛra wɛtɔ̀yɔ̀ daka wɛkawɛ ompocɛ pɛtas akɔ̀ fɛp.

⁴ Bawo afum fɛp, pecernɛ paɲan pɔ̀ ɲambɛr kɛpocɛ kɛɲan, mba nkɔ̀n, kɛtɔ̀yɔ̀ kɔ̀n daka disrɛ omboc pɔ̀kɔ̀ ɔ̀yɔ̀ gbɛcɛrɛm pedi mɔ̀.»

Yesu oluku a andelɔ̀sɛr kɛlɔ̀ kɛpɔ̀ɲ ka Kanu

Mat 24.1-2; Mark 13.1-2

⁵ Afum alɔ̀ma ɲancloku teta **kɛlɔ̀ kɛpɔ̀ɲ ka Kanu**: «Kɛntesɛ k'alompɛsɛ ki masar mɛpat mɔ̀tɔ̀t kɔ̀ ca yɔ̀tɔ̀t ya ki nye aɲsɔ̀ɲ Kanu kɛpocɛ mɔ̀.» Kɔ̀ Yesu oluku:

⁶ «Dɔ̀sɔ̀k dendedɛr, mamɛ nɔ̀ɲgbɛtɛnɛ mɔ̀ fɛp andewuɲ mi. Tasar pɔ̀fɔ̀dedɛɲsɛ tasar pɔ̀lɔ̀ma kɛrɔ̀ɲ.»

Pɛlɛc kɔ̀ kɛtɔ̀rɛs

Mat 24.3-14; Mark 13.3-13

⁷ Kɔ̀ ɲayif kɔ̀: «Wɛtɛksɛ, ake tɛm tɔ̀ tatɔ̀kɔ̀ tendeyi-ɛ? Tɛgbɛkɛrɛ tere tendementer a mes mamɔ̀kɔ̀ mɛmbɛp-ɛ?»

⁸ Kɔ̀ Yesu oluku ɲa: «Nɛkɛmbɛrɛnɛ, ta nɛsakɛnɛ patalɛr nu! Bawo afum alarɛm ɲandɛdɛr ɲacbaɲɛnɛ kɛbɛcɛ tewɛ tɛm, ɲacloku nu: «In'ɔ̀fɔ̀, wɛsɔ̀m wɛka Kanu,» «Tɛm tɛmbɛp!» Mba ta nɛdecɛmɛ ɲa darɔ̀ɲ!

⁹ Kɔ̀ nɛndɛnɛ pacloku teta kɛwan, k'afum a dɔ̀tɔ̀f ɲayɛɲkɛr abɛ aɲan bɛkɛc-ɛ, ta nɛnesɛ. Pɛmar mamɔ̀kɔ̀ monuɲkɛnɛ meder kɛrɛsna, mba bafɔ̀ ndɛkɛl doru dandɛ dendɛlip.»

¹⁰ K'oloku ɲa sɔ̀: «Afum a tɔ̀f ɲandɛyɛfɛrɛnɛ kɔ̀ afum alɔ̀ma, dɛbɛ dɛyɛfɛrɛnɛ kɔ̀ dɛbɛ.

¹¹ Antɔ̀f ɲɛndeyikcɛ pɛpɔ̀ɲ mɔ̀fo mɔ̀lɔ̀ma, dor kɔ̀ docu dɛndeyi. Mes mɛwɛy-wɛy mɛndeyi, kɔ̀ **mɛgbɛkɛrɛ mɔ̀pɔ̀ɲ mmɛ mɛndɛyɛfɛ ndɛ Kanu kɛyi mɔ̀.**

¹² Mba mamɔ̀kɔ̀ mɛndɛbɛp, pasumpɛr nu, patɔ̀rɛs nu, pasɔ̀ɲ nu kɛkɔ̀kiti dɛkɔ̀tɔ̀la Kanu da aSuyif a padɛbɛr nu dɛbili. Andɛkɛkɛrɛ nu nda abɛ a tɔ̀f kɔ̀ akirinɲ a sɛdare sɛpɔ̀ɲ alɔ̀ma kɛkɔ̀kiti nu teta tewɛ tɛm.

¹³ Tatɔ̀kɔ̀ tendɛmar nu kɛlɔ̀ku ka tɔ̀kɔ̀ nɛncɛrɛ tetɛm mɔ̀.

¹⁴ Ta nɛcɛm-cɛmnɛ pɛlarɛm tɛyacɛnɛ tonu.

¹⁵ Ina wɛkawɛ yati in'ɛndɛkɔ̀sɔ̀ɲ nu moloku kɔ̀ kɛcɛrɛ kɛkɔ̀tɛnɛ mes nkɛ atɛr anu nwe o nwe ɔ̀ntɔ̀dɛtam kɛgbɛkɛl mɔ̀.

¹⁶ Akomɛnɛ, awɛnc aɲa, anapa, kɔ̀ abɔ̀t anu yati ɲandɛkɛbɛr nu atɛrɛnɛ anu dɛwaca, andɛsɔ̀ɲɛ alarɛm kɛfi nu dacɔ̀.

¹⁷ Fɛp fɛndɛtɛr nu teta tewɛ tɛm.

¹⁸ Mba ali kɛfon konu ka dɛromp kin kɛfɔ̀dɛsɔ̀lɛ.

¹⁹ Kɔ̀ nɛmbɛrɛnɛ kɛsumpɛr belbel-ɛ, nɛndɛyacɛnɛ nɛyi doru.»

Yesu ɛndɔ̀ɲk kɛdɛlɔ̀sɛr ka Yerusalem

Mat 24.15-21; Mark 13.14-19

20 «Kɔ nændenəŋk asɔdar ŋakel Yerusalem-ε, nəcərəε tɛm tatɔkɔ a kələsər ka di kəlɔtərne.

21 Tɛm tatɔkɔ akɔ ŋayi Yude mɔ, ŋayɛkse kəpɛrne ka dəmɔrɔ. Akɔ ŋayi Yerusalem dacɔ mɔ, ŋawur. Akɔ ŋayi dəkulum mɔ, ta ŋabɛrɛ sɔ dare de.

22 Bawo dəsək dadəkɔ d'andeboc kiti, nte tɔŋsɔŋɛ mes mme anacic mɔ fəp meyi.

23 Pucuy pere pɔ tendeyɔne abekəs, kɔ aŋɛ ŋande ŋacmesər dəsək dadəkɔ mɔ! Bawo pəyɛŋki pəpəŋ pendeyi dəsək dadəkɔ dɔtɔf, kɔ mɛtɛlɛ mɔpəŋ ma Kanu nnɔ afum akakɔ ŋayi mɔ.

24 Sakma sɔ andedifətɛ ŋa, tɔf fəp yosumpər-sumpər ŋa yekekərəε ŋa pəbɔlɛ. Tɛm tatɔkɔ afum acuru ŋabaŋ Yerusalem, haŋ tɛm nte asɔŋ ŋa mɔ teclip.»

Kəder ka Wan ka Wərkun

Mat 24.29-31; Mark 13.24-27

25 «Mɔyɔ mɛgɛbəkərəε mme mɛyɛfɛ nde Kanu kəyi mɔ mendeyi dədəc, dəŋɔf kɔ dəcɔs. Dəntɔf, bəkəc yendelɛcɛ-lɛcɛ afum teta pukulɛ-kulɛ pa dəkəba kɔ yam ya ki.

26 Afum ŋandefine kənesɛ ka kəcɛm-cɛmnɛ ka tɔkɔ tendeder dəntɔf mɔ, bawo fənɔntər fa kəm fəndeyikɛ.

27 Tɛm tatɔkɔ tɔ andenəŋk Wan ka Wərkun kəder kəp kəron, dəfənɔntər fəlarəm, kɔ dənɔrɔ da debeki dən.

28 Kɔ mɔyɔ maməkɔ mendecop kəder-ε, nəlomp, nəyɛkti səbomp, bawo kəsɔŋ konu kəway kəlɔtərne.»

Cəke cɔ kətək kəkom kənatəksɛ-ε?

Mat 24.32-35; Mark 13.28-31

29 Kɔ Yesu oloku ŋa totubcɛnɛ tin: «Nənəŋk kətək kəkom* kɔ tək yɛlɔpəs nyɛ.

30 Nənckɔnanəŋk yi yɛlɛŋk, nəcərəε katin a kətən kəlɔtərne.

31 Nəna sɔ, kɔ nændenəŋk mes maməkɔ mɛcder-ε, nəcərəε a dɛbɛ da Kanu dɔlɔtərne.

32 Kance icloku nu: Dɛtɛmp dandɛ dɔfɔcɛpər ta mes mame fəp meyi-ε.

33 Kəm kɔ antɔf yendesɔlɛ mba moloku mem mɔfɔdesɔlɛ.»

Ta nədirərne!

34 «Nəkembərne belbel! Ta nəsak bəkəc yonu yɛtasərne cəsata kɔ kəcis, kɔ kəcɛm-cɛmnɛ ka doru dandɛ, kɔ pəyi ti tatɔkɔ-ε, dəsək dəpəŋ dadəkɔ dendebəpən'am,

35 pəmɔ nte manta mɛŋgbəpərne lop mɔ. Bawo dəsək dadəkɔ dendebəpɛnɛ afum a doru fəp.

36 Ta nədirərne, **næclok-lokær Kanu** tɛm fəp, nte tɔŋsɔŋɛ nəde nəsɔtɔ fənɔntər fəmulpɛnɛ mes məkɔ mendeder mɔ fəp, nədekɔ nəcəmɛ, nəmentərne Wan ka Wərkun, ta nəlapərne.»

* 21:29 CəTabo «figuier»

³⁷ Dəsək dadək, Yesu pəctəksə afum dəndo **kələ kəpəŋ ka Kanu**, k'owur kəkəcepərəne pibi nde aŋwe «Tərə ta Tək ya Olif» mə.

³⁸ Afum fəp, kə dec dəsək-ε, ŋanckə nde **kələ kəpəŋ ka Kanu** kəkəcəŋkəl kə.

22

Abə katəŋne kəyə ka Yesu pələc

Mat 26.1-5; Mark 14.1-2; Isaŋ 11.45-53

¹ Kəsata ka Cəcom cətənəŋkəl lebin nke aŋwe kəsata ka Kəcepər ka Mələke medif mə kənalətərne.

² Alonəne apəŋ kə atəksə sariyə s'aSuyif ŋayefe kəten nte ŋaŋyə a ŋadif Yesu mə, mba ŋacnese afum.

Yudas kəwose kən kəmar abə a aSuyif a ŋasumpər Yesu

Mat 26.17-25; Mark 14.10-11

³ Kə Sentani səmbere Yudas, nwe ancwe «Wəka dare da Keriyot» mə, nwe ancləm acəpse a Yesu wəco kə merəŋ daco mə.

⁴ Kə Yudas əŋkə ŋanenene kə abə a alonəne kə asədar aŋe ŋancbum **kələ kəpəŋ ka Kanu** mə, təkə pəmar pəber Yesu ŋa dəwaca mə.

⁵ Kə pəmbət ŋa, kə ŋantəŋne kəsəŋ kə pəsam.

⁶ Kə Yudas owose, k'eyefe ŋə kəten təyə nte əŋyə a pəber Yesu ŋa dəwaca ta afum ŋancəre ti mə.

Yesu kəsəŋ ka kəlompəs yeri ya kəsata ka Kəcepər

Mat 26.17-25; Mark 14.12-21; Isaŋ 13.21-30

⁷ Kə dəsək da kəsata ka Cəcom cətənəŋkəl lebin dəmbəp nde pəmar padif aŋkesiya ŋolonəne ŋa Kəcepər ka Mələke medif mə.

⁸ Kə Yesu osom Piyer kə Isaŋ, pəcloku ŋa: «Nəkə nəlompse su yeri ya kəsata ka Kəcepər ka Mələke Medif*, nte təŋsəŋe səde sədi yi mə.»

⁹ Kə ŋayif Yesu: «Deke məfan a səlompəs yi-ε?»

¹⁰ Kə Yesu oloku ŋa: «Kə nəndena nəbərə dare disre-ε, nəŋkəbərəne kə wərkun wələma pəsare apampe ŋa domun. Nəcəme kə darəŋ haŋ nde kələ kəŋkə əŋkəbərə mə.

¹¹ Nəloku wəka kələ kəŋkə: «Wətəksə osom su a səder səyif'am: Deke dəkələ deyi nde indedi yeri ya kəsata ka Kəcepər ka Mələke Medif kə acəpse em darəŋ-ε?»

¹² Endəkəmentər nu kələ darenc, dəkələ dəpəŋ palompəs di belbel. Dəndo kəfo kəŋkə kə nəŋkəlompəs yeri ya kəsata.

¹³ Kə acəpse ən darəŋ ŋaŋkə ŋabəp ca fəp pəmə təkə Yesu ənaloku ŋa ti mə, kə ŋalompəs yeri ya kəsata kəŋkə.

* **22:8** Kəsata ka Kəcepər ka Mələke Medif CəKresi = Pak

Kəyer ka kəcom ka kəsata ka Kəcepər

Mat 26.26-30; Mark 14.22-26

¹⁴ Nte tɛm tɛmbəp mə, kɔ Yesu ɛndɛ dɛmɛsa kədi yeri kɔ Asom ɔn.

¹⁵ Kɔ Yesu oloku: «Pəmbas im kədi yeri ya kəsata ka Kəcepər ka Mɛlɛkɛ Medif yayɛ kɔ nənə, a idɛtəɔ.

¹⁶ Bawo iclɔk'un, ifɔsɔdi yi, haɲ tɛm nte teta yi tendekɔlarɛ nde akip ɲa dɛbɛ da Kanu dɛntɔf mə.»

¹⁷ Kɔ Yesu ɛlɛk tɔmbəl, k'eyif Kanu barka, k'oloku: «Nələk tɔmbəl tantɛ, nəyerɛnɛ pedisrɛ pa pi,

¹⁸ bawo iclɔku nu, ifɔsɔmun wɛn haɲ dɛbɛ da Kanu deder.»

¹⁹ Kɔ tɛyɛfɛ day, kɔ Yesu ɛlɛk kəcom, nte elip kəyif Kanu barka† mə, k'entepi ki, k'ɔsɔɲəs ɲa pəcloku: «Dis dem dɔ dandɛ, ndɛ asɔɲɛ tetonu mə. Nəde nəcyɔ ti nte tɔɲsɔɲɛ nəccɛm-cɛmn'ɛm mə.»

²⁰ Nte ɲalip kədi yeri mə, k'ɛlɛk sɔ tɔmbəl ta wɛn, pəcloku: «Mecir mem mɛmɛ meyi dətɔmbəl tantɛ mə, m'andelɔɲɛ tetonu, mi mendɛcaɲəs danapa dofu da Kanu kɔ nənə.

²¹ Ti disrɛ, fum nwɛ endɛbɛr im atɛrɛnɛ em dəwaca mə, ɛndɛ nnɔ amɛsa ɲaɲɛ kɔ ina.

²² Wan ka Wərkun endɛfi, pəmə tɔkɔ ancic ti mə, mba pələc peyi fum wəkakɔ endɛbɛr kɔ atɛrɛnɛ ɔn dəwaca mə.»

²³ Kɔ acɛpsɛ a Yesu darəɲ ɲayɛfɛ kəyiftɛnɛ dənda, an'eyi su dacɔ nwɛ endɛbɛr kɔ atɛrɛnɛ ɔn dəwaca mə?

An'ɛcepər nu fəp dəkəcəmə-ɛ?

²⁴ Kɔ kəgbəkəlɛnɛ kəpɔɲ kəyɛfɛ acɛpsɛ a Yesu darəɲ dacɔ, teta kəcərə ka nwɛ embək dəkəcəmə pəcepər ɲa dacɔ fəp mə.

²⁵ Kɔ Yesu oloku ɲa: «Abɛ a tɔf ɲantasərɛnɛ afum aɲan, aɲɛ ɲaɲkɔtɛnɛ kətam nnɔ ɲayi mə. Abɛ akakɔ ɲacwɛnɛ «Ayo mes mətɔt».

²⁶ Bafɔ tin tayi tɔ kɔ nənə! Mba mɛnɛ nwɛ ɛncɛpər nu fəp mə, pəyi pəmə nwɛ ɛfɛtɛ nu dacɔ fəp mə. Nwɛ ɔyɔnɛ wəbɛ mə, pəyi pəmə wəmarəs.

²⁷ Bawo, nwɛ ɛncɛpər nu mə ɔyɔnɛ, nwɛ ɛndɛ dɛmɛsa mə ba, ka nwɛ ɛɲkɛrɛ kɔ yeri dənda mə? Bafɔ nwɛ ɛndɛ dɛmɛsa mə ɔfɔ? Kɔ ina, iyi nu dacɔ, pəmə nwɛ ɛɲkɛrɛ nu yeri dɛmɛsa mə.»

²⁸ «Nən'ɛnasiməs kɔ ina tɛm nte inayi pəcuca disrɛ mə.

²⁹ It'ɔsɔɲɛ nte isɔɲ nu dɛbɛ pəmə nte papa kem ɛnasɔɲ im di mə:

³⁰ Nte tɔɲsɔɲɛ nədi yeri, nəmun amɛsa ɲɛm kəpɔɲ nde akip ɲa dɛbɛ dem dɛntɔf mə. Nəndɛ səcɔm sa dɛbɛ kəpɔɲ, nəckiti cəsɔɲka wəcɔ kɔ mɛrəɲ ca Yisrayɛl.

Yesu ɛndəɲk a Piyɛr ɛndɛbanɛnɛ kətɔcərə kɔ

Mat 26.31-35; Mark 14.27-31; Isay 13.36-38

† **22:19** *Kəyif Kanu barka* = «kəkor-koru Kanu» kɔ pəyɔnɛ fɛ ti-ɛ, «kəyif Kanu nəwali teta kəcom»

31 Kə Yesu oloku Siməŋ Piyer: «Siməŋ, Siməŋ! Məkembərne! Sentani səntola kədəs-dəs'un dəsifite pəmə kəcom.

32 Mba intolan'am, nte tənşəŋe ta abəkək ɲəkafəl'am‡ mə. Kə mändeder'im-ε, məyeŋkəs bəkək ya awenc'am aŋa.»

33 Kə Piyer oloku kə: «Mariki, iwose kəkə dəbili, kə pəyənε fε ti-ε, ifi kə mənə.»

34 Mba kə Yesu oloku kə: «Piyer, iclok'am, mändegbekəl məkə kəcər'em kəmaas a kicipi kəccam.»

Pəsam pa delek, aləba, kə dakma

35 Kə Yesu eyif ɲa: «Nte incsom nu ta ɲşəŋ nu pəsam, ta ɲşəŋ nu aləba ɲəberε yamos, ta ɲşəŋ nu cəfta cəberne mə, paka penayi yi dacə mpe nənətə-sətə mə ba?» Kə acεpse ən darəŋ ɲaloku: «Ala! Ali pin penayi fε.»

36 Kə Yesu oloku ɲa: «Ndekəl mes mēsəkrε! Mənə nwe məŋyə pəsam mə, məlekεne pi. Mənə nwe məŋyə aləba ɲəberε yamos mə, məlekεne ɲi, kə mənə nwe məntəyə dakma mə, məcaməs yamos yam, məway din!

37 Bawo, iclok'un: Mene təkə ancic mə telare nnə iyi mə: «Analəm kə calbante dacə.» Nte təyənε temi mə, təmbəle fε sə kəlip.»

38 Kə acεpse ən darəŋ ɲaloku kə: «Wəbe məbaŋ sakma nse mεrəŋ.» Kə Yesu oloku ɲa: «Pəntəŋne tantε.»

Yesu kəlok-lokər Kanu nde tərə ta Olif

Mat 26.36-46; Mark 14.32-42

39 Pəmə təkə əncyə ti mə, Yesu endewur k'əŋkə nde tərə ta Tək ya Olif. K'acεpse ən ɲancəme kə darəŋ.

40 Nte ɲambəp kəfo kəŋkə mə, k'oloku ɲa: «Nətola Kanu ta nəsakne nəberε kəwakəs disrε.»

41 K'əmbələne ɲa pəmə kələm ka tasar katin, k'encəp suwu, k'ontola Kanu,

42 pəcloku: «Papa kə məwose-ε, məbələn'em təmbəl pa kətərəs pampε. Ti disrε, ta tεfaŋ tem teyi, mba tam teyi.»

43 Kə melekε mələma mowurər kə kəyεfε darenc, kədeyeŋkəs kə abəkək.

44 K'abəkək ɲεlεcε-lεcε kə, k'εyεfε kəlok-lokər Kanu, k'abəkək ɲempε kə, kə kawonε kən kəyi pəmə nte mocul ma mecir mendetempene dəntəf mə.

45 Kə Yesu esak sə kətola Kanu kəŋkə enayi mə, k'əŋkə pəbəp acεpse ən darəŋ ɲadirene bəkək yerenc.

46 Kə Yesu eyif ɲa: «Ta ake tə nəndirene-ε? Nəyεfε, **nətola Kanu** ta nəsakne nəberε kəwakəs disrε!»

Kəsumpər ka Yesu

Mat 26.47-56; Mark 14.43-50; Isaŋ 18.3-11

‡ 22:32 Ta abəkək ɲəkafəl'am, kə pəyənε fε ti-ε, «ta kələŋ kam kəsölε»

47 Yesu pəsərɔlok-loku, kə kənay k'afum kənder, fum wəkə ancwe Yudas, nwe enayi acəpse a Yesu darəŋ aŋe wəco kə mərəŋ dacə mə, pəyi ŋa kirin. K'ɔlətərne Yesu kəkəcup kə.

48 Kə Yesu oloku kə: «Yudas, kəcup kə mändeleke Wan ka Wərkun məber kə ater ɔn dəwaca!»

49 Nte asol a Yesu ŋanəŋk tatəkə tenakəcəpər mə, kə ŋayif Yesu: «Wəbe, səntam kəsutnəne sakma sosu ba?»

50 Kə fum wəkin acəpse a Yesu darəŋ dacə, encəp wəcar ka wəloŋne wəpəŋ aləŋəs ŋa kəca kətət, k'əŋgbinti ŋi.

51 Kə Yesu eyac ŋa pəcloku: «Nəce tatəkə!» K'əŋgbuŋene aləŋəs ŋa fum wəkakə, k'entamne.

52 Kə Yesu eŋkafəle k'entefərne aloŋne apəŋ, abe a abum a kələ kəpəŋ ka Kanu kə abeki a dətəf aŋe ŋanader kəsumpər kə mə: «Nənder nətəmpər sakma kə tək yosutnəne, pəmə nte nənder kəsumpər kalbante mə.

53 Dəsək o dəsək sən'encyi nde **kələ kəpəŋ ka Kanu** kə nəna, ali fum enasumpər f'em. Ndekəl oŋ, təm tonu tēbəp, kə kətam ka kubump.»

Piyer embaŋne kətə-cəre Yesu

Mat 26.57-58,69-75; Mark 14.53-54,66-72; Isay 18.12-18,25-

27

54 Nte ŋalip kəsumpər Yesu mə, kə ŋaŋkekəre kə nde kələ ka wəloŋne wəpəŋ. Mba Piyer pəcməmən ti pəbəle.

55 K'amot nenc aban̄ka dacə k'andə di kəsək. Kə Piyer endə ŋa dacə.

56 Nte wəcar wəyecəra wələma enəŋk kə pəndə ŋa dacə nenc kirin mə, k'oloku: «ŋa ŋayina kə fum wəkawə.»

57 Kə Piyer eŋgbekəl wəran nwe, pəcloku: «Wəran, incəre fe fum wəkawə!»

58 Pəwon fe kə wələma enəŋk kə, k'oloku: «Məna sə akin ayi ŋə nəyənə.» Kə Piyer oloku wərkun nwe: «Ala! Bafə akin ayi ŋə səyənə.»

59 Kə dec din dencepər, kə fum wələma eŋgbəc kəloku: «Fum wəkawə oŋwurene kənayi kə Yesu, bawo wəKalile əfə.»

60 Kə Piyer oloku: «Məna, ina incəre fe tantə mən̄kəre kəloku mə.» ŋayi kəlok-loku kə kicipi kəncam.

61 Kə Mariki eŋkafəle k'eŋgbətne Piyer. Kə Piyer encem-cemne toloku təkə Mariki Yesu enaloku kə mə: «Məndegbekəl kətəcər'em kəmaas a kicipi kəcəm.»

62 Kə Piyer owur nde daban̄ka, k'əŋkə pəbok belbel.

Kələməs kə kəsut ka Yesu

Mat 26.67-68; Mark 14.65

63 Arkun aŋe ŋancbum Yesu mə ŋafani kə, ŋacsut kə.

64 ŋackump kə kəro, a ŋacyifət kə nte: «Awa Sayibe, məloku su an'osut əm-ε?»

65 Kə ŋales-les kə moloku mələməs məlarəm.

Yesu nde aboc kiti apɔŋ fɔr kirin

Mat 26.59-66; Mark 14.55-64; Isaŋ 18.19-24

⁶⁶ Nte dec dɔsɔk mɔ, kɔ abeki a dɔtɔf, aloŋne apɔŋ, k'atɔkse sariye s'aSuyif ŋambɔpɔsɛne. Kɔ ŋaŋkekɔre Yesu nde aboc kiti aSuyif ŋayi mɔ.

⁶⁷ Kɔ ŋayif kɔ: «Kɔ pɔyɔne a mɛn'ɔyɔne Krist-ε, mɛloku su ti.» Kɔ Yesu oloku ŋa: «K'iloku nu ti-ε, nɛfɔlan ti,

⁶⁸ k'iyif nu sɔ moloku-ε, nɛfɔluks'em mi.

⁶⁹ Kɔyɛfe ndɛkɛl, Wan ka Wɔrkun pɛnde Kanu nkɛ kɛntam mes fɔp mɔ kɛsɛk.»

⁷⁰ Kɔ afum fɔp ŋambanɛne: «Mɛn'ɔyɔne oŋ Wan ka Kanu ba?» K'oloku ŋa: «Nɛn'oloku ti: Nkɛn iyɔne.»

⁷¹ Kɔ ŋayiftɛne: «Sede sɔre sɔ pɛmar payif-ε? Sɛna yati, sɛn'enene kɔ ti dɛkusu.»

23

Yesu fɔr ya Pilat kirin

Mat 27.1-2,11-14; Mark 15.1-5; Isaŋ 18.28-38

¹ Kɔ ŋayɛfe fɔp faŋan, kɔ ŋasole Yesu kɛkekɔre kɔ nde fɔr ya Pilat kirin.

² Kɔ ŋayɛfe kɔyɛmsɛne kɔ, ŋacloku: «Wɛkawɛ sɛŋkɔ sɛbɔp pɛcgbinɔr afum kɔyɛŋkɔr su sɛbomp, ŋafati kɛsɔŋ wɔbe ka doru fɔp dut, pɛcwenɛ sɔ «Wɔyɛk-yɛk wɛka Kanu, wɔbe wɛka atɔf.»»

³ Kɔ Pilat eyif kɔ: «Mɛn'ɔyɔne wɔbe ka aSuyif ba?» Kɔ Yesu olukse kɔ: «Mɛn'oloku ti.»

⁴ Kɔ Pilat oloku wɔloŋne wɔpɔŋ wɛka kɛlɔ kɔpɔŋ ka Kanu kɔ kɛnay ka afum: «Inɛŋk fɛ tɔlɔm o tɔlɔm nte pɛmar pasumpɔre wɔrkun wɛkawɛ mɔ.»

⁵ Mba kɔ ŋaŋgbɔc gbɛs, kɛloku: «Afum ŋɔ ɛŋgbinɔr, pɛctɔkse afum atɔf ŋa Yude disre fɔp kɔyɛfe atɔf ŋa Kalile nde ɛnacop mɔ, haŋ nnɔ.»

Yesu fɔr ya Herodu kirin

⁶ Nte Pilat ene teta Kalile mɔ, k'eyif kɔ: «Wɛka Kalile mɔyɔne ba?»

⁷ Nte Pilat ene a wɛka Kalile ɔfɔ mɔ, k'oloku a fum wɛkawɛ, Herodu pɛmar pɛkiti kɔ. K'oloku a pakɛne kɔ Herodu nwe ɛnayi mata mamɔkɔ Yerusalem mɔ.

⁸ Nte Herodu ɛnɛŋk Yesu mɔ, kɔ pɛmbɔt kɔ, bawo ɛnctɛn kɛnɛŋk kɔ kɔyɛfe nte pɛnawon mɔ, teta mes mɔkɔ ɛncne pɛcloclo tɔn mɔ, pɔyɔ amera kɛnɛŋk kɔ, pɔyɔ **tɔyɔ tɛgbɛkɔre nte tɛyɛfe nde Kanu kɔyi mɔ** fɔr yɔn kirin.

⁹ Kɔ Herodu eyifɔt Yesu mes mɛlarɛm, mba Yesu ɛnalukse fɛ kɔ nte o nte.

¹⁰ Aloŋne apɔŋ kɔ atɔkse sariye s'aSuyif ŋanayi di, ŋacnaŋkanɛ kɔyɛmsɛne kɔ.

¹¹ Herodu kɔ abum ɔn ɲafani kɔ, kɔ ɲayɔ kɔ pələc pələc, kɔ ɲamber kɔ duma d'abɛ, kɔ ɲasɔŋ kɔ a pakenɛ Pilat.

¹² Dɔsɔk dadɔkɔ yati dɔ Pilat kɔ Herodu ɲanabɔt ɔŋ, ɲanaterɛnɛ cɔkɔ-cɔkɔ.

Antəŋne kədif Yesu

Mat 27.15-26; Mark 15.6-15; Isaŋ 18.39-19.16

¹³ Kɔ Pilat ewe aloŋne apɔŋ, abɛ a dɔtɔf, kɔ afum.

¹⁴ K'oloku ɲa: «Nəŋker'em fum nwe a nkɔn eŋgbɪŋər afum kəyɛŋk səbomp. Mba fɔr yonu kirɪŋ iyifət kɔ, ali tes tin inəŋk fɛ nte ɔyɔ mes mame nəmbonɔcɛ kɔ mɔ, nte pəmar padifɛ kɔ mɔ.

¹⁵ Herodu sɔ ɛnəŋk fɛ ali tin, bawo olukɛ su kɔ. Awa! Fum wəkawɛ ɔyɔ fɛ nte o nte pəmar padifɛ kɔ mɔ.

¹⁶ Kəsak kɔ k'inder k'andelip kəsut kɔ-ɛ.»

¹⁷ Kəsata ka Kəcəpər ka Mɛlɛkɛ Medif nkɛ o nkɛ, Pilat ɛncsake afum yeŋən wəyi dɔbili wəkin.

¹⁸ Kɔ kənay kəmbanɛnɛ fəp kəkule-kule: «Mədif wəkawɛ! Məsake su Barabas yeŋən!»

¹⁹ Anabɛr Barabas dɔbili teta kədif fum, nte ɲanayɛfɛ kəyɛŋkər abɛ a dɔtɔf səbomp mɔ.

²⁰ Kɔ Pilat nwe ɛnafan kəsak Yesu mɔ, ɔŋgbəkərə sɔ kəyif ti kənay ka afum.

²¹ Mba ɲanckule-kule: «**Məcaŋ kɔ dətɔk yepəmpəl!** Məcaŋ kɔ!»

²² Kɔ Pilat eyif ɲa sɔ tamaas: «Pələc pɛrɛ p'ɔyɔ-ɛ? Inəŋk fɛ nte o nte pəmar padifɛ kɔ mɔ. Kəsak kɔ k'inder k'alip kəsut kɔ-ɛ.»

²³ Kɔ ɲampɛnɛ sim kəbupərə a pacan kɔ dətɔk yepəmpəl. Kɔ sim səŋan səŋkalərɛ.

²⁴ Kɔ Pilat owosɛ kəyɔ təkɔ ɲanafan mɔ.

²⁵ Kɔ Pilat ɛsak yeŋən Barabas wəkɔ ɲanawɛr kɔ mɔ. Barabas nwe anabɛr dɔbili teta kədifətɛnɛ, kɔ kədif ka fum mɔ. Kɔ Pilat ɛlɛk Yesu, k'emɛr ɲa dəwaca ɲayɔ kɔ təkɔ ɲanafan mɔ.

Kəcaŋ ka Yesu

Mat 27.32-44; Mark 15.21-32; Isaŋ 19.17-27

²⁶ Nte ɲayi kəkəkərə Yesu mɔ, kɔ ɲambəpɛnɛ kɔ wərkun wəlɔma pacwe kɔ Simɔŋ, wəka dare da Siren ɛnayi pəyɛfɛ dale, kɔ ɲaŋgbəŋsər kɔ tək yepəmpəl nyɛ anakɔ kəcaŋ Yesu mɔ a pəcəmə kɔ darəŋ pəkəkərə yi.

²⁷ Kɔ kənay ka afum alarəm kɔ aran ɲancəmə kɔ darəŋ ɲacsut-sutnɛ bəkəc ɲacyɔnɛ kɔ nɔnɔfɔr.

²⁸ Kɔ Yesu ɛŋkafɛ nɔnɔ ɲayi mɔ, k'oloku: «Aran a Yerusalem, ta nəbokɛ tetem! Mba nəbokɛ te tonu kɔ ta awut anu!

²⁹ Bawo dɔsɔk dendedɛr ndɛ andeloku: «Pəmbɔt aran aŋɛ ɲantəbəkəs mɔ, pəmbɔt cor nɛ cəntəkom mɔ, kɔ mɛsɛ mɛmɛ məntəmɛsər mɔ!»

³⁰ Afum ηανδελoku mərə dəsək dadək: «Mətempene su kəron!» kə mofoməneci, «Məgbəpərne su!»

³¹ Bawo k'ayə ti kətək kəcanj-k-ε, cəke cə andeyə kəwosu-ε?

³² Kə ηasolene sə kəkekəre calbante mərəη anje anakədifene kə Yesu mə.

³³ Nte ηamberε kəfo kələma nke anje «Kəmbembələ» mə, kə ηancaη kə dətək yepəmpəl dəndo, kələkene calbante akakə mərəη, wəkin pəyi kə kəca kətət, wəkə pəyi kə kəca kəmeriya.

³⁴ Kə Yesu oloku: «Papa mənəηnene ηa, bawo ηancəre fe nte ηayi kəyə mə.» Kə asədar akanje ηayerene yamos yən ηakote ti yampunpuη.

³⁵ Afum ηacəme, ηacəmən. Abε ηacfani Yesu, ηacloku: «Bawo eyac akə, pəyacne oη ma nkənsərka, kə pəyone a Krist əyone, Wəsom nwe Kanu kəyək-yək mə-ε!»

³⁶ Kə asədar sə ηancəηne kəkəfani Yesu, kə ηasəη kə mənəncə.

³⁷ ηacloku: «Kə pəyone a mən'əyone wəbe ka aSuyif-ε, məyacne oη ma, mənəsərka!»

³⁸ Anacik kə domp takəron: «Wəkawe əyone wəbe ka aSuyif.»

³⁹ Kalbante kin akakə anacəη mə, pəcləməs Yesu, pəcloku: «Bafə mən'əyone Krist Wəyək-yək wəka Kanu ba? Məyacne oη ma, kə səna!»

⁴⁰ Mba kə kalbante kamerəη kəηkə anacəη mə, kəηgbəηgbəηər kə, kəcloku: «Cəpə məfənesε Kanu ba, mənə nwe andeyə pəmə səna mə?»

⁴¹ «Ta səna, kance kə, tante tə pəmar pasəη su kəway ka mələsər mosu. Mba wəkawe əyofε tələm o tələm təc.»

⁴² K'oloku: «Yesu məde məcəm-cəmn'em kə mənəkəberε akip ηa dəbe dam dəntəf-ε.»

⁴³ Kə Yesu oloku kə: «Kance kə, iclok'am: Məkə, sən'əηkəyi Ariyana kə mənə.»

Defi da Yesu

Mat 27.45-56; Mark 15.33-41; Isəη 19.28-30

⁴⁴ Daη dənabəp, dec dosurene afum dəsəbomp, kə kubump kəntor dəntəf fəp, tənabələ kətenc haη salifana.

⁴⁵ Dec dənakalε, pənabiyε. Kə kəloto kələl nke kəηkəηk təkso ta kələ kəpəη ka Kanu mə, kəηgbere dacə.

⁴⁶ Kə Yesu oηkulərne dim dəpəη: «Papa, ilək amera ηem, k'imber əm dəwaca!» Nte elip kəloku moloku maməkə mə, k'efi.

⁴⁷ Nte wəbe k'asədar wəRom enəηk mes maməkə mənəcəpər mə, k'oηkor-koru Kanu pəcloku: «Kance kə, fum wəkawe wəlompu yati enayi!»

⁴⁸ Nte kənay ka afum anje ηanader kədetəηne mes maməkə mə, ηanəηk nte tənəcəpər mə, kə ηalukus ηacsut-sutne bəkəc nənəfər.

49 Anje ɲanacære Yesu mɔ fəp, kɔ aran akɔ ɲanacəmbər kɔ kəyɛfɛ Kalile mɔ, ɲanacəmə pəbɔlə, ɲacməmən tɔkɔ mes men-cəpər mɔ.

Kəber ka Yesu dəkufu

Mat 27.57-61; Mark 15.42-47; Isaɲ 19.38-42

50 Wərkun wəlɔma pacwe kɔ Isifu. Enayɔnɛ aboc kiti aSuyif dacɔ, fum wətət, pəlomp.

51 Nkən enawosɛ fɛ kətəɲnɛ kəsek ka mɔloku maməkɔ, kɔ mɔyɔ ma akɔ. Wəka dare da Arimate enayɔnɛ, atɔf ɲa Yude, pəckar dəbɛ da Kanu.

52 K'ɔɲkɔ nde Pilat eyi mɔ, k'ontola kɔ kəbel ka Yesu.

53 K'ontorɛ kɔ dətɔk yɛpəmpəl* nde anacəɲ kɔ mɔ, k'ɛnɛpsər kɔ kasəɲke ka kəloto kətɛlɛr, k'ɔɲkɔ pəboc kɔ nde dəkufu nkɛ anayɔk dətasar mɔ. Kufu kənayi nkɛ anatɔwup fum o fum ki disrɛ kərəsna mɔ.

54 Yuma yənayi, dəsək da kəlompəsɛnɛnɛ simiti, dəsək da kəɲesəm ndɛ ampusɛ Mariki mɔ dɛcfan kəcɔp.

55 Aran anje ɲanasol kɔ Yesu kəyɛfɛ Kalile mɔ, ɲander kɔ Isifu, kɔ ɲaməmən kufu disrɛ, kɔ ɲanəɲk tɔkɔ anaboc Yesu mɔ.

56 Ntɛ ɲalip kəməmən kɔ mɔ, kɔ ɲalukus dare, kəkəlompəs moro kɔ labundɛ da dərɛs. Dəsək da kəɲesəm ndɛ ampusɛ Mariki mɔ kɔ ɲanɛsəm pəmɔ tɔkɔ Kanu kəsom ti mɔ.

24

Yesu kəyɛfɛ kən afi dacɔ

Mat 28.1-10; Mark 16.1-8; Isaɲ 20.1-10

1 Tataka ta sandɛɲ bətbət suy, kɔ aran anje ɲaɲkɔ sɔ dəndo dəkufu, ɲakekərə moro mobotu ambənc mme ɲanalompəs mɔ.

2 Kɔ ɲaɲkɔ ɲabəp pabɪɲkəli tassar tɔkɔ anasuncɛ kufu mɔ,

3 kɔ ɲambɛrɛ, mba ɲanabəp fɛ kəbel ka Mariki Yesu.

4 Ntɛ tes tatɔkɔ tenciyanɛ ɲa mɔ, kɔ arkun mɛrəɲ ɲawurər ɲa, ɲabɛrnɛ yamos yomotər-motər.

5 Kənɛsɛ kəɲan disrɛ, kɔ aran ɲancəp cəro fəp faɲan dəntɔf. Mba kɔ afum anje mɛrəɲ ɲayif ɲa: «Ta ake tɔ nəntɛnɛ wətɔfi afi dacɔ-ɛ?»

6 Eyi fɛ nnɔ! Ɔfɔtɛ afi dacɔ! Nəcɛm-cɛmnɛ tɔkɔ ɛnaloku nu ntɛ ɛnayi atɔf ɲa Kalile mɔ.

7 Ntɛ oncloku: «Mɛnɛ palɛk Wan ka Wərkun pabɛr kɔ aciya dəwaca, **ɲacəɲ kɔ dətɔk yɛpəmpəl**, pəyɛfɛ defɪ tataka tən ta maas.»

8 Kɔ ɲancɛm-cɛmnɛ toloku ta Yesu tatɔkɔ.

9 Kɔ ɲayɛfɛ dəndo dəkufu kəkəloku ti asom a Yesu anje wəcɔ kɔ pin, kəbəp ka afum alpəs akɔ.

* 23:53 Dətɔk yɛpəmpəl it'əyɔnɛ «kətɔk ka kəpandən.»

10 Mari wəka Makdala, Yohanna, Mari wəka Sak kə aran aləma, aŋe ŋananəŋk sə mes maməkə mə, ŋaloku sə tin tayi asom a Yesu.

11 Mba moloku maməkə menayi ŋa pəmō nte atonjkulu ŋandelok-lokər ŋa mə, ŋanaləŋ fē moloku ma aran akakə.

12 Kə Piyer eyefe, k'eyekse kəkə nde dəkufu. Nte ontulne kəmōmən mə, enəŋk fē daka o daka mēne mopol ma kəloto məkə menafəntərə dəntəf mə. K'eyefe k'əŋkə ndərən, pəciyanə kə təkə enəŋk mə.

Nde dəpə da Emayus

Mark 16.12-13

13 Dəsək din dadəkə, aɛpsɛ a Yesu darəŋ mērəŋ ŋackə dare dələma nde ancwe Emayus mə, dare dənayi, nde dənabələne Yerusalem kəkət ka dec mērəŋ mə.

14 Afum akanje mērəŋ ŋaclokenɛ mes məkə mencepər mə fəp.

15 Ŋayi kəlokenɛ mes maməkə, ŋacgbekələne, kə Yesu ɔlətərne ŋa, kə ŋasol.

16 Mba paka pələma pencyaməs ŋa kənepəl kə.

17 Kə Yesu eyif ŋa: «Ake moloku mə nəyi tantɛ nəŋkə mə?» Kə ŋancəmɛ, kə dis dɛndɛncɛ ŋa.

18 Kə wəkin wəkə ancwe Kələyopas mə, oloku kə: «Məna sona gbəŋ, məna eyi məkə Yerusalem nwe ɔntəcərə nte tencepər mata mamɛ mə?»

19 K'eyif ŋa sə: «Ake?» Kə akakə ŋaloku kə: «Nte tencepər teta Yesu wəka Nasarɛt, nwe enayəne wədəŋk wəka Kanu wəpəŋ mə. enamentər ti dəmɔyɔ kə dəmoloku, fər ya Kanu kirin, kə nnə afum ŋayi mə.

20 Aloŋne apəŋ asu, kə abɛ asu aka dətəf ŋalɛk kə, kə ŋamber kə afum dəwaca, **k'ancəŋ kə dətək yɛpəmpəl.***

21 Səncɛm-cɛmnɛ fə nkən enader kəwurəs pəbanj Yisrayel, mba mamɛ oŋ fəp, tataka ta maas tə tantɛ, nte mes mamɛ mencepər mə.

22 Kance kə: A aran aləma ŋayi su dacə, aŋe ŋasəŋe kə pəciyanɛ su mə. ŋanunjkənɛna kəkə nde dəkufu,

23 nte ŋantənanəŋk kəbel ka Yesu mə, kə ŋander ŋaloku su a mɛlɛkɛ mowurərna ŋa, kə moloku a eyi doru.

24 Kə afum aləma ŋayina su dacə, kə ŋəŋkə dəndo dəkufu, kə akakə ŋəŋkə ŋabəp mes pəmō təkə aran ŋalokuna su mə, mba nkən, ŋa ŋanəŋkna fē kə.»

25 Kə Yesu oloku ŋa: «Nəna afum atəsək səbomp, bəkəc yonu yonwon kələŋ moloku mmɛ adəŋk a Kanu ŋanaloku mə!

26 Pənamar dis dələl Krist Wəyɛk-yɛk wəka Kanu tantɛ a pədebərə debeki dən dən disrɛ?»

* 24:20 *K'ancəŋ kə* = «ampandən kə dəkətək» kə «aŋgbek kə dəkətək»

27 Kəyefə ka buk ba Musa kəbəp ka yecicəs yecempi ya adənk a Kanu alpəs anjə fəp, kə Yesu ələmər nja təkə Yecicəs Yosoku fəp yoloku tetən mə.

28 Nte njalətərne tadare təkə njanckə mə, kə Yesu əyə pəmə nte enfanj kəcepər pəkə pəbələ mə.

29 Mba kə njaməne kə kəcepər, njacloku: «Məyi nno kə səna, dec defanj kəkale, kəbiyə kə pəndə. Kə Yesu embere kəkəyi di kə nja.»

30 Njandə demesa kəkədi yeri, kə Yesu elək kəcom, k'eyif Kanu barka, k'entepi ki k'əsənj nja.

31 Kə fər yanjan yemere, kə njanepəl kə, mba k'əsələ sə fər yanjan kirin.

32 Kə afum anjə njaefə kələkene: «Pəyina fe pəmə nte nenc denji su dəcor, nte endenasəkəse su moloku mecic nde dəpə mə?»

33 Kə njaefə gbəncana babəkə kə njalukus Yerusalem, kə njanjə nja bəp acespə darənj a Yesu anjə wəco kə pin njaclonkane kə asol anjan,

34 njacloku: «Kance kə: Wəbe əfətə afi daco, k'ənjə pəwurər Simənj!»

35 Kə afum anjə mərənj njaləm sə təkə tenacepər dəpə mə, kə təkə njananepəl kə kətepi kən kəcom pəsənj nja mə.

Yesu kəmentərne kən acespə ən darənj

Mat 28.16-20; Mark 16.14-18; Isanj 20.19-23; Asom 1.6-8

36 Njai kələku moloku maməkə, kə Yesu nkənsərka owurər nja, k'oloku: «Pəforu peyi nu!»

37 Kə ayek-yek nontorər nja, kə njanesə, kə pəyi nja pəmə nte njanənəjk tubəri mə.

38 Mba kə Yesu eyif nja: «Ta ake tə pəyine nu yamayama tante-e, ta ake tə nəngbəkəlnene dəbəkəc-ε?»

39 Nəməmən ma wəcək wem kə waca wem-a, ina əfo yati! Nəgbunən'em, nəməmən! Tubəri təyə fe sem, təyə fe bent. Mba ina, iyə yayəkə fəp.»

40 Yesu eyi kələku moloku maməkə, k'ementər nja waca wən kə wəcək.

41 Mba nte pənananjane kəbət nja hanj ta njantam kəlanj mə, kə njai pəciyanə disre. Kə Yesu eyif nja: «Nəyə paka pələma pedi ba?»

42 Kə acespə ən darənj njawure alop njenəkət njin kə njasənj kə.

43 Kə Yesu elək alop njanəkə k'əsəm nji fər yanjan kirin.

44 Nte elip kəsəm alop nne mə, k'oloku nja: «Mes mame m'inclok'un nte inayi kə nənə mə. Mene mes məkə ancic tetem Tawureta Musa, yecicəs yecempi ya adənk a Kanu kə Yabura Dawuda mə fəp meyi.»

45 Kə Yesu əsənjə nja kəsək səbomp nte tənəsənjə njacərə Yecic ya Kanu fəp mə.

⁴⁶ Kə Yesu oloku ŋa: «Nte tɔ ancic dəYecicəs Yosoku, a dis dendeləl Krist, kə tɛyɛfɛ dənda-ɛ, pəfɔtɛ afi dacɔ tataka tən ta maas.

⁴⁷ Mɛnɛ pacam kəsəkɔpər mera pacəmɛ pəlompɔ darəŋ tewe tən, kəyɛfɛ ka Yerusalɛm, nte tənɔŋɛ paŋaŋnɛnɛ afum a tɔf ya doru fəp kiciya kəŋan mə.

⁴⁸ Nən'ɔyɔnɛ sede sa mes mamɛ.

⁴⁹ Kə ina, kəkɛrɛ nu k'inder daka ndɛ Papa kem ɛnasəŋ temer kəsəŋ nu mə. Nəyi nnɔ dare dandɛ haŋ Kanu kələs nu fənəntər fa darenc.»

Yesu kəpɛ kən darenc

Mark 16.19-20; Asom 1.9-11

⁵⁰ Kə Yesu osole ŋa k'ɛŋkəkərɛ dare kəsək ntende Betani, nte ŋambəp di mə, k'ɛmpɛnɛ waca darenc, k'ontolanɛ ŋa.

⁵¹ Eyi kətolanɛ ŋa, k'ɛsak ŋa, k'ampɛnɛ kə dəkəm.

⁵² Kə ŋancəpɛ kə mobu kəsəŋɛ kə pələli, kə ŋalukus Yerusalɛm, pəbotu disrɛ.

⁵³ Tɛm o tɛm ŋanckɔ oŋ ndɛ **kələ kəpəŋ ka Kanu**, ŋackor-koru Kanu.

Yebac ya Asom a Yesu

Asɔŋ asom a Yesu temer ta kader ka Amera Nɛcempi ŋa Kanu

¹ Wanapa Teyofil,

Inacicəs kitabü kem kɔcɔkɔ-cɔkɔ disre mes mmɛ Yesu ɛnacop kəyɔ kɔ kətəksɛ mə,

² haŋ dɔsɔk ndɛ anapɛnɛ kɔ darenc, ntɛ elip kəsom asom ɔn Amera Nɛcempi ŋa Kanu disre, aŋɛ ɛnayɛk-yɛk mə.

³ Asom akakɔ ŋɔ Yesu ɛnamentər kance ka mes mɛlarəm ntɛ ɛnayɛfɛ pucuy pa defi mə. K'owurər ŋa mata 40 pəyi wəyɛŋ, pəcloku ŋa mes ma dəbɛ da Kanu.

⁴ Dɔsɔk dɔlɔma ntɛ ŋayi kədi yeri kɔ Yesu mə, k'oloku ŋa: «Ta nəbɔlɛ dare da Yerusalɛm, mba nəkar tes ntɛ Papa ɛnasɔŋ temer kədesɔŋ mə, tɔkɔ nənane icloku mə:

⁵ Dəromun Saŋ ɛncgbət afum teta Kanu, mba nəna kəgbət dəromun dəAmera Nɛcempi ŋa Kanu disre kɔ nəndesɔtɔ mata mamɛ.»

Kəpɛ ka Yesu dəkəm

⁶ Akɔ ŋanalɔŋkanɛ mə kɔ ŋayif Yesu: «Wəbɛ, tɛm tantɛ tɔ məndelompəsɛ Yisrayel dəbɛ ba?»

⁷ K'oloku ŋa: «Tɛncəmɛ fɛ nu dɔpɔ kəcərə ka tɛm kɔ dɔsɔk ndɛ Apa Kanu ɛncɛmɛmnɛ kəyɔ tɛfaŋ tɔn kətam kɔn disre mə.

⁸ Mba nəndesɔtɔ fənɔntər kɔ Amera Nɛcempi ŋa Kanu ŋɛndeder nu-ɛ, tɛm tatakɔ nəndeyɔnɛ atəŋnɛ aŋɛ mes mencepər fər yaŋan kirin mə ndɛ dare da Yerusalɛm, atɔf ŋa Yude fəp kɔ atɔf ŋa Samari kəkɔbər cəpəc ca doru fəp.»

⁹ Ntɛ elip kəloku tatakɔ mə, afum aŋɛ ŋanayi di mə fəp ŋanagbətɛ Yesu ntɛ ancɛnɛ kɔ mə, kɔ kəp kəŋkump kɔ, ŋanctam fɛ sɔ kənəŋk kɔ.

¹⁰ Ntɛ Asom ɔn ŋanagbətɛ kəm Yesu pəcpɛ darenc mə haŋ k'əsɔlɛ. Gbəncana babɔkɔ kɔ mɛlɛkɛ mɛrəŋ mɛmbɛrnɛ yamos yomotər-motər mɛmɛtərɛ ŋa,

¹¹ kɔ moloku: «Afum a Kalile, ta ake tɔ nəncəmɛnɛ kəmɔmən kəm-ɛ? Yesu, wəkakɔ ɛmpɛ dəkəm fər yonu kirin mə, tantɛ nəŋgbətɛ kɔ pəcpɛ mə, t'ɛndesɔ-der.»

Wəcənc ka Yudas

¹² K'asom a Yesu ŋalukus Yerusalɛm kəyɛfɛ ndɛ tɔrɔ tɔkɔ aŋwɛ «Tɔrɔ ta tək ya *Olif*», mpɛ pəntɔbɔlɛnɛ dare mə. Pəbol-bolu mpɛ dinɛ da aSuyif doncwosɛ fum kəkɔt pabər simiti, dɔsɔk da kəŋɛsəm mə.

¹³ Ntɛ ŋambɛrɛ dare mə, kɔ ŋampɛ dəkəlɔ da kəron ndɛ ŋancndɛ mə. Afum aŋɛ ŋanayi di mə: Piyɛr, Isaŋ, Sak kɔ Andərə,

Filip kɔ Tɔma, Bartelemy kɔ Matiye, Sak wan ka Alfe, Simɔŋ wɛsimɛ teta atɔf, kɔ Yudas wan ka Sak.

¹⁴ Fɛp faŋan kɛfo kin kɔ ŋanckɔ kɛtola Kanu tɛm o tɛm kɔ aran, kɛbɛp ka awɛnc a Yesu, kɔ iya kɔn Mari.

¹⁵ Dɔsɔk dɔlɔma mata mamɔkɔ disrɛ, afum aŋɛ ŋanayi di mɔ, ŋanckɔ haŋ afum tasar tin kɔ wɛco mɛrɔŋ (120). Kɔ Piyɛr ɛyɛfɛ awɛnc ɔn daco, k'oloku:

¹⁶ «Awɛnc im aŋa: Pɛnamar yecicɛs ya dɛkitabu yɛlarɛ. Ti disrɛ Amera Nɛcɛmpi ŋa Kanu nŋɛ Dawuda ɛnanuŋkɛnɛ kɛloku teta Yudas, nwɛ ɛnasolɛ aŋɛ ŋanasumpɛr Yesu mɔ.

¹⁷ Analɔm Yudas su daco, sɛpaŋnɛ yebɛc yin yayi.

¹⁸ Ntɛ elip kɛsɔtɔnɛ abɔf pɛsam pa kiciya kɔn mɔ, k'ɛŋgbɛkɛnɛ, k'ɛntɛmpɛnɛ tekiriŋ k'ɛwalinɛ kor kɔ tɔsɔŋɛ sumpa sɔn fɛp kɛsamsɛr dɛntɔf.

¹⁹ Tes tɔ ntɛ aka Yerusalem fɛp ŋanacɛrɛ mɔ, ti tɛnasɔŋɛ pawɛ dalɛ dadɔkɔ «Hakeldama», itɔ tatɔkɔ kusu kɛŋan «Dale da mecir».*

²⁰ Bawo anacic ndɛ Yabura Dawuda disrɛ:

«Kɛlɔ kɔn kɛyɔ fos,

ali fum ta pɛyi ki!»

K'ɛnacicɛs sɔ:

«Wɛlɔma pɛlɛk dɛkɛcɛmɛ dɔn!»

²¹⁻²² Mɛnɛ pamɔmɔnɛ afum aŋɛ ŋanccɛmbɛr su tɛm ntɛ Yesu ɛncpɛ pɛctor kɔ sɛna mɔ, mɛnɛ wɛkin pɛyi su daco nwɛ endeyɔnɛ wɛtɔŋnɛ mes mɛmɛ mɛnacepɛr fɔr yɔn kiriŋ kɛyɛfɛ ka Yesu afi daco, mɛnɛ wɛkayi sɔ pɛyɔnɛ wɛnatɔŋnɛ mes fɛp kɛlɛk kɛgbɛt ka Saŋ teta Kanu, haŋ dɔsɔk ndɛ Yesu ɛnayɛfɛ su daco mɔ.»

²³ Awa kɔ ŋamentɛr afum mɛrɔŋ: Matiyas, kɔ Isifu nwɛ ancwɛ Barsabas, pacdɛŋɛr kɔ sɔ tewɛ ta Yusutu.

²⁴ Kɔ ŋantola Kanu ntɛ: «Wɛbɛ, mɛna nwɛ mɛncɛrɛ bɛkɛc ya fɛp mɔ, mɛmentɛr su gbasŋa wɛkin nwɛ mɛlɛk kɛdɛcɔnc Yudas akaŋɛ mɛrɔŋ daco mɔ.

²⁵ Tɔsɔŋɛ wɛkayi kɛcop su daco yebɛc yɔn, pɛlɛk dɛkɛcɛmɛ ndɛ Yudas ɛnasak a k'ɔŋkɔ kɛfo nkɛ kɛmar kɔ mɔ.»

²⁶ Kɔ ŋaŋkot yampunŋpun † kɔ tosurɛnɛ Matiyas nwɛ anabɛrɛnɛ Asom aŋɛ wɛco kɔ pin mɔ.

2

Kɛdɛr ka Amera Nɛcɛmpi ŋa Kanu

* **1:19** «Kiciya ka Yudas», mɛmɔmɔnɛ Matiye 26.47-53, 27:3-8. **1:20** Yabura 69.26; 109.8 † **1:26** Ntɛ ŋanafaj kɛcɛrɛ tafaj ta Kanu mɔ, kɔ ŋambɛr ca yowurɛnɛ mɛrɔŋ dɛlɔba. Pin tewɛ ta Matiyas, pɔkɔ tewɛ ta Barsabas. Dɛkɛwurɛ da yi, kɔ wɛkin (Matiyas) ɔsɔtɔ.

1 Nte Dɔsɔk da kəsata ka Tataka ta wɔco kəcəmɛt dɛnabɛp mɔ, alaŋ a Yesu fɛp ŋanalɔŋkanɛ kɛfo kin.*

2 Gbɛncana babɔkɔ kɔ pukulɛ pɛyɛfɛ dɛkɔm mpɛ pɛnawurɛnɛ pukulɛ pa afɛp ŋɔpɔŋ mɔ, kɔ pɛlas kɛlɔ kanɔkɔ ŋanandɛ disrɛ mɔ.

3 Kɔ memɛr mowurɛr ŋa mmɛ mɛnawurɛnɛ ma nɛnc mɔ. Kɔ meyerɛsɛnɛ fɛp faŋan, kɔ temɛr tɛntɔpɛnɛ nwe o nwe dɛtɔbu.

4 Kɔ Amera Nɛcɛmpɛ ŋa Kanu ŋɛndɛr ŋa fɛp, kɔ ŋayɛfɛ kɛcɔp nwe o nwe kusu kɛcuru. Amera Nɛcɛmpɛ ŋɔncsɔŋɛ ŋa kɛcɔp tatɔkɔ.†

5 Awa tɛm tatɔkɔ aSuyif aɛmpɛr dinɛ gbɛŋ aŋɛ ŋanayɛfɛ tɔf ya doru fɛp mɔ, ŋanandɛ dare da Yerusalem.

6 Nte ŋane pukulɛ mpɛ mɔ, kɔ ŋayɛkse kɛkɔ di. Kɔ pɛnciyɛnɛ acikɛra fɛp nte ŋane afum a Kalilɛ ŋaccɔp nwe o nwe kusu k'acɛkɛra mɔ.

7 Pɛciyanɛ, kɔ kusu kɛwɔs kanɔkɔ disrɛ, kɔ ŋayifɛnɛ: «Afum akanɛ ŋalok-loku mɔ, bafɔ aka Kalilɛ ŋɔ ba?

8 Ake'sɔŋɛ nte sɛna dacɔ, fum o fum enɛ ŋaccɔp kusu kɛn mɔ?

9 AParto, aMede, aka Elam, aka Mesopotami, aka Yude, aka Kapados, aka Ponto, kɔ aka Asi,

10 aka Firiki, aka Paŋfili, aka Misira, aka Libi andɛ a atɔf ŋa Sirɛn, aRom,

11 aSuyif kɔ acikɛra aŋɛ ŋanctubucɛnɛ pɛtɔt pa dinɛ da aSuyif mɔ: Aka Krit, aka Arabi, sɔŋnɛ ŋa ŋacloku cusu cosu mɛs mɔpɔŋ ma Kanu!»

12 Kɔ cusu cɛwɔs ŋa kɔ pɛyi ŋa yamayama, kɔ ŋayifɛnɛ taŋan: «Cɛkɛ cɔ tantɛ toloku-ɛ?»

13 Mba kɔ alɔma ŋaŋfani ŋa, ŋacloku: «Mɛmbɛr mobotu mɔ ŋanɛmbɛrɛ!»

Kɛcam ka Piyɛr

14 Kɔ Piyɛr ɛyɛfɛ k'ɛncɛmɛ kɔ asom a Yesu aŋɛ wɔco kɔ pin, k'ɛmpɛnɛ dim pɛcloku kɛnay nke: «Afum a Yude kɔ nɛna aŋɛ nɛndɛ dare da Yerusalem mɔ, nɛsu lɛŋɔs, nɛcɛŋkɛl belbel moloku mem! Nɛcɛrɛ ti:

15 Afum akanɛ ŋancɛs fɛ pɛmɔ tɔkɔ nɛcɛmɛmɛnɛ ti mɔ, bawo bɛtɔbɛt b'ayi bambɛ. ‡

16 Mba tɔkɔ aŋnabi Yowɛl ɛnaloku mɔ teyi kɛcɛpɛr:

17 «Kɔ Kanu kɛloku mata mɛlpɛs:

«Indesamsɛr Amera ŋɛm nnɔ afum fɛp ŋayi mɔ.

Awut anu arkun kɔ aran ŋandɛ ŋacdɛŋk cɛsayibɛ-ɛ.

Indesɔŋ awut atɛmp anu kɛnɛŋk ka mɔyɔ mem,

indewɛrɛpɛs sɔ afum anu atɛm.»

* **2:1** *Kəsata ka Tataka ta wɔco kəcəmɛt*: Mɛmɛman ALewy 23.15-21, Sariyɛ 16.9-11. Itɔ kɛrɛn o kɛrɛn aSuyif ŋamboc kəsata ka kɛtɛl tatɔkɔ tataka ta wɔco kəcəmɛt (50) kɔ kəsata ka Kɛcɛpɛr kɛncɛpɛr-ɛ. † **2:4** Mɛmɛman 1.5,8 (toloku ta kɛsɔŋ temɛr Amera Nɛcɛmpɛ ŋa Kanu.) ‡ **2:15** *Bawo bɛtɔbɛt b'ayi bambɛ* = itɔ kusu ka aka Kresi koloku: «Dec maas da dɔsɔk dɔ dandɛ» = 9:00, bɛrɔbɛt.

18 <Ey,> Kanu kəloku, <Indeyerəs Amera Nəcempi nɛm acar em
arkun kə aran,
mata maməkə, nɛndedəŋk cəsayibε-e.

19 Indementər mes mɛwɛywey mɛlarəm dəkəm

kə mɛgbəkərɛ ma Kanu nnə dəntəf: Mecir, nɛnc, kə acul nɛ
kinimε.

20 Dec dendesəkrɛ kubump,

kə nɛf nɛsəkrɛ mecir.

Maməkə mendecepər a dəsək da Wəbe dedebər,

dəsək dadəkə dɛmbək kə dentesε.

21 Nwε o nwε endekornε Mariki mə endefis.>

22 Afum aka Yisrayel, nəcəŋkəl moloku mamε! : Yesu wəka
Nasarət, fum nwε Kanu kəmentərɛ nu debeki dən mə, dəmes
mɛwɛy-wɛy, dəmərɔŋ, dəməgbəkərɛ pəmə tatəkə nəncərɛ ti mə,

23 fum wəkawε anasəŋ nu kədif kən pəmə təkə Kanu
kənaɔsε ti kə kəsəŋ təkətɛnε ta ti mə. Nənim kə nəncəŋ kə
dətək yɛpəmpəl kəmar ka waca wa acikəra. §

24 Kanu kəyɛkti kə kəŋgbintər kə pəcuɔ pa defi, bawo defi
dɛnatam fε kəmɛŋkərɛ kə.

25 Dawuda ɛnanuŋkɛnε kəloku dəyɛcicəs yecempi teta Yesu:
<Incəŋk Mariki tɛm fəp fər yem kirinɔ,
ifəyikε, bawo ey'im kəca kətət.

26 It'əsəŋɛ nɛ abəkəc nɛm nɛyi dəkəsata mə, kə temer tem
tesikələ dəpəbotu.

Dis dem yati dendekəŋesəmε kəgbəkər amera.

27 Bawo məfədekəsak im dabiya

məfədekəsak wəsoku kam pəte.

28 Məsəŋ'em kəcərɛ səpə sa kəcəpərɛnε doru,

kiyi kam ina kəsək kəndekəlas im pəbotu.>

29 Awɛnc im aŋa! Nəɔsε iloku nu nɛ kəlanɔ disrɛ teta wətem
Dawuda: ɛnafi, k'awup kə, kə kufu kən kəyi su sə məkə dacə.

30 Mba nɛ Dawuda ɛnəyɔnε sayibε mə, ɛncərɛ sə a Kanu
kənadərɛmε kə a kəndedəs wansə kən wələma dəcəm da dəbe
dən kəronɔ.

31 Dawuda ɛnanuŋkɛnε pənəŋk kəyɛfε ka Krist dəkufu *,
ɛnanəŋk nɛ tendeder mə k'oloku ti: a anasak fε Krist dabiya,
dis dən dɛnate fε dəkufu.

32 Yesu wəkakə, Kanu kəyɛkti kə, sənə fəp səyɔnε sedε aka ti.

33 Kə Kanu kəmpɛnε Yesu kəfo kələli, k'endəs kə kəca kən
kətət. Kə Yesu əsətər nkən apa Kanu Amera Nəcempi nɛ
analoku kədəsəŋ mə, k'eyerəs tatəkə nənəŋk kə nənε mə.

34 Bafə Dawuda ɛnapɛ darenc, nkən yati oloku:

2:21 Yowel 2.28-32

§ 2:23 Acikəra = afum atətəmpər sariyε, atəyɔnε aSuyif.

2:28 Yabura 16.8-11

* 2:31 Krist = Wəbe nwε Kanu kəyɛk-yek mə, Wəyɛk-yek ka
Kanu

«Mariki Kanu oloku Mariki mem: «Mænd'em nnɔ kɛca kem kətɔt,
 35 haŋ iclip kəboc aterɛnɛ am wɛcək wam dɛntɔf mɛnas-nas ŋa.»

36 Pɛmar aka Yisrayel fəp ŋacərə ti belbel: Kanu kənasɔŋɛ Yesu kəyɔnɛ wəbɛ wəyɛk-yɛk kɔn, Yesu wəkakɔ nəncəŋ dətək yepəmpəl mɔ.»

37 Ntɛ afum ŋane moloku maməkɔ mɔ, kɔ mosumpər ŋa, kɔ ŋayif Piyɛr kɔ asom a Yesu akɔ: «Awɛnc su aŋa, cəke cɔ pɛmar səyɔ oŋ-ɛ?»

38 Kɔ Piyɛr oloku ŋa: «Nəsəkpər mera yonu, nəlomp! Nwɛ o nwɛ pəsɔtɔ kəgbət dərɔmun tɛwɛ ta Yesu Krist disrɛ, ntɛ tɔŋsɔŋɛ paŋaŋənɛnɛ kiciya ka wəkayi mɔ, nəndesɔtɔ sɔ Amera Nɛcɛmpi ŋa Kanu.

39 Bawo, kəpocɛ nkɛ Kanu kənasɔŋɛ temer mɔ, konu kɔ, kɔ awut anu kəbəp ka akɔ ŋayi pəbɔlɛ mɔ, haŋ kənay ka afum nkɛ Wəbɛ Kanu kosu endewɛ mɔ.»

40 Kɔ Piyɛr oloku ŋa sɔ moloku mɛlarəm ntɛ tɔŋsɔŋɛ ŋanɛnɛ kɔ mes mmɛ mɛnəcɛpər fər yɔn kirin mɔ. K'ɛŋgbinər ŋa, pəcloku: «Nəyacnɛ dɛtɛmp dandɛ dɛŋkafələ-kafələ mɔ!»

41 Afum alarəm ŋawosɛ kəgbət dərɔmun tɛta Kanu. Dəsək dadəkɔ afum wul maas (3.000) ŋambɛrɛnɛ akɔ ŋananuŋkɛnɛ kəlaŋ mɔ.

42 Kɔ ŋancəŋkəl tɛm fəp kɔ belbel mɛtəkɛ ma asom a Yesu, kiyi kəŋan tɛs tin, kəpaŋnɛ kəŋan dap da yeri,† kɔ kətola Kanu.

43 Kɔ kənɛsɛ kəsumpər nwɛ o nwɛ bawo Kanu kəncmɛntərəɛ mes mɔpəŋ kɔ mes mɛwɛy-wɛy mɛlarəm waca wa asom a Yesu.

44 Akɔ ŋanalaŋ mɔ fəp ŋanayi tɛs tin ŋacyɛrɛnɛ mɛrɛ o mɛrɛ ŋaŋsɔtɔ mɔ.

45 Kɔ ŋancaməs daka dəkɔ ŋanayɔ mɔ, kɔ ŋayer pəsam papəkɔ ŋacmɔmən təkɔ pəcucanɛ pɛncɛpərənɛ mɔ.

46 Dəsək o dəsək ŋancloŋkanɛ ndɛ kəlɔ kəpəŋ ka Kanu, ŋacdinɛnɛ yeri kəfo kin ndɛ wɔlɔ waŋan, ŋacdinɛ yi mera yobotu kɔ bəkɛc yoforu.

47 Njackor-koru Kanu, kɔ mes maŋan mɔmbɔt afum fəp. Kɔ Mariki nkɔn ɛmbɛrɛnɛ dəsək o dəsək kəgba ka aŋɛ ɛncyac mɔ.

3

Wəbɛc wətəkɔt ɛntamnɛ

1 Dəsək dɔlɔma Piyɛr kɔ Isan ŋampe ndɛ kəlɔ kəpəŋ ka Kanu dec dərɔfɔy, dec ndɛ antola Kanu mɔ.

2 Tosurɛnɛ pasarɛ wəbɛc nwɛ aŋkomɛ kətəkɔt mɔ. Dəsək o dəsək ancɛkərəɛ kɔ padəs ndɛ kusunka ka kəlɔ kəpəŋ ka Kanu.

2:35 Yabura 110.1 † 2:42 *Kəpaŋnɛ kəŋan dap da yeri* = cəKresi «kətɛrɛnɛ kəcom kəyɛrɛnɛ ki mɔ»

Dando wabac nwe onctolanε daka nonofar disre afum ane nancberε kalε kεpεn mε. Kusunjka nke ancwe «Kusunjka Katot».

³ Nte enajk Piyer kε Isan ane nanc kε kabere kalε kεpεn mε, k'eyefe katola akakε nonofar disre.

⁴ Piyer kε Isan najgbatne kε, kε Piyer oloku: «Mεgbatne su!»

⁵ K'εnjbatne na pεckar kadesotar na paka polom.

⁶ Mba kε Piyer oloku on: «Ali pasam iyε fe, mba mpe iyε mε, ip'indesεn'am: Tewe ta Yesu Krist wεka Nasaret, mεyefe, makot!»

⁷ Gbancana babakε kε nasumpar kε kεca katot kε nayekti, wεcεk kε mεgbalkεc mεn yencεp.

⁸ Kεsorne katin k'eyefe k'encεme, k'elek wεcεk kεkot. K'osol kε na, kε nambere kalε kεpεn ka Kanu disre, pεckot, pεcyoke, pεckor-koru Kanu.

⁹ Kε afum fεp najanj kε fum nwe pεckot, pεckor-koru Kanu.

¹⁰ Ancnepal kε, nkεn encnde nde kalε kεpεn nde «Kusunjka Katot», pεctolanε daka nonofar disre. Kεnese kε paciyanε kεmbεp afum fεp tεta tεkε tenabεp kε mε.

Moloku ma Piyer nde kalε kεpεn ka Kanu

¹¹ Nte fum nwe enader pεyi on ta εnyefe Piyer kε Isan dεntof mε, kεnese disre kε afum fεp nayekse kεkε nde akεr nne anwe «Aker na Sulemani», nde Piyer kε Isan najayi mε.

¹² Nte Piyer enajk ti mε, k'oloku afum: «Aka Yisrayel! Ake'sεne nte tante t'enciyanε nu mε? T'ake tε najgbatnene su pεmε fanεntar fosu, kε pεyεne fe ti-ε, dosoku dosu disre dεsεne fum wεkawε kεkot?»

¹³ Bafε tatεkε tε de! Mba ti disre, Kanu ka atem asu Kanu ka Abraham, Kanu ka Siyaka, kε Kanu ka Yakuba kεnayek-yekεs wεmarεs kεn Yesu. Mba nkεn nεna nεnalek, kε nεsεn abε, nεce kε fεr ya Pilat kirin, ali nte Pilat εnacεm-εεmne kεsak kεn mε.

¹⁴ Nεna nεnace nwe εyεne wεcεmpi kε wεlompu kε naloku a pawose kεsakε nu wεdifεt afum dare disre.

¹⁵ Nεnadif wεkirin wεka doru, mba Kanu kεnasεne kε kafote afi daccε. Sεn'εyεne atεne aka ti.

¹⁶ Anasεn fanεntar fum wεkawε najgbatne kε nεncεre mε. Kεlan kεn Yesu gbεcεrεm kεsεn fum wεkawε fanεntar. Kεlan kεn Yesu kεsεn kε katamne ke nε fεr ya fεp fonu kirin.

¹⁷ Ndekεl on, awεnc im anε, incεre a katεcεre konu kεnasεne nu kεyε tatεkε, nεna kε abε anu.

¹⁸ Kanu kεnalas tεkε kεnanunkenε kaloke cusu ca sayibe εn fεp mε: A pεnamar dis dεlεl Krist, wεyek-yek kεn.

¹⁹ Nεsεkpar bεkεc yonu, nεlaksεrne nte tεnsεne panεnne kiciya konu mε,

²⁰ nte tεnsεne Wεbe Kanu pεgbakεre sε kεkεre nu tεm ta kεnesεm, Yesu nwe ananunkenε kεyεkyεke nu mε.

²¹ Nkɔn kɔm kɛntɔmpɛr haŋ tɛm nte mes mme Kanu kɛnalokɛ tɛm tobol-bolu cusu ca sayibe ɔn sɛcɛmpi mɔ melare.

²² Aŋnabi Musa ɛnaloku: «Wɔbɛ, Kanu konu, endekɛɛ nu sayibe pɛmɔ ina. Fum wɛkin wɛka awɛnc anu dacɔ endeyi, nɛde nɛcɛŋkɛl moloku mamɔkɔ ende pɛcloku nu mɔ fɛp.

²³ Nwɛ o nwɛ ɔntɔdecɛŋkɛl wɛdɛŋk wɛkakɔ mɔ, andelɛsɛr kɔ. Endemɛlkɛ afum a Kanu dacɔ.»

²⁴ Sayibe fɛp kɛyɛfɛ aŋnabi Samiyɛl haŋ aŋɛ ŋanacɔnc kɔ mɔ, ŋanaloku teta mataka mamɔkɔ, kɔ ŋaŋdɛŋk mi.

²⁵ Nɛna, awut a sayibe ŋɔ nɛyɔnɛ, kɔ nɛyɔnɛ sɔ awut a temer tɔkɔ Kanu kɛnacɛŋɛs kɔ atem anu mɔ, kɛcloku Abraham: «Afum a doru fɛp ŋandesɔtɔ kɛpɔcɛ kɛtɔt kem teta kɛbɛnda ka dokom dam.»

²⁶ Te tonu tɔ, Kanu kɛnanunɛkɛnɛ kɛyɛkti wɛcar kɔn, k'osom kɔ kɛdetolane nu, pɛsɛkpɛr nu nwɛ o nwɛ abɛkɛc ŋɔn ŋɛɛc, ŋɛyɔnɛ kɔ ŋɔtɔt.»

4

Piyer kɔ Isan fɛr ya aboc kiti aSuyif kirin

¹ Piyer kɔ Isan ŋanayi kɛlok-lokɛr afum tɛm nte alɔŋnɛ a kɛlɔ kɛpɔŋ ka Kanu ŋanabɛɛ kɔ wɔbɛ ka asɔdar aŋɛ ŋancbum ki mɔ, kɔ aSadisi.

² Pɛnatɛɛ ŋa nte ŋanane Piyer kɔ Isan ŋactɛkɛ afum a fɛp fɛndɛfɔtɛ afi dacɔ pɛmɔ nte Yesu ɔfɔtɛ afi dacɔ mɔ.

³ Kɔ ŋasumpɛr Piyer kɔ Isan, kɔ ŋandɛs ŋa pacbum ŋa dɛbili haŋ dɛckɔsɔk, bawo pɛnabiye.

⁴ Afum alarɛm alɔma aŋɛ ŋanane moloku maŋan mɔ, ŋanalaŋ, dɛlay daŋan dɛnabɛp arkun wul kɛcamɔt (5.000).

⁵ Dɛckɔsɔk abɛ aŋan, abeki apɔŋ a dɔtɔf, kɔ atɛkɛ a yecicɛs ya Aŋnabi Musa ŋambɛpsɛnɛ Yerusalem

⁶ kɔ wɛlɔŋnɛ wɛpɔŋ Anas, kɔ Kayifa, Isan, Aleksandɛr, kɔ akɔ ŋanayɔnɛ aka kɛbɛnda ka dokom da alɔŋnɛ apɔŋ mɔ.

⁷ Kɔ ŋancɛmbɛr Piyer kɔ Isan fɛr yaŋan kirin kɛyifɔt: «Fɛnɔntɛr fɛrɛ, kɔ tewɛ ta ana tɔ nɛyɔnɛ tante-ɛ?»

⁸ Awa kɔ Amera Nɛcɛmpi ŋa Kanu ŋɛlarɛ Piyer, kɔ ŋɔsɔŋɛ kɔ kɛloku ŋa: «Abɛ a afum kɔ abeki a dɔtɔf:

⁹ Ayifɔt su mɔkɔ teta pɛtɔt mpɛ ayɔnɛ wɛlanyuru mɔ, kɔ nte antamɛs kɔ mɔ.

¹⁰ Nɛcɛrɛ ti belbel, fɛp fonu kɛbɛp ka aYisrayɛl: Tewɛ ta Yesu Krist wɛka Nasarɛt, wɛkɔ nɛnacɛŋ dɛtɔk yɛpɛmpɛl, akɔ Kanu kɛnasɔŋɛ kɔ kɛfɔtɛ afi dacɔ mɔ, tewɛ tɔn tɔsɔŋɛ nte fum wɛkawɛ ɛncɛmɛ nu dacɔ pɛtamnɛ mɔ.

¹¹ Nkɔn Yesu ɔyɔnɛ togbu mpɛ nɛna acɛmbɛr kɛlɔ nɛnafani mɔ, mba ɛnayɔnɛ togbu pɛtɔt pa dacɔ.»

12 Nkɔn gbacɛram entam kɛsɔŋ su kɛfis. Kanu kɛnasɔŋ fɛ tewe tɔlɔma ta fum nnɔ doru dandɛ nte pɛmar payacnɛnɛ mɔ.»

13 Nte abeki aŋɛ ŋanɛŋk Piyɛr kɔ Isan ŋabɛkne mɔ, kɔ pɛnciyanɛ ŋa, bawo ŋanacɛrɛ a afum gbacɛram ŋanayi aŋɛ ŋanatɔtɔkɛs mɔ. Kɔ ŋanɛpɛl ŋa dacɔ akɔ ŋanayi kɔ Yesu mɔ.

14 Mba nte abeki apɔŋ ŋancnɛŋk fum nwe anatamɛs pɛcɛmɛ ŋa fɔr kirin mɔ, ŋanayɔ fɛ toloku.

15 Kɔ aboc kiti aSuyif ŋaloku Piyɛr kɔ Isan kɛwɔr ka dɛkɛlɔ ndɛ ancyifɛt ŋa mɔ, kɔ ŋamɛŋksɛnɛ tanjan,

16 kɔ ŋayifɛnɛ: «Cɛke c'andeyɔ afum akanɛ-ɛ? Bawo tɔsɛkɛr aka Yerusalem fɛp a ŋa ŋasɔŋɛ kɔ tɛgbɛkɛrɛ ta Kanu tantɛ teyi. Afɔtam kɛgbɛkɛl ti.

17 Mba, nte anyɔ a ta tɛsam nnɔ afum ŋayi mɔ, pabɛŋnɛ ŋa, pamɔnɛ ŋa kɛclɔk-locɛr nwe o nwe tewe tatɔkɔ.

18 Kɔ ŋawe ŋa, kɔ ŋambɛŋnɛ ŋa kɛtɔloku kɔ kɛtɔtɔkɛ afum tewe ta Yesu.

19 Piyɛr kɔ Isan ŋayif ŋa: «Pɛmar fɔr ya Kanu kirin palelɔs nɛna patas Kanu Nkɔn ba? Nɛna nɛmɔmɛn ti belbel,

20 bawo sɛna sɛfɔtam kɛyi ta sɛloku tɔkɔ sɛnɛŋk kɔ tɔkɔ sɛnɛ mɔ-ɛ.»

21 Kɔ aboc kiti ŋanɛgbɛkɛrɛ sɔ kɛbɛŋɛsɛnɛ ŋa, kɔ ŋasak ŋa. ŋanasɔtɔ fɛ tes nte andɛŋɛ ŋa a patɔrɛrɛ ŋa ti mɔ bawo afum fɛp ŋanckor-koru Kanu teta tɔkɔ tɛnacɛpɛr fɔr yanjan kirin mɔ.

22 Fum nwe ɛnasɔtɔ tɛgbɛkɛrɛ ta kɛtamɛs tatɔkɔ mɔ, ɛnatam kɛsɔtɔ meren wɛcɔ manɛkɛlɛ pɛcɛpɛr.

Kɛtola ka alan

23 Nte asak Piyɛr kɔ Isan mɔ, kɔ ŋanɛkɔ ŋalɔmɛr afum aŋan tɔkɔ alɔŋnɛ apɔŋ kɔ abeki a dɔtɔf ŋanaloku ŋa mɔ.

24 Nte ŋane moloku mame mɔ, kɛtɛŋnɛ disrɛ kɔ ŋampɛnɛ sim nnɔ Kanu kɛyi mɔ, ŋaclɔku: «Wɛbɛ, mɛna nwe mɛlɔmpɛs kɛm, antɔf, kɛba kɔ ca yɔkɔ yeyi ki mɔ fɛp,

25 dɛAmerɛ Nɛcɛmpi ŋɔ mɛnalokɛ kusu ka kas kosu Dawuda wɛmarɛs kam:

«Akesɔŋɛ nte mɛtɛlɛ mɔpɔŋ mɛncɛpɛrɛr afum a tɔf mɔ?

Akesɔŋɛ nte afum ŋantɛŋnɛ mes mɛmɛ mɔntɔdelɛpsɛr mɔ?

26 Abɛ a doru kɔrkɔr ŋalɔmpɛsɛnɛ teta kɛyɛfɛrɛnɛ,

kɔ akirin ŋalɔŋkanɛ kɔ ŋantɛŋnɛ pɛlɛc

nnɔ Wɛbɛ Kanu kɔ wɛyɛk-yɛk kɔn ŋayi mɔ.»

27 Bawo kance, Herodu kɔ Pɔŋsɛ Pilat ŋantɛŋnɛ pɛlɛc dare dandɛ disrɛ atɔyɔnɛ aSuyif kɔ aYisrayel nnɔ wɛmarɛs kam wɛcɛmpi Yesu eyi mɔ, nwe mɛnaye-k-yɛk mɔ.

28 ŋanayɔ mes fɛp mɛmɛ mɛnanunɛkɛnɛ kɛwɔsɛ kɛyɔ mɔ.

29 Nɛkɛl ɔŋ, Wɛbɛ, mɛgbɛkɛrɛ kɛbɛŋɛsɛnɛ kɛŋan, mɛsɔŋɛ acar am kɛbɛkɛnɛ kɛloku toloku tam kance disrɛ.

³⁰ Mætenci kəca nte təsəŋe kətaməs, megbəkəre, kə mes mēwey-wey meyi tewe ta wəcar kam wəsoku Yesu.

³¹ Nte ŋalip kətola Kanu mə, kə kəfo kəŋkə ŋanaloŋkanə mə kəyikce, kə Amera Nəcempi ŋəsəŋe fəp faŋan kəloku toloku ta Kanu kəbəkne disre.

Alaŋ Yesu ŋawose kəyerene daka daŋan

³² Kənay nke kənaləŋ mə, ŋasətə bəkəc yin yayi, kə ŋayəne sə akin ayi. Nwe o nwe oncloku fe a nkən sona əyə daka dən, mba a fəp faŋan fə ŋanapaŋne di.

³³ Asom a Yesu ŋancloku təkə ŋananəŋk kəfəte ka Mariki Yesu afi dacə mə. Kə kəmar ka Kanu kəyi alaŋ fəp kəroŋ.

³⁴ Afum akanə dacə, nwe o nwe abəkəc ŋenaləce fe sə teta kətəyə kən daka, bawo aŋe ŋanayə dale, kə pəyəne fe ti wələ mə, ŋanacaməs yi. Kə ŋaŋkere kəway ka ca yayəkə,

³⁵ kə ŋambocər ki asom a Yesu dəntəf. Kəway kəŋkə k'ancyer nwe o nwe kə təkə pəcuca peyi kə mə.

³⁶ Isifu wəka kor ka Lewy enayi, nwe asom a Yesu ŋancwe Barnabas mə, itə tatəkə kusu kəŋan «Wəcəpəs bəkəc.» Nde dare da Sipər anakom kə.

³⁷ Nkən enacaməs antəf nŋe enayə mə, k'əŋkere kəway kəŋkə fəp k'ender pəbocər ki asom a Yesu dəntəf.

5

Ananiyas kə Safira

¹ Wərkun wələma enayi pacwe kə Ananiyas, kə wəran kən Safira, kə ŋancaməs antəf ŋaŋan.

² Kətəŋne disre kə wəran kən, k'Ananiyas embelər kəway ka antəf ŋaŋəkə k'əŋkere kəway kələpəs nke k'əŋkə pəbocər ki asom a Yesu dəntəf.

³ Kə Piyer eyif kə: «Ananiyas, akə'səŋe nte məwose Sentani səsəŋ am kəyembər Amera Nəcempi mə? Məmbelər kəway ka dale.

⁴ Nte dale dandə denayəne dam mə, ak'enasəŋe ta məmənəkərne di-ε? Ali nte mənacaməs di mə, pəsam papəkə, bafə pam pənayi ba? Akəsəŋ'am kəyə tantε-ε? Bafə afum ŋə məyembər de, mba Kanu!»

⁵ Nte Ananiyas ene moloku maməkə mə, k'entempene, k'əŋgbiŋ kifir, k'efi. Kə kənese kəpəŋ kəsumpər akə ŋanane ti mə fəp.

⁶ K'atemp ŋayefe kə ŋanepsər kə arəfən, kə ŋaŋkə ŋawup.

⁷ Nte dec maas dencepər mə, kə wəran ka Ananiyas embere, ta encərə təkə tenacepər mə.

⁸ Kə Piyer eyif kə: «Məlök'im ma kance: Kəway kəŋke kə nəncaməs dale ba?»

Kə wəran nwe oloku «Ey, kəway kəŋkə yati kə.»

⁹ Kɔ Piyer oloku kɔ: «Akesɔŋɛ nte nantɔŋɛ kɔ nɔwak Amera ŋa Wɔbe mɔ-ɛ? Mɛcɛre a aŋe ŋawur wos ɔm mɔ, ŋayi nde dɔkusunja, kɛkɛrɛ kɔ ŋander sɔ mɔna.»

¹⁰ Gbɔncana babɔkɔ k'entempene kɔ wɛcɛk dɔntɔf, k'engbin kifir. Kɔ atemp ŋambere kɔ ŋambɔp kɔ pafi. Kɔ ŋankekere kɔ, kɔ ŋanƙɔ ŋawur wos kɛsɛk.

¹¹ Kɔ kɔnese kɔpɔŋ kɔsumpɔr kɔlonƙane ka alan fɔp kɔ akɔ ŋanane moloku mamɔkɔ mɔ.

Asom a Yesu ŋanatɔmpɔr mes mɛwɛy-wɛy mɛlarɔm ma Kanu

¹² Asom a Yesu ŋancyɔ mɛgbekere kɔ mes mɛwɛy-wɛy mɛlarɔm mme mɛnayi afum dɔcɔ mɔ. Alan fɔp ŋanacɛme kɔfo kin nde akɛr ŋɛ ancwe «Akɛr ŋa Sulemani» mɔ.

¹³ Afum alpɔs ŋancnese kɔnɔŋkɛl ŋa, mba ŋancyekɛkɛs ŋa.

¹⁴ Kɔnay ka arkun kɔ aran aŋe ŋanalan Wɔbe mɔ, ŋancla ɔŋ kɔla dɔm.

¹⁵ Packere atɔtamne sɔpɔ fɔp packere ŋa dɔyala kɔ dɔsɔpoko nte tɔsɔŋe kɔ Piyer ender-ɛ, andulu ŋɔn gbɔcɔrɔm ŋetam kɔbɔp wɔlɔma mɔ.

¹⁶ Kɔnay ka afum aŋe ŋanayi sɔdare nse sɔnakɛl Yerusalem mɔ, ŋancyekse kɛkɛre Yerusalem atɔtamne nde asom a Yesu ŋanayi afum aŋe yɔŋk yelec yenasɔŋ dɔtonƙulu mɔ, fɔp faŋan anatamɔs ŋa.

Antɔrɔs asom a Yesu teta kɔlan ƙɔŋan

¹⁷ Wɔlonɛ wɔpɔŋ kɔ aSadisi aŋe ŋasol mɔ ŋayɛfene ƙɔraca.

¹⁸ Kɔ ŋantɔp asom a Yesu waca kɔ ŋamber ŋa dɔbili.

¹⁹ Pibi papɔkɔ disre kɔ meleke ma Wɔbe Kanu mengbiti cumba ca bili babɔkɔ, kɔ mowurene ŋa. Kɔ meleke moloku ŋa:

²⁰ «Nɛkɔ kɔlɔ kɔpɔŋ, nɔloku afum moloku kɔ mes fɔp ma tɔkɔtene ta doru dande.»

²¹ Nte ŋane moloku mamɔkɔ mɔ, kɔ asom a Yesu ŋanƙɔ bɔtbɔt suy nde kɔlɔ kɔpɔŋ, kɔ ŋancɔp kɔtɔkse di afum.

Kɔ wɔlonɛ wɔpɔŋ ender kɔ akɔ ɛnasole mɔ. Kɔ ŋawe aboc kiti alpɔs aSuyif kɔ abeki apɔŋ aka Yisrayel fɔp, kɔ ŋasom a pako pawurene asom a Yesu dɔbili, pakere.

²² Kɔ asɔdar ŋafɔ ŋakɔ afum aŋe ŋawur ŋambɔp fe ŋa dɔbili, kɔ ŋalukus. Kɔ ŋanƙɔ ŋaloku ti abe aŋe ŋanasom ŋa mɔ, ŋaloku:

²³ «Sɔŋkɔ sɔbɔp cumba ca bili pacan ci belbel, abum a ci ŋacɛme dɔkɛcɛme danjan, mba sɔngbiti ali fum sɔmbɔp fe bili disre.»

²⁴ Nte ŋane moloku mamɔkɔ mɔ, kɔ pɔyi wɔbe ka asɔdar a kɔlɔ kɔpɔŋ kɔ alonɛ apɔŋ yamayama teta afum akanɛ, kɔ ŋayifne cɔke cɔ tes tantɛ tendelɔpɔsɔr-ɛ?

²⁵ Kɔ fum wɔlɔma ende pɔloku ŋa: «Afum aŋe nɔnaber dɔbili mɔ ŋayi nde kɔlɔ kɔpɔŋ, ŋactɔkse afum.»

26 Asɔdar a kɛlɔ kɛpɔŋ kɔ wɔbɛ kɛŋan ŋaŋkɔ kɛlek asom a Yesu, kɔ ŋaŋkɛrɛ ŋa pɛforu disrɛ, bawo ŋananese afum kɛca-cas ŋa.

27 Ntɛ asɔdar ŋaŋkɛrɛ asom a Yesu mɔ, kɔ ŋancɛmbɛr ŋa fɔr ya aboc kiti aSuyif kirin. Kɔ wɛlonɛnɛ wɛpɔŋ eyifat ŋa,

28 k'oloku: «Bafɔ sɛnamɔnɛ nu kɛtɛksɛ sɔ afum teta tewe tantɛ ba? Nɛlas Yerusalem mɛtɛksɛ monu! Kɔ nɛlɔku gbɛs a mɛnɛ nɛlonɔr su pɛlɛc pa defi da fum wɛkawɛ.»

29 Piyɛr kɔ asom a Yesu ŋaloku: «Kɛcɛŋkɛlɛ Kanu kɛncɛpɛr ka afum!

30 Kanu ka atem asu kɛnasɔŋɛ Yesu kɛfɔtɛ dɛdefi, nwɛ nɛnacɛŋ dɛkɛtɔk yɛpɛmpɛl mɔ.

31 Kanu kɛndɛsɛrnɛ kɔ kɛsɛk bawo nkɔn ɔyɔnɛ wɛkirin kɔ wɛyɛc, ntɛ tɔŋsɔŋɛ pɛsɔŋ aka Yisrayel kɛsɛkpɛr bɛkɛc ŋacɛmɛ dɔpɔ da Kanu darɛŋ, pɛŋaŋnɛnɛ ŋa kiciya kɛŋan mɔ.

32 Sɛna sɛyɔnɛ atɛŋnɛ a moloku kɔ mes mamɔkɔ fɛp, sɛna kɔ Amɛra Nɛcɛmpi ŋɛ Kanu kɛsɔŋ aŋɛ ŋalɛlɛs kɔ ŋawosɛ toloku tɔn mɔ.»

33 Pɛnatɛlɛ aboc kiti aŋɛ ŋanccɛŋkɛl ŋa mɔ haŋ pɛcɛpɛrɛr, kɔ ŋafɛŋ kɛdif ŋa.

34 Mba wɛFarisi wɛlɔma ɛnayi ŋa dacɔ, pacwɛ kɔ Kamaliyel. Wɛtɛksɛ sariyɛ ɛnayi, nwɛ afum fɛp ŋanabɔtɛr mɔ. K'ɛyɛfɛ aboc kiti aSuyif dacɔ, k'oloku a pawurɛnɛ afum akanɛ kɛrɛsna,

35 k'oloku: «Arkun a Yisrayel! Nɛkɛmbɛrnɛ belbel ntɛ nɛndeyɔ afum akanɛ mɔ.

36 Towon fɛ, Tudas ɛnadot banca, afum masar maŋkɛlɛ (400) ŋanacɛk kɔ darɛŋ. Mba anamɛlɛk kɔ, afum akɔ ɛnasolɛ mɔ fɛp k'ambɛlɛs ŋa. Ali wɛkin anasak fɛ.

37 Ntɛ tatɔkɔ tɛncɛpɛr mɔ, kɔ Yudas wɛKalilɛ ɛyɛfɛ tɛm ntɛ anlɔm afum a dɔtɔf mɔ. K'osolɛ sɔ afum alarɛm. Nkɔn sɔ anamɛlɛk kɔ, aŋɛ ɛnasɛp kɛkɛfɛli kɛcɛmɛ kɔ darɛŋ mɔ fɛp, kɔ ŋasamɛsɛr.

38 Nɛkɛl icloku nu, ta nɛcɛpsɛr afum akanɛ, nɛsak ŋa ŋakɔ. Kɔ pɛyɔnɛ a mɛfɛŋ, kɔ pɛyɔnɛ fɛ ti mɔyɔ maŋan nda fum mɛŋyɛfɛ-ɛ, mɛndɛsɔlɛ.

39 Mba kɔ pɛyɔnɛ a nda Kanu mɛŋyɛfɛ-ɛ, nɛfɔdetam kɛsɔlɛnɛ mi de! Nɛkɛmɛrnɛ kɛdɛyɛfɛrɛnɛ kɔ Kanu de!» Kɔ ŋane moloku mamɔkɔ Kamaliyel ɛnasɛp kɛlɔku ŋa mɔ.

40 Kɔ ŋawe asom a Yesu, kɔ ŋasut ŋa, kɔ ŋamɔnɛ ŋa kɛtɔsɔlɔk-lɔkɛ tewe ta Yesu, kɔ ŋasak ŋa.

41 Kɔ asom a Yesu ŋawur ŋa aboc kiti aSuyif dacɔ. Kɔ pɛmbɔt ŋa kɛtɔrɛs kɛŋan teta kɛlɛlɛs ka tewe ta Yesu.

42 Dɔsɔk o dɔsɔk pɛyɔnɛ ndɛ kɛlɔ kɛpɔŋ ka Kanu kɔ pɛyɔnɛ fɛ ti ndɛ wɛlɔ waŋan, ŋanasak fɛ kɛtɛksɛ kɔ kɛcam moloku mɛtɔt: A Yesu ɔyɔnɛ Krist, wɛbɛ nwɛ Kanu kɛyɛk-yɛk mɔ.

6

Ayek-yek arkun camat-merəŋ kəmar ka asom a Yesu

¹ Mata maməkō nte acəpse a Yesu ŋancla kəla dām mō, aSuyif acəp kusu ka Kresi ŋayefe kəcəpəsne teta akō ŋanccəp Ebəre mō. Aran acəp cəkresi aŋe awos aŋan ŋafi mō ŋancsətō fe yeri pəmō acəp Ebəre dəsək o dəsək kō andeyer-ε.

² Kō Asom wəco kō merəŋ ŋawe kənay ka acəpse a Yesu kəŋəŋkəne, kō ŋaloku: «Pəmar fe su kəsak kəcam kō kətəkse toloku ta Kanu teta kəyer yeri.

³ Awa awenc su aŋa, nəyek-yekene arkun camat-merəŋ, aŋe afum ŋancəre kəyō mera yətət mō, ŋalare sō Amera Nəcempi ŋa Kanu kō kəcəre kəkət. Səsəŋ ayek-yek anu akakō yebac yayəkō.

⁴ Səna səsumpər belbel kətola ka Kanu kō yebac ya kəcam kō kətəkse toloku ta Kanu tēm fəp.»

⁵ Kō moloku maməkō məmbət afum fəp, kō ŋayek-yek Etiyen, fum wəlanj Kanu wəpəŋ, pəlare Amera Nəcempi ŋa Kanu, kō Filip, kō Pirəkər, kō Nikanər, kō Timon, kō Parmenas, kō Nikola, wəka dare da Antiyək, nwe enayəne wəcikəra kəberε ka dine da aSuyif mō.

⁶ Kō ŋaŋkō ŋamentər ayek-yek akakō asom a Yesu nte ŋalip kətola Kanu mō, kō ŋandenj ŋa waca kədəs kəŋan.

⁷ Moloku ma Kanu mme anctəkse mō mēncsam kəsam dām, kō acəpse a Yesu ŋala katəna katəna Yerusalem, kō alonjne Kanu alarəm ŋawose kəlanj Yesu.

Kəsumpər ka Etiyen

⁸ Kanu kənamar Etiyen kō kəsəŋ kō kətam kəyō ka mes mēwey-wey kō megbekəre məpəŋ ma Kanu afum dacō.

⁹ Afum alōma aka dəkətola Kanu da aSuyif aŋe ancwe ki «kəb kə Awur dacar» mō, ŋanayine fe Etiyen. ŋa ŋanayəne afum aka atəf ŋa Siren, aka dare da Aleksandər kō afum a atəf ŋa Silisi, kō aka atəf ŋa Asi. Nte tō kō ŋamberε kəgbekəlene kō Etiyen.

¹⁰ Mba ŋanatam fe kəsumpər kō dəmoloku, bawo Amera Nəcempi ŋa Kanu ŋenasəŋ kō kəlok-loke decerən.

¹¹ Ti disre, kō afum akakō ŋasəŋ calbante pəsam aŋe ŋanaloku nte: «Səna sənene kō kəlməs Musa kō Kanu!»

¹² Kō ŋamberəs afum mer kəyefe abeki a dətəf haŋ atəkse sariye. Kō ŋasumpər Etiyen, kō ŋaŋkekəre kō fər ya aboc kiti aSuyif kirinj.

¹³ Kō ŋaŋkenene sō calbante akakō ŋanawose kəyeme mō, ŋaloku: «Fum wəkawe eyi fe nte o nte mēne kəloku pələc pa kəfo kəsoku kaŋke kō sariye sa Musa.

¹⁴ Sənene kō pəcloku a Yesu wəNasaret wəkawe endeləsər kəfo kaŋke, pəsəkpər sō məyō mme Musa enasake su mō.»

15 Aboc kiti aSuyif fap njanagbatne Etiyen, bawo kero kon kancmot pemo ka melake.

7

Etiyen nde far ya aboc kiti kirinj

1 Ko walongne wopon waka kelo kapon ka Kanu eyif Etiyen: «Ita teyi ba?»

2 Ko Etiyen oloku: «Awenc im ana, Papa kem ana, Nacanjkal im! Kanu nke debeki don donmot mo kanawurar Abraham, watem kosu, nte enayi Mesopotami, ta entadeder kande Haran mo.

3 Ko Kanu kaloku Abraham: «Mawur atof nam, dajkom dam, mako nde atof nne indekomentar am mo.»

4 Ko Abraham owur atof na Kaldi, k'onko ponde dare da Haran. Dando, nte defi da kas denceper mo, ko Kanu kanceperene ko atof nane nande on ndekal mo.

5 Kanu kanason fe Abraham ke atof nane, ali dakacambor kacak, mba kanalake ko temer kadeson ko ni kabap kabanda ka dokom don ko nkon encep-ar-e, mba tem tatoko ta entayo wan-e.

6 Ko Kanu kaloku Abraham nte: «Kabanda ka dokom dam kandeyi decikara atof njoloma. Andekacambor na di dacar, pataras na meren masar mankale (400).

7 Mba afum aka atof nanoko ndekacambor na dacar mo, in'endekabocor na kiti. Ko tenceper-e, ndewur ndekor-kor im nno kifo kanke.»

8 Nte tatoko tenceper mo, ko Kanu kancanjas kiyi kon tetin ko Abraham, ti toyone kamenkorne ka kakanc arkun. Ti disre ko Abraham onkom Siyaka, k'enkanc ko tataka ton ta camat-maas. Ita Siyaka enayo so Yakuba, ko Yakuba yo so ti awut on arkun waco ko meron, ane njayone cas ca cusunka waco ko meron ca Yisrayel mo.

9 Nte atem asu, awut a Siyaka, nanayone wenc kanan Isifu karaca mo, ko njancamos ko nte tonsone pakekare ko Misira mo. Mba Kanu kanayi ko Isifu,

10 kanayac ko pacuca fap. Kanu kancmar Isifu, kacson ko kacare kakot nde Firawona wabe ka Misira far kirinj. Firawona enason Isifu dekirinj da Misira ko da kelo kon disre fap mo.

11 Ko dor dopon dende dey Misira fap ko atof na Kanon. Pacuca penabek, atem asu nancsoto fe yeri.

12 Ko Yakuba ende pane a cagbay cayi Misira, k'osom tocoko-coko awut on ane nantanne atem asu mo.

13 Tameron, ko Isifu owurarne awenc on, nte to ko Firawona osoto kacare on akomene a Isifu.

14 Kɔ Isifu osom awenc ɔn a pakere kɔ kas Yakuba, kɛkɛne ka afum ɔn fɔp, aɲe ɲancɔp afum wɔco camət-merɛɲ kɔ kɛcamət (75) mɔ.

15 Kɔ Yakuba ontor atɔf ɲa Misira. Difɔ enafi, kɔ atem asu alɔma.

16 K'anɲekɛre cɔbel cɔɲan Sɛkem, k'anɲkɔ pawup nde kufu nke Abraham enawaye pɛsam nnɔ kusunɲa ka Hamɔr kɛyi mɔ.

17 Tem nte pɛnamar a Kanu kɛlas temer nte kɛnaleke Abraham mɔ tenalɔtɛrne. Kɔ dokombɛra dɛmbɛk, kɔ afum ɲanɲa ɔɲ kɛla dɛm Misira,

18 haɲ kɔ wɔbe wɔlɔma ender pɛnde dɛbe da atɔf ɲanɲkɔ nwe enatɔcɛre Isifu mɔ.

19 Wɔbe wɛkakɔ ender pɛcnɛmpɛs, pɛctɔrɛs atem asu. K'ende pɛsɔɲe ɲa kɛsak cɛnaka cɔɲan, nte tɔɲsɔɲe ta akakɔ ɲantam kɛyi doru mɔ.

20 Tem tatɔkɔ t'anakom Musa, nwe enabɔt Kanu kɛnɲk mɔ. K'antɔmpɛr kɔ yof maas nde kɛlɔ ka kas disre,

21 mba nte tɔyɔ tenatɔyi mɛnɛ kɛgbal kɛn mɔ, kɔ wan ka wɔbe ka Misira wɛran efir kɔ, k'ɔɲkɔ pɛdusum pɔyɔ kɔ wan.

22 Kɛcɛre kɛkɔt fɔp k'aMisira k'anadusumɛ Musa, k'ɔsɔtɔ fɛnɔntɛr dɛmoloku kɔ dɛmɔyɔ.

23 Nte Musa ɔsɔtɔ meren wɔco maɲkɛle (40) mɔ, k'ende pɛcem-cɛmne kɛkɛnɲk awenc aɲa, afum a Yisrayel.

24 Kɔ Musa ɔɲkɔ pɛtɔɲne wɛnc wɛkin wɛka Misira paccakɛra, k'encɛmɛne wɛnc wɛkakɔ anctɔrɛs mɔ. K'olukse ayɛk ɲa wɛnc, k'endif wɛMisira.

25 Kɔ Musa encɛm-cɛmne a awenc aɲa ɲanɲtam kɛcgbɛkɛre a Kanu kɛntam kɛbaɲ ɲa kɔ ɲancɛme kɔ darɔɲ-ɛ, mba ɲanacɛre fɛ ti.

26 Dɔckɔsɔk, kɔ Musa ɔɲkɔ pɛbɔp aYisrayel merɛɲ ɲacsutɛne, k'eyac ɲa, k'olompɛs ɲa dacɔ. K'eyif ɲa: <Ta ake tɔ nɛɲsutnɛne tante-ɛ? Dɛwɛnca dɔ nɔyɔ!>

27 Mba wɛkɔ encɛkakɛra wɛnc mɔ, ewɛn Musa pɛcyif: <An'ɔsɔɲ am kɛyɔne wɔbe kɔ wɔbɔc kiti sɛna dacɔ-ɛ?>

28 Kɛdif im kɔ mɛfaɲ ba, pɛmɔ tɔkɔ mɛndifsa wɛMisira mɔ?>

29 Kɔ moloku mamɔkɔ mɔsɔɲe Musa kɛyɛkse, k'ɔɲkɔ pɛnde decikɛra atɔf ɲa Madiyaɲ. Difɔ enakom awut arkun merɛɲ.

30 Nte meren wɔco maɲkɛle mencepɛr (40) mɔ, kɔ mɛlɛke mowurɛr Musa nde tɛgbɛre ta tɔrɔ ta Turisnina dɛmemer ma nɛnc nde dɛncmar dɛrɛntɛm mɔ.

31 Nte Musa enɲk ti mɔ, kɔ pɛnciyane kɔ kɛnɲk ka tes tɛwey-wey tatɔkɔ, nte ɔncɔɲne kɛkɛgbɛkɛre mɔ, kɔ dim da Wɔbe Kanu dender kɔ:

32 <In'ɔfɔ, Kanu ka atem am: Kanu ka Abraham, ka Siyaka kɔ ka Yakuba!> Musa pɛcyikɛ, ta ɔɲwose sɔ kɛgbɛtne di-ɛ.

33 Kɔ Wəbɛ oloku kɔ: «Məwure cɔfta cam dəwecək, bawo kəfo kan̄kɔ mənɔcəmɛ mɔ, kəfo kəcɛmpɪ kɔ.

34 Inəŋk pəcuɣ pa afum em aŋɛ ɲayi Misira mɔ, ine kigbis kəŋan: Kətor k'inder ideɣac ɲa. Nɔkəl oŋ, məder isom əm Misira.»

35 Musa wəkakɔ ɲanace a ɲacloku: «An'ɔsɔŋ əm kəɣɔne wəbɛ kɔ wəboc kiti sənə dacɔ-ɛ?» Nkɔn Kanu kənasom pəɣɔne wəbɛ kɔ wəɣac, kəberene ka mɛlɛkɛ mɛnawurər kɔ nde dərəntəm mɔ.

36 Nkɔn Musa ɛnawurene aYisrayel Misira pəcyɔ mes mɛwɛy-wɛy kɔ mɛgbəkəre ma Kanu, nde kəba Kəyim kɔ nde dətɛgbərə, meren mɛnə wəcɔ mən̄kələ (40) disre.

37 Nkɔn Musa wəkakɔ yati ɛnaloku aYisrayel: «Kanu kəndekere nu sayibe pəmɔ ina, nwe kəndeyek-yek awenc anu dacɔ mɔ, pəsom kɔ nnɔ ɲayi mɔ.»

38 Nkɔn Musa, nte afum ɲanalɔŋkanɛ nde dətɛgbərə mɔ, nkɔn ɛnəɣɔne sɔ wəcɛpərəne moloku atem asu dacɔ kɔ mɛlɛkɛ mɛnə monclok-lokər kɔ nde dətərɔ ta Turisnina mɔ. K'ɔsɔtɔ moloku meyi wəɣɛŋ, nte təŋsəŋɛ səcərə mi mɔ.

39 Atem asu ɲanafan̄ fɛ kəcəŋkəl kɔ, kɔ ɲawənəs kɔ. ɲanacɛm-cɛmnɛ dəbəkəc kəluksərne Misira.

40 Kɔ atem asu ɲaloku Aruna, «Məlompəse su mɛrəŋka, mɛnə mendesole su mɔ, bawo Musa nwe owurene su Misira mɔ, səcərə fɛ nte tɔsɔtɔ kɔ mɔ.»

41 Mata maməkɔ, kɔ ɲalompəs tərəŋka ta tura, kɔ ɲalɔŋne nnɔ tərəŋka kirin̄, kɔ ɲambocɛ kəsata yebac ya waca wəŋan.

42 Mba kɔ Kanu kəmbər ɲa kumunt, kɔ kəsakɛ ɲa kəkər-koru ca ya dərɛnc. It'ancic ti buk ba sayibe disre:

«Nəna aka Yisrayel,
meren wəcɔ mən̄kələ (40) mɛnə nəcɛpərəne dətɛgbərə mɔ, in'ɔ
nəncdife sɛm kəlɔŋne disre ba?»

43 Nənakekərə abal ɲa tərəŋka ta Mələk
kɔ tərəŋka ta kəs ka kanu konu Refan̄.

Nənapat mɛrəŋka teta kəcɔntnɛnɛ ka mi fər kirin̄!
Ti disre kəkəkərə nu k'inder decikərə Babilɔŋ tadarəŋ.»

44 Atem asu ɲanayɔ dəndɔ dətɛgbərə aŋgbancan ɲa sɛde ɲɛ ɛnə anamɛŋk walakɛ wa masar nwe Kanu kənacice Musa mɔ. Tatəkɔ tɔ wələk-lokər ka Musa ɛnaloku kɔ a pəɣɔ, a ɲowurene kɔ ɲəkɔ ɛnanəŋk mɔ.

45 Nte atem asu ɲasɔtɔ ɲi mɔ, kɔ ɲan̄kəkərə nde atɔf ɲɛ Kanu kənabeləs afum fər yəŋan kirin̄ mɔ. Yosuwe pəɣɔne ɲa wəkirin̄. Aŋgbancan ɲan̄kɔ ɲɛnayi di han̄ tɛm ta Dawuda.

46 Kɔ Dawuda ɔsɔtɔ kəmar ka Kanu, k'ontola sɔ kəsɔŋ kɔ kəfo nkɛ ɔŋkɔcəmbərə Kanu ka Yakuba dəkəyi mɔ.

47 Mba Sulemani ɛnəder pələ kələ kan̄kɔ.

48 MENE nte Wabe waka darenc antawose kayi paka disre mpe kaca ka fum kalompas ma, pamo toko sayibe seloku ti ma:

49 Wabe oloku:

«Kom kayone dacam dem da debe,
ko antof nyone dakacambar dem wecak.

Ake kalo ko nanyi kacambar em-e?

Kafo kare k'inde icnesam-e?

50 Bafu kaca kem kalompas mame fap ba?»

51 Nana afum atani lene, ayo bakac pamo bilakoro! Han mako nana nanyi kawenas Amera Necempi na Kanu pamo atem anu!

52 Sayibe sare atem anu nanatoter-e? Nanadif ane nananankene kadank kader ka Wolompu nwe nana nenaso na a ko andif ma.

53 Nana ane nenasoto sariye sa Musa nse meleke ma Kanu menaloku ko ma, mba nankotene fe si, namenkorne fe so si.»

Kadifka Etiyen

54 Nte Etiyen onclok-loku ma, afum ako nancne moloku mamako ma, pananankane katele na han nancnanerene sek nno eyi ma.

55 Mba Amera Necempi na Kanu nencbac Etiyen davis. K'engbatne kom, k'enank nro da debeki da Kanu, Yesu pacame Kanu kasak.

56 K'oloku: «Inank kom kagbite, Wan ka Warkun pacame Kanu kasak!»

57 Ko afum ane nankule-kule papon, ko nasuncne lene, ko nawetne fap fanan kakobap Etiyen.

58 Ko jambelas ko han ko nawerene ko dare, ko nanc-cas ko masar. Atene aka ti nanaboc suma sanan sa keron wtemp dantof, nwe ancwe Sol ma.

59 Nte nanc-cas ko ma, ko Etiyen ontola poclou: «Mariki Yesu, maban amera nem.»

60 Nte to ko Etiyen encap suwu, k'onkule-kule: «Wabe, ta masarsar na kiciya kanke!» Nte elip kaloku tatoko ma, k'engbin kifir.

8

1 Sol enawose kadif ka Etiyen.

Sol antoras kalonkane ka alan Yesu

Dosak dadako d'anacop kotoras kalonkane ka alan Yesu dando Yerusalem. Ko alan fap fanan nasamasar nde tof ya Yude ko Samari, mene asom a Yesu.

2 Ko afum alompu aloma nawup Etiyen, ko jambok ko belbel.

³ Kɔ Sol nkɔn eyefe kɛtɔrɛs ka kɛlɔŋkanɛ ka alañ Yesu, pɛcbere dɛwɔlɔ wañan, pɛcwurɛnɛ ña, pɛcsumpɛr arkun kɔ aran, pɛcber ña dɛbili.

Filip kacam kɔn moloku mɔtɔt atɔf ña Samari

⁴ Alañ anɛ ñanasamɔsɛr mɔ, ñanccam moloku mɔtɔt mofɔ fɛp mɛ ñanccepɛr mɔ.

⁵ Filip nwe enator dare da Samari mɔ, enccam teta Krist, nwe Kanu kɛyɛk-yɛk kɛyɔnɛ Wɛbe mɔ.

⁶ Kɛnay k'afum kɛtɔŋnɛ disɛ ñanccɛŋkɛl belbel tɔkɔ Filip oncloku mɔ, nte ñancne kɔ ñacnɛŋk sɔ mɛgbɛkɛrɛ ma Kanu mɛ mɛncyɔ mɔ.

⁷ Yɔŋk yɛlɛc yonckule-kule kɛwur afum alarɛm dɛris aka dare dadɔkɔ. Anatamɔs atorɛr kɔ afum alarɛm akɔ ñanafi wɛcɛk mɔ.

⁸ Kɔ pɛbotu pɛpɔŋ pɛmbɛrɛ dare da Samari.

⁹ Wɛrkun wɛlɔma enayi di pacwe kɔ Simɔŋ. Enawon dare dadɔkɔ, pɛyɔnɛ dure, pɛcsɔŋɛ aka Samari cusu kɛwos, pɛcwɛnɛ sɔ fum wɛpɔŋ.

¹⁰ Afum fɛp kɛyɛfɛ wanfɛt haŋ wɛbeki ñanalelɛs kɔ, ñacloku: «Fum wɛkawɛ ɔyɔnɛ fɛnɔntɛr fa Kanu, fɛnɔntɛr fɛkɔ anɛwe «Fɛpɔŋ» mɔ.»

¹¹ Ñanacɛmɛ kɔ darɛŋ, bawo enawon kɛwosɔs ña cusu teta dureya dɔn.

¹² Mba nte ñanalaŋ moloku ma Filip, nwe enccam moloku mɔtɔt ma dɛbe da Kanu kɔ tewe ta Yesu Krist mɔ, k'anɛgbɛt arkun kɔ aran dɛromun teta Kanu.

¹³ Kɔ Simɔŋ nkɔn yati elañ moloku ma Filip, k'owosɛ kɛgbɛt dɛromun. K'encɛmɛ Filip dɛntɔf tɛm fɛp. Nte Simɔŋ enɛŋk mɛgbɛkɛrɛ kɔ mes mɛwɛy-wɛy ma Kanu mɛ mɛncyi mɔ, kɔ kusu kɛwos kɔ.

¹⁴ Nte asom a Yesu ñanayi Yerusalem kɔ ñane a aka Samari ñawosɛ toloku ta Kanu mɔ, kɔ ñasom Piyɛr kɔ Isañ kɛkɔ di.

¹⁵ Nte Piyɛr kɔ Isañ ñantor dare da Samari mɔ, kɔ ñantolane ña nte tɔŋsɔŋɛ ñasɔtɔ Amera Nɛcɛmpi ña Kanu mɔ,

¹⁶ bawo haŋ tɛm tatɔkɔ Amera Nɛcɛmpi ñɛnatorɛr fɛ nwe o nwe kɛrɛsna dɛndɔ. Mɛnɛ kɛgbɛt dɛromun gbɛcɛrɛm kɔ ñanasɔtɔ tewe ta Yesu Krist.

¹⁷ Awa Piyɛr kɔ Isañ ñandɛŋɛr ña waca, kɔ ñasɔtɔ Amera Nɛcɛmpi ña Kanu.

¹⁸ Nte Simɔŋ enanɛŋk a kɛdɛŋɛr kɛca ka asom a Yesu gbɛcɛrɛm kɛnasɔŋ afum Amera Nɛcɛmpi mɔ, k'ɛŋkɛrɛ ña pɛsam pɛcloku:

¹⁹ «Nɛsɔŋ im ina sɔ kɛtam! Nwe o nwe indɛdɛŋɛr waca mɔ, wɛkayi pɛsɔtɔ Amera Nɛcɛmpi ña Kanu.»

²⁰ Mba kɔ Piyɛr oloku kɔ: «Kanu kɛsɔŋɛ mɛlɛcɛ kɔ pɛsam pam, bawo mɛncɛm-cɛmnɛ kɛsɔtɛnɛ pi kɛpɔcɛ ka Kanu!

²¹ Māna mǎyǎ fɛ daka, mǎyǎ fɛ tofokəl nnǎ tes tante disre, bawo abəkac ŋam ŋolomp fɛ fɔr ya Kanu kirin.

²² Məluksərne Wəbe Kanu, məletsene kǎ, mətola kǎ nte tǎŋsǎŋe pəŋaŋnen'am məcəm-cəmne məlec ma abəkac ŋam mǎ, kǎ Kanu kəwose ti-ε.

²³ Bawo inəŋk a məcəm-cəmne məlec ma kəraca məntam əm, kǎ kətəlomp kəsekət əm.»

²⁴ Kǎ Simǎŋ oloku kǎ: «Nətolan'em Kanu Wəbe, nte tǎŋsǎŋe mame nəloku mǎ ta təlɔm o təlɔm tǎsət'em.»

²⁵ Piyer kǎ Isan ŋancam nte ŋananəŋk kǎ tǎkǎ ŋanane teta Yesu mǎ, kǎ ŋalukus Yerusalem, ŋaccam toloku tǎtǎt ta Kanu sǎdare sǎlarəm sa Samari.

Filip kǎ wərkun wəpəŋ wəka atəf ŋa Ecopi

²⁶ Mələkε ma Wəbe məlɔma mender nde Filip eyi mǎ mo-cloku: «Məkǎ ntende kǎca kətǎt, məsolne dǎpǎ deyer-yer nde deŋyefe Yerusalem doctor Kasa mǎ.»

²⁷ Kǎ Filip eyefe katin, k'entas. Wərkun wəpəŋ wəka Ecopi enayi pabane kǎ. Nkǎn enatəmpər kəcəmbər-cəmbər ka daka da Kandas, wəbera wəka atəf ŋa Ecopi fəp. Enader Yerusalem kədəkor-koru Kanu.

²⁸ Kəlukus k'encnde ndərǎn pənde pəyekse ne pǎn kərǎŋ, pəckarəŋ pəpəŋ buk ba aŋnabi Esayi.

²⁹ Kǎ Amera ŋa Kanu ŋoloku Filip: «Məcǎŋne mələtərne pəyekse ne mpe.»

³⁰ Kǎ Filip eyekse kəkǎ dǎndo, k'ene wəka Ecopi nwe pəckarəŋ buk ba aŋnabi Esayi. K'eyif kǎ: «Məncərə nte mǎyi kəkaran mǎ ba?»

³¹ Kǎ wəEcopi nwe oloku Filip: «Cəke c'intam ti kəcərə-ε, k'intǎyǎ nwe entəks'em mǎ?» K'oloku Filip a pəpese pənde kǎ kəsək pəyekse ne pǎn kərǎŋ.

³² Moloku ma Buk mbe enckarəŋ mǎ mənayǎne mme:
«K'aŋkekərə kǎ dəkədif pəmǎ aŋkesiya.

Pəmǎ aŋkesiya ŋowut nŋe ŋəntəkule-kule wəfon wəka ŋi dəntǎf mǎ,

enawani fɛ kusu.

³³ Owose kətore kǎn banca, k'ambanər kǎ kance kǎn.

An'endetam kəlɔm teta kəbənda ka dokom dǎn-ε?

Bawo anim kiyi kǎn doru antəf ŋaŋε kərǎŋ.»

³⁴ Kǎ wərkun wəbanε nwe eyifne Filip: «lletsen'am, mələk'im: Tes ta ana tǎ sayibe səluku tante-ε? Ta nkǎn wəsərka ba, ka fum wəcuru?»

³⁵ Kǎ Filip εlek moloku k'oncop dəmoloku ma Buk babəkǎ, k'oloku kǎ toloku tǎtǎt ta Yesu.

36-37 Nte njanasolne dɔpɔ njackɔ mɔ, kɔ njanɔ njabɔp domun. Kɔ wɔrkun wɔbanɛ oloku: «Domun dɔ dandɛ: Ak'endeyamɛs on kɔgbɛt kem dɔromun teta Kanu-ɛ?»*

38 Kɔ Filip oloku a pɔcɛmbɔr pɛyɛksɛnɛ, kɔ nantɔr dɔromun. Kɔ Filip ɛnɔgbɛt kɔ dɔromun teta Kanu.

39 Nte njanpe dɔromun mɔ, kɔ Amera Nɛcɛmpi nja Wɔbɛ Kanu nɛmpɛnɛ Filip. Ti disrɛ, wɔbanɛ wɔka Ecopi nwe ɛnɔnɔk fɛ kɔ sɔ, k'osolne dɔpɔ dɔn abɛkɛc nɔbotu disrɛ.

40 Kɔ Filip ɔnɔkɔ pɔnɔnɔkne dare da Asot. K'oloku moloku mɔtɔt ma Kanu sɔdare fɔp nɛ encɛpɔr mɔ, hanɔ k'ɔnɔkɔ pɔbɔp dare da Sesari mɔ.

9

Kanu kɔncɛmbɔr Sol dɔpɔ dɔtɔt

22.3-16; 26.9-20

1 Tɛm tatɔkɔ Sol pɔcɛnɔsɛnɛ kɔdifɛt acɛpɛsɛ a Mariki darɔn, k'ɔnɔkɔ ndena wɔlɔnɛnɛ wɔpɔnɔ wɔka kɔlɔ kɔpɔnɔ ka Kanu.

2 Kɔ Sol ewer wɔlɔnɛnɛ wɔpɔnɔ reka teta wɔlɔ wa dɔkɔtɔla Kanu da aSuyif nde Damas, nte tɔnɔsɔnɛ k'ɛmbɔp di akin akin-ɛ, pɔyɔnɛ arkun pɔyɔnɛ aran anɛ njanɔcɛmɛ dɔpɔ da Yesu darɔn mɔ, pɔtam kɔsumpɔr nja pɔkɛkɛrɛ Yerusalem.

3 Dɔpɔ Sol ɛnɔyi pɔclɔtɔrɛnɛ dare da Damas, gbɔncana babɔkɔ kɔ pɔmot pɛyɛfɛ dɔkɔm, kɔ pɔsɔnɔ pɔwanɔkɔra mɛpɛ pɛnakɛl kɔ mɔ.

4 K'ɛntɛmpɛnɛnɛ dɔntɔf. K'ɛnɛ dim ndɛ dɛnɔyif kɔ: «Sol! Sol! T'ake tɔ mɔntɔrɔs ɛm-ɛ?»

5 Kɔ Sol ɛyif kɔ, «Wɔbɛ, mɔna an'ɔfɔ-ɛ?»

«Ina, Yesu iyɔnɛ, nwe mɔyi kɔtɔrɔs mɔ.

6 Mba mɔyɛfɛ, mɔbɛrɛ dare, anɔkɔlɔk'ɔm tɔkɔ pɔmar mɔyɔ mɔ.»

7 Kɔ arkun anɛ njanasol kɔ nkɔn Sol mɔ njanɔcɛmɛ, ta njanɔtam kɔlɔk-lɔku-ɛ kɔnɛsɛ disrɛ, njanɔcɛ dim mba ta njanɔnɔnɔk fum-ɛ.

8 Kɔ Sol ɛyɛfɛ dɔntɔf pɔmɛpi fɔr, mba ta ɛnɔnɔnɔk paka o paka-ɛ. K'asumpɔr kɔ kɔca, k'ambɛrsɛnɛ kɔ dare da Damas.

9 K'ɛyi di mata maas ta ɛnɔnɔnɔk-ɛ, ɔfɔdi pɛri, ɔfɔmun.

10 Dɔndo dare da Damas wɔcɛpɛsɛ wɔka Mariki darɔn wɔlɔma ɛnɔyi di pacwe kɔ Ananiyas. Kɔ Wɔbɛ oloku kɔ kɔnɔnɔk disrɛ: «Ananiyas!»

K'owosɛ: «Iyi nnɔ, Mariki!»

11 Kɔ Mariki oloku kɔ: «Mɔkɔ dɔpɔ dɔkɔ anɛwe «Dolompu» mɔ, mɔkɔ mɔtɛn ndɛ kɔlɔ ka Yudas fum wɔkɔ anɛwe Sol mɔ, wɔka dare da Tarɔs ɔyɔnɛ. Bawo ontola Kanu,

* **8:36-37** Yecicɔs yɔlɔma anɔdɛnɔr moloku mɔlɔma: «Kɔ Filip oloku: «Kɔ mɔlanɔ abɛkɛc njan fɔp-ɛ, sɔntam ti.» Kɔ wɔEcopi wɔbanɛ oloku: «Ina a Yesu Krist ɔyɔnɛ Wan ka Kanu.»»

12 Kɔ Kanu kɔnamentɔr kɔ kɔnɔŋk disre fum nwe aŋwe Ananiyas mɔ pɔberɔr kɔ. K'endenɔr Sol waca, nte tɔŋsɔŋe kɔ sɔ kɔnɔŋk mɔ.»

13 Mba Ananiyas olukse: «Wɔbe, inene afum alarɔm ŋaclɔm pɔlec mpe fum wɔkakɔ ɔyɔ afum am acempi nde Yerusalem mɔ.

14 Nnɔ kɔfo kanke yati kɔ alɔŋne apɔŋ aSuyif ŋanawure Sol a padesumpɔr nwe o nwe ombonc tewe tam mɔ.»

15 Mba kɔ Wɔbe oloku Ananiyas: «Mɔkɔ! Bawo fum wɔkakɔ paka pɔ mpe inayek-yek kɔkɔtenɛ tewe tem nnɔ abe a tɔf ya doru kɔ aka Yisrayel fɔr kirinj mɔ.

16 Ina yati in'endementɔr Sol pɔcuy fɔp pɔkɔ pɔmar pɔdeceperɛne teta tewe tem mɔ.»

17 Kɔ Ananiyas ɔŋkɔ. Nte embɔp kɔlɔ kanke mɔ, k'embere, k'endenɔr Sol waca. K'oloku: «Sol Wenc im, Mariki Yesu, nwe enawurɔr ɔm nde dɔpɔ nde mɔnasolne mɔcder Damas mɔ, osom im nte tɔŋsɔŋ'am sɔ kɔnɔŋk, a mɔlare sɔ Amera Ŋecempi ŋa Kanu mɔ.»

18 Gbɔncana babɔkɔ, kɔ ca yɔŋkɔŋe kɔ dɔfɔr pɔmɔ wokwok, kɔ fɔr yɔn yentam sɔ kɔcɔŋk. Kɔ Sol eyefe, k'ɔsɔtɔ kɔgbɔt dɔromun teta Kanu.

19 Nte elip kɔdi yeri mɔ, k'ɔsɔtɔ sɔ fɔnɔntɔr.

Sol kɔcam kɔn toloku ta Kanu dare da Damas

Kɔ Sol encepɔrɛne mataka mɔlɔma kɔ acɛpse a Mariki Yesu akɔ ŋanayi dare da Damas mɔ.

20 K'eyefe kɔcam katina dɔwɔlɔ wa dɔkɔtola Kanu da aSuyif, pɔclɔku a Yesu Wan ka Kanu ɔyɔne.

21 Kɔ pɔnciyane afum fɔp aŋe ŋancne polok-loku pa Sol mɔ, kɔ ŋayif: «Bafɔ nkɔn nde Yerusalem encfɔŋ kɔmɔlɔk aŋe ŋancbonc tewe tante mɔ ba? Bafɔ kɔsumpɔr kɔŋan k'ɛnaderɛne nnɔ, pɔkekɔre ŋa nde alɔŋne apɔŋ ŋayi mɔ ba?»

22 Mba Sol pɔcsɔtɔ kɔsɔtɔ dɔm kɔtam pɔcsɔŋe aSuyif aŋe ŋanayi dare da Damas mɔ kɔciyane, kɔcmentɔr a Yesu ɔyɔne Krist, wɔbe wɔyek-yek wɔka Kanu.

23 Nte mataka mɔlɔma mencepɔr mɔ, aSuyif aŋe ŋanayi Damas mɔ ŋantɔŋne kɔnim ka Sol.

24 Kɔ Sol ende pɔcɔre tetɔŋne taŋan. ASuyif ŋancbum dan kɔ pibi kɔdewur kɔn dare nte tɔŋsɔŋe ŋatam kɔnim kɔ mɔ.

25 Mba pibi papɔkɔ kɔ acɛpse a Mariki Yesu darɔŋ ŋamber kɔ dɔkɔsaksaka, kɔ ŋayɔkɛne kɔ damba da saŋka sa dare darɔŋ.

Kɔyi ka Sol Yerusalem

26 Nte Sol embere Yerusalem mɔ, k'ɛŋsep kɔnɔŋkɔlɛne acɛpse a Mariki Yesu darɔŋ. Mba fɔp fɔncnese kɔ, ta ŋalaŋ a nkɔn sɔ ɔyɔne wɔcɛpse wɔka Yesu darɔŋ-ɛ.

27 Mba kɔ Barnabas elɛk kɔ, kɔ njan kɔ nde asom a Yesu nanyi mɔ. Kɔ Barnabas ɔlmɛr nja nte Sol enanɛnk Mariki dɔpɔ, a kɔ Yesu olok-lokɛr kɔ mɔ, kɔ nte tewe ta Yesu kɛnasɔnɛ kɔ kɛbɛkne kɛlɔkk-loku mɔ.

28 Sol ɔnc kɔ pɛcder kɔ nja dɛndo Yerusalem pɛclɔk-lokɛ kɛlan disrɛ tewe ta Mariki.

29 Sol pɛclɔk-loku, pɛcgbɛkɛlɛnɛ kɔ afum aKresi, mba, nja sɔ, nactɛn kɛnim kɔ.

30 Nte awɛnc alɛn nancɛrɛ ti mɔ, kɔ njasɔnɛ Sol kɛtor Sesari, k'elɛk dɔpɔ k'ɔnkɔ dare da Tarɛs.

31 Kɛlɔnkɛnɛ ka alɛn Yesu a atɔf nja Yude, atɔf nja Kalile kɔ atɔf nja Samari, nja fɛp njanayi pɛforu disrɛ. Alɛn Yesu nancɛpɛsɛnɛ bɛkɛc, njaninɛ kɛnesɛ ka Wɛbɛ Kanu disrɛ. Amera Nɛcɛmpi nja Kanu nɛncmarɛs kɛlɔnkɛnɛ ka alɛn Yesu, ti disrɛ njanla kɛla dɛm.

Kɛtamɛs ka Eney

32 Piyɛr nwɛ ɛncɛpɛr sɛdare sasɔkɔ fɛp mɔ, ɛnader pɛtor sɔ ndena afum acɛmpi anɛ njanandɛ dare da Lida mɔ.

33 K'ɔnkɔ pɛbɛp di fum nwɛ ancwɛ Eney mɔ, ta ɔnkɔt-ɛ, pɛfɛntɛrɛ debik meren camɛt-maas disrɛ.

34 Kɔ Piyɛr oloku kɔ: «Eney, Yesu Krist ɛntamɛs ɛm! Mɛyɛfɛ mɛna wɛsɛrka mɛnɛp abik njam!» Gbɛncana babɔkɔ k'ɛyɛfɛ, k'ɛncɛmɛ.

35 Nte aka Lida kɔ aka Sarɔn fɛp njanɛnk kɔ mɔ, kɔ njan kɛfɛli mera yanjan nnɔ Mariki eyi mɔ.

Kɛyɛkti ka Tabita defɛ

36 Wɛran wɛcɛpɛ ka Mariki Yesu darɛn wɛlɔma ɛnayi dare da Yope, pacwɛ kɔ Tabita. Kusu kɛnan disrɛ ancwɛ kɔ sɔ Dorkas, ti tɔyɔnɛ «were». Wɛran wɛkakɔ ɔncyɔ mes mɔtɔt mɛlarɛm, kɔ kɛmar.

37 Mata mamɔkɔ disrɛ, k'ɛfɛntɛrɛ docu, k'ɛfi. K'ambikɛ kɛbel kɛn, k'ampɛnɛ ki nde dukulɔ da kɛlɔ darenc.

38 Nte acɛpɛ a Mariki Yesu darɛn njanɛ a Piyɛr eyi Lida ndɛ dɔlɔtɛrnɛ dare da Yope mɔ, kɔ njasom arkun mɛrɛn kɛkɔlɛtsɛnɛ kɔ: «Ta mɛwɔn kɛcɛpɛr nde ndorosu.»

39 Kɔ Piyɛr ɛyɛfɛ kɔ njan kɔ kɔ asom anɛ mɛrɛn. Nte njanbɛrɛ mɔ, k'ampɛnɛ kɔ nde dukulɔ da kɛlɔ darenc. K'acɛbɔkɛra fɛp njanɛr njanbɛp kɔ njanbɔk, njanɛntɛr kɔ sɛbrumɛs kɔ yamos nyɛ Dorkas ɛnalompɛs nte ɛnayi kɔ nja mɔ.

40 Kɔ Piyɛr owurɛnɛ afum fɛp nde doru, k'ɛncɛp suwu, k'ontola Kanu tetɔn. Nte elip mɔ, k'ɛnkɛfɛlɛ ndɛ kɛbel kɛyi mɔ, k'oloku: «Tabita, mɛyɛfɛ!» Awa kɔ Tabita ɛmɛpi fɔr, nte ɛnɛnk Piyɛr mɔ, k'ɛyɛfɛ, k'ɛndɛ.

41 Kɔ Piyɛr ɔsɔn kɔ kɛca, k'ɛyɛkti kɔ. K'ewɛ afum acɛmpi kɔ acɛbɔkɛra, k'ɛmentɛr nja Tabita pɛyi wɛyɛn.

⁴² Kɔ aka dare da Yope fɛp ɲancɛre ti, kɔ alarɛm ɲancop kɛlan Mariki.

⁴³ Kɔ Piyɛr eyi dare da Yope mataka mɛlarɛm, ndena Simɔɲ wɛlɔma nwe ɛncbɛc kata mɔ.

10

Kɔwe ka Piyɛr ndena Kɔrnɛli

¹ Wɛrkun wɛlɔma ɛnayi Sesari pacwe kɔ Kɔrnɛli, pɛyɔnɛ wɛbɛ ka kɛgba ka asɔdar tasar tin (100). Kɛgba kanƙɔ k'ancwe «Kɛgba Itali.»

² Nkɔn kɔ aka kɛlɔ kɔn disre fɛp ɲancnɛse Kanu, ɲacɛmɛ tɛfan ta ki darɛɲ. Kɔrnɛli ɔncyɔnɛ afum nɔnɔfɔr, pɛctola Kanu tɛm fɛp.

³ Dɔsɔk dɔlɔma dec dɔrɔfɔy, k'ɛnɔɲk pɛsoku pɛs kɛnɔɲk disre, mɛlɛkɛ ma Kanu mɔlɔma mɛbɛrɛ nde kɛlɔ kɔn disre, kɔ mewe kɔ: «Kɔrnɛli!»

⁴ K'ɛɲgbɔtnɛ mi, kɔ kɛnɛsɛ kɛyi kɔ, k'eyif mi: «Acɛkɛ Wɛbɛ?»

Kɔ mɛlɛkɛ mamɔkɔ moloku kɔ: «Motola mam kɔ kɛyɔnɛ kam afum nɔnɔfɔr, mes mamɔkɔ fɛp mɛmpɛ nde Kanu fɔr kirin, kɔ kɛncɛm-cɛmnɛ mi.

⁵ Mɛsom ɔɲ afum dare da Yope ɲakɔwen'am fum wɛlɔma nwe aɲwe Simɔɲ mɔ, pacdɛɲɔr kɔ tewe ta «Piyɛr.»

⁶ Ndena Simɔɲ wɛlɔma eyi, wɛkakɔ wɛbɛc kata ɔfɔ, kɛlɔ kɔn kɛyi kɛba kɛsɛk.»

⁷ Ntɛ mɛlɛkɛ mamɔkɔ mɛnalok-lokɛr kɔ mɔ mɛnadelukus, kɔ Kɔrnɛli ewe amarɛs ɔn mɛrɛɲ kɔ wɛsɔdar wɛcɛmɛ mɛfan ma Kanu darɛɲ wɛlɔma aɲɛ ɲanayi kɔ dɛntɔf mɔ.

⁸ Ntɛ Kɔrnɛli elip kɛlɔmɛr asɔdar ɔn mes mɔkɔ mɛnacepɛr nkɔn kɔ mɛlɛkɛ dacɔ mɔ, k'osom ɲa Yope.

⁹ Dɔckɔsɔk, ntɛ ɲanayi dɔpɔ, a ɲacɔtɛrɛnɛ dare da Yope mɔ, kɔ Piyɛr ɛmpɛsɛ akɛr ɲa kɛlɔ kɔn kakɛrɔɲ kɛkɔtola Kanu, tɛnatɔɲɛ dan dɛcbɛp.

¹⁰ Kɔ dor dɔyɔ kɔ, k'ɛfan kɛdi yeri. Tɛm tɔkɔ anayi kɛlɔmpɛsɛ kɔ yeri mɔ, k'ɛnɔɲk tes tɔlɔma ntɛ tɛyɛfɛ dɔKanu mɔ.

¹¹ K'ɛnɔɲk kɔm kɛgbite, paka pɔlɔma mpɛ pɛnawurɛnɛ kɔ manta mɔpɔɲ mɛmɛ anasumpɛr mɔɲkubut manƙɛlɛ mɔ, mon-tor han kɔ mɛfɛntɛrɛ dɛntɔf.

¹² Sɛm dokom fɛp yɛnayi manta mamɔkɔ disre, kɛyɛfɛ sɛm ya wɛcɛk manƙɛlɛ, yɛlinɛ-linɛ han kɛbɛp bɛmp ya darenc.

¹³ Kɔ dim dɔlɔma doloku kɔ: «Piyɛr, Mɛyɛfɛ, mɛdif, mɛsɔm!»

¹⁴ Kɔ Piyɛr oloku: «Ala Wɛbɛ! Tɔlɔm o tɔlɔm tɛntasɔɲɛ f'ɛm kɛsɔm paka mpɛ sariyɛ sɛmɔnɛ mɔ.»

¹⁵ Tamɛrɛɲ kɔ dim ndɛ dolok-lokɛr kɔ sɔ: «Paka mpɛ Kanu kɛcɛmpɛs mɔ, ta mɔna mɛyik-yikɛs pi.»

¹⁶ Kɔ teyi kɛmaas, pɛwon fɛ k'ampɛnɛ dɛkɔm manta mamɔkɔ mɛnaye sɛm mɔ.

17 Kɔ tedisɛ ta kənəŋk kaŋkɔ teyi Piyer yamayama. Tem tatəkɔ tɔ asom a Kɔrneli, nte amentər ɲa kələ ka Simɔŋ mɔ, kɔ ɲaŋkɔ ki nde dəkusuŋka.

18 Kɔ ɲawe, kɔ ɲayif kɔ pəyɔne fɔ kələ kaŋkɔ kɔ Simɔŋ nwe andenɲər tewe ta «Piyer» mɔ eyi-ɛ.

19 Nte Piyer eyi kəcem-cemne tedisɛ ta kənəŋk kən mɔ, kɔ Amera ɲa Kanu ɲoloku kɔ: «Arkun maas ɲayi nde dabanɲa ɲacten əm.

20 Mator, nəsol nəkɔ kɔ ɲa, ali kənesɛ ta kəy'im, bawo In'osom ɲa.»

21 Kɔ Piyer ontor k'eyif arkun aɲɛ: «Ina nənten, ta ake tɔ nənderene nnɔ-ɛ?»

22 Kɔ ɲaloku kɔ: «Kɔrneli, wəbe wəka asodar tasar tin (100), fum wəlompu pəcnese Kanu, nwe aSuyif fəp ɲancərə dɔtɔt dɔn akɔ ɲaŋloku mes mən mətɔt mɔ, ndərən Kanu kəsom mɛkɛ mosoku, a pəsak su sədew'am pəkəcəŋkəl əm nte pəmar məloku kɔ mɔ.»

23 Awa kɔ Piyer emberɛ ɲa deker, k'əsɔŋ ɲa dəkiyi.

Dɔckəsək kɔ Piyer eyefe, k'ɔŋkɔ kɔ ɲa. K'awenc alaŋ a dare da Yope alɔma ɲancəmbər kɔ.

24 Kɔ ɲambere Sesari dɔckəsək, Kɔrneli pəckar ɲa, k'ewe akomene ən alɔma nde ndərən kɔ anapa ən atɔt.

25 Kəbere ka Piyer, kɔ Kɔrneli ɔŋkɔ pəfayne kɔ, k'entempene kɔ wecək dəntɔf. K'encəpe kɔ suwu.

26 Mba kɔ Piyer eyekti kɔ, k'oloku: «Məyefe, ina sɔ fum iyɔne.»

27 ɲayi kələk-loku kɔ Kɔrneli, k'ember� k'embəp afum alarəm ɲalɔŋkanɛ.

28 Kɔ Piyer oloku ɲa: «Nəncərə a amɔne aSuyif kəbɔt kɔ acikərə, kɔ pəyɔne fe ti-ɛ, pəbere ndərən. Mba Kanu kəmentər im a pəmar fe a pakule fum o fum a eyik-yik, kɔ pəyɔne fe ti-ɛ, pəmar fe sɔ a pakule fum o fum a əsək fe fər ya Kanu kirin.

29 It'əsɔŋe nte məsom a pakəw'em mɔ, k'inder ali ta incemcemne-ɛ. Ndekəl iyif əm, T'ake tɔ məwen'em-ɛ?»

30 Kɔ Kɔrneli oloku: «Təsɔtɔ mata maŋkələ ictola nnɔ nderem, dɔfɔy dendebəp. K'inəŋk fər yem kirin wərkun wəlɔma pəberne yamos yomotər-motər.

31 Kɔ fum wəkakɔ oloku: «Kɔrneli, Kanu kəmbaŋ kətola kam, k'encemcemne sɔ kəyɔne kam afum nənɔfər.

32 Məsom fum dare da Yope pakəwen'am Simɔŋ nwe andenɲər tewe ta «Piyer» mɔ, nde kələ ka Simɔŋ, wəbəc kata, nwe kələ kən kəyi kəba kəsək mɔ.»

33 K'isom katina fum, kɔ mənna məsɔtɔ abəkəc ɲɔtɔt kəder. Ndekəl ɔŋ səyi fəp fosu Kanu fər kirin, sədecəŋkəl moloku məkɔ Wəbe osom əm kəloku mɔ.»

Moloku ma Piyer ndena Kɔrneli

³⁴ Awa kə Piyer elək moloku, k'oloku: «Kance: Incəre oŋ a Kanu kəyi fə kəsək kin.

³⁵ Mba afum fəp dacə mənə nwe məŋnese Kanu, məcəmə pəlompu darəŋ mə, Kanu kəmbəŋ əm.

³⁶ Kanu kənakenə aka Yisrayel toloku, pəcloku ŋa moloku mətət ma pəforu mpe Yesu Krist enkerə afum fəp mə: Nkən əyənə Wəbe ka afum fəp.

³⁷ Nəna nəncərə təkə teyi Yude fəp mə, Kalile tenacop, nte Saŋ enadəŋk kəgbət dəromun mə.

³⁸ Kanu kənabəy Yesu wəka Nasaret Amera Nəcempi ŋən kə fənəntər. Nnə o nnə enccepər mə, əncyə pətət, pətaməs afum fəp aŋe amera ŋeləc ŋənctərəs mə, bawo Kanu kənayi kə nkən Yesu.

³⁹ Səyənə atəŋne a mes fəp mme Yesu enayə nde atəf ŋa aSuyif kə Yerusalem mə. Nkən nwe ŋananim, ŋacaŋ kə dəkətək mə,

⁴⁰ mba Kanu kənasəŋe kə kəfətə dədefi tataka tən ta maas. Kə kəsəŋ kə kəmentərne,

⁴¹ bafə nnə afum fəp ŋayi mə, mba nnə atəŋne mes aŋe Kanu kənanuŋkenə kəyek-yek, kə səna aŋe sənadi yeri, səmun kə nkən nte enafətə afi dacə mə.

⁴² K'osom su kəloku afum, səmentər a nkən Yesu, nkən ə Kanu kəncəmbər kəyənə nwe endeboce afum afi kə ayi wəyeŋ kiti mə.

⁴³ Sayibe fəp sənaloku tetən: Nwe o nwe egbekər kəlaŋ kən Yesu mə, endesətə nde Kanu kəyi mə kəŋaŋnənə ka mes mən melec teta tewe ta Yesu.»

Atəyənə aSuyif ŋasətə Amera Nəcempi ŋa Kanu

⁴⁴ Moloku maməkə mə Piyer enayi kəloku, nte Amera Nəcempi ŋa Kanu ŋenatorər afum akə ŋanccəŋkəl moloku mən mə.

⁴⁵ Cusu cənawos alaŋ a Kanu, akənc akə ŋanader kə Piyer mə, kənəŋk a kəpocə ka Amera Nəcempi kənasaməsər kəbəp haŋ acikəra aŋe ŋantəyənə aSuyif mə,

⁴⁶ bawo ŋancne ŋa kəkər-koru Kanu cusu c'acikəra.

Awa kə Piyer əŋgbəkərə:

⁴⁷ «Antam kəfatənə kəgbət afum dəromun nnə akaŋe ŋasətə Amera Nəcempi pəmə səna mə ba?»

⁴⁸ K'oloku a pagbət akakə dəromun tewe ta Yesu Krist. Kə ŋaletsenə Piyer kəyi dəndo mataka mələma.

11

Piyer kəsəksər alaŋ a Yerusalem mes məkə mənacəpər dare da Yope mə

¹ Asom a Yesu kə awənc aŋa alaŋ aŋe ŋanayi atəf ŋa Yude mə ŋane a acikəra, aŋe ŋantəyənə aSuyif mə, ŋawose toloku ta Kanu.

² Nte Piyer enape Yerusalem ma, ko afum ane anakanc ma nyayefe kanal ko,

³ njacloku: «Mambere ndena afum ane antokanc ma, ko mandiri yeri ko na, bawo asuyif njanamone ti!»

⁴ Awa ko Piyer eyefe kalomar na tin tin tin mes mako menacepar mo:

⁵ «Ina, nde dare da Yope inayi, dasok dadoko ictola Kanu ko kanank kander im. Ti disre, k'inank paka poloma poctor powurene ko manta pasumpar pi monkubut mankale, ko pontor kayefe dakom han nno inayi ma.

⁶ Nte inagbatne pi disre ma, k'inank sem ya wacak mankale, sem ya dop, yelinge-linge, ko bemp ya dakom.

⁷ K'ine so dim doclok'im: «Mayefe Piyer! Madif, masom.»

⁸ K'iloku: «Ala Wobe! Tolom o tolom tentasone f'em kabere paka potocemp dakusu, mpe Kanu kamone kadi ma.»

⁹ Ko dim nde dngbokare so kayefe dakom: «Paka mpe Kanu kancempas ma, ta mana maloke pi katocemp!»

¹⁰ Ko teyi kamaas, pawon fe ko ca nye fap yolokus so dakom.

¹¹ Gbancana babako, ko arkun maas ane anasom nde nderem kayefe dare da Sesari ma, jander nacame dakusnja ka kalo kanjo sanayi ma.

¹² Ko Amara Necempi njolok'im a sasol sako ko na, ali inese fe. Ko awenc asu ana alan camat-tin ane nacam'em daraj, ko sanjo sabere ndena Korneli.

¹³ Ko Korneli oloku su nte enanank meleke nde ndoron, ko moloku ko: «Masom fum dare da Yope pako wen'am Simaj, wako andenar tewe ta «Piyer» ma.

¹⁴ Nwe endelok'am moloku mme mendeyac am, kabap aka kalo kam disre fap ma.»

¹⁵ Iyi kalok-loku, ko Amara Necempi na Kanu njontorar na pamo nte njenatorar sana so dakocop ma.

¹⁶ Awa k'incem-cemne toloku ta Mariki nte enaloku: «Dromun San enagbat afum, mba nana Amara Necempi na Kanu no nandesatone kagbat dromun teta Kanu.»

¹⁷ Ko payone a kapoce kin kayi ko nanasatar Kanu pamo sana ane salan Yesu Krist mo-e, an'inatam kayone-e nte injkoyamsar Kanu mo?»

¹⁸ Nte jane moloku mamako ma, ko bakac yontor na, ko njankor-koru Kanu, njacloku: «Kanu kasaj so acikera ane njantoyone asuyif ma katam kasakpar bakac, nte tajsone njasoto teceparene doru nte Kanu kafan ma!»

Kalonkan ka alan Yesu nde dare da Antiyak

¹⁹ Nte andif Etiyen ma, k'ancop kataras afum alan ko tasaj na kasamsar. Alma njanak ataf na Fenisi, alma njako Sipar,

aloma nakó han Antiyók, nanlukse fe nwe o nwe so toloku ta Kanu mene aSuyif gbacaram.

²⁰ Afum akako daco, aloma nanayi, ane nanader dare da Antiyók kayefe ka sadare sa Sipar ko Siren mo, nancopar aKrek, nacloku na toloku totot ta Mariki Yesu.

²¹ Kaca ka Mariki kanayi alan akako karonj. Ko afum alaram nayone alan, ko nan kafali bakac yanjan nno Mariki eyi mo.

²² Ko moloku mamako memberé kalonkane ka alan Yesu ka Yerusalem dalajəs, k'asom Barnabas Antiyók.

²³ Kabere kon di, nte enadenank patot ko pabotu mpe Kanu kanayone alan a Antiyók mo, ko pambot ko. K'engbinjar na kagbekar ka Mariki mera yanjan fap kalan disre.

²⁴ Barnabas fum watot enayi. Kalan kanayi ko debakac ko Amera Necempi na Kanu neyi ko so daranj. Ko afum alaram nancame dopo da Mariki daranj.

²⁵ Ko Barnabas ankó dare da Taras kalek Sol.

²⁶ Nte Barnabas enank Sol mo, k'enkekere ko Antiyók. Teren tin camcam, nactanne kalonkane ka alan, ko nan takse kanay ka afum. Dendo Antiyók, difo anacop tɔcɔkɔ-cɔkɔ kawe acepse a Mariki Yesu daranj «aka Krist.»*

²⁷ Mata mamako, ko sayibe sa Kanu seloma nantor dare da Antiyók kayefe Yerusalem.

²⁸ Wakin enayi na daco pacwe ko Akabus, k'eyefe, ko Amera Necempi nasone ko kadank a dor dendeyi doru fap. Dor dadoko denader deyi tem nte Kalod enayone wabe ka taf ya Rom fap mo.

²⁹ Ko acepse a Yesu nancem-cemne kafek teta kamar ka awenc ana alan ane nanayi atof na Yude mo, nwe o nwe ko nte enatam kafek mo.

³⁰ Ito nanayo: Ko nasom Barnabas ko Sol kakené ki abeki ane nanayi kalonkane ka alan a Yude mo.

12

Kadifka Sak, ko kaber ka Piyer dabili

¹ Tem tatoko to wabe waka atof Herodu enatapsar afum alan aloma waca teta kataras kanjan.

² K'endife Sak wenc ka Isan dakma.

³ Nte Herodu enanank a moyo mon mamako moncbot aSuyif mo, k'encem-cemne so katap Piyer waca, nte tonsone pcanar ko mo. Mataka ma kasata karonj ka aSuyif menayi: Kasata ka cacom catonankal lebin.

⁴ Nte Herodu osumpar Piyer, k'ember ko dabili mo, k'oson cagba mankale ca asodar kabum kon, kagba o kagba kanayo

* **11:26** Aka Krist = cɔTabo « chrétiens », ito tɔkɔ kusu ka Kresi « kristianos », ito'mentar cɔBaka « ane nanawene Krist mo ».

asodar mankale. Enccem-cemne kabocar Piyer kiti far ya afum far kirin ko kasata ka Kacepar ka Meleke Medif kancepar-e.

⁵ Ancbum Piyer dabili, mba afum alan nantolane ko belbel no Kanu kayi mo tem far.

Kawure ka Piyer dabili

⁶ Nte dasak nde Herodu enacem-cemne kabocar Piyer kiti dembar mo, pibi papako, pakote Piyer gbekce meren, pafantare pacdire asodar meren daco. Nde dakumba, asodar nanaceme so dendo nacbum bili.

⁷ Gbancana babako, ko wasom waka darenc, meleke ma Wabe, mender, ko pamot pason pawankara bili disre. Ko meleke mme mentimi Piyer m'ocsut-sut ko kasak, ko moloku ko: «Mayerfe katana!» Ko gbekce yonkonje ko dawaca.

⁸ Ko meleke moloku ko: «Malek yamos yam, maberne cofa cam!» Ko Piyer yo mamako far. Ko meleke moloku ko so: «Maberne yi, macem'em darer!»

⁹ Ko Piyer enceme meleke mme darer. Encare fe a kamar ka meleke kanjo a kance ko: kanerj ka darenc ko nkon enacem-cemne.

¹⁰ Nte nancepar abum acoko-coko ko aka meren mo, ko jambap kumba ka fec nke kanateferne dare mo. Ko kumba kangbite kisarka far yanjan kirin, ko nawur, ko nasumpar dapo doloma. Gbancana babako, ko meleke mesak Piyer.

¹¹ Nte pandecerje Piyer mo, k'oloku: «Incare on a Wabe osomna meleke mon, mede mepar im waca wa Herodu disre, ko palec pako asuyif nanafan'em mo far.»

¹² Nte encare ti on mo, k'ojko nde kalo ka Mari, iya waka Isan, nwe andenar tewe ta «Mark» mo, nde afum alarem nanalokane nactola Kanu mo.

¹³ Nte Piyer osut-sut kumba ka dakabere mo, ko wayecara waloma pacwe ko Rodu, ancenje kakocanjkal.

¹⁴ Ko Rodu enepal dim da Piyer, mba pabotu disre engbiti fe kumba. K'eyekse kakoloku afum anje nanayi dakalo mo a Piyer ender, k'enceme dakumba.

¹⁵ Ko afum jaloku Rodu: «Mona mantamne fe!» Mba k'engbac a tako oloku mo ito teyi. Ko jaloku: «Meleke mon mo!»

¹⁶ Piyer nkon pacsut-sut kasut-sut dam kumba. Nte nangbiti kumba ko nanerj Piyer mo, ko cusu cawos ja.

¹⁷ K'olok-lokare ja kaca a nacanj, k'olomar ja nte Wabe owure ko dabili mo. K'oloku: «Naloku ti Sak ko awenc asu.» K'owur k'ojko kifo kaloma.

¹⁸ Nte dec dasak mo, ko payamayama papon peyi asodar daco: Akesoto Piyer-e, Deke eyi-e?

¹⁹ Ko Herodu osom a paten Piyer, mba nananerj fe ko. K'ombocar asodar akako nancbum Piyer mo kiti, ko Herodu

oloku a padif ɲa. Nte telip mɔ, kɔ Piyer eyefe atɔf ɲa Yude, k'ontor dare da Sesari kəkɔcepərəne di tem tolɔma.

Kafi ka wɔbe Herodu

²⁰ Herodu enayi kəyefərəne kɔ aka sɔdare sa Tir kɔ Sidɔɲ. Mba kətəɲne disre aka sɔdare sasɔkɔ ɲander ɲabəp Herodu. Nte ɲasep kəsɔtər Bələstus nwe enayɔne wətəmpər ka mes ma kəɔ disre ma wəbe Herodu mɔ, pamar ɲa kəsɔtər Herodu pəforu, bawo ndərɔn tɔf yanɲan yɔncsɔtɔ yeri.

²¹ Nte tataka tanɲan tetəɲne tɛmbəp mɔ, kɔ Herodu emberne yamos yɔn ya dɛbe, pənde nde aɲgbancan ɲɔn pɛclɔk-locər ɲa.

²² Tem nte afum fəp ɲanckule-kule, a ɲacloku: «Bafɔ dim da fum dɔ dandɛ, mba da kanu dɔ!»

²³ Gbancana babɔkɔ kɔ mɛleke ma Wəbe mosut kɔ, bawo enayek-yekəs fe Kanu, kɔ yet yoncɔp kəsɔm kɔ, k'efi.

²⁴ Toloku ta Wəbe tencsam oɲ kəsam dəm tɔckɔ kirinɲ.

²⁵ Barnabas kɔ Sol nte ɲalip kəkɔtene kəsom kəɲan nde dare da Yerusalem mɔ, kɔ ɲalukus, ɲaclekene Isanɲ, nwe andenɲər tewe ta «Mark» mɔ.

13

Ayek-yek Barnabas kɔ Sol kəkɔtene ka moloku ma Kanu

¹ Kəlonkanɛ ka alanɲ aɲe ɲanayi dare da Antiyɔk mɔ, sayibe-e kɔ atəkse ɲanayi ɲa dacɔ: Barnabas, Simeyɔɲ nwe andenɲər tewe ta «Wəbi» mɔ, Lusiyus wəka Siren, Manahɛɲ nwe anadusum kəfo kin kɔ Herodu wəbe wəka topoc tin k'ayer atɔf kəmanɲkəle-ɛ, kɔ Sol.

² Dɔsɔk dɔlɔma, alanɲ akakɔ ɲanckor-koru Kanu, ɲasunɛne sɔ, kɔ Amera Nɛcempi ɲa Kanu ɲoloku: «Nəcəmbər em kəsək Barnabas kɔ Sol, teta yebac yɔkɔ inawene ɲa mɔ.»

³ Nte alanɲ ɲalip kəsunɲ kɔ kətola Kanu mɔ, kɔ ɲandenɲər Barnabas kɔ Sol waca, kɔ ɲasom ɲa.

Kayi ka Barnabas kɔ Sol nde Sipər

⁴ Nte Amera Nɛcempi ɲa Kanu ɲosom Barnabas kɔ Sol mɔ, kɔ ɲantor atɔf ɲa Selusi, dəndo ɲanalek abil kɔ ɲancali kəkɔ ka mokuru ma Sipər.

⁵ Nte ɲambere Salamin mɔ, kɔ ɲancɔp kəlukse toloku ta Kanu nde dəkətola Kanu da aSuyif. Isanɲ enayi di pəcmar ɲa.

⁶ Nte ɲancali mokuru hanɲ dare da Pafɔs mɔ, kɔ ɲambəp di fum wəwɛɲkɛ wəlɔma pəcwenɛ sayibe, mba ta ɔyɔne si-ɛ. WəSuyif enayi, pacwe kɔ Bar-Yesu.

⁷ Wəwɛɲkɛ wəkakɔ ndena Serkus Polu enayi, nwe enayɔne wəkirinɲ wəka sɔdare sa atɔf ɲanɔkɔ mɔ. Nkən Serkus Polu wərkun wəcempi domp enayi. K'ender k'ewe Barnabas kɔ Sol pəctɛn kənene ɲa toloku ta Kanu.

⁸ Elimas, ito tatoko «wawehke» kusu kəjan, engbekəl moloku ma Barnabas ko Sol, pecten kəkafəli kəlan ka wəkiriŋ Serkus Polu.

⁹ Mba Sol, nwe ancwe so Pol mo, Amera Necempi neyi ko darəŋ, k'engbətne Elimas.

¹⁰ Ko Sol oloku ko: «Məna wəkako məla mowul ko yem mo, wəka amera nɛlec, wəter pəlompu fəp, məfosak kəkafəli-kafəli səpə sa Wəbe Kanu nse səlomp mo ba?

¹¹ Ndekəl kəca ka Wəbe kəy'am kəron: Wətonəŋk məndeyəne! Tem tendebəp, məndeyi ta mənəŋk pəwanəkəra pa dec-ε.»

Gbəncana babako ko fəp yəyo ko pafulu ko kubump kəwəkərne ko. K'eyefe kənana-nana pecten kəca nke kəŋkəsumpər ko kəsolə mo.

¹² Nte wəkiriŋ ka dətəf enəŋk nte tenacepər mo, k'əyənə wəlan. Metəkse mme enanene Barnabas ko Sol teta Wəbe mo menabət ko debəkac.

Pol ko Barnabas dare da Antiyək nde Pisidi

¹³ Nte Pol ko asol ən naye fe dare da Pafos mo, ko naye kti abela kəkə ka Perke, nde atəf nja Panfili. Ko Isan Mark engbey nja, k'olukus Yerusalem.

¹⁴ Ko naye fe Perke nəcəme dəpə danan darəŋ han Antiyək, atəf nja Pisidi. Ko nənko dəkətola Kanu da aSuyif simiti, dəsək da kənesəm, ko nandə.

¹⁵ Nte alip kəkaran Tawureta Musa ko Sayibe mo, ko abe a kəlo ka dəkətola da Kanu nde nəloku Barnabas ko Pol: «Awenc asu anja, ko nəyo toloku tecəpəse abəkac nte nənfan kəloku afum mo, nəloku ti.»

¹⁶ Ko Pol eyefe, k'ondot kəca, k'oloku: «Arkun a Yisrayel, ko nəna alpəs anje nənnesə Kanu mo, nəcəŋkəl!

¹⁷ Kanu ka afum akanje, Kanu ka Yisrayel, kənayek-yek atem asu, ko kəsəŋe nja kəla tem nte njanayi decikəra Misira mo, ko Kanu kin kəŋko kəwurene nja atəf nənəkə fənəntər fa kəca kən.

¹⁸ Ko kələke nja mes mɛlec manjan nde dətəgbəre meren wəco mankələ (40).

¹⁹ Nte Kanu kənim afum a cusunəka camət-merəŋ nde atəf nja Kanan mo, ko kəsəŋ atəf nənəkə afum ən nte tənəŋe nəyənə nja ke mo.

²⁰ Mes mamako fəp menawon meren masar mankələ ko wəco kəcəmət (450).

Nte tatoko tencepər mo, ko Kanu kəsəŋ nja aboc kiti, anje njanatəmpər dəbe da aka Yisrayel mo han kəbəp ka tem ta anəbi Samiyel.

²¹ Ko tēyefe danda ko aka Yisrayel nawer Kanu wəbe. Ko kəsəŋ nja Sawul wan ka Kis pəyənə nja wəbe meren wəco mankələ (40). Fum wəka kusunəka ka Benyamin enayi.

22 Nte Kanu kafan Sawul mo, ko kasonja na wabe Dawuda, nwe Kanu kanaloke nte mo: «Inenka Dawuda wan ka Yisay, fum ofo nwe sawurene bakac mo, incem-cemne a endeyo mefan mem fap.»

23 Kabanda ka dokombora da nkon Dawuda, difo Kanu kanasonja kakom ka Yesu Krist kadeyone ka nwe endeyac afum a Yisrayel, pamo nte kanasonja ti atem asu temer mo.

24 Ta Yesu entader-e, San enacam kagbat daromun, nte tonsone afum a Yisrayel fap nasakpar bakac yanjan yetefarne Kanu mo.

25 Nte San enclapas yebac nye Kanu kanasom ko mo, encyif: «Pecem-cemne ponu, an'iyone-e? Nwe nancem-cemne a nkon iyone mo, bafonkon iyone de! Mba endeder tadaran tem nwe pantamar im yati kasikali cofa dawecak mo.»

26 Awenc im ana, nana awut aka dokom da Abraham, ko nana ako nanesa Kanu mo, sana na anakere toloku nte tendeyac su mo.

27 Mba aka Yerusalem ko abe anjan nanacere fe fum nwe Yesu enayone mo. Nanagbekere fe so moloku ma sayibe mme ankaranja simiti o simiti dasak da kanesam mo, mba nanader jalas moloku mamako nte nanabocar Yesu kiti mo.

28 Nanasoto fe nte o nte toko panamar a nadife Yesu mo, mba ko nantola Pilat kadif kon.

29 Nte nalip kayo mes fap mako anacic teton mo, ko nantore ko datok yepampal, ko nanako naboc ko dakufu.

30 Mba Kanu kanasonje ko kafote afi daco.

31 Ko Yesu owurer mataka melarom ako nanape ko nkon kayefe Kalile kako ka Yerusalem mo. Na nayone on ane nanatane kayefe ka Yesu afi daco mo, na nantam so kalukse ti afum aloma.

32 Ko sana toloku totot tatoko to saloku nu: Temer mpe anasonja atem asu mo,

33 Kanu kalase su ti belbel, sana dokomene danjan, kayekti ka Yesu, pamo toko ancic ti Yabura Dawuda ya meran disre mo:

«Wan kem moyone,

bawo in'okom am kayefe mako.»

34 Kanu kanaloku a kadeyekti ko afi daco, nte tonsone ta oluksarne pate mo. Ti tenasonje peloku:

«Indesonja nu memer mosoku mme inasonja Dawuda mo, memer mme moyone kance mo.»

35 Iti Kanu kalokene kafe kaloma Yabura Dawuda disre:

«Mafodesak Wosoku wakam pate dakufu.»

36 Dawuda nkɔn ɛnabɛc tɛfaŋ ta Kanu dɛtɛmp dɔn disrɛ, k'ɛfɛntɛrɛ k'ɛfi, k'awup kɔ nde atem ɔn kɛsɛk, k'ente dɛkufu.

37 Mba fum nwe Kanu kɛnasɔŋɛ kɛfɔtɛ afi dacɔ mɔ, nkɔn ɛnate fɛ.

38 Awɛnc im aŋa, nɛcɛrɛ ti: Teta nkɔn Yesu t'ancamɛ nu kɛŋaŋnɛnɛ ka kiciya, kiciya nke sariyɛ sa Musa sɛnatɔtam kɛsɔkɛsɛ nu mɔ.

39 Ti disrɛ, nwe o nwe ɛŋgbɛkɛr kɛlan kɔn Yesu mɔ, Kanu kɛndɛsɔkɛs kɔ.

40 Nɛkɛmbɛrɛ nte tɔŋsɔŋɛ mes mɔkɔ sayibɛ ŋancic mɔ ta mɛbɛp nu:

41 «Nɛmɔmɔn nɛna afum aŋɛ nɛmbɔtɛr kɛfani mɔ!

Nɛyi pɛciyanɛ disrɛ, nɛsɔlɛ!

Bawo ina kɛyɔ k'inder tes tɔlɔma kiyi konu doru kɛŋkɛ disrɛ, tes nte nɛntɔdelan kɔ fum oloku nu ti-ɛ.»

42 Nte Pol kɔ Barnabas ŋawur dɛkɛtola Kanu da aSuyif mɔ, kɔ afum ŋalɛtsɛnɛ ŋa kɛder sɔ simiti dɔsɔk da kɛŋɛsɛm dɔkɔ dender mɔ kɛdegbɔkɛrɛ moloku min mayi.

43 Nte kɛnay kɛsaktɛnɛ mɔ, aSuyif alarɛm kɔ akɔ ŋambɛrɛ dinɛ d'aSuyif mɔ ŋancɛpsɛ Pol kɔ Barnabas kɛlok-loku kɛŋan disrɛ. Kɔ akakɔ ŋasɛp kɛcɛpɛs ŋa bɛkɛc teta kɛsumpɛr kɛmar ka Kanu.

44 Simiti dɔsɔk da kɛŋɛsɛm ndɛ dɛnacɔnc mɔ, kɔ aka dare fɛp ŋalɔŋkanɛ kɛkɔcɛŋkɛl toloku ta Wɛbɛ.

45 Nte aSuyif ŋananɛŋk kɛnay ka afum mɔ, kɔ ŋayɔ kɛraca kɛpɔŋ. Kɔ ŋayɛfɛ kɛgbɛkɛl Pol, ŋaclɔmɛs kɔ.

46 Pol kɔ Barnabas ŋambɛkɛnɛ kɛloku ŋa: «Nɛna yati pɛnamar a pacɔp kɛlukɛ toloku ta Kanu. Mba nte nɛnabupɛrɛ ti, kɔ nɛncɛm-cɛmnɛ a pɛmar fɛ a nɛsɔtɔ kiyi wɛyɛŋ ka doru o doru mɔ, ndɛkɛl ɔŋ sɛna sɛndekafɛlɛ sɛkɔ ndena akɔ ŋantɔyɔnɛ aSuyif mɔ.

47 Bawo Wɛbɛ osom su nte:

«Isɔŋ'am kɛyɔnɛ pɛwanɛkɛra pa tɔf, nte tɔsɔŋɛ mɛkɛkɛrɛ kɛyac ka afum han nde cɛpɛc ca doru fɛp cɛyi mɔ.»

48 Nte afum ŋane ti mɔ, kɔ pɛmbɔt atɔyɔnɛ aSuyif dɛbɛkɛc. Kɔ ŋaŋkor-koru toloku ta Wɛbɛ, aŋɛ Kanu kɛnacɛmbɛrɛ kiyi wɛyɛŋ ka doru o doru mɔ, kɔ ŋayɔnɛ alan.

49 Kɔ toloku ta Wɛbɛ tɛsamɛsɛr dɔtɔf fɛp.

50 Mba kɔ aSuyif alɔma ŋaŋgbɛŋɛr aran abeki akor-koru Kanu, kɔ abeki a dare, kɔ ŋancɔp kɛtɔrɛs Pol kɔ Barnabas teta kɛlan kɛŋan kɔ ŋambɛlɛs ŋa dare danɛn.

⁵¹ Pol kɔ Barnabas ɲaɲkoɲɔr ɲa kɛfɛl ka wɛcɛk waɲan, kɔ tɔyɔnɛ sede sa kɛfati kɛɲan kɛcɛɲkɛl toloku ta Kanu, kɔ ɲaɲkɔ Ikoniyon. *

⁵² Pɛmbɔt acɛpse a Yesu darɛɲ, kɔ Amera ɲɛcɛmpi ɲa Kanu ɲɛnayi kɔ ɲa.

14

Pol kɔ Barnabas nde dare da Ikoniyon

¹ Dɛndo dare da Ikoniyon, Pol kɔ Barnabas ɲamberɛ dɛkɛtola Kanu da aSuyif. Kɔ ɲaloku moloku mɛmɛ mɛnasɔɲɛ aSuyif kɔ aKresi alarɛm kɛgbɛkɛr Yesu kɛlan mɔ.

² Mba kɔ aSuyif ayɛɲki sɛbomp aɲɛ ɲamberɛs afum atɔyɔnɛ aSuyif mɛr kɛtɛr ka awɛnc aɲa alaɲ.

³ Ti disrɛ, Pol kɔ Barnabas ɲambɔlɔsɛ kiyi kɛɲan dɛndo dare dadɔkɔ. Kɔ ɲalok-lokɛ kɛgbɛkɛr mera yaɲan tɛta MARIKI. Kɔ MARIKI ɔsɔɲ ɲa fɛnɔntɛr fɛyɔnɛ mes mɛwɛy-wɛy kɔ mɛgbɛkɛrɛ, pɛcmentɛr sɔ kance ka mes mɔkɔ Pol kɔ Barnabas ɲanccam kɛmar kɛn disrɛ.

⁴ Kɔ kɛnay ka afum a dare dadɔkɔ ɲayersɛnɛ. Alɔma ɲanayinɛ aSuyif, alɔma ɲayinɛ asom a Yesu.

⁵ Mba, aSuyif kɔ acikɛra kɛbɛp ka abɛ aɲan ɲanalompɛsɛnɛ kɛkɛtɔrɛs Pol kɔ Barnabas kɛca-cas kɛɲan masar haɲ ɲadif ɲa.

⁶ Ntɛ Pol kɔ Barnabas ɲane ti mɔ, kɔ ɲayɛkɛ kɛkɔyɛcɛnɛ nde Listɛr kɔ Dɛrbɛ, sɛdare sa atɔf ɲa Likayoni, kɔ sɛkɛsɛk sayi.

⁷ Dɛndo sɔ ɲanccam toloku tɔtɔt ta Yesu.

Pol kɔ Barnabas nde dare da Listɛr

⁸ Fum wɛlɔma ɛnayi Listɛr pɛyɔnɛ wɛtɔɲkulu, wɛcɛk wɔn wɛnafi. Kɛyɛfɛ ntɛ aɲkom kɔ mɔ, ali ɔncɛkɔt fɛ. ɛnandɛ,

⁹ pɛccɛɲkɛl moloku ma Pol. Kɔ Pol ɛɲgbɛtɛnɛ kɔ. Ntɛ ɛnɛɲk a wɛtɔɲkulu ɔyɔ kɛlan nɛkɛ kɛntam kɛyɛc kɔ mɔ,

¹⁰ kɔ Pol olokɛ kɔ dim dɔpɔɲ: «Mɛyɛfɛ! Mɛcɛmɛ wɛcɛk wam kɛron, mɛlomɲ!» Kɔ wɛrkun nwe oyoknɛ, k'ɛyɛfɛ k'ɛncɛmɛ kɛkɔt.

¹¹ Kɔ kɛnay ka afum akakɔ ɲanɛɲk ntɛ Pol ɔyɔ mɔ, kɔ afum kɛnay ɲampɛnɛ cɛbebe ɲaclɔku cɛLikayoni: «Canu cɛntɛɲkɛlɛ afum kɔ cɛntɔr nnɔ ndorosu!»

¹² Ti tɛnasɔɲɛ ɲawe Barnabas «Sus», ɲawe Pol nkɔn «Hɛrmɛs», bawo Pol nkɔn ɛncɛpɛrɛnɛ moloku. *

¹³ Wɛlɔɲɛnɛ ka Sus ɛnakɛrɛ mura kɔ yɛnɛkɛs nde dɛkɛbɛrɛ da kɛlɔ ka dɛkɛlɔɲɛnɛ ndɛ deyɛ nde dare dɛkusu mɔ. Pɛnabas kɔ

* **13:51** *ɲaɲkoɲɔr ɲa kɛbɔf ka wɛcɛk waɲan* = pɛmɔ tɔkɔ Mariki Yesu ɛnaloku ti acɛpse ɔn darɛɲ mɔ: a dare o dare dɔkɔ ɲaɲkɔ a tawosɛ kɛcɛɲkɛl toloku ta Kanu mɔ, a ɲakoɲɔr dare dadɔkɔ kɛbɔf ka wɛcɛk waɲan. Ti t'ɛɲmentɛr a ɲanacɛpɛr dare dadɔkɔ akɔ antɔwosɛ kɛcɛɲkɛl toloku ta Kanu. * **14:12** Dinɛ da aKresi «Sus» ɛnayɔnɛ wɛbɛ ka canu, kɔ «Hɛrmɛs» ɛnayɔnɛ wɛcɛpɛrɛnɛ kɛn moloku.

kəlonɲe mi, nkən kə kənay ka afum nnə Pol kə Barnabas ɲayi mə.

¹⁴ Mba nte asom a Yesu Barnabas kə Pol ɲane ti mə, kə ɲawal-wali yamos yaɲan, kə ɲambere afum daco ɲackule-kule:

¹⁵ «Anapa! Ta ake tə nəyɔne tantɛ-ɛ? Səna sə, afum ɲə səyɔne, palompəs su tin tayi pəmə nəna. Səloku nu toloku tətət nte tɔɲsɔɲe nəsak mes mɛyamayama mame mə! Nəkafələr Kanu fər nkɛ kəyi wəyɛɲ mə, Kanu nkɛ kəlompəs kəm, antəf kə kəba, kə ca yəkə yeyi ki mə fəp.

¹⁶ Dɛtemp dəkə dənacepər mə, Kanu kənowosɛnɛ afum a təf ya doru fəp ɲactam kəcəme dɔpə darəɲ dəkə ɲaɲfan mə.

¹⁷ Ali nte nkən Kanu kənatəsak kəcmentər nu dətət dəmɔyɔ mən mə, bawo kəncsɔɲ nu wəcafən, kəncsɔɲɛ sə yəbɔf yonu kəkom pəlarəm, kə kəncsɔɲ nu sə yeri yelərəm, kə kənclas nu sə pəbotu dəbəkəc.»

¹⁸ Ali nte Pol kə Barnabas ɲanaloku moloku maməkə mə, pəcuca pənayi ɲa kəyamsər ka kənay kanəkə kəlonɲe cəna nɛ ɲanafan kəlonɲenɛ ɲa mə.

¹⁹ Kə aSuyif aləma ɲander kəyefe Antiyək ɲa Pisidi kə Ikoniyon, kə ɲasɛp haɲ kə ɲantalər kənay ka afum akakə. Nte tə kə kənay ka afum aɲɛ ɲayefe kəca-cas Pol. Tɛlpəs kə ɲalinəs kə haɲ dare kəsək, ɲacɛm-cɛmne a efi.

²⁰ Mba nte acɛpse a Yesu darəɲ ɲanadekel Pol mə, k'eyefe, k'oluksərne dare. Dəckəsək kə ɲaɲkə dare da Dərbɛ, nkən kə Barnabas.

Kəlucus ka Pol kə Barnabas Antiyək atəf ɲa Siri

²¹ Nte Pol kə Barnabas ɲambəp dare da Dərbɛ kə ɲancam dəndo toloku tətət ta Yesu. Kə ɲasətə di afum alarəm aɲɛ ɲanalaɲ teta Yesu mə. Nte tə kə ɲalɛk dɔpə kəlucus ka Listər, Ikoniyon kə Antiyək ɲa Pisidi.

²² Kə ɲacəpəs acɛpse darəɲ bəkəc, ɲacgbiɲər ɲa kəyine kəlaɲ, ɲacloku: «Kə səna, mɛnɛ səcɛpərənɛ pəcuɲ pəlarəm a səbɛrɛ nde akip ɲa dɛbɛ da Kanu dəntəf.»

²³ Kə ɲayek-yekɛ ɲa abeki dəkəlonkane fəp da alaɲ. Nte ɲalip kətola Kanu kə kəsun mə, Pol kə Barnabas ɲasɔɲ ɲa Mariki nwe ɲanagbəkər kəlaɲ mə kəbum kəɲan.

²⁴ Kə ɲancepər dɔpə da atəf ɲa Pisidi kə ɲambere atəf ɲa Paɲfili.

²⁵ Nte ɲalip kəloku toloku ta MARIKI dare da Perke mə, kə ɲantor dare da Atali.

²⁶ Dəndo Atali, difə Pol kə Barnabas ɲanalek abil kə ɲancali kəkə Antiyək ɲa Siri, dare ndɛ anatolanɛ ɲa kəmar ka Kanu teta yebac nyɛ ɲanalip mə.

²⁷ Nte ɲambere mə, kə ɲalonka alaɲ a Antiyək fəp, kə ɲaləm təkə Kanu kənayɔnɛ ɲa mə, kə təkə nkən Kanu kənasɔɲɛ atəyɔnɛ aSuyif kəlaɲ mə.

28 Pol kɔ Barnabas ηawon dɔndo dare dadɔkɔ kɔ acɛpse a Mariki Yesu darɛη.

15

Kɔbɔpsɛnɛ ka alaη nde Yerusalem

¹ Afum alɔma ηanayefe atɔf ηa Yude, ηactɔkse awenc aηa alaη nte: Kɔ nɛntɔyɔ pakɛnc nu pɛmɔ tɔkɔ tɔyɔ tokur ta Musa toloku ti mɔ, Kanu kɛfɔdewose kɛyac nu.

² Nte Pol kɔ Barnabas ηaηgbekɛlɛnɛ kɔ arkun akakɔ kɛliηɛnɛ kɛηan moloku mɔ, kɔ ηantɛηnɛ a nkɔn Pol kɔ Barnabas kɛbɔp ka akin akin arkun akakɔ dacɔ, ηakɔ Yerusalem kɛkɔnɔnɛ moloku mamɔkɔ nnɔ asom a Yesu kɔ abeki a kɛlonηkanɛ ka alaη fɔr kirih.

³ Kɔ kɛlonηkanɛ ka alaη a Antiyɔk ηasɔη ηa daka nde pɛnamar a ηayɔ teta marɛnt mɔ. Nte ηancepɛr atɔf ηa Fenisi kɔ atɔf ηa Samari mɔ, kɔ ηalɔmɛr ηa nte atɔyɔnɛ aSuyif ηaηkafɛli bɛkɛc yanηan nnɔ Mariki eyi mɔ, ηacsɔηɛ awenc aηa alaη fɛp pɛbotu.

⁴ Nte ηambɛrɛ Yerusalem mɔ, kɔ kɛlonηkanɛ ka alaη, asom a Yesu, kɔ abeki a kɛlonηkanɛ ηambar ηa. Nte tɔ Pol kɔ Barnabas ηalɔm tɔkɔ Kanu kɛnayɔ fɛp kɔ ηa mɔ.

⁵ Awa kɔ aFarisi alɔma aηɛ ηanayɔnɛ alaη mɔ ηayefe kɔ ηaloku: «Pɛmar pakɛnc atɔyɔnɛ aSuyif, pagbiηɛr ηa sɔ kɛlelɛs sariyɛ sa Musa.»

⁶ Asom a Yesu kɔ abeki a alaη aka Yerusalem ηanabɔpsɛnɛ kɛkɔmɔmɔη ka tes tatɔkɔ.

⁷ Nte kɛgbekɛlɛnɛ kɛwon ηa dacɔ mɔ, kɔ Piyer eyefe k'oloku: «Arkun, awenc im aηa, nɛncɛrɛ ti: A pɛwon nte Kanu kɛnayɛk-yɛk im nɛna dacɔ kɛcam ka Kibaru Kɛtɔt ka Yesu, nte tɔηsɔηɛ atɔyɔnɛ aSuyif ηatam kɛnɛ ti kɔ kɛlaη ti mɔ.

⁸ Kanu kɛncɛrɛ bɛkɛc ya afum, Ki yati kɛmentɛr a kɛmbaη atɔyɔnɛ aSuyif, bawo kɛsɔη ηa sɔ Amera Nɛcempi pɛmɔ sɛna.

⁹ Ali kɛgbɛy kɛfɛt ηηgbɛy fɛ su kɔ atɔyɔnɛ aSuyif, bawo kɛlaη k'ɔsɔkɛs ηa bɛkɛc.

¹⁰ Ndɛkɛl ɔη, ta ake tɔ nɛfan kɛdɛkɛtɛrɛ Kanu-ɛ? Nte nɛfan kɛsarsɛr acɛpse a Yesu tes tocu nte, kɛyefe atem asu haη sɛna yati sɛntɔtam kɛsarɛ mɔ.

¹¹ Mba sɛlaη a andeyac su kɛmar ka Mariki Yesu disɛ pɛmɔ ηa atɔyɔnɛ aSuyif.»

¹² Kɛnay ka afum fɛp ηanacɔηk, k'ancɛηkɛl ɔη moloku ma Barnabas kɔ Pol. Kɔ ηalɔm mes mɛwɛy-wɛy kɔ mɛgbekɛrɛ mɛmɛ Kanu kɛnasɔηɛ ηa kɛyɔ atɔyɔnɛ aSuyif dacɔ mɔ.

¹³ Nte ηalip kɛlɔku mɔ, kɔ Sak endɛηɛr: «Awenc im aηa! Nɛcɛηkɛl im!

¹⁴ Simeyɔη ɔlɔm tɔcɔkɔ-cɔkɔ nte Kanu kɛnader kɛyɛk-yɛk tɔf ya doru fɛp dacɔ, afum aηɛ ηayɔnɛ akɔn mɔ.

15 Itə moloku ma sayibe mosolne kə moloku ma Simeyən pəmə nte ancic ti mə:

16 «Kə Mariki oloku: «Kə tante tencepər-ε, indeder sə.

Indeyekti sə abal ɲa Dawuda ɲɛ ɲenatempene mə, indeyekti samba sa abal ɲaɲəkə,

Indecəmbər ɲi sə ɲolomp,

17 nte tənɲɛ afum alpəs ɲaten ina Mariki mə.

Ǝy, dətəf fəp nyε anakorne tewe tem mə.»

Mariki oloku nte, nwe ɲyɔ mes maməkə mə

18 Ǝnasɔɲε mi kəcəε kəyεfε nte pə nawon mə.»

19 It'əsɔɲε nte, ina Sak, ɲɲwose sə a ta pətərəs atəyɔne aSuyif aɲε ɲantefərne nno Kanu kəyi mə.

20 Mba pacice ɲa a ɲakembərne pətəcemp mpe pɛyεfε nno kətola mɛrəɲka kəyi mə, kə dalakə, kə kəsəm ka sɛm nyε antəfay mə, ɲakembərne sə kəmun mecir.

21 Kəyεfε detemp dəcək-cək, Musa ɲyɔ sədare fəp afum aɲε ɲaloku tetən mə, bawo aɲkarəɲ Tawureta tən simiti o simiti dəsək da kəɲesəm nde dəkətola Kanu da aSuyif.»

Areka ɲəkə anakenε alaɲ atəyɔne aSuyif mə

22 Asom a Yesu kə abeki kəbər ka kəlonkanε ka alaɲ Yesu kərkər ɲande ɲaməmən a pəmar payek-yek ɲa daco afum aləma akə pəmar a pasom Antiyək mə, kəberεne ka Pol kə Barnabas. Ti disre kə ɲayek-yek afum mɛrəɲ aɲε ɲanatəmpər delel awenc aɲa daco mə: Yudas wəkə ancwe sə Barsabas mə, kə Silas.

23 Kə ɲasom ɲa kə areka nyε:

«Awenc anu, asom a Yesu kə abeki kə alaɲ ɲancice nu areka, nənə awenc su aɲa aka Antiyək, aka Siri, aka Silisi aɲε ɲantəyɔne aSuyif mə:

Səyif nu!

24 Səne a afum asu aləma aɲε ɲawur nno ndorosu mə, ɲantərəs nu kə ɲampempe nu moloku maɲan, mme səntəsom ɲa mə.

25 Nte sənənεne akə səntəɲne ti mə, itə sənəɲk a pəntese səyek-yek afum, səsom ɲa nde nəyi mə, kəberεne ka Barnabas kə Pol, aɲε səmbətər mə,

26 afum aɲε ɲancaməs kiyi kəɲan doru tewe ta Mariki Yesu Krist mə.

27 Itə səsom Yudas kə Silas ɲakə ɲaloku nu nte teyi areka ɲaɲε disre mə.

28 Pənas Amara Ɗecempi kə sənə sə, a pəntese fε a sənɲkər nu mes məkə nəntətəm kəsare mə, mēne mes məkə mɛmar nu kəsumpər mə:

29 Ta nəsom sem nyε alonhene merəŋka mə, nəbolenε mecir kə sem nyε antəfay mə, nəbolenε sə dalakə. Pəmar nəkembərne mes maməkə fəp.

Kanu kəsəŋε a nətamne.»

30 Nte anasak asom aŋε mə, kə ŋawurnε kəkə Antiyək. Kə ŋaŋkə ŋalonka di alan, kə ŋasəŋ ŋa areka ŋaŋəkə.

31 K'aŋkaraŋ ŋi kə pəmbət ŋa, bawo areka ŋaŋəkə ŋenacəpəs ŋa bəkəc.

32 Yudas kə Silas aŋε ŋanayəne sə sayibe mə ŋancgbiŋər awenc aŋa alan kə ŋacəpəs ŋa sə bəkəc dəmoloku mɛlarəm.

33-34 Ŋanayi dəndo Antiyək haŋ, kə awenc aŋa alan ŋatolane ŋa marənt moforu, kə afum a Antiyək ŋasak ŋa kəluku nde asom aŋan ŋayi mə.

35 Mba tɛm tatəkə Pol kə Barnabas ŋanayi Antiyək, kəberεne kəŋan kə afum alarəm aləma, ŋactəkse, ŋaccam sə toloku tətət ta Mariki.

Pol kə Barnabas ŋaŋgbeyεne

36 Nte mataka mələma mencepər mə, kə Pol oloku Barnabas: «Səluksərne səkəŋəŋk awenc su aŋa sədare nse sənadəŋk toloku ta Mariki mə, nte təŋsəŋε səcərə nte ŋayi mə, kə təkə ŋasumpər toloku tatəkə mə.

37 Barnabas nkən encfaŋ kəkεne Isəŋ, wəkə aŋwe sə «Mark» mə.

38 Mba Pol nkən enawosε fε ti, εnacεm-cεmne a pəmar fε kəkεne Mark, bawo dəndo Paŋfili Mark εnasak ŋa pəfati kəcəmbər ŋa kəkətεne ka yebac yəkə anasom ŋa mə.

39 Kəgbəkəlεne kəŋan kənayəŋk haŋ kə təsəŋε ŋa kəgbeyεne. Nte tə kə Barnabas εlek Mark kə ŋambεke debil kə ŋancali kəkə Sipər.

40 Nte Pol εnayek-yek Silas mə, awenc aŋa alan ŋantolane kə, ŋactola Mariki a pəbum ŋa kəmar kən disre, kə ŋaŋkə.

41 Kəkə kəŋan, kə ŋancali təf ya Siri kə Silisi, ŋaccəpəs alan aka di bəkəc.

16

Timote encəmbər Pol kə Silas

1 Pol εnabεre dare da Dərbε, k'əŋkə sə Listər. Dəndo wəcεpse Yesu darəŋ wələma εnayi pacwe kə Timote, kεre pəyəne wəSuyif nwe εnader pəlan Yesu mə, mba kas pəyəne wəkresi.

2 Awenc aŋa alan aka Listər kə Ikoniyon ŋanatəŋne kəyə kən mes mətət.

3 Kə Pol εfaŋ kəkεkərə Timote, k'εlek kə k'εŋkənc teta aSuyif akə ŋanayi atəf ŋaŋəkə mə, bawo fəp fənacərə a Timote kas wəkresi εnayi.

⁴ Sədare nse ɲancceɓər mə, ɲanclukse moloku mme asom a Yesu kə abeki alañ a Yerusalem ɲanasom ɲa kəkətene mə, nte tɔɲsɔɲe alañ atəyɔne aSuyif ɲacəme mi darəɲ mə.

⁵ Alonkane alañ ɲaccəpəs bəkək kəlanj disre, ɲacberene kəla dəsək o dəsək.

Pol enasətə kənəɲk kəyefe darenc

⁶ Nte Amera ɲecempi ɲa Kanu ɲeyamse Pol kə Silas kəloku toloku tətət ta Kanu atəf ɲa Asi mə, kə ɲancali atəf ɲa Firiki kə atəf ɲa Kalat.

⁷ Nte ɲalətərne atəf ɲa Misi mə, kə ɲasəp kəkə atəf ɲa Bitini, mba Amera ɲa Yesu ɲenawosene fe ɲa ti.

⁸ Kə ɲasolne atəf ɲa Misi kə ɲantor dare da Torowas.

⁹ Pibi disre kə Pol əsətə kənəɲk kəyefe ka darenc. Ti disre, wəka Masedon pəcəme kə kəsək pəclətsene kə: «Məder Masedon, məmar su!»

¹⁰ Pol enadesətə kənəɲk kanjə, kə sənten katina kəkə ka atəf ɲa Masedon, səboc ti a Kanu kəwe su kəkəcam di toloku tətət ta Yesu.

Ludy kəlanj kən Mariki Yesu

¹¹ Kə səyefe Torowas kə səyekti abela kə səntefərne kəkə ka Samotiras, dəkəsək kə səmbere Neyapoli.

¹² Kə səyefe dəndo, kə səɲkə Filipi, dare dəpəɲ da atəf ɲa Masedon dələma nde aka Rom alarəm ɲanande mə. Kə səncepərne mataka mələma dare dadəkə.

¹³ Simiti dəsək da kəɲesəm kə səwur dare dəkusu kəɲgbəkə kəsək, nde sənacem-cəmne kəfo nke səntam kətola Kanu mə. Kə sənde kəlok-lokər aran aɲe ɲanalonkane di mə.

¹⁴ Wəran wələma enayi ɲa daco pacwe kə Ludy, pəcəməs cəloto ca karɛ. Pakom kə dare da Tiyatir. Wəkor-koru Kanu enayi. Pəcəɲkəl su, kə Mariki eɲgbiti kə abəkək, nte tɔɲsɔɲe kə kəcne belbel moloku mme Pol oncloku mə.

¹⁵ Nte anagbət kə dərɔmun teta Kanu mə, Ludy kə aka kələ kən disre, k'ewe su kəyi nde ndərən mataka mələma, pəctola: «Kə nəcem-cəmne a ilanj Mariki belbel-ɛ, nəder nnə nderem, nəyi nnə kə səna.» K'elətsene su kəyi di.

Kəcaɲər ka Pol kə Silas nde bili ba Filipi

¹⁶ Dəsək dələma səckə dəkətola Kanu da aSuyif, kə wəyecəra wəcar wələma ender pəbəp su, pəyɔ ɲəɲk nɲe ɲəɲsɔɲe kə kəloku nte tender mə. Wəyecəra nwe əncsətəne ti nnə abe ən ɲayi mə pəsam pəlarəm teta kəloku kən mes mme mender mə.

¹⁷ Kə wəyecəra nwe encəpse su darəɲ Pol kə səna, pəckule-kule: «Afum akanje acar a Kanu nke kəyi darenc mə ɲə! Dəpə da kəyac də ɲayi kəmentər nu!»

¹⁸ Nte wəyecəra əyɔ mes maməkə mata məlarəm mə, kə tələs Pol dis. K'ɛɲkafəle, k'oloku ɲəɲk: «Tewe ta Yesu Krist

ilok'am, mawur wəyecəra wəkawɛ dərɪs!» Gbəncana babəkɔ kɔ ŋɔŋk ŋaŋkɔ ŋowur kɔ dərɪs.

19 Ntɛ abɛ ɔn ŋanəŋk a tɔsɔtɔnɛ tanjan pəsam tɔsɔlɛr ŋa mɔ, kɔ ŋasumpər Pol kɔ Silas, kɔ ŋaŋkəkərəɛ ŋa ndɛ aban̄ka ŋa dare daco abɛ a dare fər kirin̄.

20 Kɔ ŋaŋkɔ ŋamentər ŋa aboc kiti, ŋacloku: «Afum akan̄ɛ pəyamayama pɔ ŋayi kəbɛrsɛnɛ dare dosu. ASuyif ŋɔ ŋayɔnɛ,

21 aŋɛ ŋayi kəcam mɔyɔ manjan mme pəntɔmar su kəwosɛ kəyɔ ka mi, sən̄a aŋɛ səyɔnɛ aka Rom mɔ.»

22 Kɔ kənay ka afum ŋayɛfɛ kɔ ŋancəmɛ ŋa dəbəkəkɛ. Kɔ aboc kiti a dare dadəkɔ ŋawurɛ ŋa yamos, k'asutɛ ŋa cəŋgban-gban.

23 Ntɛ alip kəsut ŋa pəlarəm mɔ, kɔ ŋambɛr ŋa dəbili, kɔ abɛ ŋaloku wəbum bili a pəkembərɛnɛ ŋa belbel.

24 Ntɛ wəbum bili enɛ moloku maməkɔ mɔ, k'embɛr ŋa ndɛ bili mbɛ ŋantɔtam kəwur mɔ, k'ɔŋkɔtərənɛ ŋa wəkək məmboŋk ma tək.

25 Cɛk-cɛk cəndɛbəp, Pol kɔ Silas ŋactola Kanu, ŋaclɛŋəs mɛlɛŋ mokor-korɛ Kanu, kɔ ayi dəbili ŋaŋnɛ sim səŋjan.

26 Gbəncana babəkɔ kɔ antɔf ŋeyikcɛ pəpɔŋ, kɔ tɔsɔŋɛ kəlɔ ka bili tantɔf kəkəkəlɛ. Kɔ cumba fəp cəŋgbitɛ, kɔ gbekcɛ fəp yon̄kɔŋɛ.

27 Kɔ wəbum bili entimɛ, k'ɛnəŋk ntɛ cumba ca bili cəŋgbitɛ mɔ, k'owurɛ dakma dɔn pəkəkɔ kədɪfnɛ, bawo ɛnacɛm-cɛmnɛ a afum aŋɛ ambɛr dəbili mɔ ŋayɛksɛ.

28 Kɔ Pol ɔŋkule-kulɛ pəpɔŋ: «Ta məyɔnɛ pələc, səyi nnɔ fəp fosu!»

29 Kɔ wəbum bili ewe nɛnc, k'embɛrɛ katəna katəna, k'ɔŋkɔ pətɛmpɛnɛ fər ya Pol kɔ Silas kirin̄, pəcyikcɛ kənɛsɛ disrɛ.

30 K'owurɛnɛ ŋa ndɛ doru k'eyif ŋa: «Abɛ, cəkɛ cɔ pəmar iyɔ ntɛ tendeyac im mɔ-ɛ?»

31 Pol kɔ Silas ŋaloku kɔ: «Mələn̄ Mariki Yesu, andekəyac əm, mən̄a kɔ aka kəlɔ kam disrɛ fəp.»

32 Kɔ ŋaloku kɔ toloku ta Mariki, kɔ afum akɔ ŋanayi ndɛ kəlɔ kən mɔ fəp.

33 Pibi papəkɔ kɔ wəbum bili ɛlɛk ŋa, k'ɛŋkəkərəɛ ŋa kəkəyək gbali yanjan. Wəbum bili kɔ afum ɔn fəp ŋasɔtɔ gbəncana babəkɔ kəgbət dərɔmun tɛta Kanu.

34 K'ɛmpɛnɛ ŋa ndɛ ndərɔn, k'ɛncəmbər amɛsa, kɔ ŋawoləs kɔ aka kəlɔ kən disrɛ pəbotu pa kələn̄ kən Kanu.

35 Ntɛ dec dəsək mɔ, kɔ aboc kiti a dare ŋasom afum aŋan alɔma kəkɔloku wəbum bili: «Məsak afum akan̄ɛ.»

36 Kɔ wəbum bili olukɛ moloku maməkɔ Pol: «Aboc kiti a dare ŋasom afum nnɔ iyi mɔ, a isak nu. Awa nəwur nəkɔnɛ bəkək yoforu.»

³⁷ Mba kɔ Pol oloku ɲa: «Nte ɲalip oɲ kəsut su fɔr ya afum kirin mɔ, ta aɲkiti su-ε, sɛna aɲε sɛyɔnε aka Rom mɔ, ɲaber su dɛbili. Ndɛkɛl oɲ yɔkyɔk yɔ ɲandefan kəsak su ba? Tatɔkɔ tɔfɔyi, ɲader ɲasərka ɲasak su!»

³⁸ Kɔ asɔdar ɲaɲkɔ ɲalukse moloku mmε aboc kiti, kɔ ɲanese nte ɲanane a Pol kɔ Silas aRom ɲɔ ɲayɔnε mɔ.

³⁹ Kɔ aboc kiti a dare ɲander ɲaletseɛne Pol kɔ Silas kəɲaɲε, kɔ ɲasak ɲa. ɲacloku a ɲawur dare dandε.

⁴⁰ Nte ɲawur dɛbili mɔ, Pol kɔ Silas ɲaɲkɔ ndena Ludy. Kɔ ɲanəɲk awɛnc aɲa alaɲ, kɔ ɲacəpəs ɲa bəkɛc. Kɔ ɲasumpər dɔpɔ, kɔ ɲaɲkɔ.

17

Pol kɔ Silas nde dare da Tesaloni

¹ Nte ɲancepər Aɲfipoli kɔ Apoloni mɔ, kɔ ɲambere dare da Tesaloni, nde aSuyif ɲanayɔ kɛlɔ ka dəkətola Kanu mɔ.

² Kɔ Pol aɲkɔ pəmɔ tɔkɔ aɲcyɔ mɔ, simiti dɔsɔk da kəɲesəm maas ɲacgbekɛlɛnε dɛyɛcicəs yecempi kɔ ɲa.

³ Pol ɛncmentər ɲa pəsɔk pɛs dɛyɛcicəs Yosoku a pənamar dis dɔlɔl Krist, a pədeyεfε afi dacɔ. Pol oncloku ɲa: «Yesu nwe indəɲkər nu tetən mɔ, nkən aɲɔnε Krist, wəbε nwe Kanu kəyεk-yek mɔ.»

⁴ Anasεp haɲ k'εɲkafɛli alɔma ɲa dacɔ kɔ ɲalaɲ ti, kɔ ɲancəme moloku ma Pol kɔ Silas darəɲ, kəbəp ka akor-koru Kanu aKresi alarəm, kɛlɛkɛnε sɔ aran abeki alɔma.

⁵ Mba kɔ aSuyif aka dare da Tesaloni alɔma ɲayɔ kəraca. Kɔ ɲalonka afum alɛc alɔma dɔpɔ dacɔ, kɔ ɲayɛkti pəyamayama dare disrε. Kɔ ɲaɲkɔ ɲamepɲε kɛlɔ ka Yason, ɲactɛn Pol kɔ Silas kɛkɛkərə ɲa kənaɲ ka afum fɔr kirin.

⁶ Nte ɲanatənəɲk Pol kɔ Silas mɔ, kɔ ɲalinəs Yason kɔ awɛnc aɲa alaɲ alɔma fɔr ya abε a dare kirin. ɲackule: «Afum akanε ɲaɲkafɛli-kafɛli doru dandε fəp mɔ, ɲayi oɲ nnɔ,

⁷ kɔ Yason nkən embəɲ ɲa!» Afum akanε fəp ɲance moloku mmε wəbε wəka tɔf ya Rom fəp oloku mɔ, ɲacloku a wəbε wəlɔma eyi, pacwe kɔ Yesu!»

⁸⁻⁹ Ti tɛnasɔɲε ɲayɛkti pəyamayama kənaɲ ka afum dacɔ. Nte abε a dare ɲane ti mɔ, kɔ ɲambaɲər Yason kɔ awɛnc aɲa alaɲ pəsam, kɔ ɲasak ɲa.

Pol kɔ Silas nde dare da Bere

¹⁰ Pibi papɔkɔ disrε kɔ awɛnc aɲa alaɲ ɲasak Pol kɔ Silas kəkɔ dare da Bere. Nte ɲambere di mɔ, kɔ ɲaɲkɔ nde dəkətola Kanu da aSuyif.

¹¹ Akakɔ ɲanabɔt mes ɲatas aka Tesaloni, kɔ ɲancəɲkɛl toloku ta Kanu belbel pəbɔtu disrε. ɲackəkce sɔ Yecicəs Yosoku belbel

dɔsɔk o dɔsɔk kɛcɛrɛ kɔ pɔyɔnɛ a moloku min mayi mɔ kɔ tɔkɔ Pol kɔ Silas njanjloku nja dɛkɛtola Kanu mɔ.

¹² Kɔ afum alarɛm nja dacɔ njanjloku alɛn, kɛkɛkɛnɛ aran aKresi anjɛ njanabek dɛkɛcɛmɛ mɔ, kɔ arkun alarɛm.

¹³ Mba ntɛ aSuyif aka Tesaloni njanadecɛrɛ a Bere sɔ Pol eyi kɛcam toloku ta Kanu mɔ, kɔ nander sɔ dɛndo kɛdeyeki pɔyamayama njanberɛs kɛnay ka afum dacɔ.

¹⁴ Kɔ awɛnc anja alɛn njanbelkɛr kɛkɛkɛrɛ Pol kɛca ka dɛkɛba, mba Silas kɔ Timote njanj dɛndo Bere.

¹⁵ Afum anjɛ njanasolɛ Pol mɔ, njanakɛkɛrɛ kɔ hanj dare da Atɛn. Dɛkɛlukus danjan kɔ Pol osom nja ndɛ Silas kɔ Timote njanj mɔ, a njanɛlɛr kɔ katɛna katɛna.

Pol ndɛ dare da Atɛn

¹⁶ Ntɛ Pol ɛnckar Silas kɔ Timote ndɛ dare da Atɛn mɔ, kɛnɛnjɛ ka dare dadɔkɔ dɛlarɛ mɛrɛnjɛka kɛnacɔ kɔ Pol dɛbɛkɛc.

¹⁷ Pol ɛncgbɛkɛlɛnɛ kɔ aSuyif kɔ alɔma akɔ njanader kɛkor-koru Kanu ndɛ dɛkɛtola d'aSuyif mɔ, pɛcgbɛkɛlɛnɛ sɔ dɔsɔk o dɔsɔk kɔ afum akɔ njanjɛ ndɛ abanjɛka nja dare mɔ.

¹⁸ Acɛpsɛ mɛtɛksɛ ma Epikuru kɔ ma Seno darɛn alɔma nander njan nja kɔ moloku. Alɔma njanlɔku: «Wɛlɔk-lɔku ɔfɔ wɛkawɛ! Cɛkɛ c'ɛfanj kɛlɔku tantɛ?» Akɔ njanlɔku: «Wɛkawɛ pɛwɛrɛnɛ pɛmɔ ntɛ endɛcam tɛta canu cɛcɛkɛra mɔ!» Njanalɔku ti bawo toloku tɔtɔt ta Yesu kɔ kɛyɛfɛ kɛn afi dacɔ kɔ Pol onclɔku.

¹⁹ Awa kɔ njalɛk Pol, kɔ njanjɛkɛrɛ kɔ tɛpɛsa mɛrɛ ancwɛ Areyopako mɔ kɛronj, kɔ njanjɛ Pol: «Mɛlɔku su kɛtɛksɛ kɛfu kanjɛ mɔyɛ kɛlɔku ta ki mɔ,

²⁰ bawo moloku mame mɔyɛ kɛlɔku mɔ, mɔyɔnɛ lɛnjɛs yosu mofu. Sɛfanj kɛcɛrɛ tɛdisɛ ta mi.»

²¹ Awa dɛmɔyɔ ma aka dare da Atɛn kɔ acɛkɛra anjɛ njanjɛ di mɔ fɛp, njanccɛpɛrɛnɛ di tɛm tanjan fɛp kɛclɔku, kɔ pɔyɔnɛ fɛ ti-ɛ, njanccɛnjɛkɛl moloku mofu.

²² Pol pɛcɛmɛ tɛpɛsa ta Areyopako kɛronj, k'olɔku: «Arkun a dare da Atɛn, inɛnjɛ a afum asumpɛr dinɛ belbel njɔ nɔyɔnɛ.

²³ Ntɛ indenakɔt dare donu mɔ, k'inɛnjɛ mɛrɛnjɛka monu, k'injɛkɛcɛ tɛtɛk tolonjɛ tonu tɔlɔma pacic ti ntɛ: «Ta kanu nkɛ antɔcɛrɛ mɔ.» Awa tɛs tɔkɔ nɛnjɛkor-koru ta nɛncɛrɛ ti mɔ, tɛtɔkɔ yati t'inder kɛlɔku nu.

²⁴ Kanu nkɛ kɛlompɛs doru kɔ daka ndɛ dɔyɔ mɔ fɛp, nkɛn nwe ɔyɔnɛ Wɛbɛ wɛka kɛm kɔ antɔf ɔfɔtam kɛyɛ kɛlɔ kɛpɔnj nkɛ alompɛsɛ waca wa fum tɛta kɛkor-koru kɛn mɔ.

²⁵ Waca wa fum wɛfɔtam kɛmar Kanu kɛyɛ, pɛmɔ ntɛ kɛnjɛfanjɛr fum tɔlɔm mɔ. Nkɛn ompocɛ afum yeyɛnɛ yanjan doru, kɛpɛnɛ kifir kɔ kɛtorɛ, kɛbɛp ka ca yɛlɛpɛs nyɛ fɛp.

²⁶ Dəfum wəkin Kanu kəwure təf ya afum alpəs a doru aŋe fəp, nte təŋsəŋe ŋandə antəf fəp kəronj mə. Kə Kanu kənanuŋkəne kəcic cələncər ca təf yayəkə fəp. Kə kəlompəs dərən kə kətən teren o teren disre.

²⁷ Kanu kənayə ti nte təŋsəŋe ŋatən kə haŋ ŋanəŋk kə kəbuma-buma disre mə, bawo Kanu kəmbəle fe nwe o nwe.

²⁸ Nte tə nəne moloku mamə: «Nkən əsəŋe su kəyi doru, nkən əŋsəŋe su kəcəpe, nkən əsəŋe su kəyi tante ayi mə.» Itə alenje anu aləma ŋaloku:

«Kəbənda ka dokom da Kanu kə səna sə səyi.»

²⁹ Kə pəyənə a kəbənda ka dokom dən kə səna sə səyi-ε, pəmar fe a pəcəm-cəmne a Kanu kəwurene kə kəma, kə gbəti, kə pəyənə fe ti-ε, tasar mpə fum əncəm-cəmne k'empate dəcərəŋ dən mə.

³⁰ Kanu kənacəpsər fe afum akə ŋanayi təm nte anatəcərə mes mə, mba kəfaŋ oŋ afum a doru fəp a ŋasəkpər bəkəc.

³¹ Kə Kanu kəmbonc dəsək nde kəndəkəbocə afum a doru fəp kiti kəlompu mə. Kanu kənayək-yək fum nwe endəkəboc kiti kaŋkə mə, kənasəŋe afum fəp kəcərə wəkayi nte kənayekti kə afi dəcə mə.»

³² Nte ŋane Pol pəcloku teta kəyefe ka defi mə, kə aləma ŋayefe kəfani kə, mba aləma ŋaloku: «Səndəsəcəŋkəl əm kəloku ka tatəkə dəsək dələma.»

³³ Kə Pol owur ŋa dəcə, k'əŋkə.

³⁴ Kə afum aləma ŋasumpər moloku mən kə təsəŋe ŋa kəyənə ka alaŋ a Yesu, pəmə Denis wəka kəgba ka Areyopako, wəran wələma pacwe kə Damaris, kə afum aləma.

18

Pol nde dare da Kərənt

¹ Nte tatəkə tencepər mə, kə Pol eyefe dare da Atən k'əŋkə Kərənt.

² K'əŋkə pəbəp di wəSuyif wələma pacwe kə Akila, nwe anakom dare da Pənt mə, pətəp kəcder atəf ŋa Itali kə wəran kən Pirsila, bawo wəbε Kələd ənaloku a aSuyif fəp ŋawur Rom. Kə Pol əŋkə pəbəp ŋa.

³ Nte tənasurene ŋapaŋne yebac yin yayi mə, kə eyi ndaraŋan, ŋacbəc, ŋaclompəs cəbal.

⁴ Simiti o simiti dəsək da kəŋesəm Pol əncgbəkələne kələ ka dəkətola da aSuyif pəcsep dəmoloku a aSuyif kə aKresi ŋawose kəcəmə moloku mən darəŋ.

⁵ Nte Silas kə Timote ŋanator Masedon mə, kə Pol əncəmə oŋ gbəcərəm kəcəm toloku tətət, pəcəŋe aSuyif kəlaŋ a Yesu əyənə nwe Kanu kəyək-yək mə.

⁶ Mba nte aSuyif ŋancgbəkəl kə ŋacləmsəne kə mə, k'əŋkəŋ-kəŋər kəfəl ka yamos yən teta kəyənək kəŋan səbomp nnə eyi

mɔ, k'oloku: «Doru donu deyi nu dɛwaca! Kɔ ina, isɔk ti disre. Nɔkɛl on, nda atɔyɔnɛ aSuyif indekɔ.»

⁷ Kɔ Pol eyefe di, k'ɔnkɔ nda Titi Yusutu wɛkor-koru Kanu wɛlɔma, nwe kɛlɔ kɔn kɛnasɛnkɛrɛnɛ kɔ dɛkɛtola Kanu da aSuyif mɔ.

⁸ Krispɔs, wɛbɛ ka kɛlɔ ka dɛkɛtola wɛlɔma ɛnalɔn teta Mariki kɔ aka kɛlɔ kɔn disre fɛp. Kɔ aKɔrɛnt alarɛm aɛnɛ nɛncɛnkɛl mɔ nɛnayɔnɛ alɔn, k'anɛgbɛt nɛ dɛromun teta Kanu.

⁹ Pibi disre kɔ Mariki oloku Pol kɛnɛnkɛ disre: «Ta mɛnesɛ! Mɛlok-loku, ta mɛcɛnkɛ de,

¹⁰ bawo ina iyi kɔ mɛna! Fum o fum ɔfɔsɛmpɛr ɛm kɛca kɛyɔ ɛm tes tɛlɛc, bawo iyɔ afum alarɛm dare dandɛ disre.»

¹¹ Kɔ Pol eyi nɛ dacɔ teren tin kɔ yof camɛt-tin pɛctɛkse nɛ tolɔku ta Kanu.

¹² Tɛm tatɔkɔ tɔ Rom dɛnadɛs Kaliyɔn kɛyɔnɛ ka wɛbɛ nde atɔf nɛ Akaya. Kɔ aSuyif alɔma nɛantɛnɛ kɛyɛfɛrɛnɛ kɔ Pol, kɔ nɛnkɛkɛrɛ kɔ dɛnkiti.

¹³ Kɔ nɛlɔku: «Fum wɛkawɛ, afum n'ɛfan a nɛkor-koru Kanu nɛcɛmɛ dɔpɔ dɔn darɛn, dɔpɔ ndɛ dɛnciyɛnɛ kɔ ndɛ sariyɛ sɛlɔku mɔ.»

¹⁴ Pol eyefe kɛkɛlɔku, mba Kaliyɔn oloku aSuyif: «Pɛcyɔnɛ a fum endif, kɔ pɛyɔnɛ fɛ ti, tes tɛlɛc tɔpɔn tɔlɔma tɔyɔ-ɛ, k'incɛnkɛl nu, nɛna aSuyif!

¹⁵ Mba nɛ pɛyɔnɛ a dɛmolɔku, dɛmewɛ, kɔ pɛyɔnɛ fɛ ti, teta sariyɛ sonu nɛna asɛrka sɔ nɛyi kɛgbɛkɛlɛnɛ mɔ, nɛna nɛ tatɔkɔ tɔmɔmɛn. Ina intola fɛ kɛyɔnɛ wɛbɔc kiti kɛnkɔ.»

¹⁶ Kɔ Kaliyɔn ɛmbɛlɛs nɛ dɛndo dɛnkiti.

¹⁷ Kɔ aSuyif nɛnkɔ nɛsɛmpɛr Sɔstɛn wɛbɛ wɛka dɛkɛtola Kanu waca, kɔ nɛyɛfɛ kɛsut kɔ dɛndo dɛnkiti, mba Kaliyɔn ɛnawɛ fɛ ti ali daka.

Pol olukus Antiyɔk

¹⁸ Kɔ Pol owon dare da Kɔrɛnt mataka mɛlɔma, k'ɛnder pɛlɛmbɛrnɛ awɛnc aɛnɛ alɔn, k'ɛlɛk abil kɛkɔ atɔf nɛ Siri, nkɔn, Pirsila kɔ Akila. K'ofonnɛ domp nde dare da Sɛnkɛrɛ kɛmɛntɛr ka kɛlip ka tes nɛ ɛnɛdɛrmɛ teta Kanu mɔ.

¹⁹ Nɛ nɛmbɛrɛ dare da Efesi mɔ, kɔ Pol ɛsak Pirsila kɔ Akila. Kɔ Pol ɔnkɔ kɛlɔ ka dɛkɛtola Kanu da aSuyif kɔ nɛnkɛkɛlɛnɛ kɔ nɛ.

²⁰ Kɔ akakɔ nɛantola kɔ kɛyi ka dɛndo dare dɛnɛn kɛrɛsna, mba ɛnawɛ fɛ.

²¹ K'ɛlɛmbɛrnɛ nɛ pɛclɔku: «Indɛlukus nɛndɔronu kɔ Kanu kɛwɛsɛ-ɛ.» K'ɛlɛk abil dare da Efesi,

²² k'ontɔr dare da Sɛsari ndɛ ɛnacɔp mɛrɛnt mɔn mɔ. K'ɛmpɛ kɛrɛsna Yɛrusalɛm kɛkɔyif alɔn. Nɛ elip mɔ, k'ontɔr dare da Antiyɔk nɛ Siri.

²³ Nte tem taloma tenceper ma, ko Pol onko k'enceper atof na Kalat ko Firiki paccapas accepse a Yesu bakac fap.

Apolos nde sadare sa Efesi ko Korint

²⁴ WəSuyif wəloma ancwe Apolos, enader Efesi. Dare da Aleksandar* do anakom ko, fum wacare kalok-loku enayi, pacare so Yecicas Yosoku belbel.

²⁵ Dopa da Mariki do anatakse ko, ko kasumpar ka mes belbel, kance k'oncloke, patakse teta Yesu, mba mene kagbat daromun ka San gbacaram ko enacare.

²⁶ K'eyefe kalok-loke kalan disre nde dakatola Kanu da aSuyif. Nte Pirsila ko Akila nane ko kalok-loku ma, ko njalek ko ndaranan, ko jambere ne ko katakse kacare kanko kanabut ko teta dopa da Kanu ma.

²⁷ Nte Apolos enacem-cemne kaceper ka Akaya ma, ko awenc anja alan nangbinar ko. Ko nancice accepse a Yesu daran ane naye Akaya ma areka, nacloku na kaban ko belbel. Nte embere ma, k'entese afum aka di, ako kamar ka Kanu kanasone kayone alan ma.

²⁸ Bawo fanotar fo Apolos encgbekale aSuyif for ya afum alaram kirin pasone na kacare daYecicas Yosoku a Yesu oyone wabe nwe Kanu kanayek-yek ma.

19

Pol nde dare da Efesi

¹ Tem nte Apolos enayi Korint ma, Pol nwe enaceper sadare sa maro ma, ontore dare da Efesi. K'embap di accepse a Mariki Yesu daran aloma.

² K'eyif na: «Nanasoto Amera Necempi na Kanu kayefe nte nanayone alan Yesu ma ba?»

Ko njalukse Pol: «Santane fe yati teta Amera Necempi.»

³ Ko Pol eyif na so: «Ko kagbat daromun kare ko nasoto-e?»

Ko njalukse Pol: «Kagbat ka San.»

⁴ Ko Pol oloku: «Kagbat daromun ka San, kasakpar mera yati kanayi teta Kanu. Mba San oncloku afum a njalan wako endeder nkan tadaran ma, ito tatako Yesu.»

⁵ Nte nane moloku mamako ma ko nasoto kagbat daromun tewe ta Mariki Yesu.

⁶ Ko Pol endenar na waca, ko Amera Necempi nender na, ko nayefe kacap cusu nce nantacare ma, nacdanj so moloku matat mme Kanu kanasom na kadanj ma.

⁷ Arkun akako njancbap waco ko meran.

* **18:24** Aleksandar = dare dopan nde Misira nde afum alaram a doru fap nanjo katakas mes.

⁸ Kɔ Pol embere daketola Kanu da aSuyif, pɛclok-loke di kabɛkne disre han yof maas, pɛcgbekɛlene, pɛcserp kɛsɔɲe afum kɛcɛre mes ma dɛbe da Kanu.

⁹ Mba nte ayenki sɛbomp alɔma ɲancfati kɛlanj mɔ, ɲacfani dɔpɔ da Mariki nnɔ kɛnay kɛyi mɔ. Kɔ Pol ɔmbɔle ɲa, k'elɛkɛne acɛpse a Yesu darɛɲ alɔma, kɔ ɲawɛnne kɛsɛk, kɔ ɲanlok-lokɛɛne dɔsɔk o dɔsɔk nde dakɛtakse da Tirano.

¹⁰ Tatɔkɔ tenawon meren merɛɲ, kɔ tɔsɔɲe aSuyif kɔ aKresi aɲe ɲanayi atɔf ɲa Asi mɔ kɛne toloku ta Mariki.

Awut a Sefa

¹¹ Kanu kɛncɔɲe waca wa Pol kɛyɔ mes mɛwɛy-wɛy mme menacuca kɛɲɲk mɔ.

¹² Tenasɔɲe pachɛcɛse acuy cɛloto, kɔ pɛyɔne fe ti-ɛ kɛpol nke kɛɲgbuɲɛne Pol mɔ, kɔ ayɔ ti-ɛ, docu doncwur wɛkayi, kɔ yɔɲk yeɛc yocwur sɔ wɛkayi dɛris.

¹³ Kɔ aSuyif alɔma ɲanɲkɔs-kɔs mofɔ melarɛm, kɔ ɲatubucne Pol kɛbelɛs ka yɔɲk yeɛc nnɔ acuy ɲayi mɔ, ɲacloku: «Ilɔk'ɛm: Mɛwur wɛcuy wɛkawɛ tewe ta Yesu wɛkɔ Pol encam mɔ.»

¹⁴ Wɛloɲɲe wɛpɔɲ wɛka aSuyif wɛlɔma ɛnayi pacwe kɔ Sefa. Awut ɔn atɛmp camɛt-merɛɲ ɲa ɲancyɔ mɔyɔ mamɔkɔ.

¹⁵ Mba kɔ ɲawak kɛbelɛs ɲɔɲk ɲɛɛc-ɛ, ɲi ɲoloku ɲa: «Yesu, incɛre kɔ. K'ɲɲɛpɛl sɔ belbel fum nwe Pol ɔyɔne mɔ, mba nɛna, an'ɔ nɔyɔne-ɛ?»

¹⁶ Kɔ fum wɛkɔ ɲɔɲk ɲɛɛc ɲɛnayi mɔ ɲɲgbɔpɛrne ɲa kɛyɛfɛɛne, k'ɛntam ɲa fɛp k'ombɔpɛr-bɔpɛr atɛmp aɲe, kɔ ɲayɛkse fɛp faɲan dis fos kɔ ɲasak kɛlɔ.

¹⁷ ASuyif kɔ aKresi aka dare da Efesi ɲancɛre toloku tatɔkɔ, kɔ kɛnese kɛyi ɲa fɛp, kɔ ɲaleɛs ɔɲ tewe ta Mariki Yesu.

¹⁸ Afum alarɛm aɲe ɲanawose kɛlanj Yesu mɔ, ɲancder ɲaccɛɲ fɔr ya afum fɛp kirin pɛɛc mpɛ ɲancyɔ mɔ.

¹⁹ Kɔ afum akɔ ɲanayɔne dure mɔ, ɲanckɛre sɛbuk sɛɲan sa dure kɔ ɲancɔf si fɔr ya afum fɛp kirin. Kɛway ka sɛbuk sasɔkɔ kɛnabɔp mɛncɛmbɛl ma gbeti wul wɛcɔ kɛcamɛt (50.000).

²⁰ Ti disre kɛtam ka Mariki disre kɔ toloku ta Kanu tɛsamsɛr kɔ tɔsɔtɔ fɛnɔntɛr.

Pɛyamayama dare da Efesi

²¹ Nte tencepɛr mɔ kɔ Pol olompɛsne kɛkɔ dare da Yerusalem pɛccɛpɛɛne tɔf ya Masedon kɔ Akaya. K'oloku: «K'ɲɲkɔbɛre Yerusalem-ɛ, mɛne idekɔsɔmɔmɛn Rom.»

²² Kɔ Pol osom Masedon amar ɔn merɛɲ Timote kɔ Erasto, mba kɔ nkɛn Pol eyi mataka mɔlɔma atɔf ɲa Asi.

²³ Tɛm tatɔkɔ tɔ pɛyamayama pɔpɔɲ pɛnayi Efesi teta dɔpɔ da kɛlanj ka Mariki Yesu.

²⁴ Wəgbec wələma enayi di, pacwe kə Demeteri, pəctubucne kəlompəs ka wələ wa terəjka mpe ancwe Artemi mə. Agbec a wələ wa gbeti wawəkə njancsətəne wi daka delarəm.

²⁵ Kə Demeteri olonka agbec kə akə njancdine yebac yayəkə mə, k'oloku ja: «Arkun! Nəncəre ti belbel a yebac yaye y'andine.

²⁶ Mba nənəjk kə nəne a nnə Efesi kəbər ka atəf ja Asi Pol pampre esep kəsəne afum alarəm kəlan han pəkafəli ja mera kəloku a merəjka mme waca wa fum wolompəs mə, bafə canu cə.

²⁷ Moloku maməkə mentam kəsəne yebac yosu kələce. Təsəne sə teta kələ ka terəjka Artemi təyə sə aboc. Afəde sə pacloku a Artemi terəjka a kanu kə, kanu kəran nke afum fəp njənkorkoru nnə atəf ja Asi, kə doru kərkər mə.»

²⁸ Nte afum njane moloku maməkə mə, kə metele mencepərər ja, kə njayefe kəkule-kule: «Artemi kanu ka Efesi kəyənə kəpəj!»

²⁹ Kə pəyamayama papəkə posumpər dare fəp, kətəjne disre kə afum njambəpsene abanjka njəjan njəpəj. Kə njalinəs asol a Pol Kayus kə Aristarko, anje njanayefe Masedon mə, kə njəjkekəre.

³⁰ Pol enafəj kəkəmentərne afum fər kirin, mba acəpse a Yesu darəj njanawosene fe kə ti.

³¹ Abə aləma a atəf ja Asi, anje njanayənə anapa a Pol mə, njanasom afum nnə eyi mə njacletsene kə a ta pəkə dəndo abanjka njəjan njəpəj de!

³² Kə pəyamayama poncop afum dacə, anje njackul-kulene nte, akə njackul-kulene təkə. Afum alarəm ja dacə njanacəre fe nte o nte anabəpsenene mə.

³³ Kənay kanəkə dacə kə afum aləma njələmər Aleksandər, nwe aSuyif aləma njanacəjəs kəkəlok-loku fər ja afum kirin mə. Kə Aleksandər efek kəca, pəfan kəlok-loku pəyacne.

³⁴ Mba nte njanadenepəl a Aleksandər wəSuyif əyənə mə, kə fəp fəyefe kəkule-kule han dec merəj: «Artemi kanu ka Efesi kəyənə kəpəj!»

³⁵ Kə wəbe wələma wəka di entam kətore-tore afum bəkəkə pacloku: «Arkun a Efesi, an'ətəcəre a dare da Efesi dətəmpər kəbum ka kələ kəpəj ka kanu kosu Artemi kə terəjka tən mpe pontor kəyefe darenc mə-ε?

³⁶ Fum əfətam kəgbekəl tatəkə, pəmar nənde nəcajka ta nəbelkər kəyə nte o nte.

³⁷ Nte təsək mə, afum anje nəjkerə mə njələsər fe kələ kosu kəpəj, njələməs fe sə kanu kosu Artemi.

³⁸ Kə Demeteri kə awenc anja apəjne ən yebac njayə kəbokene teta fum-ε, dəkəboc kiti deyī kə aboc kiti njayi, dəndo pəmar njakə njabokene!

³⁹ Kə nəyə sə tobokene tələma-ε, andekəlompəs ti pəmə təkə sariye səloku ti mə nde aboc kiti njənləjkane mə.

40 Nəkembərne, bawo antam kəbonce su kəsəne pəyamayama pampə kəyi, teta mes mamə mencepər də məkə mə, bawo ali toloku səfətəm kəsətə kəloku nte təsəne afum kəbəpsene tantə mə.» Nte wəbe elip kəloku tatəkə mə, k'oloku nwe o nwe kəlukuş ndə ndərən.

20

Pol nde təfya Macedon kə Kresi

1 Nte pəyamayama pəsak mə, kə Pol ewe acəpse a Yesu darəñ, k'encəpəs ɲa bəkəc. Nte elip kələmbərne ɲa mə, k'əñkə Masedon.

2 Nte encepər atəf ɲaɲəkə mə, k'encəpəs alaɲ bəkəc dəmoloku melarəm, k'ender atəf ɲa Kresi.

3 K'eyi di yof maas. Tem nte enadefan kəyektı abela kəkə ka atəf ɲa Siri mə, k'asəne kə kəcərə a aSuyif ɲantəne kəyə kən pələc, k'encəm-cəmnə kəlukuşərne sə dəpə da atəf ɲa Masedon.

4 Afum aɲe ɲanacəmbər kə mə, ɲanayəne: Sopateri wan ka Purus wəka Bere, Aristarko kə Sekundu aka Təsaloni, Kayus wəka Dərbə, Timote, Tikiko, kə Tirofimo aka atəf ɲa Asi.

5 Afum akakə ɲanayi su kirin kəkə, kə ɲaɲkə ɲakar su Torowas.

6 Kə səna nte mataka ma kəsata ka cəcom cətəyə lebin mencepər mə, kə səlek abil dare da Filipi. Mata kəcəmət disre kə səmbəp ɲa dare da Torowas, nde sənacəpərəne mata camət-mətəñ mə.

Kəcəpər kələpəs ka Paul dare da Torowas

7 Tataka təcəkə-cəkə ta tataka toluksər, kə səlonkanə kətəpi ka kəcom. Pol nwe pənamar kəkə dəckəsək mə eyi kəlök-lokər ɲa, k'əmbəlse moloku haɲ cək-cək.

8 Səlamp səlarəm sənayı dəndo dukulə da darenc dadəkə sənalonkanə mə.

9 Wətemp wələma pacwe kə Eyutik enandə binəli ba wunder kəron tem tatəkə Pol onclök-loku mə. Kə mere meɲgbəpərne kə, k'entempene kəyefe dukulə dakəron da maas. Aɲkələk kə, tetəne efi.

10 Kə Pol ontor, k'əñkə pəsipne kə, k'elek kə dəwaca, k'oloku: «Ta pəyi nu yamayama. Eyi wəyeñ!»

11 Nte Pol empə sə mə, k'entəpi kəcom kəsəm, k'oncop sə moloku mən haɲ dəsəka. Nte elip mə, k'əñkə.

12 K'aɲkere wətemp wəkəkə pəyi wəyeñ, kə təyəne təcəpse bəkəc təpəñ.

Marənt kəyefe Torowas haɲ Mileto

13 Səna, sənanunkenə kələk abil kəkə dare da Asəs nde Pol enaloku a səndekələk kə mə, bawo kəroru k'enafan kəkə.

14 Nte enabəp su Asəs mə, kə səlek kə kəkə ka Mitilen.

15 Nte sayefe kacali dakaba dando ma, ko sambere dockosok Kiyo. Dockosok dameraj ko sanybuɛne Samos, tataka ta maas ko sambap Mileto.

16 Pol enafaj kacepar dare da Efesi takoron ta encambaras di-e, nte tansaje ta owon so Asi ma. Yerusalem encelkar kabap, ko tentam kayi-e, a dosok da kasata ka tataka ta waco kacamot decbap.

17 Tem nte enayi Mileto ma, k'osom dare da Efesi kakawene ko abeki a kalonkanɛ ka alaj aka di.

18 Nte njander kawe kon ma, ko Pol oloku ja nte: «Nancare fap fonu tako isumpar nu ma, kalex dosok docoko-coko nde incambap kacak atof ja Asi ma.

19 Imbace Mariki katore banca disre, icbok, ictaro, bawo aSuyif njancfaj kay'em palec.

20 Tes o tes tentam katese nu iloku nu ti for ya afum kirin kaka han dawalo wonu disre, ali tin imenkar fe nu.

21 K'ingbinar so aSuyif ko aKresi kasakpar bakac jakafale nno Kanu kayi ma, njagbekar kalaj Mariki mosu Yesu.

22 Ndekal on Amera ja Kanu nesekat im, Yerusalem injo. Incare fe nte tajokbap im di ma,

23 mene Amera Necempi ja Kanu nonlok'im dare o dare nte: A kataro k'inder, paber im dabili.

24 Teta ina, mes ma ina daraj meyi, tafaj ta ina toyone kakotene kasom nke asom im ma, mes mme Mariki Yesu olok'im kayo ma fap m'ifaj kayo, nte toyone kamentar sede sa Kibaru Katat ko kamar ka Kanu ma.

25 Ndekal on intas, incare a nafosonajk im, nana fap anje inacepar kacam debe da Kanu ma.

26 Ilip kaloku nu moloku fap mme Kanu kanasom im kaloku nu teta kayac konu ma. Ko nantoyo on tako inatakase nu ma, te mi teyi fe so ti,

27 bawo iloku nu mefaj ma Kanu fap, ali tin imenkar fe nu.

28 Nakembarne nanasarka kabap ka alaj anje jayi pamo yocal nye Amera Necempi ja Kanu nasaj nu kakak ma. Nakembarne kalonkanɛ ka alaj a Kanu, mecir mon yati masotone ja.

29 Incare a k'indekot-e, afum alec njandetaras kalonkanɛ konu pamo calma cawey-wey nce cantosak yocal ma.

30 K'incare a alma nana daco yati njandeyefe kaloku yem, nte tansaje acepse alaj jacame ja daraj ma.

31 Nade nakembarne, ta napaler a meren mme maas pibi ko dan isak fe kaloku nu damencar a nakembarne!

32 Ndekal on isaj nu Kanu ko toloku ta kajanne kon. Toloku tatoko tentam kacapas nu bakac ko kasaj nu ke, nana anje njayone afum on ma.

33 Inafaj fe pasam, inafaj fe kema, inafaj fe yamos ya fum.

³⁴ Nəna yati nəncərə a waca wem wawε w'imbəcə kəten ka yeri yem kə ya afum aņe iņsole mə.

³⁵ Imentar nu a kə mənjbac tatəkə-ε, mənε nəmar atəyo fənəntar. Məcəm-cəmnε moloku ma Mariki Yesu, nkən nwe enaloku: «Kəpocε kəncəpər kəsətə.» »

³⁶ Nte Pol elip kəloku moloku maməkə mə, k'encəp suwu kətola Kanu kə ņa fəp faņan.

³⁷ Afum fəp kəbok disre ņanepsərne Pol dəkilim ņaccup kə,

³⁸ nənəfər denananķane kəyi ņa nte Pol enaloku a ņafəsənəņk kə mə. Nte telip mə, kə ņancəmbər kə nde dəkətənta.

21

Pol əņkə Yerusalem

¹ Nte səmbəņərne ņa mə, kə səyekti abela kəkə ka Kəs. Dəckəsək kə səncəpər sə haņ Rodu, kə səyefe dəndo kə səņkə dare da Patara.

² Nte səmbəp di abil ņņe ņenccali kəba kəkə ka ntende atəf ņa Fenisi mə, kə səmbəke ņi, kə səncali.

³ Sənadetəfərne Sipər, kə səsak si kəca kəmeriya, kə səņkə kəca ka atəf ņa Siri, kə səņkə səpe dare da Tir nde pənamar abil ņotore ca yəkə ņenayə disre mə.

⁴ Nte sənabəp di acəpse a Yesu mə, kə səyi di mata camət-mərəņ. Kəcəņəs ka Amera ņa Kanu disre kə ņəņgbiņər Pol a ta pəpe Yerusalem.

⁵ Nte kiyi kosu dəndo kənalip mə, kə səņkə. Kə alaņ fəp ņancəmbər su, kəyefe aran kəbəp awut haņ kə səwur dare disre, kə səņkə səcəp suwu dəndo dəgbəp kətola Kanu.

⁶ Nte sənələmbərne ņa mə, kə səmbəke debil, kə ņa ņalukus ndaraņan.

⁷ Kə səna, kələpəs kosu kəkət kə səmbəke dare da Tir kəkə ka dare da Pətolemay. Nde sənakə səyif awenc asu aņa alaņ mə, kə səncəpərne di dəsək din.

⁸ Dəckəsək də sənayefe di kəkə dare da Sesari. Dəndo sənabere kələ ka Filip, wəcam ka toloku tətət, nwe enayəne wəkin ka afum camət-mərəņ aņe anayek-yek Yerusalem mə. Kə səncəpərne dəndo mata camət-mərəņ.

⁹ Filip enayə awut aran maņkəle aņe ņanatəcərə arkun mə, aņe ņancdəņk moloku mme Kanu kəncmar ņa kəcəm mə.

¹⁰ Nte sənayı di mataka mələrəm mə, kə sayibe sələma səntor dare da Sesari kəyefe ka atəf ņa Yude, pacwe kə Akabus.

¹¹ Nte encder nno səyi mə, k'elek belet ba Pol, k'əņkotne wəcək kə waca. K'oloku: «Nəcəņkəl nte Amera ņecempi ņa Kanu ņoloku mə: Fum nwe əyo belet bambə mə, tante tə abe aSuyif ələma ņandekot kə Yerusalem, ņaber kə atəyəne aSuyif dəwaca.»

12 Nte sàne toloku tatòkò kò afum akò ñanayi su kəsək mò, kò sàletsene Pol ta pèpe Yerusalem.

13 Mba kò Pol oluksè su: «Ta ake tò nàmbòkè, nəsəñ'em abəkək kələcè-è? Iwosè kəkot kem, iwosè sò kəfi kem Yerusalem teta tewè ta Mariki Yesu.»

14 Nte anasèp kò antòtam Pol dàmoloku mò, kò sənçe kò. Kò sàntola: «Kanu kəsəñe tefañ ta Mariki teyi!»

15 Nte sənçepərəne mataka mamòkò dare da Sesari mò kò səlompəsne, kò sàlek dòpò kəpe ka Yerusalem.

16 Kò səsol kò acèpse a Yesu alòma añe sənader kəyefe ka dare da Sesari mò. Kò ñaṅkekəre su nda fum wəlòma nwe pənamar səyi ndərən mò, pacwe kò Manasəñ. WəSipər enayi, enayəne wəcəpse wəka Yesu darəñ kəyefe nte pənawon mò.

Pol ndena Sak

17 Kəberè kosu Yerusalem, kò awenc asu aña alaṅ ṅaselene su pəbotu disre.

18 Dòckəsək kò səsol kò Pol, kò səṅkò ndena Sak. Kò abeki a kəlòṅkane ka alaṅ a Yerusalem fəp ṅambəpsene dəndo.

19 Kò Pol efayne ṅa, k'eyefe kəlòmər ṅa tin tin tin mes fəp mme Kanu kənamar kò kəyò aSuyif dacò mò.

20 Nte ṅalip kəcəṅkəl Pol mò, kò ṅayek-yekəs Kanu. Kò ṅaloku Pol: «Məməmən wenc kosu, afum asu wul wəlarəm ṅayəne alaṅ a Yesu kò ṅasumpərəne sò Sariye waca mərəñ.

21 Awa aSuyif alòma ṅacəm-cəmmè kəne a kətəksè kam disre a məloku aSuyif añe ṅayi afum acuru dacò mò a ṅasak sariye sa Musa: Ta ṅakənc awut, ta ṅacəme məyò mokur ma aSuyif darəñ.

22 Cəke c'andeyò-è? Bawo ṅaṅkəne a mənder nnò.

23 Awa məyò təkò səndelok'əm mò. Səyò nnò arkun mankələ aṅe ṅanasəñ Kanu temer mò.

24 Mələk ṅa, nəkò kəlò kəpəñ ka Kanu, məsəkəsne kò ṅa. Kò məwosè-è, məlek kəwure pəsam pa kəway kəṅan ka kəlòṅne, nte təṅsəñe ṅafonne səbomp mò. Ti disre fəp fəndetam kəcəre a mes məkò asəñe ṅa kəcəre tetam mò fəp məyəne fè kance, a məna sò yati mələləs teta sariye sa Musa.

25 Nte təyəne ta atəyəne aSuyif aṅe ṅayəne alaṅ mò, sənəṅk a pəntese kəcice ṅa reka kəboce ṅa tənc: A ta ṅasəm səm nyè alòṅnəne mərəñka mò, ta ṅamun mecir, ta ṅasəm səm nyè antəfay mera mò, ta ṅasumpər dalakò.»

26 Dòckəsək kò Pol èlek afum aṅe, kò ṅancop kəsəkəsne, k'embere kəlò kəpəñ ka Kanu disre, k'əṅkò pəbonc dəsək nde kəsəkəsne kəṅan kəndelip mò, kò dəsək nde andelòṅnəne nwe o nwe mò.

Kəsumpər ka Pol nde kəlò kəpəñ ka Kanu disre

²⁷ Dækələpəsər da mataka maməkə camət-merəŋ, nte aSuyif aloma aŋe ŋayefe atəf ŋa Asi ŋanəŋk Pol kələ kəpəŋ ka Kanu disre mə, kə ŋampene bəkək ya afum fəp, kə ŋasumpər kə.

²⁸ Ŋackule-kule: «Arkun a Yisrayel, nəder nəmar su! Wəkawe entəkse afum fəp kəfo o kəfo təkə təntətesə afum asu, sariye sosu, kə nnə kəfo kaŋke mə! Ali aKresi embersene ŋa nnə kələ kəpəŋ ka Kanu, k'eyik-yikəs kəfo kəsoku kaŋke!»

²⁹ Ŋanabokene nte bawo təkəkə-cəkə ŋananəŋk Pol kə Tirofimo wəka Efesi ŋasol dare disre, kə ŋancem-cemne a Pol enabersene kə kələ kəpəŋ ka Kanu disre.

³⁰ Kə dare məlməl deyi yamayama, kə afum ŋayefe waca fəp kə ŋasumpər Pol, kə ŋalinəs kə kəwurene aban̄ka ŋa kələ kəpəŋ ka Kanu disre, k'ancan̄əs cumba katina.

³¹ Nte ŋanayi kəsəp kədif kə mə, k'an̄kə paloku wəbe wəsodar wəRom a pəyamayama peyi Yerusalem fəp.

³² Gbəncana babəkə kə wəbe wəsodar wəpəŋ nwe elek asodar kə abe aŋan aloma kə ŋayekse kəkə di. Nte aSuyif ŋanəŋk asodar aŋe kə abe aŋan mə, kə ŋasak kəsut Pol.

³³ Kə wəbe wəpəŋ wəsodar nwe əncəŋne, k'osumpər Pol, k'osom a pakote kə gbekce merəŋ. K'eyif fum nwe əyənə mə, kə təkə əyə mə.

³⁴ Kənay kaŋkə daco, aloma ŋackule nte, akə ŋackule təkə. Nte enader pəyi oŋ ta eŋne tələm o tələm teta pəyamayama papəkə mə, kə wəbe oloku a pakekəre Pol dəkədire da asodar.

³⁵ Nte Pol embəp dəkusəŋka mə, kə asodar ŋasipne kə, bawo ŋananesene kə pəlec pəkə afum ŋanafan̄ kəyə kə mə.

³⁶ Kənay ka afum kənacəme Pol darəŋ, ŋackule: «Pamələk kə!»

Pol kəyacne kən dəmoloku

³⁷ Tem nte anadekəfan̄ kə kəbərsene dəkədire da asodar mə, kə Pol eyif wəbe wəsodar cəkresi: «Aŋwos'em kələk'am tes təloma ba?» Kə wəbe eyif kə: «Məncəre kəcəp cəkresi ba?»

³⁸ Bafə wəMisira məyənə, wəkə enter kəcsəŋe pəyamayama kəyi mə, məkerə adifət afum wul maŋkələ (4000) nde dətəgbərə ba?»

³⁹ Kə Pol oloku: «Awoŋ! Ina, wəSuyif iyənə, dare da Tarəs atəf ŋa Silisi aŋkom im, fum wəka dare dəpəŋ de! Intol'am, məwose ilok-lokər afum.»

⁴⁰ Kə wəbe wəsodar owose kə ti. Kə Pol empe k'encəme dəkusəŋka, k'efek afum kəca. Kə afum fəp ŋancan̄k, k'əncəpər ŋa cəEbre, kusu ka aSuyif aka di.

22

¹ «Awenc im aŋa, Abek'em aŋa!» Pol oncloku, «Nəcən̄kəl oŋ moloku mme iyə meyacne mə.»

² Nte ɲane pɛccɔpɛr ɲa kusu kɛɲan cɛEbre mɔ, kɔ pɛnanɲkane kɛyɔ yɛɲ.

K'oloku:

³ «WɛSuyif iyɔnɛ, pakom im dare da Tarɛs, atɔf ɲa Silisi. Mba nnɔ dare dandɛ d'andusum im nnɔna Kamaliyel nwe afum fɛp ɲancɛrɛ mɔ. Nwe entɛks'em belbel sariyɛ sa atem asu mɔ, k'inasumpɛr sɔ teta Kanu belbel kɔ abɛkɛc fɛp, pɛmɔ tantɛ pɛyi nɛna sɔ mɔkɔ mɔ.

⁴ K'inatɔrɛs afum alɔma aɲɛ ɲanacɛmɛ dɔpɔ da Yesu dandɛ darɛɲ mɔ han kɔ ɲafi. K'inɲkot aran kɔ arkun, k'imber ɲa dɛbili.

⁵ Wɛlɔɲnɛ wɛpɔɲ kɔ abeki a dɔtɔf fɛp ɲayɔnɛ atɔɲnɛ aka ti. Inasɔtɛr ɲa reka kɛkenɛ afum em aka Damas, nde inckɔ kɛkɔsumpɛr alan akɔ ɲanayi di mɔ, ikɛrɛ ɲa fɔr ya abɛ kirinɲ nde Yerusalem pakɔsut.

Pol ɔlɔm tɛcɛmɛ tɔn dɔpɔ dɔtɔt

⁶ Dɔpɔ inayi iclɔtɔrnɛ Damas, danɲ pɛɲ, gbɛncana babɔkɔ, kɔ pɛmot pɔpɔɲ pɛyɛfɛ darenc kɔ pɛɲkɛl im pɛwanɲkɛra.

⁷ K'intɛmpɛnɛ dɛntɔf, k'ine dim ndɛ donclɔk'im: «Sol, Sol, ta ake tɔ mɛntɔrs'em-ɛ?»

⁸ K'iyif: «Mariki, mɛna an'ɔfɔ-ɛ?»

K'olok'im: «Ina, Yesu wɛka Nasaret iyɔnɛ, nwe mɛna mɛyi kɛtɔrɛs mɔ.»

⁹ Afum aɲɛ sɛnasol mɔ ɲananɲɲk pɛwanɲkɛra papɔkɔ belbel, mba ɲanane fɛ dim da nwe onclɔk-lokɛr im mɔ.

¹⁰ K'iyif kɔ: «Cɛke cɔ pɛmar iyɔ-ɛ, Mariki?»

Kɔ Mariki olɔk'im: «Mɛyɛfɛ, mɛkɔ dare da Damas, dɛndo aɲkɔlɔk'ɛm tɔkɔ pɛmar ɛm kɛyɔ mɔ fɛp.

¹¹ Mba nte pɛwanɲkɛra pa pɛmot papɔkɔ pɛnasɔɲ'em kɛtɔnɲɲk mɔ, afum akɔ sɛnasol mɔ ɲasumpɛr im kɛca kɔ ɲanɲkɛkɛr'em han kɔ imberɛ Damas.

¹² Mba fum wɛlɔma ɛnayi di pacwe kɔ Ananiyas, pɛcɛmɛ tɛfanɲ ta Kanu darɛɲ pɛmɔ tɔkɔ sariyɛ sɛlɔku ti mɔ. Nwe aSuyif aɲɛ ɲanandɛ di ɲanacɛrɛ dɔtɔt amera mɔ.

¹³ Kɔ Ananiyas ender nnɔ iyi mɔ, k'encɛm'em kɛsɛk, k'olok'im: «Sol, wɛnc im, mɛluksɛrnɛ sɔ kɛnɲɲk.» Gbɛncana babɔkɔ k'inɲɲk nkɔn Ananiyas.

¹⁴ Kɔ Ananiyas olɔk'im: «Kanu ka atem asu kɛsɔɲ ɛm kɛcɛrɛ ka tɛfanɲ tɔn, mɛnɲɲk Wɛlɔmpu, mɛnɛ sɔ dim dɔn,

¹⁵ bawo mɛndɛkɔyɔnɛ kɔ sede fɔr ya afum fɛp kirinɲ ta nte mɛnɲɲk kɔ nte mɛnɛ sɔ mɔ.

¹⁶ Ndɛkɛl ɔɲ ta ake tɔ mɛyi kɛwɔnɛ-ɛ? Mɛyɛfɛ mɛyɔ pagbɔt ɛm dɛromum teta Kanu, payak kiciya kam kɛwe ka Mariki disrɛ.»

Kɛsom ka Pol decikɛra

¹⁷ Nte ilukus Yerusalem mɔ, ictola ndɛ kɛlɔ kɛpɔɲ ka Kanu, kɔ kɛnɲɲk kɛnder im kɛyɛfɛ darenc.

18 Ti disre, k'inəŋk Mariki Yesu, nwe enalok'im: «Məkufe mawur Yerusalem, bawo ɲafədewose kəne sede səko məsumpər tetem mə.»

19 K'iloku kə: «Mariki, ɲancəre a inckə dəkətola Kanu da aSuyif, icsut, icber afum dəbili aɲe ɲanalan tetam mə.»

20 Nte analon mecir ma sede sam Etiyen mə, ina wəkawe yati inayi di, kə mes maɲan məmbət im. In'enaməɲkə akakə ɲanadif kə mə yati yamos.»

21 Mba kə Mariki olok'im: «Məkə! Pəbəle pə ina indesom əm, nde atəyənə aSuyif ɲayi mə.»»

Pol kə wəbe wəsədar wəRom

22 Afum ɲanacəɲkəl kə haɲ tɛm nte enaloku toloku tatəkə mə, mba ndəkəl oɲ kə ɲampene sim ɲacloku: «Pamələk kə! Ta pasak fum pəmə wəkawe pəyi doru.»

23 Kə ɲaɲkule-kule, kə ɲaɲgbal suma səɲan kə ɲaləm kəbof darenc.

24 Kə wəbe wəsədar wəRom osom asədar ən a pabersene kə dəkədire daɲan. K'oloku a pasut Pol nte təɲsəɲe pəloku-loku, pacəre te təkə əyɔ nte təsəɲe afum kəkule-kule tetən mə.

25 Nte anakot Pol kəkəsut kə mə, kə Pol eyif wəbe wəsədar wəkə enayi di mə: «Awos'am kəsut wəkom wəRom nwe antəkiti mə ba?»

26 Nte wəbe wəsədar nwe ene toloku tatəkə mə, k'əɲkə pəyif wəbe wəsədar wəpəɲ, pəcloku: «Cəke məndeyə-ε? Wəkom wəRom əfɔ.»

27 Kə wəbe wəpəɲ wəsədar wəRom ender k'eyif kə: «Məlok'im kance, wəkom wəRom məyənə ba?»

Kə Pol owose: «Ey.»

28 Kə wəbe wəpəɲ wəsədar wəRom nwe oloku sɔ: «Ina, pəsam pɛlarəm p'isətənə kəyənə ka wəRom!»

Kə Pol oloku: «Ina, aɲkom em ti kəkome dəm.»

29 Gbəncana babəkə, akə pənamar ɲasəɲe Pol kəlɔk-loku mə ɲambəle, kə wəbe wəsədar enese, k'encəre a wəkom wəRom yati nkən wəbe wəsədar əsəɲe k'aɲkot.

Pol nde fər ya aboc kiti kirin

30 Dəkəsək wəbe wəka asədar nwe pəfan kəcəre tes təkə aSuyif akakə ɲambonce Pol mə, k'oloku a pasikəli kə, k'oloku sɔ alonɲe apəɲ kə aboc kiti aSuyif fəp kəlɔɲkanə. Kə wəbe eɲkɛre Pol k'encəmbər kə fər yaɲan kirin.

23

Pol kəyacne kən nde fər ya aboc kiti kirin

1 Pol pəgbətne aboc kiti aSuyif aɲe, k'oloku: «Kə ina, awenc im aɲa, amera ɲosoku pes ɲ'ɲkətene fər ya Kanu kirin haɲ məkə.»

² Ananias wəlonne wəpəŋ oloku akə ŋanayi Pol kəsək mə a ŋafer kə kəca dəkanca.

³ Kə Pol oloku kə: «Kanu kəndesut əm, məyənə pəmə damba dete nde ancəm alom ŋefer mə! Məndə nnə məckit im pəmə təkə sariyə səloku mə, mba məcloku a pasut im, təkə sariyə səməne mə!»

⁴ Afum akə ŋanayi di mə, ŋaloku: «Wəlonne wəpəŋ ka Kanu məyi sə kəlməs ba?»

⁵ Kə Pol olukse ŋa: «Awenc im aŋa, incərə fe a nkən əyənə wəlonne wəpəŋ. Itə ancic dəYecicəs Yosoku disre disre: «Pəmar fe məlməs wəkiriŋ wəka afum am.»»

⁶ Nte tenayənə a alonkane ŋanayi kəsək kin aSadisi kə kəŋkə aFarisi mə. Kə Pol eyefe k'empene dim dəndo aboc kiti aSuyif ŋancyifət kə mə: «Awenc im aŋa! Ina sə, wəFarisi iyənə, wan ka aFarisi! K'ancəmbər im kəkiti-ε, kəlan kem a afi ŋandeyefe defi kəsəŋe ti!»

⁷ Nte Pol oloku moloku maməkə mə, kə kəgbekələne kəyi aFarisi kə aSadisi dacə, kə kəgbeyene kəyi.

⁸ Kə aSadisi ŋaloku a kəyefe defi kəyi fe, melekə meyi fe, yəŋk kə arkifin yeyi fe. AFarisi kəca kəŋan, ŋanalan a maməkə fəp meyi doru.

⁹ Kə sim səmpə han, kə atəkse sariyə kəca ka aFarisi ŋayefe kə ŋambupərə pəpəŋ, ŋacloku: «Səŋəŋk fe nte o nte telec nnə fum wəkawe eyi mə! Ancərə fe: Tələma ŋəŋk, kə pəyənə fe ti-ε, melekə molok-lokər kə.»

¹⁰ Nte kəgbekələne kəncəŋne oŋ kəcəŋne dəm kiriŋ mə, kə wəbe wəsədar wəpəŋ enese a ta ŋawatəri-watəri Pol, k'oloku asədar a ŋator ŋakə ŋalək Pol ŋalukse kə nde asədar ŋandire mə.

¹¹ Dəckəsək pibi kə Mariki ender Pol kənəŋk disre, k'oloku: «Məbəkne! Təkə mənayən'em sede fər ya aboc kiti nde Yerusalem mə, mēne məkə sə məyən'em si Rom.»

Kəsək kədif ka Pol

¹² Nte dec dəsək mə, k'aSuyif aləma ŋasek kədif Pol, kə ŋantəŋne kəsəŋene temer kətədi yeri, kətəmun han ŋaclip ti.

¹³ Afum aŋe ŋanasek kədif Pol kəŋkə mə, ŋanckə han ŋacepər afum wəco maŋkələ.

¹⁴ Kə ŋaŋkə ŋabəp alonne apəŋ kə abeki a dətəf kəkəloku ŋa: «Səsəŋene temer kətədi peri ta səntalip kədif Pol-ε.

¹⁵ Nəna oŋ ndəkəl kəbəp ka aboc kiti aSuyif, nəkə nətola wəbe wəsədar pəkere nu Pol pəmə nte nəŋfan kəməmən tetən belbel mə. Səna səncəme səckar kədif kən ta entabəp nu-ε.»

¹⁶ Nte wan ka wəkire ka Pol ene pacloku toloku ta kəcəpe kə towul pədife pən mə, k'əŋkə nde asədar ŋandire mə, k'embere k'oloku ti Pol.

17 Kɔ Pol ewe wəsɔdar wəpɔŋ wəlɔma k'oloku kɔ: «Məsɔlɛ wətɛmp nwe məkenɛ kɔ wəbɛ wəsɔdar wəRom, bawo ɛfan kəsɔŋɛ kɔ kəcərə toloku tɔlɔma.»

18 Kɔ wəsɔdar wəkakɔ ɛlɛk kɔ, kɔ ŋaŋkɔ ndena wəbɛ wəsɔdar wəRom.

K'oloku kɔ: «Kelmani Pol ew'em k'olok'im a iker'am wətɛmp wəkawɛ, a ɛfan kəsɔŋ'am kəcərə toloku tɔlɔm.»

19 Kɔ wəbɛ wəsɔdar wəRom osumpər kɔ kəca kɔ ŋawurnɛ kəsək. K'eyif kɔ: «Ake toloku tɔ məyɔ nte məfan kəlɔk'im mə-ɛ?»

20 Kɔ wətɛmp nwe oloku: «ASuyif alɔma ŋantəŋne a ŋawer əm alna Pol mətɔrɛnɛ ŋa kɔ ndena aboc kiti aSuyif, pəmɔ nte ŋaŋfan kəyifət kɔ ŋaməmən tetən belbel mə.

21 Mba məɛp ta ŋatam əm dəmoloku de! Bawo afum wəco maŋkələ kɔ tɔlɔm ŋa dacɔ ŋayi kəcərə Pol towul pɛdife pən. Ŋasɔŋɛnɛ temer kətədi yeri, kətəmun ta ŋantanim kɔ-ɛ. Tɛm tantɛ ŋalip kəlompəsne. Kəwosɛ kam gbəcərəm kɔ ŋayi kəkar.»

22 Kɔ wəbɛ wəsɔdar wəRom ɛmɛŋkəs wətɛmp nwe a ta pəlɔmər sɔ nwe o nwe toloku tatəkɔ oloku kɔ mə, k'ɛsak kɔ, k'ɔŋkɔ.

Pol nde fɔr ya wəbɛ Felikəs kirin

23 Kɔ wəbɛ wəsɔdar wəRom ewe asɔdar ɔn apɔŋ mɛrəŋ, k'oloku ŋa: «Nələk asɔdar masar mɛrəŋ (200), ayɛksɛnɛ fələs wəco camət-mɛrəŋ, kɔ atəmpər mbəncəran masar mɛrəŋ (200), ŋalompəsne kəkɔ ka Sesari pibi-ana.

24 Nəlompəs sɔ fələs, nte təŋsɔŋɛ pakɛnɛ wəbɛ Felikəs Pol pəyi wəyɛŋ mə.»

25 Kɔ wəbɛ wəsɔdar wəRom encicɛ Filikəs areka ŋɛ ɲenaloku nte mə:

26 «Ina, Kolodu Lisiyas, incic'am areka ŋaŋɛ mənə wəbɛ kem Felikəs, icyif əm.

27 Wərkun wəkawɛ, aSuyif alɔma ŋalɛk kɔ ŋackɔ kənim. Mba alok'im a wəkom wəRom ɔfɔ, it'ɔsɔŋ em kəder kɔ asɔdar em kəbanər ŋa kɔ.

28 Nte ifaŋ kəcərə tes nte amboncɛ kɔ mə, k'intɔrɛnɛ kɔ nde aboc kiti aSuyif ŋayi mə.

29 K'inəŋk, k'amboncɛ kɔ tes-ɛ, kəgbəkələnɛ kɔ nke kəŋkotərənɛ sariyɛ səŋan mə, mba ali tes ɛləsər fɛ nte pəmar padife kɔ, kɔ pəyɔnɛ fɛ ti-ɛ, pabɛr kɔ dəbili mə.

30 Nte alok'im kəsɛk kədif ka wərkun wəkawɛ ɔŋ mə, itɔ inken'am kɔ katəna. K'ilokɛnɛ aboncɛ ɔn tes, ŋakɔ ŋabokɛnɛ tetən nnɔ mənə məyi mə. Dənda ɔfɔ ləŋtaŋ.»

31 K'asɔdar ŋayɔ pəmɔ tatəkɔ wəbɛ kəŋan ɛnasom ŋa mə. Kɔ ŋalɛk Pol kɔ ŋaŋkəkərə kɔ pibi disrɛ haŋ Antipatiri.

³² Dɔckɔsɔk kɔ asɔdar alɔma ɲaluksərɲe nde ɲandire mɔ, kɔ ɲasak ayeksenɛ fɛles ɲakekɛre kɔ.

³³ Nte ɲamberɛ Sesari mɔ, kɔ ɲasɔɲ areka ɲaɲɔkɔ Felikəs wɔbɛ ka dɔtɔf, kɔ ɲamentər kɔ Pol.

³⁴ Nte wɔbɛ ka dɔtɔf elip kəkaraɲ areka ɲɲe mɔ, k'eyif Pol wɔka atɔf ɲere mɔyɔnɛ-ɛ. Nte ene a wɔka Silisi ɔyɔnɛ mɔ,

³⁵ kɔ wɔbɛ Felikəs oloku: «Indecəɲkəl əm kɔ abonɔɛ am tes ɲandeder-ɛ.» K'osom a pacarɲər Pol nde bili bɔkɔ bɛnayi nde abarɲka ɲa wɔbɛ Herodu mɔ.

24

Ambonɔɛ Pol mes

¹ Nte mata kɛcamət mencepər mɔ, kɔ wɔlɔɲɲe wɔpɔɲ Ananiyas ontɔr kɔ abeki a dɔtɔf alɔma kɔ wɔgbɛkɛlɛnɛ wɔkin pacwe kɔ Tertulu. Kɔ ɲarɲkɔ ɲabokɛnɛ nnɔ wɔbɛ wɔka dɔtɔf eyi mɔ teta Pol.

² Kɔ wɔbɛ ka dɔtɔf osom k'awe Pol, kɔ Tertulu oncop moloku mɔn nte: «Wɔbɛ, mɔn'ɔsɔɲɛ nte sɔyine bɛkɛc yoforu mɔ. Kɛkɔtɛnɛ dɛbɛ kam kɛtɔt, kɔ kəsɛkpər ka mes mɔlɔma teta atɔf ɲosu ɲarɲɛ, bawo mɔnayay ɲi nte tender mɔ.

³ Wɔbɛ Felikəs wɔlɛlɛs kosu, sɔɲsɔtɔ pɔtɔt papɔkɔ tɛm fɔp kɔ mofɔ fɔp. Sɔɲyek-yekəs'am ti.

⁴ Mba nte intɔfan kɛlɛkɛr əm tɛm tɛlarəm mɔ, it'intolan'am kɛcəɲkəl su abɛkɛc ɲɔtɔt disrɛ tɛm tepic.

⁵ Sɔɲkɔkɔɛ a fum wɔkawɛ wɔbɛrəs afum dacɔ ɔyɔnɛ, nkɔn ɔɲsɔɲɛ aSuyif fɔp kɛgbɛkɛlɛnɛ doru mofɔ fɔp. Wɛkirin wɔka kɛgba ka afum a Nasarɛt ɔyɔnɛ.

⁶⁻⁷ Enafan yati kɔyik-yikəs kɛlɔ kɛpɔɲ ka Kanu, itɔ sɔnasumpərə kɔ.

⁸ Mɔna Wɔbɛ mɔntam kɔyifɔt kɔ, mɔtɛn kɛcərə kɔ pɔyɔnɛ a tɔkɔ sɔmbonɔɛ kɔ mɔ kance kɔ-ɛ.»

⁹ Kɔ aSuyif arɲɛ ɲanayi di mɔ, ɲambaɲɛ Tertulu, kɛclɔku: «Itɔ teyi yati!»

Pol fɔr ya Felikəs kirin

¹⁰ Nte wɔbɛ ka dɔtɔf ɛfɛk Pol kɛca a pɔlɔk-loku mɔ, kɔ Pol oloku nte: «Wɔbɛ, incərə a meren mɛlarəm mɔ mɔyi atɔf ɲarɲɛ mɛkiti. Kɛlarɲ kanɲkɔ disrɛ k'indelokɛn'am kɔyɔc kem.

¹¹ Tentacepər fɛ mata wɔcɔ kɔ mɛrɔɲ nte impɛ dare da Yerusalem kɛkɔkor-koru Kanu, mɔntam ti kɔyifɔt.

¹² Ambɔp f'em kɛlɔ kɛpɔɲ ka Kanu, ambɔp f'em dɛkɔtɔla Kanu da aSuyif, ambɔp f'em dare disrɛ sɛcgbɛkɛlɛnɛ kɔ afum, kɔ pɔyɔnɛ fɛ ti-ɛ, icgbinɲər afum kɔyɛfərənɛ.

¹³ ɲafɔtam sɔ kɛcmentər əm kance ka tes tɔkɔ ɲambonɔɛ em mɔ.

14 Kance intam kəwose nnə fər yam kirinj a Kanu ka atem em k'ijkor-koru, k'incəme dəpə da Kanu darənj nde ɲa ɲancem-cemne a yem yə mə. Mba ina ilan ɲte o ɲte ancic dəYecicəs Yosoku Tawureta Musa kə Sayibe mə.

15 Ingbəkər teta Kanu təloma amera, ɲte ɲa abonc'em mes ɲa sə ɲangbəkər mera mə: It'əyone a Kanu kəndeyekti afi, alompu kə atəlomp.

16 It'əsənj ɲte ina sə insep tem fəp kəkətene amera ɲətət fər ya Kanu kə afum kirinj mə.

17 Nte meren mɛlarəm mencepər mə, k'inder nnə Yerusalem kədemar afum em, k'ilonje sə Kanu.

18 Kə ɲanjə ɲabəp im icsəkəsne kələ kəpənj ka Kanu disre, bafə afum ɲalənkane di, bafə pacgbəkələne de.

19 Mene aSuyif a atəf ɲa Asi aloma akə ɲanayi di mə, ɲa ɲə pəmar kəder nnə məyi mə ɲacbonc'em mes, kə pəyone a ɲantəmpər em mi-ε.

20 Kə pəyone fe ti-ε, afum akanje ɲaloku tes telec ɲte aboc kiti aSuyif ɲananənk im ɲte ɲanakit'im mə.

21 Mene pəyone toloku təkə inaloke dim dəpənj, icəme ɲa daco mə de: «Teta kədeyefe defi nke ilan mə, it'ancəmbər'em məkə kiti nnə fər yam kirinj!»

22 Tenabəp paloku Felikəs belbel mes ma dəpə da Mariki Yesu, k'olukase kiti dəsək dəloma, pəcloku: «Kə wəbe wəsədar wəRom Lisiyas endeder-ε, indeməmən tes tonu.»

23 Kə wəbe ka dətəf oloku wəsədar a pəcaɲər kə, mba ta pəkot kə, ta pəmone sə afum ən kəmar kə mes mələma.

Pol fər ya Felikəs kə Durusil kirinj

24 Nte mataka mələma mencepər mə, Felikəs ɲasol kə wəran kən, Durusil, wəSuyif enayi, kə ɲander, kə ɲasom pakəwene ɲa Pol. Kə ɲancənjəl kə kələku ka kəlan kən Yesu Krist.

25 Mba ɲte Pol enatəfərnene moloku mən teta pəlompu, teta kəsumpərne, kə kiti nke kəndeder mə, kə kənesə kəyi Felikəs. K'oloku Pol: «Pəntənjne məkə tantε. Məkə kərəsna. K'indəsətə tem-ε, indəsəw'am.»

26 Felikəs enafətoma a Pol əjkəsənj kə pəsam. It'oncsomase tem fəp, pakəwene kə Pol ɲaloku-loku.

27 Kə ɲayi ti disre haɲ kə meren mɛrənj mencepər, k'asəkpər Felikəs dəbe, k'andəs Pərsiyus Fəstus. Mba ɲte Felikəs enafənj kəbətəs abe aSuyif mera mə, k'əsak Pol dəbili.

25

Awe Pol fər ya wəbe wəka təfya Rom fəp kirinj

1 Kədəs ka Fəstus dəcəm da dəbe tataka ta maas, k'eyefe dare da Sesari kəkə ka Yerusalem.

² Alonɛ apɔɔj kɔ afum alel a dɔtɔf aSuyif ɲaɲkɔ ɲabokene nno eyi mɔ, teta Pol.

³ Kɔ ɲaɲgbac ɲactola Festus kɛmar kɛɲan pakere Pol Yerusalem, mba kɔ ɲalompɛs towul mpe ɲantam kɛdife Pol dɔpɔ mɔ.

⁴ Kɔ Festus oloku ɲa a ancaɲɔr Pol dare da Sesari, a nkɔn yati pɛmar pɛkɔ di mata mamɛkɔ.

⁵ K'endenɔr, «Afum acɛre kɛlok-loku aɲe ɲayi nu dacɔ mɔ, ɲasol kɔ ina, sɛkɔ. Kɔ fum wɛkawɛ enalɛsɛr tes-ɛ, ɲakɔ ɲalɔm kɛbokene kɛɲan dɛndo.»

⁶ Festus enacɛpɛrene fe mata camɛt-maas, kɔ pɛyɔne fe ti-ɛ mata wɛɔ Yerusalem, k'olokus dare da Sesari. Dɔckɔsɔk k'ende dɛɲkiti, k'osom a pakere Pol.

⁷ Nte Pol ender mɔ, kɔ aSuyif aɲe ɲanator Yerusalem mɔ ɲaɲkel kɔ, kɔ ɲambonce kɔ mes mɔpɔɲ melarɛm, mme ɲanatɔtam kɛsɛkɛs mɔ.

⁸ Pol oncloku kɛyacɛ kɔn: «Ali tes ilɛsɛr fe! Inciya fe sariye sa aSuyif, inciya fe kɛlɔ kɛpɔɲ ka Kanu, inciya fe Sesar.»

⁹ Festus, nwe enafɔɲ kɛbɔtɛs aSuyif mera mɔ, eyif Pol: «Mɛfɔɲ kɛpe Yerusalem pakɛkit'ɛm di fɔr yem kirin ba?»

¹⁰ Kɔ Pol oloku: «Fɔr ya dɛɲkiti da Sesar y'incɛme kirin tante, difɔ pɛmar pakit'im. Ali tes ilɛsɛre fe aSuyif, pɛmɔ tatɛkɔ mɛna yati mɛncɛre ti mɔ.

¹¹ Kɔ pɛyɔne a inciya, kɔ pɛyɔne a iyɔ nte o nte pɛmar padif'em mɔ-ɛ, ifɔtola a paɲaɲɲen'em. Mba kɔ pɛyɔne a mes mame ambonc'em mɔyɔne fe kance-ɛ, pɛmar fe nwe o nwe pɛsɔɲ im ɲa. Intola ti wɛbe wɛka tɔf ya Rom fɔp pɛkit'im.»

¹² Awa Festus, nte ɲalip kɛmɛmɛn mes mme kɔ amar ɔn mɔ, k'oloku: «Nte mɛloku a Sesar mɛfɔɲ a pɛkit'ɛm mɔ, kɛkɔ kɔ mɛnder Rom pɛkɛkit'ɛm.»

Pol fɔr ya Akripa kɔ Bernis kirin

¹³ Nte mataka mɛlɔm mɛncɛpɛr mɔ, wɛbe Akripa kɔ wɛkire kɔn Bernis ɲander dare da Sesari, kɛdeyif Festus.

¹⁴ Nte ɲawak di kɛwon mɔ, kɔ Festus ɔlɔmɛr wɛbe nwe teta Pol, pɛcloku: «Felikɛs enasak fum wɛlɔma dɛbili.

¹⁵ Nte inakɔ Yerusalem mɔ, alonɛ apɔɔj kɔ abeki a dɔtɔf aSuyif ɲanabokene tetɔn, ɲactola kɛdif kɔn.

¹⁶ K'iloku ɲa a aRom ɲafɔsɔɲ fum kɛdif ta wɛkayi ɲantatefɛrene kɔ abonce ɔn mes-ɛ, pɛyacɛne moloku mɛkɔ ambonce kɔ mɔ.

¹⁷ It'ɔsɔɲɛ nte ɲatɔwon kɛderene nno mɔ. Dɔckɔsɔk, k'inde dɛɲkiti, k'isom a pakere fum wɛkakɔ.

¹⁸ Nte abonce ɔn mes ɲander mɔ, ali tes ɲambonce fe kɔ nte inafɔtɔne kɔ mɔ.

¹⁹ Nɔ̄nɔ̄gbekɛlɛnɛ kɛgbekɛlɛnɛ dɛm tɛtɛ dinɛ dɔ̄nɔ̄n, kɔ̄ tɛtɛ Yesu wɛlɔ̄mɛ, nwɛ efi mɔ̄, mba kɔ̄ Pol nkɔ̄n oloku a eyi wɛyɛn.

²⁰ Kɔ̄ ina, nɛ intɔ̄cɛrɛ nɛ indeloku tɛtɛ mes ma dinɛ dɔ̄nɔ̄n mɔ̄, k'iyif Pol, kɔ̄ pɛyɔ̄nɛ ɔ̄nɔ̄wɔ̄sɛ kɛkɔ̄ Yerusalem pakɔ̄kiti kɔ̄ dɛndɔ̄-ɛ.

²¹ Mba Pol ontola nɛ efaɔ̄n mɔ̄: A wɛbɛ kosu wɛlɛl pɛkiti kɔ̄, it'ɔ̄sɔ̄nɛ nɛ iloku a pacanɔ̄r kɔ̄ haɔ̄ ictam kɛkɛnɛ kɔ̄ Sesar wɛbɛ wɛkɛ tɔ̄f ya Rom fɛp.»

²² Kɔ̄ Akripa oloku Fɛstus: «Ina sɔ̄, ifaɔ̄n kɛcɛɔ̄nkɛl fum wɛkawɛ.» Kɔ̄ Fɛstus oloku: «Alna mɛncɛɔ̄nkɛl kɔ̄.»

²³ Dɔ̄ckɔ̄sɔ̄k Akripa kɔ̄ wɛkiriɛ kɔ̄n Bernis ɔ̄nderɛnɛ asos ɔ̄ayɛsɛ, kɔ̄ ɔ̄ambɛrɛ ndɛ dukulɔ̄ dɔ̄kɔ̄ aɔ̄nkɛtɛ mɔ̄, kɔ̄ abɛ apɔ̄n asɔ̄dar aRom, kɔ̄ afum alɛl a dare. Kɔ̄ Fɛstus osom k'aɔ̄nkɛrɛ Pol.

²⁴ Awa kɔ̄ Fɛstus oloku: «Wɛbɛ Akripa, kɔ̄ nɔ̄na fɛp fonu aɔ̄nɛ nɔ̄yi su dacɔ̄ mɔ̄, nɔ̄nɔ̄nkɛl fum wɛkawɛ, tɛtɔ̄n tɔ̄ aSuyif alarɛm akanɛ ɔ̄ambokɛnɛ nnɔ̄ iyi mɔ̄. Kɛyɛfɛ Yerusalem haɔ̄ nnɔ̄, ɔ̄ackulɛ-kulɛ a pɛmar fɛ pɛyi doru.

²⁵ Kɔ̄ ina, inɔ̄nkɛ fɛ nɛ o nɛ pɛmar a padifɛ kɔ̄ mɔ̄. Mba nɛ nkɔ̄n wɛsɛrka ontola a wɛbɛ kosu wɛlɛl pɛkiti kɔ̄ mɔ̄, it'incɛm-cɛmɛnɛ kɛdɛkɛnɛ kɔ̄ Pol wɛkawɛ.

²⁶ Nɛ intɔ̄yɔ̄ nɛ o nɛ tosoku tɛcicɛ wɛbɛ kosu wɛlɛl tɛtɛ fum wɛkawɛ mɔ̄, it'inɔ̄kɛrɛnɛ kɔ̄ fɔ̄r yonu kirinɔ̄, pɛnanɔ̄kanɛ mɔ̄na wɛbɛ Akripa, nɛyifɛt kɔ̄ nɛ tɔ̄nɔ̄sɔ̄nɛ isɔ̄tɔ̄ tɔ̄kɔ̄ indecic mɔ̄.

²⁷ Bawo, pɛwuren'em kɛyi samnɛ, kɛsɔ̄n kelmani packekɛrɛ Rom ta mɛsɔ̄kɛs kɛcic mes mɔ̄kɔ̄ amboncɛ kɔ̄ mɔ̄-ɛ.»

26

Pol kɛyɛcɛnɛ kɔ̄n nnɔ̄ Akripa eyi mɔ̄

¹ Kɔ̄ Akripa oloku Pol: «Awos'am kɛlɔ̄ku-ɔ̄ku tɛtam.»

Kɔ̄ Pol ondɔ̄t kɛca kɛlɛk moloku kɛyɛcɛnɛ.

² «Pɛmbɔ̄t im, Wɛbɛ Akripa, kɛnɔ̄nkɛnɛ mɔ̄kɔ̄ idɛyɛcɛnɛ nnɔ̄ mɔ̄yi mɔ̄ mes mɛmɛ aSuyif alɔ̄ma ɔ̄amboncɛ em mɔ̄.

³ Mɛncɛrɛ belbel mes mokur aɔ̄nɛ ma aSuyif kɔ̄ kɛgbekɛlɛnɛ ka mi. Ilɛtsɛn'am mɛcɛɔ̄nkɛl im belbel.

⁴ ASuyif fɛp ɔ̄ancɛrɛ nɛ tɛnɔ̄yɔ̄nɛ tɛyi tɛm kɛyɛfɛ dowut dem mɔ̄, dɛkɛcɔ̄p nɛ inayi afum em dacɔ̄ Yerusalem mɔ̄.

⁵ ɔ̄ancɛr'em kɛyɛfɛ nɛ pɛnawon mɔ̄, ɔ̄antam sɔ̄ kɛbɔ̄ncɛ ti, bawo fɔ̄r yaɔ̄nɛ yati ɔ̄anatɔ̄nɛ mes kɔ̄ mɔ̄yɔ̄ ma doru dem fɛp, a cɛFarisi c'inayi, kɛgba ka afum akɔ̄ ɔ̄ananɔ̄kanɛ kɛyɛnkɛ mes dinɛ dosu mɔ̄.

⁶ Mɔ̄kɔ̄ ayi kɛkit'im, bawo inɔ̄gbekɛr amera tɛmɛr nɛ Kanu kɛnasɔ̄n atɛm asu mɔ̄.

⁷ Cusunɔ̄ka cosu nɛ wɛcɔ̄ kɔ̄ mɛrɔ̄nɛ cɛɔ̄nsali tɛm fɛp, dɔ̄n kɔ̄ pibi, ɔ̄ayɔ̄ amera kɛsɔ̄tɔ̄ ka kɛlɛkɛ tɛmɛr kanɔ̄kɔ̄. Wɛbɛ, tɛtɛ kɛgbekɛr amera kanɔ̄kɔ̄ kɔ̄ aSuyif ɔ̄amboncɛ em mes.

8 Teta ake to nantofanje kalan a Kanu kənsəne fum kəfəte dədefi-ε?

9 Ina wəkawε yati, inacem-cemne kəsīməs kə tewe ta Yesu wəNasaret səpə fəp.

10 It'inayə Yerusalem, ina wəkawε yati inaber afum acempi alarəm dəbili kətam disre nke abe a aləne njanasəne im mə. Nte nancloku kədif kənan mə, ina sə incwose ti.

11 Inckə dəwələ wa dəkətola Kanu da aSuyif fəp, ictərəs alan, incgbac nja kəlməs tewe ta Yesu. Pəctel'em nno njayi mə, incbeləs nja han sədare səcuru.»

Pol ələm kəkafəle kən amera

12 «Ti tenasəne dəsək nde indekə dare da Damas mə, kətam kə kəsom ka abe a aləne apəne.

13 Dan decfan kəbəp, Wəbe Akripa, k'inənk dəndo dəpə pəwanəkəra mpe penakel im kə afum akə sənəsəl mə. Pəmot mpe pənayefe dəkəm mə, pocmot petas dec.

14 Kə səntəmpene fəp fosu dəntəf, k'ine dim doclok'im cəEbre: «Sol, Sol, ta ake to məntərəs em-ε? Ta ake to məmbərə pəmə wana cəngbangban ca mariki mam dəntəf-ε.»

15 K'iyif: «Mariki, an'əfə-ε?»

K'oluks'em: «In'əfə Yesu, nwe məna məyi kətərəs mə.

16 Mba məyefe məcəme wəcək wam kəron. Məcəre tes nte təsəne'em kəwurər əm mə: Iyek-yek əm kəyone ka wəbəcə kem, məyone sə wətəne mes məkə mənənk nno iyi mə kə məkə indesəwurər əm mə.

17 Indeban əm afum am akanə dəwaca kə atəyone aSuyif nda anə indesom əm mə,

18 kəkəmepe nja fər. Nte tənəne nəwur dəkəbump nətəfərne pəwanəkəra, nəwur kətam ka Sentani njayi kətam ka Kanu disre mə. Kə nalan im-ε, nandesəto kənanne ka kiciya kənan, nəsəto dəkəcəme afum dacə anə nəyone aka Kanu mə.»

Pol oloku yebac yən

19 «Ti disre, Wəbe Akripa, iyenkər fe kənənk nke kənyefe darenə mə domp.

20 Mba inacam kərəsna nno afum aka Damas kə aka Yerusalem, kəbəp ka afum aka atəf nja Yude fəp han atəyone aSuyif. Iloku nja kəsəkpər bəkəc nəkafəle nno Kanu kəyi mə, nəyə məyə mətət mme menmentər kəsəkpər kənan bəkəc mə.

21 Tante tenasəne kə aSuyif nəsumpər im nde kələ kəpəne ka Kanu disre, nəcfan kədif im.

22 Mba kəbum ka Kanu kəsəne'em kəyi doru han məkə, iyone sede sən nno awut kə abeki njayi mə. Ifəloku nte o nte sayibə kə Musa nənətəloku mə,

23 kəcərə a Krist endekekərə pəcuca, k'əyənə wəyefe wəcəkəkəkə defi-ε, nkən endecam teta pəwanjəra nnə aSuyif kə atəyənə aSuyif ηyayi mə.»

Pol kəfan kən kəsəne Akripa kəlan

24 Nte Pol oncloku moloku mən meyacnənə mə, kə Fəstus oηkulərne: «Pol cəpə mətamne fε? Kətəkəs kam kəlarəm kəsəη'am kətətamne.»

25 Kə Pol oloku: «Daka o daka dəyə f'em. Intamne keη, Wəbe kem wələl, Fəstus! Moloku ma kance kə molompu m'iyi kəloku.

26 Wəbe encərə maməkə fəp, it'ηləkə mi kəlan disre fər yən kirin. Incərə a məcərə mes maməkə fəp, bawo mənəcəpər fər ya afum kirin.

27 Wəbe Akripa, məlan sayibe ba? Incərə belbel a məlan ηal!»

28 Kə Akripa oloku Pol: «Kə məsəp kəberənə pəpic-ε, məηsəη'em kəyənə wəlan ηrist.»

29 Kə Pol oloku: «Təyənə a ndəkəl kə pəyənə fε ti-ε, tekirin, intola kə Kanu kəwose-ε, kəyefe məna haη akə ηayi kəcəηkəl im məkə mə, nəyi pəmə ina, mba ta gbekce yayε yeyi ti de.»

30 Awa wəbe ka atəf, wəbe ka sədare səlarəm, Bernis, kəbər ka afum akə ηanandε kə ηa mə fəp ηayefe.

31 Nte ηancwur mə ηaclokənə: «Fum wəkawε əyə fε nte o nte pəmar padife kə, kə pəyənə fε ti-ε paber kə dəbili mə.»

32 Kə Akripa nkən oloku Fəstus: «K'antam kəsak fum wəkawε pətə-yənə fə ewe wəbe wəka Rom-ε.»

27

Aηkekərə Pol Rom

1 Nte antəηne oη a səbekε debil kəkə ka atəf ηa Itali mə, k'asəη Pol kə afum aləma akə ηanayi dəbili mə wəsədar wəpəη wələma nwe ancwe Yuliyus mə. Wəbum ka wəbe wəka Rom ənayənə, k'asom kə kəkəkəs ηa.

2 Kə səmbekε dəbil kəyefe ka dare da Adaramit kəkə ka cəgbep ca Asi kə səηkə səpε. Aristarko wəMasedon wəka dare da Tesaloni ənayi su dacə.

3 Dəckəsək kə səmbere Sidəη. Yuliyus nwe əncyə Pol mes mətət mə, owose kə kəkə ndena anapa ən kəkətənər ηa kəmar kələma.

4 Nte səyefe dəndo mə, kə səsumpər kəca ka Sipər bawo səncgbofnε afεf.

5 Nte səncali kəba nke məc mənəsut təf ya Silisi kə Paηfili mə, kə səηkə sətor dare da Mira, atəf ηa Lisi.

6 Dəndo kə wəbe wəsədar əsətə dəndo abil nηe ηanakəyefe dare da Aleksandər kəkə ka Itali mə, k'embek su ηi disre.

⁷ Mataka melarəm disre sækət meten dəkəba. Pəcuca disre pə sənadebəp Sinidi, mba nte afef ηenatəwose su kəkə pəbələ mə, kə səsumpər agbep ηa atəf ηa Kret, kə sancepər Salmən.

⁸ Kə səngbofne dobo dadəkə pəcuca disre, kə səηkə səbəp kəfo kaηkə aηwe «Cətənta Cətət,» ta pəmbələne di kə dare da Laseya-ε.

⁹ Nte tem telarəm tenccepər, akə kəkətene abil kəncyə kəyə dəm wəywey mə, kə mata ma kəsuy mencepər-ε. Kə Pol engbijər ηa:

¹⁰ «Anapa, inəηk a kəkət kosu kaηke kəyə wəywey. Abil kə yecaməs yəkə yeyi ηi disre mə yendelece, səna aηe səyi ηi disre mə yati sətəro.»

¹¹ Mba wəbe wəsodar pəlan wəgbək abil kə wəka ηi, ta ewe moloku ma Pol daka-ε.

¹² Nte tendenərne ti mə, kətənta kənatese fe kəcəpərəne derəη. Kə ayi a abil ηaηəkə disre alarəm ηaloku kəyefe ka di ηabelər Fenik, kətənta ka Kret nke kəηkəηkəne afef ηederəη mə.

Afef ηəpəη ηosut dəkəba

¹³ Kə afef ηepic ηeyefe kəwur kəca kətət, kə ηancem-cemne a ηantam kəyə tefan tanan. Kə ηayekti abela ηaηan kə ηasolne dobo da Kret, ηagbərəne di.

¹⁴ Pəwon fe kə afef ηəpəη ηəkə ancwe «Erakiləη» mə ηowur kəyefe ka mərə ma dare.

¹⁵ Kə afef ηaηəkə ηeyefe kəcərnene abil ta antam sə kəcəme afef ηaηəkə kirin-ε, kə səsakne kə ηeηkəkəre su nde ηenafan mə.

¹⁶ Səyi kəcəpər mokuru mēfet mələma tantəf, mme ancwe Koda mə, kə səntam pəcuca disre kəcəmbərəs abil.

¹⁷ Nte səlinərne ηi mə, kə aηe ηayi kəbəc abil disre mə ηaηkote ηi bənda yəkə yenayəne yeməηkərne mə, ηacnese kəkəloηe agbep ηa atəf ηa Siriti, bawo kərəre ka asənc kənayi di. Kə ηaηgbal aηka, mba afef ηosole ηa.

¹⁸ Nte afef ηenananəkanə kəyikəc su mə, dəkəkəsək kə ηaηgbaləs yecaməs yələma dəkəba.

¹⁹ Tataka ta maas, kə abəc a debil ηasumpər gbalanηi ba abil dəwaca kə ηaηgbal bi dəkəba.

²⁰ Mataka melarəm disre dec kə cəs yoncwur fe, afef ηecbək oη kəbək dəm, telpəs kə səwure mera kəyi sə doru.

²¹ Nənadi fe yeri kəyefe nte pənawon mə. Itə kə Pol eyefe k'encəme ηa dacə, k'oloku: «Anapa, pəcyəne a nənacəηkəl im ta nəyefe Kret nəyekti abela-ε, kə nəmbumnəna pəcuy pamppe pəsətə su, kə ca nye yəsələr su mə.

²² Mba ndekəl oη, intola a ancəpəs nu bəkəc, bawo ali fum əfəfi nu dacə, mēne abil ηendelece.

²³ Itə nnə pibi mēleke mələma ma Kanu nke iyəne wəkən kə nke inkor-koru mə, mowurərn'em.

24 Kɔ molok'im: «Ta mænese, Pol! Mene mæcæme fɔr ya wæbe ka tɔf ya Rom fɔp kirin, tetam tɔ Kanu kəsake akanɛ nɔyi abil njanɛ disre mɔ fɔp kɔyi doru.»

25 Næcɔpæsne bækac arkun, bawo ilan tɔkɔ Kanu kəlɔkun'em mɔ tendeyi.

26 Mba mene pakɔlɔŋe mɔkuru mɔlɔma.»

27 Pibi pa wæco kɔ mankæle p'anakɔ pafecærene su kəba ka Adiriya. Pibi dacɔ kɔ akɔtene abil njancære a alɔterne antɔf nɔwosu.

28 Kɔ njantore paka pelel pakotər pi kəbænda, kɔ njanɔŋk a putukum pɛmbəp mɛtər wæco maas kɔ camət-tin. Kɔ njancɔŋne kirin kɔ njawak sɔ, kɔ njanɔŋk a pətukum pɛmbəp mɛtər wæco mɛrəŋ kɔ camət-mɛrəŋ.

29 Nte njanesene abil kəcanɔrene masar mɔ, itɔ njanagbale anka mankæle tadarəŋ, kɔ njandɛ njackar pəwanəkəra, mba pəcwon nja.

30 Mba nte abæc a debil njanafan kəyeksər abil mɔ, kɔ njantore agbanke, njacloku a njakɔ njagbal anka tekirin ta abil.

31 Kɔ Pol oloku wæbe wəsɔdar kɔ asɔdar, «Kɔ afum akanɛ njantɔyi debil-ɛ, nɔfɔtam kɔyi doru.»

32 Kɔ asɔdar njancɔpu bænda ya agbanke, kɔ njasak nji kɔ njentɛpene.

33 Njai kəkər dec kəsək, kɔ Pol ewene fɔp fosu kəkɔdi yeri, k'oloku: «Mɔkɔ tataka ta wæco kɔ mankæle nte nɔyi kəkər, ta nændi yeri mɔ.

34 Intola nu oŋ kədi yeri, bawo pəmar nədi yi nte tɔŋsɔŋe nɔyacne mɔ. Ali wəkin nu dacɔ, kəfon kən ka dərɔmp kəfəsɔlər kɔ!»

35 Nte Pol elip kəlɔku tatɔkɔ mɔ, k'elɛk kəcom k'eyif Kanu barka fɔr ya afum fɔp kirin, k'entepi ki, k'eyefe ki kəsəm.

36 Kɔ fɔp fəncəp bækac kɔ njayefe kəsəm cəcom.

37 Sənaiy afum masar mɛrəŋ wæco camət-mɛrəŋ kɔ camət-tin (276) akɔ njanayi abil njanɔkɔ disre mɔ.

38 Nte fɔp fənembəre mɔ, kɔ njanɔgbal malɔ mɛlpəs dəkəba nte tɔŋsɔŋe abil njɛberene kəfoy mɔ.

Kəlɔŋe ka abil

39 Nte dec dəsək mɔ, abæc a debil njananɛpəl fe antɔf, mba njananɔŋk kɛrɛre, kɔ njancem-cemne kəcɔŋəs abil han njabəp ki.

40 Kɔ njasikəli anka kɔ yontor dəkəba, kɔ njasikəlene sɔ bænda ya yas nyɛ ancgbeke abil mɔ. Kɔ njayekti abela abil dəkəro, kɔ afɛ njɛlek nja, kɔ njɔncɔŋəs abil kəca ka dəkɛrɛre.

41 Mba kɔ njanɔkɔ njapət kɛrɛre acir mɛrəŋ dacɔ, kɔ kəro ka abil kəmətne dəsənc, njentam fe sɔ kəcɔŋne kirin. Kɔ yam yɔpəŋ yender yosut abil njanjan kɔ njɛləsər nji tadarəŋ.

42 Kɔ asɔdar njancem-cemne kədif ka kelmani-e, ta wəlɔma pənjəŋ pəyeksər nja.

⁴³ Mba wabe wəsodar nwe enacem-cemne kəmar Pol ta efi dəkəba mə, eyamsər asodar kəyɔ ka tefan tanjan, k'oloku akə njanacəre kənerəŋ mə njanuŋkene kətor dəkəba njanerəŋ nte tənsoŋe nape pəwosu mə.

⁴⁴ Afum alpəs akə nandelek cəbam kə cəpom ca abil njanerəŋ njabəp nja dəndo dəpəwosu. Kə afum fəp nampre dəpəwosu, ali wəkin tes tenasəto fə.

28

Pol eyi Malit

¹ Nte səmpre ta tələm o tələm təsəto fum mə, k'aloku su a mokuru maməkə m'anwe Malit.

² Kə afum aka di njasumpər su belbel. Kə njankekəre su kəkəsəye nenc nde njanacəl teta wəcafən wəkə enacop kətuf kə kəfe mə.

³ Pol enawetəs yancan yələma nyə enayi kəcəl dənenc mə, mba teta pəwon, kə dəf dowur yancan disre kə dendetərne kə dəkəca.

⁴ Nte aka atəf njanəkə njanəŋk dəf dendetərne Pol dəkəca mə, kə njalokene: «Fum wəkawe tələma wədif afum əyənə, bawo entep kəccafe dəkəba, mba Pəlompu powose fə nkən kəyi doru.»

⁵ Mba kə Pol ewes abok nje dənenc, ali ta pəncu kə-ε.

⁶ Afum akakə njackar a pəŋkəkəf kə dənda abok njanadetərne mə, kə pəyənə fə ti-ε pətəmpene pəfi. Nte njankar kə pəwon ta njanəŋk tələm o tələm təsəto kə mə, kə njasəkpər təcem-cemne tanjan, kə njaloku a kanu kə əyənə.

⁷ Kəfo kanjə kəsək antəf njəpəŋ njanayi di nja fum wəbeki wəpəŋ wəka mokuru maməkə wələma, pacwe kə Pubiliyu. Nkən enasəŋ su dəkəyi dətət mata maas.

⁸ Papa ka Pubiliyu enafəntəre ta entamne-ε, fiba kə kupur yeyi kə. Kə Pol emberər kə, k'əntola Kanu, pəcdeŋər kə waca, k'entaməs kə.

⁹ Ti disre kə acu aka mokuru alpəs akə nander sə, kə nja sə nantamne.

¹⁰ Kə aka dare njaələs su belbel, nte səndeyefe kəkə mə, k'asəŋ su ca yəkə pənamar su kəyɔ mə fəp.

Pol kəbəp kən Rom

¹¹ Nte sənəcəpərəne yof maas mə, kə səsəto abil nje njeɣefe dare da Aleksandər, kə nəcəpərəne dərəŋ mokuru ma Malit mə. Abil njanəkə n'ancwe «Diyəskur.»

¹² Nte səmbere dare da Sirakus mə, kə səyi di mata maas.

¹³ Kə səyefe dəndo, səsolne agbep kə sənəkə səsumpər dare da Resiyo. Kə afef nja kəca kətət njeɣefe dəkəsək, mata mērəŋ disre kə səmbəp dare da Pusəl.

14 Difɔ sɛnabɛp awɛnc su aɲa alaɲ akɔ ɲanatola su kɛyi di mata camɛt-mɛrɛɲ mɔ. Tɔkɔt tantɛ tɔ sɛnakɔt kɛbɛrɛ dare da Rom.

15 Awɛnc su aɲa alaɲ a dare da Rom aɲɛ ɲanane tetosu mɔ, ɲander kɛfayɛ su haɲ nde makit ma Apiyus, kɔ nde ancwe Dɛkiyi Maas mɔ. Ntɛ Pol ɛnɛɲk ɲa mɔ, k'eyif Kanu barka, k'ɛmbɛrɛnɛ sɔ kɛcɛp abɛkɛc.

16 Ntɛ sɛmbɛrɛ Rom mɔ, k'awosɛ Pol kɛyi taciɲa kɔ wɛsɔdar wɛkɔ oncbum kɔ mɔ.

Pol kɛcam kɛn toloku tɔtɔt ta Kanu Rom

17 Ntɛ mata maas mencepɛr mɔ, kɔ Pol ewe afum alɛl aSuyif aɲɛ ɲanayi Rom mɔ. Ntɛ ɲambɛpsɛnɛ mɔ, k'oloku ɲa: «Awɛnc im aɲa, ali tes ilɛsɛrɛ fɛ afum asu, ali tes ilɛsɛr fɛ ta mes mosu mokur ma atɛm asu, mba ɲanasumpɛr im nde Yerusalem kɔ ɲamber im aRom dɛwaca.

18 Ntɛ ayifɛt im mɔ, abɛ akakɔ ɲanafan kɛsak im, bawo ɲananɛɲk fɛ ntɛ o ntɛ pɛmar padif'em mɔ.

19 Mba aSuyif ɲawosɛ fɛ. Ti tɛnasɔɲ'em kɛwɛ kiti ka wɛbɛ ka tɔf ya Rom fɛp ta ifan kɛboncɛ afum em tes-ɛ.

20 Tes tatɔkɔ tɔsɔɲɛ ntɛ ifan kɛnɛɲkɛ nu, isɔɲɛ nu ti kɛcɛrɛ mɔ, bawo teta kɛgbɛkɛr amera ka afum a Yisrayel kɛsɔɲɛ ntɛ ambɛr im gbɛkɛcɛ yayɛ mɔ.»

21 Kɔ afum alɛl a Rom ɲaloku kɔ: «Ali areka ɲɛfɛt ɲin sɛsɔtɔ fɛ kɛyɛfɛ atɔf ɲa Yude tetam. Ali awɛnc su aɲa wɛkin ender fɛ pɛloku su pɛlɛc pam.

22 Mba sɛfan a sɛn'am kɛlok-loku mɛna yati tɔkɔ mɛncɛm-cɛmɛnɛ mɔ, bawo sɛncɛrɛ a kɛgbɛkɛlɛnɛ kɛyi mofɔ fɛp teta kɛgba nkɛ mɛyi mɔ.»

23 Kɔ ɲamboc tataka, kɔ ntɛ dɔsɔk dadɔkɔ dɛmbɛp mɔ alarɛm ɲander nda Pol kɛcɛɲkɛl kɔ. Kɔ Pol ɛncmentɛr ɲa pɛsoku pɛs dɛYecicɛs Yosoku disrɛ mes ma dɛbɛ da Kanu fɛp, kɛyɛfɛ sariyɛ sa Musa kɛbɛp yecicɛs ya Sayibɛ. Kɛyɛfɛ bɛtbɛt haɲ dɔfɔy kɔ Pol ɛncɛp kɛsɔɲɛ ɲa kɛlan teta Yesu.

24 K'ɛɲkafɛli afum alɔma kɛlan tɔkɔ oncloku mɔ, mba alɔma ɲanalaɲ fɛ ti.

25 Ntɛ afum ɲancsakɛtɛnɛ kɛgbɛkɛlɛnɛ disrɛ dɛndo onclok-loku mɔ, kɔ Pol endɛɲɛr ntɛ gbɛcɛrɛm: «Amera ɲɛcɛmpi ɲa Kanu ɲɛnalok-lokɛr atɛm anu belbel, dɛYecicɛs Yosoku ya aɲɲabi Esayi,

26 ntɛ t'ɛnaloku:

«Mɛkɔ nnɔ afum akanɛ ɲayi mɔ, mɛloku:

Nɛndewon kɛcɛɲkɛl, mba nɛfɔdɛcɛrɛ!

Nɛndewon kɛgbɛtɛnɛ, mba nɛfɔdɛnɛɲk few,

27 bawo sɛbomp sa afum akanɛ sɛfɔtam kɛcɛrɛ,

ɲasunc lɛɲɛs, kɔ ɲamɛp fɛr

nte tɔɲsɔɲe ta ɲanɔɲke yi,
nte tɔɲsɔɲe ta ɲanene lɔɲəs yaɲan.

Ta bəkac yaɲan yɔsɔɲe ɲa kəcərə,
ɲadekafəle, ɲaluksərne nnɔ iyi mɔ, tɔsɔɲe itaməs ɲa.»

²⁸⁻²⁹ Nəcərə a kəɲaɲne ka Kanu kanke atɔyɔne aSuyif
ɲ'anakere ki, ɲa ɲandecəɲkəl ki.»

³⁰ Kɔ Pol eyi kələ kəɲkɔ ɔncsɔɲ kəway mɔ meren merəɲ, difɔ
akɔ ɲancfaɲ kənəɲk kɔ mɔ fəp ɲancbəp kɔ.

³¹ Pol pəccam dəbe da Kanu, pəctəkse afum teta Mariki Yesu
Krist kəlan fəp disre, ali tes ta ayamsər kɔ-ε.

Sak An'ɔ Sak ɔyɔnɛ-ɛ, t'ake tɔ pɛmar pakaraɲɛnɛ areka ɲɔn-ɛ?

Areka ɲɛfɛt ɲaɲɛ ɲɔyɔnɛ yecicɛs ya moloku ma Kanu, ɲɛɛ alaɲ a Krist ɲambɔtɛr kɛkaraɲ doru dandɛ fɛp mɔ. Wɛnc ka Yesu, Sak, ɛnacicɛs ɲi nte tɔɲsɔɲɛ alaɲ aka Krist ɲacɔpɔs bɛkɛc yaɲaɲ, ali tɔyɔnɛ a ɲanayi dɛpɔcuca. AKresi ɲaɲkule «Sak», aHɛbɛrɛ ɲa ɲakule «Yakuba». Tewe tin tayi tɔ.

Sak ɛnayɔnɛ wɛbɛki wɛlɛl acɔkɔ-cɔkɔ a kɛlɔɲkanɛ ka alaɲ nde Yerusalem dacɔ. Dɛndo Yerusalem Sak ɛnayi, nte kɛbɔpsɛnɛ kɛpɔɲ ka abɛki kɛnacɔpɛr mɔ. K'ɛmar Paul kɔ Barnabas kɛsɔtɔ ka moloku kɔ mɔkɔt mɔtɔt nte ɲanagbɛkɛlɛnɛ kɔ aSuyif alɔma teta kɛkɛnc ka atɔyɔnɛ aSuyif mɔ. Antam kɛnɔɲk mes mamɔkɔ nde buk ba Yɛbɛc ya Asom a Yesu disrɛ, sapitɛr 15.

Nnɔ areka ɲaɲɛ disrɛ, Sak ɛnacɔɲɔs alaɲ a Yesu nte tɔɲsɔɲɛ ɲamentɛr kɛlɔɲ kɛɲaɲ kɛtɔt dɛmɔyɔ mɔtɔt mɔ. ɛnatɔksɛ alaɲ tɔkɔ pɛmar ɲatam kɛsumpɛr kɛlɔɲ kɛtɔt kɔ dinɛ dosoku nde Kanu kɛmbɔtɛr mɔ.

Sak ɛnaloku alaɲ a ɲakɛmbɛrɛnɛ kɛbɔtɛr ka mes ma doru, k'ɔlɔm tin tin tin tɔkɔ tɔyɔnɛ kɛbɔtɛr ka Kanu kɔ kɛbɔtɛr ka afum alɔma mɔ.

Itɔ areka ɲa Sak ɲɛɛ ɲeyɛɲkɛs alaɲ bɛkɛc haɲ mata mosu mame ayi mɔ.

Sak

Kɔyif

¹ Ina Sak, wɛcar ka Kanu kɔ Mariki Yesu Krist, incicɛ nu areka ɲaɲɛ nɛna afum a Kanu cusuɲka wɛcɔ kɔ mɛrɔɲ (12) aɲɛ ɲasamsɛr doru mɔ, ɲyif nu!

Kɛlɔɲ kɔ kɛcɛrɛ

² Awɛnc'im aɲa alaɲ, kɔ nɛncɛpɛrɛnɛ pucuca pɔlɔm-ɛ, nɛcɛm-cɛmnɛ pi pɛbotu disrɛ,

³ bawo nɛncɛrɛ kɔ kɛlɔɲ kɛncɔp kɛwakɛs fɔr kirin-ɛ, kɔɲsɔɲ kɛkar kɛbol-bolu.

⁴ Mba pɛmar kɛkar konu kɛbol-bolu kaɲkɔ kɛtesɛ, kɛlɔpsɛr sɔ, nte tɔsɔɲɛ nu kɛbɛk kɛbɛk dɛm ta nte o nte tɔɲbut kɛlɔɲ konu mɔ.

⁵ Mba kɔ afum alɔma ɲayi nu dacɔ aɲɛ kɛcɛrɛ kɛkɔt kɛmbut mɔ-ɛ, pɛmar ɲa ɲatola ki Kanu, endesɔɲ ɲa ki. Bawo Kanu kɛmpocɛ afum fɛp abɛkɛc ɲɔtɔt ta kɛnal'am-ɛ.

⁶ Mba mɛnɛ mətola Kanu kəlanj disrɛ ta kəlanj kam kəmbut-ɛ! Bawo mənna nwe məntolanɛ kənesərne disrɛ mɔ, məyi pəmɔ yam ya dəkəba, nyɛ afef ŋɛŋyɛkti ŋɛwɛn kəsək mɔ.

⁷ Ta fum wəkakɔ pəcɛm-cɛmnɛ kəsətər paka mpe o mpe yopocɛ yɔn dacɔ,

⁸ bawo fum wəkakɔ ɔntɔmpər fɛ təyɔ tin, ɔfɔcərə dɔpɔ ndɛ o ndɛ ɔŋsumpər dəyɔkɔt yɔn mɔ.

Wəka daka kɔ wətəyɔ daka

⁹ Pəmar wɛnc kosu wəlanj wətəyɔ daka pəpus, bawo Kanu kəndɛpɛnɛ kɔ.

¹⁰ Pəmar wəka daka pəpus, bawo Kanu kəndɛtɔrɛ dəkəcəmə dɔn, endəkɔcɛpər pəmɔ pɛlɛŋk pa dəkulum.

¹¹ Kɔ dec dowur-ɛ, nne yowon yowosəs yika, yɛlɛŋk ya yi yɛtɛmpɛnɛ, detes da yi dəsɔlɛ. Itɔ pəyi sɔ wəka daka, ɔŋsɔlɛ dəmosumpər-sumpər mən.

Pucuca kɔ mɛwakəs

¹² Pəbɔt fum nwe ɛmbər mɛwakəs mɔ! K'ancərə kɔ dəkəcəmə dɔtɔt-ɛ, ɔŋkəsɔtɔ kəway kətɔt ka kiyi kən doru nkɛ Mariki ɛnasɔŋ temer kəsɔŋ afum aŋɛ ŋambɔtər kɔ mɔ.

¹³ Ta nwe o nwe pəwakəs pələc mpe mɛfanj mən mɛndɛlɪŋərne kɔ mɛcɛpɛnɛ kɔ abəkɛc a pəlɔku: «Kanu kəwak kəsɔŋ'em kəciya,» bawo afɔtam kəsɔŋɛ Kanu kəciya, kɔ nkən Kanu kəfɔsɔŋɛ fum o fum kəbɛrɛ kiciya disrɛ.

¹⁴ Mba nwe o nwe mɛfanj mən mɛləc mɛŋlɪŋərne kɔ kəwakəs kəyɔ tes tɛləc, mɛcɛpɛnɛ kɔ abəkɛc.

¹⁵ Kɔ mɛfanj mɛləc mɛmbəkəs-ɛ, mokom kiciya, kiciya kəbəkəs kəkom defi.

¹⁶ Awɛnc'im aŋa aŋɛ imbɔtər mɔ, ta nəwosɛ a pətɪŋkər un,

¹⁷ bawo kəpocɛ kətɔt kɔ kətəŋnɛ nkɛ o nkɛ darenc kəŋyɛfɛ. Kanu Kas nkɛ kəlompəs yomotər-motər ya darenc mɔ, otɔrɛ ki, nkən Kanu nkɛ kəntəsəkpər ali kəmɛpər ka fər mɔ.

¹⁸ Bawo tatɔkɔ t'ɛnafanj ti k'ɔŋkɔmɛ su sɔ tamɛrəŋ toloku ta kance, ntɛ tɔŋsɔŋɛ payɔnɛ yɛbanəs yɔcɔkɔ-cɔkɔ ya yolompəs yɔn dacɔ mɔ.

Mɛnɛ fum wətɔt pəyɔ məyɔ mətɔt!

¹⁹ Nəcərə tantɛ belbel awɛnc'im aŋa: Pəmar nwe o nwe pəcɛlək kəcəŋkəl, ta pəbɛlkər kəlɔk-loku, pəcwon kətɛlɛ kɔ,

²⁰ bawo mɛtɛlɛ mɔfɔsɔŋ kəlomp fər ya Kanu kirɪŋ.

²¹ Nəlɪŋnɛ pəyikyik fəp kɔ mes mɛləc fəp mɛnɛ nəcyɔ mɔ, nəbanɛ waca mɛrəŋ toloku ntɛ anatəp nu. Toloku ntɛ tentam kəyɔc kəyi konu doru mɔ.

²² Nəcəmə toloku darəŋ, ta nəyɔnɛ acəŋkəl gbəcərəm aŋɛ ŋantɪŋkərne mɔ!

23 Nwɛ o nwɛ edecəŋkəl toloku ta əŋkɔt ti mɔ, owurɛnɛ fum nwɛ endeməmɛnnɛ kəro dɛmɛm mɔ.

24 K'elip kəmɔmɛnnɛ belbel-ɛ, pəkɔ, pəpəlɛrnɛ katəna alulu* nɔn təkɔ nɛyina mɔ.

25 Məna nwɛ mənɔkɔkɛ sariyɛ sətəŋnɛ sətɔt nɛ səsikəli afum mɔ, məsumpər si belbel, bafɔ məyɔnɛ wəcəŋkəl ka si gbəcərəm nwɛ ɛmpəlɛr mɔ de, mba wəcəŋkəl nwɛ ɛncəmɛ mes məyɔ mətɔt ma si darəŋ belbel mɔ. Pəbɔt fum nwɛ ɛncəmɛ si darəŋ mɔ.

26 Kɔ fum ɛncəm-ɛmɛnɛ kəyɔnɛ wəka dinɛ ta ɛŋkɛmbərɛnɛ kəlɔku-lɔku-ɛ, abəkɛc nɔn nɛyi kənɛmpəs, dinɛ dɔn dəsək fɛ.

27 Dinɛ dosoku ndɛ dɔntɔyɔ ali tɛbɛlɛk ta pəbir-bir ndɛ fər ya Kanu Papa kosu kirin mɔ dɔyɔnɛ nte: Nəgbəkərə awut aŋɛ akɛrɛ kɔ akas aŋa nafi mɔ, kɔ aran aŋɛ awos aŋa nafi mɔ dəpucuca paŋan. Nəkɛmbərɛnɛ mes mɛlɛc ma doru fəp.

2

Ta nəcəmɛnɛ fum

1 Awɛnc'im aŋa, kɔ nəlan Mariki kosu Yesu Krist nwɛ debeki dɔn dɛmbɛk mɔ-ɛ, ta nəcəmɛnɛ afum!

2 Kɔ fum ɛmbɛrɛ ndɛ kəlɔ ka dəkətɔla donu Kanu pəbərɛnɛ kurundɛ ka kɛma dətɛlɛr pəbərɛnɛ yamos yɔtɔt, wəlɔma wətɔyɔ daka sɔ pəbɛrɛ pəbərɛnɛ yamos yɛlɛc-ɛ,

3 nəŋkafəli fər nnɔ wəbərɛnɛ yamos yɔtɔt eyi mɔ. Nəlɔku kɔ: «Məna, məndɛ nnɔ dɔcəm dətɔt ndɛ!» Mba nəlɔku wətɔyɔ daka: «Məna, məcəmɛ ndɛ», kɔ pəyɔnɛ fɛ ti-ɛ, nəlɔku kɔ: «Məndɛ ndɛ dətɛgbɛkələ pəkɔ.»

4 Kɔ nəyɔ tatəkɔ-ɛ, bafɔ nəmbocnɛ tatəkɔ kiti ba? Pəmar fɛ nu kəyɔ ti!

5 Nəcəŋkəl awɛnc'im aŋa aŋɛ imbɔtər mɔ: Kanu kəyɛk-yɛk atɔyɔ daka doru dandɛ nte nantam kəbɛk kəlan mɔ, nəsɔtɔ kɛ ka dɛbɛ da Kanu nkɛ ɛnasəŋ temer kəsəŋ aŋɛ nambɔtər kɔ mɔ.

6 Mba nəna, nəfər-fərəs atɔyɔ daka! Bafɔ aka daka akakɔ nantərəs un, bafɔ nɔ nɔŋkəkərə nu dabɛ kəkɔcaŋər nu ba?

7 Bafɔ nɔ nɔŋlɔməs tewɛ tɔtɔt ta Mariki ba?

8 Kɔ pəyɔnɛ a nəcəmɛ sariyɛ sa abɛ darəŋ pəmɔ təkɔ Yɛcicəs Yosoku yoloku ti mɔ: «Məbɔtər wɛnc əm pəmɔ təkɔ məmbɔtərɛnɛ mɔ!» Kɔ nəyɔ ti-ɛ, nəyɔ belbel.

9 Mba kɔ nəncəmɛnɛ afum-ɛ, nənciya tɛm tatəkɔ, sariyɛ səmar kəsumpər un aciya, bawo nəlɛləs fɛ si.

10 Kɔ fum ɛncəmɛ sariyɛ fəp darəŋ mba pəciya tolɔku tin gbɔŋ ta si-ɛ, sariyɛ səmar kəsumpər'əm bawo məlɛləs fɛ si fəp.

* 1:24 Alulu = «andulu» 2:8 ALewy 19.18

11 Bawo nwe ɛnaloku: «Ta məsumpər dalakɔ!» mɔ, ɛnaloku sɔ: «Ta mədif fum!» Ti disre, kɔ məsak kəsumpər dalakɔ mba mədif fum-ɛ, pəmar sariyɛ səsumpər'am, bawo mələləs fɛ si.

12 Pəmar nəlok-loku kɔ nəyɔ pəmɔ afum aɲɛ aɲkakitine sariyɛ nɛ səsɔɲ afum akakɔ kəsikələ mɔ.

13 Afɔdekɔyɔnɛ nɔnɔfər fum nwe ɔntɔyɔnɛ akɔ nɔnɔfər mɔ, bawo nɔnɔfər dətam kiti.

Kəlan kɔ məyɔ

14 Ake dəkəcəmə dɔ tatəkɔ dɔyɔ-ɛ, awɛnc'im aɲa, fum kəcloku: «ilaɲ» mba k'ɔntɔ kəcmentər ti dəməyɔ mətɔt-ɛ? Kəlan kəɲkɔ kəntam kəyɔc kɔ ba?

15 Kɔ wɛnc'am wərəkun kɔ pəyɔnɛ fɛ ti, wɛnc'am wəran pəyi ta ɔyɔ yamos, ta ɔyɔ yeri yɔn ya dəsək-ɛ,

16 mba kɔ nələmbərɛ ɲa: «Kanu kəsɔle nu! Kanu kəsɔɲ nu yamos yɔtɔt! Kanu kəsɔɲ nu yeri yelərəm!» ta nəsɔɲ ɲa ca yɔkɔ yombut ɲa mɔ-ɛ, ake dəkəcəmə dɔ tɔyɔ-ɛ?

17 Itɔ kəlan nke kəntəmentərɛ dəmes məyɔ mətɔt mɔ kəlan kəfi kɔ kəyɔnɛ.

18 Mba fum wəlɔma pəloku: «Məna məyɔ kəlan, kɔ ina iyɔ mes məyɔ mətɔt.» Ina icyif ɲa: «Məmentər'im cəke cɔ kəlan kəntam kəyi ta mes məyɔ mətɔt meyi-ɛ. Kɔ pəyɔnɛ ina-ɛ, dəmes məyɔ mətɔt mem iɲmentər kəlan.»

19 Məna məlan a Kanu kin kɔ. Məyɔ ti belbel. Itɔ yɔɲk yelan sɔ, mba yeyi kəyikcɛnɛ kənesɛ.

20 Məntamɲɛ fɛ ba? Məfan kəcərə, a kəlan nke kəntəsɔl kɔ mes məyɔ mətɔt mɔ kəyɔ fɛ dəkəcəmə ba?

21 Ak'ɛnasɔɲɛ Kanu kəlɔm bembə bosu Abraham wəlompɔ-ɛ? Teta mes mən məyɔ, bawo ɛnasɔɲ wan kən Siyaka nde dətetek teta kəlɔɲnɛnɛ kɔ Kanu.

22 Mənəɲk kəlan kən kɔ mes mən məyɔ mətɔt mənasumpərənɛ: Dəmes mən məyɔ mətɔt, kəlan kəmentərɛ a kəmbut fɛ kɔ.

23 Tante tɔ yecicəs yɛnalərə, kəcloku: «Abraham ɛnalan Kanu, kɔ Kanu kəlɔm kɔ wəlompɔ teta kəlan kən.» K'awe kɔ wanapa ka Kanu.

24 Nənəɲk ti ɔɲ, Kanu kəfɔnəɲk dolompɔ da fum teta kəlan kən gbəcərəm, mba kəməmən sɔ mes mən məyɔ mətɔt.

25 Ti tɛnayı sɔ teta Rahabu wəran wəyamayama, bafɔ dəmes mən məyɔ mətɔt Kanu kənalɔm kɔ wəlompɔ, nte wəran nwe ɛnaban asom aka Yisrayel mɔ, k'ɛɲkafələ k'ementər ɲa dɔpɔ dɔləma mɔ ba?

26 Itɔ pəyi sɔ dis nde dɔntəsɔl kɔ ni mɔ defɛ, kəlan nke kəntəsɔl kɔ mes məyɔ mətɔt mɔ kəfi.

3

Kəcəmbər temer

¹ Awenc'im aɲa, ta nəwose kəla kəyɔne ka atəksɛ, bawo səna aɲe səntəksɛ mɔ, andekəboce su kiti nke kəndekəyɛnk kətəs ka afum alpəs akə mɔ.

² Anciya fəp fosu mɔyɔ melarəm. Kə fum əntə kəcɛiya dətəkə oɲloku mɔ, fum wəlompu əfɔ, nwe entam kəcəmbər dis dən fəp təkə ɛɲfaj mɔ.

³ Aɲgbəməs fəles fɛc dəcusu nte təɲsəɲe yecəme tɛfan tosu darəɲ mɔ, antam kəsɔle dis dayi fəp.

⁴ Nəcem-cemne sɔ cibil cəpəɲ: Kə afef ɲəpəɲ ɲewen ci-ɛ, ɲas ɲɛfɛt ɲɛɲkafəli ɲi, wəgbək pəkəkəre ɲi nnə o nnə ɛɲfaj mɔ.

⁵ Temer sɔ, paka pɛfɛt pə pəyɔne dərɪs, mba pɛntam kəpus kəyɔne ka paka pəkə pəɲsəɲe mes məpəɲ kəyɛfɛ mɔ. Nəcem-cemne nɛnc dɛfɛt ndɛ dɛntam kəcəf kulum kəpəɲ mɔ!

⁶ Temer ta fum sɔ nɛnc dɔ! Paka pɛlɛc pə mpe peyi su dərɪs mɔ, pi pɛɲyik-yikəs dis dosu fəp. Pi pendikəc nɛnc da yahanama kəyi kosu doru fəp.

⁷ Fum entam kəcəmbər sɛm ya doru tɛfan tən: Sɛm ya dop fəp, bɛmp, yelinɛ-linɛ kə sɛm ya dəkəba. Ayi kəcəmbər sɛm ya doru fəp tɛfan ta fum, k'encəmbər yi tɛfan tən.

⁸ Mba fum əfətam kəcəmbər temer tɛfan tən: Paka pɛlɛc pə kə peyi kəkafəle-kafəle tɛm fəp, pɛlare məkən* tɛp mme mɛɲɲid mɔ.

⁹ Pi pə səɲkor-kore nwe əyɔne Mariki kə Papa mɔ, mba sɔ pi pə səntolanɛ pɛlɛc afum aɲe Kanu kəlompəs ɲawurɛnɛ kə nkən mɔ.

¹⁰ Moloku ma kətolanɛ pətət kə ma kətolanɛ pɛlɛc kusu kin kaɲkɛ kə moɲwur. Awenc im aɲa, pəmar fɛ teyi tatəkə de!

¹¹ Kələmp kin kəfəsəɲ domun dobotu kə dodokət.

¹² Awenc im aɲa, akomp ɲeyi nɲe ɲəɲkom məntambɛnc mɔ ba? Kə pəyɔne fɛ ti, alembəra ɲəɲkom comp ba? Kələmp ka domun dodokət kəfətam kəsəɲ domun dobotu.

Kəcərə nke kəyɛfɛ darenc mɔ

¹³ Fum eyi nu dacɔ nwe ɛncem-cemne kəsək domp, pəyɔ sɔ kəcərə kəkət mɔ ba? Pəmar wəkəkə pəmentər ti dəmes mən mətət mosumpər, pəbətɛ mi amera kə kəcərə kəkət.

¹⁴ Mba kə nəntəmpər bəkəc yɛlare kəraca kədokət kə amera ɲa kələknɛ-ɛ, nəsak kəpusɛ kəcərə konu mes, nəcyemsɛnɛ kance.

¹⁵ Kəcərə kəkət kaɲkə bafɔ darenc kəyɛfɛ, mba nnə dəntəf kaɲkə kəyɛfɛ dəkəcem-cemne ka fum kə ka yəɲk.

¹⁶ Bawo nnə o nnə kəraca kə amera ɲa kələknɛ ɲɛɲyi mɔ, pəyamayama kə mɔyɔ mɛlɛc fəp mɛɲyi di.

* 3:8 Məkən = məkən

¹⁷ Mba kəcərə kəkət nke kəyefe darenc mɔ, kənuɲkene kə kəncemp, kə tɛyefe dənda kə kəyɔ pəforu, dərɛnc, kəcəɲkəl moloku ma afum, kəla nənɔfər kə mɔyɔ mətət, kəfɔyer fum, kəfətensər fum kəbət.

¹⁸ Pəmɔ fum nwe ɔmbɔf mənɟben mətət dəntɔf k'əsɔtɔ yetel yɔtət mɔ, atɛn pəforu aɲɛ ɲambɔf pəforu disre mɔ, ɲandesɔtɔ yetel ya dolompu.

4

Kəbətər ka ca ya doru

¹ Deke kəwan kəlarəm kə deke kəgbekəlɛnɛ kəlarəm kəɲyefe nu dacɔ-ɛ, kə pəntɔyɔnɛ dəmɛfan mɛlɛc mme moɲsutɛnɛ dis donu fəp disre mɔ?

² Nəfan ta nəsɔtɔ-ɛ. Nədif fum, kə nəyɔnɛ afum kəraca, mba nəfɔtam kəsɔtɔ nte o nte. Nəberɛnɛ kəcɔp kəlarəm kə kəwan kəlarəm, mba nəyɔ fɛ, bawo nəntola fɛ Kanu.

³ Nəntola Kanu ta nəsɔtɔ-ɛ, bawo bəkəc yɛlɛc yɔ nəntolanɛ, nte tɔɲsɔɲɛ nətam kəsɔtɔ kələsər-ləsər teta mɛfan monu mɔ.

⁴ Asumpər dalakɔ! Nəncərə fɛ a kəyɔnɛ wanapa ka doru dandɛ kəyɔnɛ wəterɛnɛ ka Kanu ba? Məna nwe mənɟfan kəyɔnɛ wanapa ka pələc pa doru mɔ, məsɔɲɛnɛ kəyɔnɛ ka wəterɛnɛ ka Kanu.

⁵ Yecicəs Yosoku yolok-loku fɛ samnɛ, kəcloku: «Kanu kəfan haɲ kə amera nɲɛ ɛnabər su mɔ ɲembas kɔ.»

⁶ Mba kəmar ka kəbət amera nke ɔsɔɲ su mɔ kəmbək, itɔ Yecicəs yoloku: «Kanu kəntɛfərɛnɛ alɛknɛ, mba atələknɛ ɲɔ Kanu kəɲsɔɲ kəmar ka kəbət kən amera.»

⁷ Itɔ pəmar nəyi Kanu darəɲ, kə nəyerɲkər ɲɔɲk ɲɛlɛc səbomp-ɛ, ɲɛɲyɛksər nu pəbɔlɛ.

⁸ Nəlɔtərɛ Kanu, ki sɔ kəɲlɔtərɛ nu. Nəsəkəsɛnɛ waca nəna aciya! Məsəkəsɛnɛ abəkəc məna nwe o nwe məntɔtəmpər pɛcɛm-cɛmɲɛ pin mɔ!

⁹ Nəɲaɲɲɛ tɛlər kəyi konu pucuca, nəndɛ kəbal ka pi, nəbok! Kəsɛl konu kəsəkpər kəyɔnɛ nu kəbok ka kəbal, pəbotu ponu pəyɔnɛ nu kəmɔncɛnɛ.

¹⁰ Nətore banca nɲɔ Mariki eyi mɔ, k'endɛpɛnɛ nu.

Ta məyɛmsɛnɛ wɛnc əm wəlan

¹¹ Awɛnc'im aɲa, ta nəyɛmsɛnɛnɛ! Nwe ɲyɛmsɛnɛ wɛnc, kə pəyɔnɛ fɛ ti-ɛ, pəkiti kə mɔ, sariyɛ s'eyi kəyɛmsɛnɛ, sariyɛ s'eyi kəkiti. Kə mənɟkiti sariyɛ, ta məyɔnɛ fum nwe ɛncəmə si darəɲ mɔ-ɛ, wəboc kiti ka si məyɔnɛ.

¹² Bawo Kanu sona kəsɔɲ su sariyɛ, ki kəntam kəboc kiti. Kanu sona kəntam kəyac, kə pəyɔnɛ fɛ ti-ɛ, kəmələk. An'ɔ məna məyɔnɛ ɔɲ-ɛ, məna nwe mənɟkiti wəndɛ kam mɔ?

Ta mələkne

¹³ Nəcəŋkəl'im, ndekəl oŋ nəna aŋe nəŋloku: «Məkə kə pəyɔne fe ti alna dare nde də səŋkə, səkəcepərəne di teren tin, səŋkəcaməs, səsətə pəsam pəlarəm.»

¹⁴ Ta nəncərə təkə doru donu deŋyi nu alna mə! Doru donu dowurəne kibi nke kəntuf tɛm tepic kəsakə sə mə.

¹⁵ Mba nte tə pəmar nəloku: «Kə Mariki efaŋ ti-ɛ, səŋyi doru, səyɔ nte kə pəyɔne fe ti-ɛ təkə.»

¹⁶ Mba nəyek-yekəsne kə nəlom. Kəlom fəp mes mələc mə kəyɔne.

¹⁷ Kə fum ɛncərə təkə aŋyɔ pətət ta aŋyɔ pi-ɛ, wəkakə ɔyɔ tes tələc.

5*Kəbeŋne ka aka daka*

¹ Ndekəl oŋ nəcəŋkəl'im, nəna aka daka! Nəbok nəsəŋe-səŋe teta pəcuy mpe pendebəp nu mə!

² Daka donu dente, yet yəsəm yamos yonu.

³ Kema konu kə gbeti bonu yosumpər mərka. Mərka mme məŋkəyɔne sede nse səndekəsumpər nu kiti mə, mərka məcsəm dis donu pəmə nenc mə. Mataka melpəs mame nəwətəs daka.

⁴ Nənəŋk! Kəway nke nənagbək abəce anu dale mə, kəŋkule. Kəbokene ka atel anu kəŋkə kəberə Mariki ma asodar a darenc dələŋəs.

⁵ Nənacepərəne doru donu kəsətə daka dəlarəm disre kə nəncepərər tefaŋ tonu. Bəkəc yonu yenanəmbərə pəmə nte asəŋəs pəcəl yeri pətəf teta dəsək nde aŋkəfay pi mə.

⁶ Nənaboc kiti nəsəŋe padif fum wəlompu, nwe ɔntəgbekəl nu mə.

Kəkar kə katola

⁷ Nəŋaŋne nəkar awenc'im aŋa alaŋ, haŋ Mariki pəcder. Nənəŋk təkə wəbifti dale eŋkar yetel yətət ya antəf mə: ɛncərə a mēne wəcafən ka mələfe kə wəka dəraŋ dəlpəs pətuf kərəsna.

⁸ Nəna sə, nəŋaŋne nəkar, nəyeŋk bəkəc, bawo kəder ka Mariki kəltərne.

⁹ Ta nəbokərəne, awenc'im aŋa alaŋ, nte təŋsəŋe ta Mariki eŋkiti nu mə. Wəkiti ɔltərne, pəmbəle fe sə pəberə!

¹⁰ Awenc'im aŋa alaŋ, nəcem-cəmne sayibe-e aŋe ŋanalok-loke tewe ta Mariki mə. Nətubucne kəkar kəbol-bolu ka aŋe ŋanabər pucuca mə.

¹¹ Nənəŋk təkə səntam kəloku a pəmbət aŋe ŋanabər pucuca mə. Nənane pacloku kəkar kəbol-bolu ka Yobu, nəncərə təkə Mariki ɛnayɔne kə telpəs mə. Mariki ɛla nənəfər k'əmbət amera.

¹² Pənaŋkanɛ, awɛnc'im aŋa, ta nədɛrmɛ darenc, ta nədɛrmɛ antɔf, ta nədɛrəm kədərəm nkɛ o nkɛ. Mba dəmɛdɛrəm monu pəmar mələku: «Ey» kɔ pəyɔnɛ kance kɔ-ɛ, mələku: «Ala» kɔ pəyɔnɛ a bafɔ kance kɔ-ɛ, nɛ tɔŋsɔŋɛ ta nəntɛmpɛnɛ kiti dantɔf mɔ.

¹³ Fum eyi nu dacɔ nwe eyi pəcuca mɔ ba? Pəmar pətola Kanu. Fum eyi pəbotu nu dacɔ ba? Pələŋəs melen ma kəkorkoru Kanu.

¹⁴ Fum wətətamnɛ eyi nu dacɔ ba? Pəmar fum wəkakɔ pəwe abeki a kəlonkanɛ ka alaŋ, ŋatola Kanu tetɔn, ŋabɔy kɔ moro mɛpic dəromp tewe ta Mariki.

¹⁵ Kɔ fum ontola Kanu kɔ kəlaŋ-ɛ, kətola kɔn kəndesɔŋɛ wətətamnɛ kətamnɛ. Mariki ɛnyɛkti kɔ pəcəmbər, k'ɛnayɔ mɛs mɛlɛc-ɛ, Kanu kəndɛŋaŋnɛnɛ kɔ mi.

¹⁶ Nəcɛŋsɛnɛ kiciya konu, nətolanɛnɛ, nɛ tɔŋsɔŋɛ nətamnɛ mɔ. Kətola ka fum wəlompɔ kəyɔ fənɔntər nɛ fəntam kəsəkprɛ mɛs mɔ.

¹⁷ Eli fum ɛnayı pəmɔ səna. Pəctola pəyɛŋki fəp wəcafən kətəder, kɔ wəcafən ɔntɔtuf haŋ meren maas kɔ yof camət-tin.

¹⁸ Kɔ Eli ontola sɔ Kanu, kɔ wəcafən ontuf sɔ, kɔ antɔf ŋəsɔŋ sɔ yokom.

¹⁹ Awɛnc'im aŋa, kɔ wəkin ɛŋgbaymɛ kance-ɛ, wəlɔma ɛntam kəliŋərnɛ kɔ pəsɔlnɛnɛ kɔ dɔpɔ da kance.

²⁰ Wəkakɔ pəcərə nɛ: Nwe oŋsɔlnɛnɛ wəciya dɔpɔ da Kanu mɔ, endeyac kɔ defɪ, pəkufun mɛs mɛlɛc mɛlarəm.

1 Isaṅ

An'ᵒ Isaṅ ᵒyᵒnε-ε, t'ake tᵒ pᵒmar pakaraṅεε areka ᵒn-ε?

Areka ᵒcᵒkᵒ-cᵒkᵒ ᵒa Isaṅ ᵒᵒ ᵒaṅε ᵒᵒε anacic meren wᵒcᵒ camᵒt-maas kᵒ kᵒcamᵒt (85) kᵒbᵒp ka meren wᵒcᵒ camᵒt-maṅkᵒle kᵒ kᵒcamᵒt (95) nte kᵒkom ka Krist kᵒnacepᵒr mᵒ. Isaṅ εnamentᵒrne fe kᵒyᵒne ka wᵒcicᵒs ka areka ᵒaṅε, mba sapitᵒr sᵒcᵒkᵒ-cᵒkᵒ sᵒmentᵒr a fᵒr yᵒn kirinᵒ yᵒ kᵒyi ka Yesu doru kᵒ kᵒfᵒte kᵒn afi dacᵒ kᵒ mes mamᵒkᵒ mᵒnacepᵒr (1.1-3). Tecicᵒs ta areka ᵒa Isaṅ tᵒlᵒtᵒreṅε kᵒwureṅε kᵒ tecicᵒs nte ambᵒp dᵒKawandi ka Isaṅ mᵒ. Ancem-cemne a Isaṅ εnacicᵒs Kawandi kᵒn kᵒ reka nyε maas dare da Efesi, nde εnande mᵒ: Areka ᵒa Isaṅ ᵒcᵒkᵒ-cᵒkᵒ, ᵒa merᵒṅ, kᵒ ᵒa maas.

Isaṅ εnacicε alaṅ fᵒp tem nte kᵒlonᵒane ka alaṅ kᵒnayi dᵒpᵒcuca pa afum alᵒma aṅε ancwe «acᵒre» mᵒ. Afum akakᵒ ᵒanccem-cemne a Yesu Kanu yati εnayᵒne, bafᵒ fum εnayi nwe ᵒyᵒne dis kᵒ mecir pᵒyi antᵒf kᵒronᵒ mᵒ. It'ᵒsᵒṅε Isaṅ kᵒcicᵒs kᵒsᵒṅε kᵒcᵒre a fᵒr yᵒn kirinᵒ mes ma kᵒyi doru ka Yesu kᵒnacepᵒr haṅ nkᵒnsᵒrka pᵒcgbuṅεε Yesu waca wᵒn yati (1.1-3). Isaṅ εnacic areka ᵒaṅε nte tᵒṅsᵒṅε pᵒlas pᵒbotu pᵒn mᵒ (1 Isaṅ 1.4), pᵒsᵒṅε alaṅ kᵒtᵒciya (1 Isaṅ 2.1), pᵒbum alaṅ mᵒtᵒksε ma yem (1 Isaṅ 2.26), pᵒyᵒṅkᵒs alaṅ bᵒkᵒc kᵒsᵒṅε ᵒa kᵒcᵒre a ayac ᵒa (5.13).

Tokotᵒreṅε ta moloku ma areka

1. Isaṅ ementᵒr areka ᵒn, k'oloku tes nte tᵒsᵒṅε k'ancic ᵒi mᵒ (1.1-4).
2. Isaṅ εnasᵒksᵒr afum nte Kanu kᵒyᵒne pᵒwanᵒkᵒra mᵒ, pᵒmar pacepᵒreṅε doru kᵒyi dᵒpᵒwanᵒkᵒra pᵒmᵒ tᵒkᵒ Yesu εnacepᵒreṅε di mᵒ (1.5-3.10).
3. Nte tᵒncᵒme ti darᵒṅ mᵒ, Isaṅ εnacem-cemᵒs tosom nte tᵒyᵒne ta kᵒbᵒtᵒreṅε mᵒ (3.11-5.12).
4. Moloku mᵒlpᵒs (5.13-21).

Toloku ta kiyi wᵒyᵒṅ

¹ Tᵒkᵒ tenayi kᵒyᵒfe dᵒkᵒcop, nte sᵒnane, nte sᵒnanᵒṅke fᵒr yosu, nte sᵒnagbᵒkᵒre kᵒ waca wosu wonᵒgbuṅsᵒreṅε ti mᵒ, ti tᵒyᵒne toloku ta kiyi wᵒyᵒṅ.

² Awa kiyi wᵒyᵒṅ kᵒmentᵒrne, kᵒ sᵒnᵒṅ ki, sᵒndᵒṅ sede sa ki, sᵒluku nu kiyi wᵒyᵒṅ ka doru o doru, nkε kᵒnayi Kas kᵒsᵒk akᵒ kᵒmentᵒrne su mᵒ.

³ Sᵒndᵒṅkᵒr nᵒna nte sᵒnanᵒṅ kᵒ sᵒne mᵒ, nte tᵒṅsᵒṅε nᵒna sᵒ nᵒtᵒṅε kᵒ sᵒna, patᵒṅε fᵒp fosu kᵒ Kas kᵒ wan kᵒn Yesu Krist mᵒ.

4 Tatəkə, səna, səncic ti, nte tənşəne pəbotu posu pelare mə.

Kanu pəwanjəra pə

5 Tosom nte sənənene Krist mə, tə səndəjkər nu, ti təyənə Kanu pəwanjəra pə, kubump nke o nke kəyi fə kə.

6 Kə səloku a səntəne kə nkən mba səckət dəkubump-ε, kəyeme kə səndε, səyi fə kəcyə nte kance kəloku mə.

7 Mba kə səndekət pəwanjəra disre, pəmə təkə nkənsərka eyi pəwanjəra mə-ε, səyi kətəne disre kə akə ηayi dəpəwanjəra mə, mecir ma Yesu wan kən mendesəkəs su pəciya fəp.

8 Kə səloku a səyə fə kiciya-ε, kətişkərne kə səndε, kance kəyi fə su.

9 Kə səwose kəcən kiciya kosu-ε, Kanu kənyə təkə kənaloku mə, kəlomp, kəndənənene su kiciya kosu, kəsəkəs su pətəlomp fəp.

10 Kə səloku a sənciya fε-ε, səşəne pəyi pəmə Kanu wəyeme əfə, toloku tən teyi fə su.

2

Krist ender kəmar su

1 Awut em, incic'on tantε nte tənşəne ta nənciya mə. Mba kə fum enciya-ε, səyə wəmar nwe eyi nde Papa kəsək mə, Yesu Krist, wəlompu.

2 Nkən yati əyənə poləne mpε pəjkump kiciya kosu mə, bafə kiciya ka səna gbəcərəm, mba ka aka doru dandε fəp.

3 Kə səmənškərne mosom ma Kanu-ε, səntam kəcloku a səncərə kə.

4 Nwe oηloku: «Incərə kə» ta wəkayi emənškərne mosom mən-ε, wəyeme əfə, kance kəyi fə kə.

5 Mba nwe emənškərne toloku tən mə, kance kəyi wəkayi, kəbətər ka Kanu kəmbut fə kə. Nte tənşəne a səncərə a səyi kə nkən:

6 Nwe oηloku kəyi kə Kanu mə, pəmar pəkət pəmə Yesu.

7 Nəna anε imbətər mə, bafə tosom tofu t'incic'on, mba tosom tokur nte nənasətə kəyefε dəkəcop mə. Tosom tokur tatəkə təyənə toloku təkə nənane mə.

8 Kəca kələma, tosom tofu t'incic'on nte təyənə kance nnə Krist eyi mə kə nnə nəna nəyi mə, bawo kubump kəncəpər kə pəwanjəra pa kance peyi oη kəmar.

9 Nwe oηloku kəyi dəpəwanjəra mba wəkayi pəter wənc wəlan mə, əsərəyi dəkubump.

10 Nwe əmbətər wənc wəlan mə eyi dəpəwanjəra, nnə eyi mə, nte o nte teyi fə nte təmpət kə mə.

11 Mba nwe enter wənc wəlan mə, dəkubump eyi kəkət, εncərə fε nde eyi kəkə mə, bawo kubump kəsəne kə fər kətənəjk.

Kətəfərnə ka doru kə ka ater a Krist

12 Kəcic'on k'indε awut em,
bawo aḡaḡnən'on kiciya konu teta tewe ta Krist.

13 Kəcic'on k'indε, papa aḡa,
bawo nəncərə wəkə enayi kəyεfε dəkəcop mə.

Kəcic'on k'indε, nəna atemp,
bawo nəntam Wələc, Sentani.

14 Incic'on awut em,
bawo nəncərə Papa Kanu.

Incic'on papa aḡa,
bawo nəncərə wəkə enayi kəyεfε dəkəcop mə.

Incic'on nəna atemp,
bawo nəyə səkət,
kə toloku ta Kanu teyi nu,
kə nəntam Wələc, Sentani.

15 Ta nəbətər mes ma doru, ta nəbətər sə daka da doru. Kə
fum əmbətər mes ma doru-ε, kəbətər ka Papa Kanu kəfəyi kə.

16 Bawo daka o daka ndε deyι doru mə, bafə ndena Papa
Kanu dəḡyεfε, mba da doru dandε də. Kəyεfε tefan telεc ta dis
kəkə tefan telεc ta fər kəbəp ka kəlanḡ ka kədət banca ka kəsətə
ka daka dadəkə, maməkə fəp doru dandε dəyə mi.

17 Doru dandε dendelip kə mεfanḡ mεlεc ma di, mba mənə
nwε məncəmə tefanḡ ta Kanu darəḡ mə, mənḡyi wəyεḡ doru o
doru.

18 Awut em, dec dεlpəs d'ayi dandε! Nənane pacloku a wəter
ka Krist endeder. Kance kə: Ater a Krist ḡala oḡ ndəkəl. It'əsəḡε
ntε səncərənε a dec dεlpəs dəmbəp mə.

19 ḡanawur kətəḡnε kosu disrε, mba bafə akosu ḡanayi. Bawo
ḡanayənε akosu-ε, kə ḡanader ḡayi kə səna. Tementərne ali
wəkin ḡa dacə enayənε fε wəkosu.

20 Kə nəna, nəbətər Krist Amera ḡecempi, it'əsəḡε nte fəp fonu
nəncərə kance mə.

21 Incic'on, təyənε fε a nəncərə fε kance, mba bawo ali yem
yin yeyi fε dəkance nkε nəncərə mə.

22 An'əyənε wəyεmε, kə pəyənε fε nwε ence kəloku a Yesu
əyənε Krist mə-ε? Awa wəkəkə əyənε wəter ka Krist, wəkəkə
ece Papa Kanu kə Wan.

23 Nwε o nwε ence Wan mə, əyə fε sə Papa Kanu. Nwε owosε
pəloku sə teta Wan mə, nkən əyə sə Papa Kanu.

24 Kə nəna, nəmεḡkərne təkə nənane kəyεfε dəkəcop mə. Kə
nəmεḡkərne təkə nənane kəyεfε dəkəcop mə-ε, nəna sə nəḡyi
dəWan kə dəKas.

25 Temer nte Krist εnasəḡ su mə, təyənε kiyi wəyεḡ ka doru
o doru.

26 Incic'on tantε teta akə ḡantiḡkər'un mə.

²⁷ Kɔ nɔna, kɛbɔy ka Amera Nɛcɛmpɪ ɲɔkɔ nɔnasɔtɛr Krist mɔ, kɛyi nu. Kɛdɛr ka fum kɛdetɛks'on kɛyɔ fɛ dɛkɛcɛmɛ nno nɛyi mɔ, bawo kɛbɔy kɔn kɛntɛks'on mes fɛp. Kɛbɔy ka Amera Nɛcɛmpɪ kanɲkɔ kɛyɔnɛ kance, kɛyɔ fɛ yem. Awa! Nɛsumpɛr kɛyi dɛKrist pɛmɔ tɔkɔ kɛbɔy ka Amera Nɛcɛmpɪ kɛnatɛks'on mɔ.

Awut a Kanu

²⁸ Nɛkɛl ɔɲ awut em, nɛsumpɛr kɛyi dɛKrist, nte tɔɲsɔɲɛ pɛyɔnɛ tɛm nte o nte Krist endɛmentɛrɛnɛ mɔ, patɔmpɛr kɛbɛkɛnɛ ta malap mmɛ o mmɛ mɔsɔɲɛ su kɛbɔlɛ kɔ tɛm ta kɛdɛr kɔn.

²⁹ Kɔ nɛncɛrɛ a Krist olomp-ɛ, nɛcɛrɛ sɔ a nwe o nwe ɔɲkɔt pɛlompɪ disrɛ mɔ, dokom da Kanu d'ɛyɛfɛ.

3

¹ Nɛmɔmɛn ma kɛbɔtɛr kɛpɔɲ nke Papa Kanu ɔsɔɲ su mɔ, kɛbɔtɛr kanɲkɔ kɛsɔɲɛ pacwe su «awut a Kanu.» Nɔ ɲɔ sɛyɔnɛ yati! K'afum a doru ɲantɔcɛrɛ su-ɛ, tɔyɔnɛ a ɲancɛrɛ fɛ Kanu.

² Nɔna aɲɛ imbɔtɛr mɔ, nɛkɛl ɔɲ awut a Kanu ɲɔ sɛyɔnɛ. Tɛyi nte sɛndɛyi mɔ tɛntamentɛrɛnɛ fɛ kɛrɛsna. Mba sɛncɛrɛ a tɛm o tɛm nte Krist endɛmentɛrɛnɛ mɔ, sɛndɛwɛrɛnɛ kɔ nkɔn, bawo sɛndenɔɲk kɔ pɛmɔ tɔkɔ eyi mɔ.

³ Nwe o nwe ɔtɔmpɛr kɛgbɛkɛr amera kanɲkɔ, ɔɲsɔkɛsɛnɛ pɛmɔ tɔkɔ Krist ɔsɔk mɔ.

⁴ Nwe o nwe enciya mɔ, bafɔ sariyɛ sa Kanu s'ɛncɛmɛ darɔɲ. Bawo kiciya, kɛyɛɲkɛr ka sariyɛ sasɔkɔ domp kɔ.

⁵ Awa! Nɛncɛrɛ ti, Krist ɛnamentɛrɛnɛ kɛdeliɲ kiciya. Kɔ nkɔn, kiciya kɛyi fɛ kɔ.

⁶ Nwe o nwe eyi kɔ Krist mɔ, ɔfɔciya. Nwe o nwe enciya mɔ ɛncɛrɛ fɛ kɔ, ali katin ɛnɔɲk fɛ kɔ.

⁷ Awut em, ta fum o fum pɛtɪɲkɛr nu! Nwe ɔɲyɔ tes tolompɪ mɔ, wɛlompɪ ɔfɔ, pɛmɔ tɔkɔ Krist olomp mɔ.

⁸ Nwe enciya mɔ dɔɲɔɲk ɲɛlɛc ɛyɛfɛ, bawo ɲɔɲk ɲɛlɛc ɲɛnaciya kɛyɛfɛ dɛkɛcɔp. Kɔ Wan ka Kanu ɛnamentɛrɛnɛ-ɛ, tɛta kɛlɛsɛr ka yɛbɛc ya ɲɔɲk ɲɛlɛc kɛnayi.

⁹ Nwe o nwe ɛɲyɛfɛ dokom da Kanu mɔ ɔfɔciya, bawo defet da Kanu, ndɛ dɔyɔnɛ toloku tɔn mɔ, dɛyi kɔ. Wɛkayi ɔfɔtam kɛciya bawo dɛKanu ɛyɛfɛ.

¹⁰ Ti tɔyɔnɛ tɛnɛpɛlɛ ta ayɛfɛ dokom da Kanu kɔ ayɛfɛ dokom da ɲɔɲk ɲɛlɛc: Nwe o nwe ɔntɔyɔ pɛlompɪ mɔ, bafɔ dokom da Kanu d'ɛyɛfɛ, tin tayi tɔ kɔ nwe ɔntɔbɔtɛr wɛnc wɛlɔɲ mɔ.

Pabɔtɛrɛnɛ!

¹¹ Tosom tante tɔ nɛnane kɛyɛfɛ dɛkɛcɔp: Pabɔtɛrɛnɛ!

¹² Ta payɔ pɛmɔ Kayɛn, nwe ɛnayɛfɛ dɛWɛlɛc, Sentani, k'endif wɛnc mɔ. T'ake t'ɛnadifɛ kɔ-ɛ? Bawo yɛbɛc yɔn yɛnalomp fɛ, ya wɛnc yolomp.

¹³ Awɛnc im aŋa, ta teciyanen'on k'afum a doru ŋanter nu-ε.

¹⁴ Səna, səncərə a nde defi deyi mə səyefe, kə səŋkə nde kiyi wəyɛŋ kəyi mə, bawo səmbətər awɛnc asu alaŋ. Nwɛ ɔntəbətər wɛnc mə, eyi nde defi deyi mə.

¹⁵ Nwɛ o nwɛ enter wɛnc mə wədif fum ɔfɔ. Nəncərə ali wədif fum wəkin, kiyi wəyɛŋ ka doru o doru kəyi fɛ kə.

¹⁶ Tante tɔŋsɔŋɛ su kəcərə kəbətər: Krist ɔsɔŋ kiyi wəyɛŋ kən teta səna. Səna sɔ pəmar səsɔŋ kiyi wəyɛŋ kosu teta awɛnc asu alaŋ.

¹⁷ Mba kə fum wəlɔma ɔyɔ daka da doru, pənəŋk wɛnc wəlaŋ pəyi dəpəcuca, mba pəgbətər wɛnc wəkakə abəkəc-ε, cəke cɔ kəbətər ka Kanu kəyi wəkayi-ε?

¹⁸ Awut em, ta payɔ kəbətər ka dəmoloku kə dətəmer gbəcərəm, mba payɔ kəbətər nkɛ kəŋmentərne dəmɔyɔ kə dəkance mə.

Kəlaŋ ka afum Kanu fər kirin

¹⁹ Tatəkɔ tɔŋsɔŋɛ su kəcərə a aka kance ŋɔ səyɔnɛ, bəkəc yosu yɔfər Kanu fər kirin.

²⁰ Bawo kə bəkəc yosu yoloku a sənciya-ε, Kanu kəmbək kətəs yi, kə kəncərə mes fəp.

²¹ Nəna aŋɛ imbətər mə, kə bəkəc yosu yəntɔloku su a sənciya-ε, səyɔ kəbəkne nde Kanu kəyi mə.

²² Ntɛ o nte səntola mə səŋsətər kə ti, bawo səmɛŋkərne mosom mən, kə səŋyɔ sɔ mes mme məmbət kə mə.

²³ Tosom tən tentɛ: Pəgbəkər tewe ta wan kən Yesu Krist kəlaŋ, pəbətərɛnɛ pəmɔ tosom təkɔ ɛnasom su mə.

²⁴ Məna nwɛ məmɛŋkərne mosom məməkɔ mə, məyi dəKanu, pəmɔ nte Kanu kəyi dəməna wəkayi mə. Amera Nəcɛmpi ŋəkɔ ɛnasɔŋ su mə, ŋɔŋsɔŋɛ kəcərə a Kanu kəyi su.

4

Amera ŋa Kanu kə ŋa wəterɛnɛ kən

¹ Nəna aŋɛ imbətər mə, ta nəlaŋ akɔ ŋabaŋɛnɛ kəyɔ Amera mə fəp. Mba nəkəkɛ yi nte tɔŋsɔŋɛ nətam kəcərə kə pəyɔnɛ ya dəKanu yɔ-ε, bawo sayibɛ sa yem səlarəm səsamsər doru.

² Tante disrɛ nəntam kəcərə a Amera ŋa Kanu ŋɔ: Amera ŋɛ o ŋɛ ŋɔŋwosɛ kəcərə a Yesu Krist ɛnader pəyɔnɛ fum mə, ŋa Kanu ŋɔ.

³ Mba amera ŋɛ o ŋɛ ŋɔntəwosɛ kəloku a Yesu ɛnader cəfum mə, bafɔ ŋa Kanu ŋɔ, ŋa wəter Krist ŋɔ. Nənane pəcloku a kəder kə wəter ka Krist ɛndɛ, ndɛkəl oŋ eyi doru.

⁴ Nəna awut em, aka Kanu ŋɔ nəyɔnɛ, kə nəntam sayibɛ sa yem, bawo nwɛ eyi nu mə, ɛntas nwɛ eyi doru mə.

⁵ ŋa, aka doru ŋɔ. Ti təsɔŋɛ nte moloku maŋaŋ məyɔnɛ ma doru mə, kə doru dəncəŋkəl ŋa.

⁶ Səna, aka Kanu ḡə səyənə. Nwε encərə Kanu mə, encəḡkəl su. Nwε əntəyənə wəka Kanu mə əfəcəḡkəl su. Ti təsəḡe su kəcərə amera ḡa kance kə amera ḡa kətiḡkər.

Kanu, kəbətər kə

⁷ Nəna aḡe imbətər mə, pabətərəne, bawo kəbətər dokom da Kanu də kəyefe. Nwε o nwε əbətər, dokom da Kanu d'eyefe, k'encərə sə Kanu.

⁸ Nwε əntəbətər mə, encərə fe Kanu ali katin, bawo Kanu, kəbətər kə.

⁹ Tante tə kəbətər ka Kanu kənaməntərne su dacə: Kə Kanu kəsom wan kən sona doru nte təḡsəḡe pəmar su səstər kə kiyi wəyən mə.

¹⁰ Kəbətər kaḡkə, bafə sən'əbətər Kanu, mba nkən əbətər su. Kə Kanu kəmbətər su haḡ kə kəsom wan kən, nwε əyənə poloḡne mpe poḡkump kiciya kosu mə.

¹¹ Nəna aḡe imbətər mə, kə Kanu kəmbətər su tante-ε, pəmar səna alaḡ sə fəp pabətərəne.

¹² Ali katin fum o fum eḡbətne fe Kanu. Kə səmbətərəne-ε, Kanu kəḡyi su dacə, kəbətər kən kəfəbut su.

¹³ Tante tə səntam kəcərə a səyi dəKanu, kə Kanu kəyi dəsəna: Bawo əsəḡ su Amera ḡən.

¹⁴ Kə səna səḡbətne, kə səyənə sede a Papa osom Wan kədeyənə wəyac ka doru.

¹⁵ Nwε o nwε oḡwosə kəloku a Yesu əyənə Wan ka Kanu mə, Kanu kəḡyi kə, nkən sə pəyi dəKanu.

¹⁶ Kə səna, səncərə kəbətər nke Kanu kəmbətər su mə, kə səḡbekər kəbətər kaḡkə kəlaḡ.

Kanu, kəbətər kə. Nwε eḡyi kəbətər disre mə, eyi dəKanu, Kanu kəyi dəwəkayi.

¹⁷ Kə kəbətər kosu kəntəbut-ε, təḡsəḡe su kəbəkne dəsək nde Kanu kəḡkiti su mə. Ta ake-ε? Bawo kiyi kosu doru kəwurene kə ka Yesu Krist.

¹⁸ Kənesə kəyi fe kəbətər disre. Kə kəbətər kəntəbut-ε, kəmbeləs kənesə. Bawo kənesə kəncem-ceməs a kətərəs kəndeder. Wənesə, kəbətər kəmbut kə.

¹⁹ Kə səna, səmbətər, bawo Kanu kənanuḡkenə kəbətər su.

²⁰ Kə fum oloku: «imbətər Kanu» mba pəter wənc wəlaḡ-ε, wəyemə əfə, bawo nwε əntəbətər wənc nwε eḡḡəḡk mə, əfətam kəbətər Kanu nke əntənəḡk mə.

²¹ Tosom tante tə Kanu kənasom su: Nwε əmbətər Kanu mə, pəmar pəbətər sə wənc.

5

Katam kosu ka doru

¹ Nwε o nwε elan̄ a Yesu ɔyɔnε Krist mɔ, fum wɛkakɔ dokom da Kanu d'eyεfε. Nwε o nwε ɔmbɔtɛr wɛkombɛra mɔ, ɔmbɔtɛr sɔ nwε eyεfε dokom da wɛkayi mɔ.

² Kɔ sɛmbɔtɛr Kanu, sɛcɛmε sɔ mosom mɔn darɛŋ-ε, sɛntam kɛcɛrε a sɛmbɔtɛr awut a Kanu.

³ Bawo kɛbɔtɛr ka Kanu kɛyɔnε a sɛmɛŋkɛrnε mosom mɔn. Mosom mamɔkɔ mɔfɔtɔrɛs,

⁴ bawo nwε o nwε eyεfε dokom da Kanu mɔ, εntam doru. Tes nte tɔsɔŋε su katam doru mɔ, it'ɔyɔnε kɛlan̄ kosu.

⁵ An'ɔyɔnε wɛtam ka doru-ε, kɔ pɛyɔnε fε nwε elan̄ a Yesu ɔyɔnε Wan ka Kanu mɔ?

⁶ Nkɔn Yesu Krist nwε εnader su kɔ domun da kɛgbɛt kɔn dɛromun kɔ mecir ma defi dɔn mɔ, bafɔ domun gbɛcɛrɛm d'εnakεrε, mba domun kɔ mecir. Amera ŋɔsɔŋ sede sasɔkɔ, bawo Amera ŋɔyɔnε kance.

⁷ Awa ca maas yɔsɔŋ sede sa ti:

⁸ Amera, domun kɔ mecir, ca yayε maas fɛp yɛntɔŋnε ti.

⁹ Kɔ sɛwɔsε sede sa afum-ε, sede sa Kanu sɛmbɛk sɛtas si. Bawo sede sa Kanu sɛntɔŋnε kɛsɔŋ sede teta Wan kɔn.

¹⁰ Nwε εŋgbɛkɛr kɛlan̄ kɔn nde Wan ka Kanu eyi mɔ, ɔyɔ sede sasɔkɔ d'ŋkɔnsɛrka. Nwε ɔntɔlan̄ Kanu mɔ, εŋgbɛkɛl kance nke Kanu kɛnaloku mɔ, bawo εŋgbɛkɛr fε kɛlan̄ kɔn dɛsede nse Kanu kɛsɔŋ teta Wan kɔn mɔ.

¹¹ Sede sasɔkɔ sɛmentɛr a Kanu kɛsɔŋ su kiyi wɛyɛŋ ka doru o doru. Kiyi wɛyɛŋ kan̄kɔ, dɛWan kɔn kɛyi.

¹² Nwε ɔyɔ Wan mɔ, ɔyɔ sɔ kiyi wɛyɛŋ. Nwε ɔntɔyɔ Wan ka Kanu mɔ, ɔfɔyɔ kiyi wɛyɛŋ.

Kiyi wɛyɛŋ ka doru o doru

¹³ Tatɔkɔ, incic'on ti, nte tɔŋsɔŋε nu kɛcɛrε a nɛyɔ kiyi wɛyɛŋ ka doru o doru mɔ, nɛna an̄ε nɛŋgbɛkɛr kɛlan̄ konu nde tewe ta Wan ka Kanu teyi mɔ.

¹⁴ Kɛban̄sε nke sɛyɔ nnɔ tewe ta Wan ka Kanu teyi mɔ kɛyɔnε, kɔ sɛntola kɔ paka mpε o mpε tɛfan̄ tɔn disrε-ε, εmban̄ su.

¹⁵ Kɔ pɛyɔnε a sɛncɛrε a εmban̄ su-ε, mpε o mpε pɔ sɛntola kɔ, sɛŋsɔtɛr kɔ pi.

¹⁶ Kɔ fum εnɛŋk wɛnc wɛlan̄ pɛcciya kiciya nke kɛntɔsolε kɔ dɛdefi mɔ, pɛtolanε kɔ Kanu, wɛnc wɛkakɔ ɔŋsɔtɔ kiyi wɛyɛŋ. Afum akɔ ŋanciya kiciya nke kɛntɔsolε dɛdefi mɔ, ŋ'in̄loku tan̄an. Kiciya kɛyi nke kɛsolε dɛdefi mɔ, bafɔ kiciya kan̄kɔ k'in̄loku a patolanε ki de.

¹⁷ Kɛtɔlomp nke o nke, kiciya kɔ. Mba kiciya kɛyi nke kɛtɔsolε dɛdefi mɔ.

18 Səncəre a nwe o nwe eyefe dokom da Kanu mə, əfəciya. Bawo nwe eyefe dokom da Kanu mə ombum wəkayi, Wələc, Sentani, əfəgbuṅene kə.

19 Səncəre a aka Kanu ḡə səyənə, mba aka doru fəp ḡayi kətam ka Wələc, Sentani dəntəf.

20 Mba səncəre sə a Wan ka Kanu enader kədesəḡ su kəsək domp, nte tənṣənə səcəre nwe əyənə Kance mə. DəKance ayi, dəkəmar ka Wan kən Yesu Krist. Nkən əyənə Kanu ka kance yati kə kiyi wəyən ka doru o doru.

21 Awut em, nəkəmbərne mərəḡka.

2 Isan

An'ɔ Isan ɔyɔnɛ-ɛ, t'ake tɔ pɔmar pakaraɲɛnɛ areka ɲɔn ɲa mɛrɔɲ-ɛ?

Isan wɔsom wɔka Yesu ɛnacicɔs areka ɲɔn ɲa mɛrɔɲ ɲɛ meren wɔco camɔt-maas kɔ kɛcamɔt (85) kɛbɔp ka meren wɔco camɔt-manɲkɛlɛ kɔ kɛcamɔt (95) nte kɛkom ka Yesu Krist kɛnacepɔr mɔ. Isan ɛnamentɔrne fe kɛyɔne ka wɛcicɔs ka areka ɲaɲɛ, mba encwene nkɔnsɔrka «Wɔbeki». Moloku ma Areka ɲa mɛrɔɲ ɲa Isan mɔlɔtɔrne kɛsurene mme ambɔp Kawandi kɔn mɔ. Tatɔkɔ tɔ tentam kɛyi pɔmɔ tɔkɔ oloku teta tosom ta Yesu mɔ, a pabɔtɔrene aɲɛ kɔ akɔ. Kɔ nte oloku kɛbɔtɔr ka Yesu dɔmosom mɔ (1.5-6, Isan 15.9-10). Ancɛm-cɛmne a Isan wɔsom wɔka Yesu ɛnacicɔs Kawandi kɔn kɔ reka yɔn maas tɛm nte ɛnayi dare da Efesi mɔ. Isan ɛnacicɛ kɔlɔɲkanɛ ka alaɲ a Yesu nke ɛnawe «Wɔran wɔyɛk-yɛk kɔ awut ɔn»^{*} mɔ. Tɛfaɲ ta Isan nte tɛnasɔɲɛ kɔ kɛcicɔs areka ɲaɲɛ mɔ tɛnayɔne kɛyɛɲkɔs kɔlɔɲkanɛ ka alaɲ bɛkɔc pɔsɔɲɛ ɲa kɛbumne mɛtɛkɛsɛ ma yem.

Tokotɔrene ta moloku m'areka

1. Isan oncop areka pɔcbɔnc akɔ ancicɛ ɲi mɔ pɔcyifɛne ɲa sɔ (1.1-3).
2. Kɔ tɛyɛfɛ dɔnda-ɛ pɔcyɛɲkɔs kɔlɔɲkanɛ ka alaɲ a Yesu bɛkɔc, pɔccɛm-cɛmɔs ɲa sɔ tosom tɔkɔ tɛmbɛk mosom fɔp mɔ (1.4-6).
3. Kɔ tencepɔr-ɛ, Isan oloku afum kɛkɛmbɔrne atɲɲkɔr afum aɲɛ ɲander mɔ (1.7-11).
4. Kɔlɔɲkanɛ ka alaɲ a Yesu nke eyi mɔ, k'elɔpsɔr kɛyif (1.12-13).

Kɛyif

¹ Ina, wɔbeki, incic areka ɲɛ kɛkɔ nda wɔran nwe Kanu kɛyɛk-yɛk mɔ[†] kɔ awut ɔn aɲɛ imbɔtɔr yati mɔ. Bafɔ ina sona ɔbɔtɔr nu, mba akɔ ɲancɔre kance mɔ fɔp.

² Imbɔtɔr nu teta kance nke kɛyi su kɔ kɛndeyi su doru o doru mɔ.

³ Papa Kanu kɔ Yesu Krist wan ka Papa ɲasɔɲ su kɛmar kifɔli, nɔnɔfɔr kɔ pɔforu dɛkance kɔ dɛkɛbɔtɔr mɔ.

Tosom nte asɔtɔr Papa mɔ

⁴ Bel-bel bɔ pɔmbɔt im kɛbɔp awut am alɔma ɲackɔtɛne kance, pɔmɔ tɔkɔ Papa osom su ti mɔ.

* : Isan pɔtubcɛne kɔlɔɲkanɛ ka alaɲ a Yesu kɔ «wɔran wɔyɛk-yɛk kɔ awut ɔn.»

† 1:1 Wɔran nwe Kanu kɛyɛk-yɛk mɔ kɔ awut ɔn = kɔlɔɲkanɛ ka alaɲ Yesu

⁵ Ndekəl on, mənə wəran nwe Kanu kəyək-yək mə[‡], intol'am nte iyi kəcic'am mə: Pabətərenə! Bafə tosom tofu tə, mba nte sənəsətə kəyefe dəkəcop da kəlan kosu mə.

⁶ Kəbətər kəyənə: Pəmar pakət mosom ma Kanu pəmə təkə kəloku mi mə. Tatəkə təyənə tosom nte pəmar nəkət mə, pəmə təkə nənane ti kəyefe dəkəcop da kəlan konu mə.

⁷ Atinjər afum alarəm ɲasamsər doru, ɲafati kəwose kəloku a Yesu Krist kance disre əyənə fum. Wətinjər afum wəkakə wəter ka Krist əyənə.

⁸ Nəkembərne nənəsərka nte tənşənə ta yokom ya yəbəc yonu yəsələr nu mə, mba nəşətənə ti kəway kətəɲnənə ka ti.

⁹ Mənə nwe o nwe əɲkə pəbələ, mba ta məyi kətəkse ka Krist mə, məyə fə Kanu. Mənə nwe məɲyi kətəkse kanjə disre mə, məyə Kas kə Wan.

¹⁰ Kə fum ender pəy'un dacə mba ta ɛɲkərə kətəkse kanjə-ɛ, ta məbanj kə nde ndaram, ta məyif kə yati.

¹¹ Bawo mənə nwe məɲyif kə mə, wəmar kən məyənə dəyebəc yən yələc.

Moloku mɛlpəs

¹² Ali nte moloku mɛlar im kəloku nu mə, ifan fə kəloku nu mi d'areka ɲecicəs. Mba injbəkər amera kəkənəɲk un, ilok-lokər nu patefərənə nte tənşənə pəbotu posu pələre mə.

¹³ Awut a wəkire kam nwe Kanu kəyək-yək mə[§] ɲayif nu.

[‡] 1:5 Wəran nwe Kanu kəyək-yək mə = Kələnkanə ka alan a Yesu.
wəkire kam nwe Kanu kəyək-yək mə = Kələnkanə ka alan Yesu

§ 1:13 Awut a

3 Isan

An'ɔ Isan ɔyɔnε-ε, t'ake tɔ pɔmar pakaraɲεnε areka ɲɔn ɲa maas-ε?

Isan wɔsom wɔka Yesu ɛnacicɔs areka ɲa maas ɲaɲε. ɛnacicɔs ɲi meren wɔco camɔt-maas kɔ kɛcamɔt (85) kɛbɔp ka meren wɔco camɔt-manɲkɛle kɔ kɛcamɔt (95) nte kɛkom ka Yesu Krist kɛnacepɔr mɔ (85-95). Isan ɛnamentɔrne fɛ kɔyɔnε ka wɔcicɔs ka areka ɲaɲε, mba ɛncwene nkɔnsɔrka «Wɔbeki» (1.1). Towurɛnε tayi tɔyɔ d'areka ɲa mɛrɔɲ ɲa Isan (1.1). Ancɛm-cɛmne a kɛlonɲkanε ka alaɲ a Yesu ɲɔ Isan ɛnacicɔs Kawandi kɔn kɔ reka yɔn maas nte ɛnandε dare da Efesi mɔ. Wɛlan wɛlɔma nwe ancwe Kayu mɔ, nkɔn Isan ɛnacicɔs areka ɲaɲε. Pɛlokɛr-lokɛr Kayu d'areka pɛmɔ wanapa kɔn, Isan pɛcsom kɔ kɛfaynε alaɲ a Yesu acikɛra aɲε ɲaɲkɔt atɔf disrε mɔ.

Tokotɛrɛnε ta moloku ma areka

1. Isan ɛmentɔr areka ɲɔn (1.1).
2. Isan ɛyɛɲkɔs Kayu abɛkɛc kɛmentɔr dofum nnɔ awɛnc aɲa ɲayi mɔ (1.2-8).
3. Kɔ tɛyɛfɛ dɛnda, k'oloku teta afum mɛrɔɲ: Diyotɛrɛf kɔ Demeteri (1.9-12).
4. Dɛkɛlɔpsɔr k'ɛncan ɲaɲ areka ɲɔn (1.13-14).

Kɔyif

¹ Ina, wɔbeki, incic areka ɲɛ kɛkɔ nda mɛna Kayu, nwe imbɔtɔr yati mɔ.

² Mɛna nwe imbɔtɔr mɔ, intola mes mam fɔp mɔckɔt belbel, mɔtamne pɛmɔ nte amera ɲam ɲɔɲkɔt belbel mɔ.

³ Pɛnabɔt im belbel nte awɛnc asu alaɲ alɔma ɲanader ɲalok'im nte mɔyi dɛkance kɔ tɔkɔ mɛɲkɔtɛnε sɔ ki mɔ.

⁴ Tes o tes tenanɲkanε fɛ kɛbɔt im, mɛnε kɛnε a awut em ɲayi kɛkɔt kance disrε.

Kɔyɛɲkε ka kɛlan ka Kayu

⁵ Mɛna nwe imbɔtɔr mɔ, mɛmentɔr kɔyɛɲkε ka kɛlan kam dɛmes mam mɔyɔ fɔp mme mɔɲyɔnε awɛnc asu alaɲ haɲ acikɛra mɔ.

⁶ ɲanatɔɲnε kɛbɔtɔr ka Kanu kam nnɔ kɛlonɲkanε k'alaɲ kɔyi mɔ. Mɛmar ɲa ɲasɔtɔ ca nce pɛmar ɲa kɔyɔ mɛrɛnt manɲan disrε mɔ, pɛmɔ tɔkɔ Kanu kɛfan ti mɔ.

⁷ Bawo teta tewe ta Krist tɔ ɲawurɛnε, ali paka ɲawer fɛ atɔlan.

⁸ Pɛmar sɛna sɔ sɛban ɲafum akakɔ nte tɔɲsɔɲε pɛpɛɲnε yɛbɔc teta kance.

Diyotɛrɛf kɔ Demeteri

⁹ Incice kəlonkanə k'alan areka ɲələma, mba Diyotəref nwe dekirin dambət mə, owosə fə kəban su.

¹⁰ It'əsəɲe, k'indeder-ε, indesəksər nu mes məkə ɲyɔ mə fəp, təkə ɲyemsənə su mə. Tatəkə təfətəɲnə kə, pəcfati kəməɲk awənc alan acikəra, pəcyamsər sə akə ɲanfan kəməɲk ɲa mə, pəcbeləs ɲa kəlonkanə ka alan dacə.

¹¹ Məna nwe imbətər mə, ta mətubucnə pələc pa fum, mba pətət. Nwe o nwe ɲyɔ pətət mə, wəka Kanu məyənə. Nwe ɲyɔ pələc mə, encərə fə Kanu.

¹² Teta Demeteri, alan fəp ɲantəɲnə a fum wətət əfə. Təkətənə tən pətət tementər sə belbel a fum wəlompu əfə. Səna səndəɲər sə sede sosu tetən, kə mənərə a kəsumpər kosu sede kance kə yati.

Kəyifkəlpəs

¹³ Iyɔ mes mələrəm mecic'am mba ifan fə kəloku nu mi d'areka ɲecicəs.

¹⁴ Intola ta pəwən sə sənəɲkənə, mba ɲgbəkər amera kəkənəɲk un, ilok-lokər nu pətəfərənə.

¹⁵ Kanu kəsəɲ əm pəforu! Anapa asu ɲayif əm. Iyif anapa, nwe o nwe kə tewe tən.